

Isaías

Judá ehuani quitlahuelcajque TOTECO

¹ Ya ni nopa miyac tlanextili tlen na, niIsaías niicone Amoz, niquitac ipan nopa tonali quema Uzías, Jotam, Acaz huan Ezequías tlanahuatiyayaj ipan tlali Judá. Ipan ni tlanextili TOTECO nechnextili tlachque panos teipa ica tlali Judá huan altepetl Jerusalén.

² Nochi tlen itztoque ipan elhuicactli huan ipan tlaltepactli, xijtlacaquilica tlen quiijtohua TOTECO: “Eltoc queja na niquiniscalti coneme huan niquinmocuitlahui ica miyac teicnelijcayotl hasta motlacachijque, pero ama yajuanti mosentlanchijtoque ica na huan ayoc quitlacaquilíaj tlen niquilhuía. ³ Nopa burrojme huan nopa torojme tlen tlapoxahuaj quinixmatij inintecohua huan quintlascamatilíaj pampa quinmocuitlahuíaj. Pero innoisraelita tlacajhua, ax innechixmatij. Ax inquimachilíaj, niyon ax inmotlascamatij pampa nimechicnelía.”

⁴ ¡Ay nopa tlajtlacolchijca tlacame! Temachtli huala tlatzacuiltlistli ininpani. Quimamajtinemij miyac tlajtlacoli hasta nesij huijcoltique pampa nelía etic. Quichihuaj tlen ax cuali queja quichijque ininhuejcapan tatahua. Yajuanti mohuejcatlalijque tlen TOTECO, huan ayoc quichihuilijque cuenta ininDios Tlen Tlatzejzelotic Tlen Itztoc Inihuaya Israelitame. Ininseltitzi quitlahuelcajque itlapalehuil.

⁵ Tlacame, ¿ax inquiselijtoque tlatzacuiltyli tlen nelhuejhueyi? Huajca ¿para tlen innechchihualtíaj noja ma nimechtlatzaculti ajachica? ¿Inquisenhuiquilise ax innechtlacuquilise para nochipa? Tlen imotzonteco hasta ipan imoicxihua nochí se imotlacayo cocojtoc. Nochi imojuanti ayoc inquipiyaj chicahualistli ipan imoyolo huan hasta sequin imojuanti ya inquinequij inmiquise.⁶ Ipampa imotlajtlacolhua nochí imotlacayohua cocojtoque. Imotzonteco semajtoc huan palantoc. Axaca inmechpajtilijtoc, niyon quipictoc campa incocojtoque, niyon axaca quipolojtoc aceite para quiquixtis nopa tlacuajcualocayotl. ⁷ Imotlal quitlamixolejtoque huan imoaltepehua quintlamitlatijtoque. Huan quema noja intlachixtoyaj, nopa sequinoc tlali ehuani quixolehuayayaj imotlal. Quiixtequij huan quicuaj nochí tlen onca ipan imomilhua. Nochi mocajtoc senquistoc tlasosolijtoc huan tlatzitzicatoc. ⁸ Huan inJerusalén ehuani [1:8 Sion eltoc seyoc itoca Jerusalén. “Iichpocahua Sion” camati tlen nopa tlacame tlen ehuani nopa altepetl.], initztoque nopano imoseltitzitzi, niyon ax inhuelij inmomanahuíaj. Inmechtlahuelcajtoque queja quitlahuelcahuaj ipilxajcal se tlamocuitlahuijquetl ipan se xocomeca mili quema tlami pixquistli. Niyon quentzi huelis inmomanahuise. Initztoque queja se altepetl tlen quiyahualojtoque icualancaitacahua.

⁹ Intla TOTECO Tlen Quinyacana Ielhuicac Ejcahua Ma Tlatlanitij amo techmaquixtijtosquía se quesqui tlen tojuanti, techtzontlamiltijtosquíaj

nochi tojuanti queja quichijqui ica nopa tlacame huejcajquiya ipan altepetini Sodoma huan Gomorra.

TOTECO quinequi tlacame ma itztoca tlapajpac-tique iixpa

¹⁰ Xijtlacaquilica itlajtol TOTECO, intlayacanani tlen tlali Israel. Eltoc queja intlayacanaj ipan altepetini Sodoma huan Gomorra pampa san se fiero imotlacajhua. Xijtlacaquilica tlachque Toteco Dios inmechnahuatía xijchihuaca. ¹¹ Quej ni quijtohua TOTECO: “Ya nechyolajsic ica nochí nopa tlacajcahualistli tlen ajachica innechhualiquilíaj. Ax nijnequi tlacajcahualistli tlen oquich borregojme, niyon ax nijnequi ininchiyajca tlapiyalime tlen tojtomahuaque. Ax nijnequi niquitas inieso nopa torojme, pilborregojtzitzi huan oquich chivojme. ¹² ¿Para tlen inquihualicaj nochí ya ni noixtla quema inhualahuij innechhueyichihuase? ¿Ajqueya inmechtlatlánia xiquinnejnemiltiquij tlapiyalime para ma moquejquetzaquij notlamapa? ¹³ Ax ipati nopa ofrendas tlen innechhualiquilíaj pampa ax inmocuesohuaj ipampa imotlajtlacolhua. Ayoc más xinechhualiquilica. Ayoc nijnequi niquitas nopa copali tlen innechtencahuilíaj. Ayoc hueli niquijiyohuis nochí nopa ilhuitl tlen inquichihuaj quema pehua yancuic metztli o ipan nopa tonali quema inmosiyajcahuaj huan ipan nopa tonali quema inmosahuaj huan inmosentilíaj san sejco. Tlahuel innechixpanoj ica nopa miyac ilhuitl tlen inquichihuaj. ¹⁴ Ayoc nijnequi niquitas

nopa ilhuitl tlen inquichihuaj quema yancuic metztli huan ipan tonali tlen tlatzejzeloltic. Eltoc queja se tlamamali tlen tlahuel nechsiyahuiltijtoc huan ayoc hueli niquijiyohuis. ¹⁵ Huajca quema inquitlananase imoma para inmomajtose, na ax nimechtlachilis, niyon ax nimechtlacaquilis. Huan yonque inmomajtose miyac hueltas, na ax nimechtlacaquilis pampa imoma eltoc espoltic ica inieso tlacame tlen inquinmictijque yonque ax tleno quichijtoyaj.

¹⁶ “Huajca ximotlapajpacchihuaca. Ayoc xijchi-huaca niyon se tlamantli tlen ax cuali noixtla na. Nochi tlamantli tlen ax cuali inquichihuayayaj xijcahuaca. ¹⁷ Ximomachtica inquichihuase tlen cuali. Xitequitica para nochi ma quiselica tlen xitlahuac. Xiquinpalehuica nopa tlacame tlen sequinoc quintlajijiyo huiltíaj. Xiquinmacaca tlen xitlahuac coneme tlen icnotzitzi huan xiquin-manahuica cahual sihuame.”

¹⁸ TOTECO quijtohua: “Xihualaca nimantzi huan ma tijsencahuaca tocuentas. Yonque tlahuel miyac imotlajtlacolhua hasta nesij chichiltic, na nijchihuas ma eli chipahuac queja nextli. Yonque fiero motlajtlacolhua queja se yoyomitl espoltic, na nimechchihuas queja inijhuiyo borregojme tlen onpano chipahuac.

¹⁹ Intla inmotemacase para inquineltocase tlen nimechilhuía, inquicuase nopa cuali tlamantli tlen nijchihuas imomila ma temaca. ²⁰ Pero intla imojuanti ax inquinequise innechtlepanitase huan inquisenhuiquilise ax inquichihuase tlen nimechnahuatíá, inhuetzise ininmaco imocualancaitacahua huan inmechhuejhuelse

ica ininmachete.” Queja nopa niimoTECO niuijtohua.

TOTECO quipajpacas Jerusalén

²¹ Imojuanti inJerusalén ehuani, ineliyayaj nelía intemachme, pero ama inmocueptoque queja se momecatijca sihuatl tlen quicajtoc ihuehue. Inquicajtejtoque TOTECO para inquintoquilíaj sequinoc tiotzitzi tlen ax tlono ininpati. Achtohui Jerusalén eltoya se altepetl campa itztoyaj tlacame tlen quichihuayabaj nochi tlen xitlahuac, pero ama temitoc nopa altepetl ica temictiani. ²² Achtohui altepetl Jerusalén eliyaya queja nopa tebos plata tlen senquistoc cuali, pero ama imojuanti tlen nopano ehuani, initztoque queja itetejzo nopa tepestli. Achtohui ineliyayaj queja nopa xocomeca atl tlen senquistoc cuali, pero ama tiitztoc queja nopa se xocomeca atl tlen tlamaneloli ica atl. ²³ Nochi imotlayacancahua mosisiniijtoque huan mochijtoque ininhuampoyohua tlaxtequini. Quinpactía quiselise tomi tlen fiero tlacame para ma ax quichihuaca tlen xitlahuac. Ax quinpalehuíaj coneme tlen icnotzitzi, niyon quinpalehuíaj cahual sihuame. ²⁴ Yeca TOTECO Dios Tlen Quinyacana Ielhuicac Ejcahua Ma Tlatlanitij, huan yajaya tlen toDios tiisraelitame huan Tlen Más Quipyia Tetili quej ni quijtohua: “Nimomacuepas huan nimechtlatzacuiltis ica nohueyi cualancayo pampa imojuanti inmochijtoque innochualancaitacahua huan yeca nimechcuepilis tlen innechchihuilijtoque. ²⁵ Queja se quiqxitis itetejzo tepestli ipan tlitl, na nimomatlalanas

para nimechtlaijiyohuiltis. Huan nimechtlapa-jpacchihuas hasta nimechquixtilis nochí imoso-quijo huan nochí tlen ax cuali.

²⁶ “Huan teipa sampa ni quintlalis jueces tlen tetlajtolsencahuase xitlahuac huan ni quintlalis tetlalnamictiani tlen cuajcualme queja achto-huiya nijchihuayaya. Huan sampa quitocaxtise Jerusalén: ‘Altepetyl Tlen Xitlahuac’ huan ‘Altepetyl Tlen Temachtli.’ ²⁷ Pampa na niitztoc xitlahuac huan nijchihua tlen cuali huan ni quinmaquixtis nopa Jerusalén ehuani tlen moyolcuepase ica na. ²⁸ Pero nochí tlen ax quinequise moyolcuepase ica na huan san quinpactía tlajtlacolchihuase, ni quintzontlamiltis pampa nechtlahuelcajtoque.

²⁹ “Huan tlahuel inmopinahuase quema inmoil-huise tlen nopa tonali quema in quintlatiliyaj tlacajcahualistli imotiotzitzi huan intlajtlacolchi-huayayaj iniixtla ipan nopa ahua cuamili tlen in quiniyocatlalijtoyaj para yajuanti. ³⁰ Pampa teipa inelise queja se ahua cuahuitl tlen tepehui ixihuiyo huan queja se xochi mili tlen ax quiatequíaj. ³¹ Huan nopa tlacame tlen más tejtetique campa imojuanti tlamiixpolihuise queja nopa tlasoli tlen quitlatíaj. Inintlajtlacol quiyolitis nopa tlitl tlen quintlatis huan axaca huelis quisehuis.”

2

Teipa oncas se tlanahuatijcayotl tlen tlasehuilistli

¹ Ya ni seyoc tlanextili tlen na, ni Isaías niicone Amoz, ni quitar. Ipan ni tlanextili TOTECO nechnextili tlachque panos teipa ica tlali Judá huan

altepetl Jerusalén. ²Ipan itlamiya tonali, itlanahuatilis [2:2 Nica huan miyac huelta campa quiijtohua “tepetl o tepetini” camati tlen itlanahuatilis o itlanahuatijcayo se tlanahuatijquetl, yeca tijpatlatoque ica “itlanahuatilis.”] TOTECO huan itiopa motlalise ipan nopa tepetl tlen más huejcapa ipan Jerusalén huan quipiyas tequihuejcayotl ica nochí sequinoc tlanahuatili ipan nochí tlaltepactli. Huan tlacame tlen miyac tlaltini ipan tlaltepactli ajachica ajsise nopano para quihueyichi-huase TOTECO.

³ Tlacame hualase huan quiijtose: “Ma tiyaca titlejcose ipan itepe TOTECO. Tiyase ipan itiopa nopa Dios tlen elqui iTeco Jacob [2:3 O Israel.] tlen huejcajquia. Nopano TOTECO techmachtis tlen quinequi ma tijchihuaca huan tijneltocase huan tinejnemise ipan iojhui.”

Pampa ipan nopa tonali, quisas itlamachtil huan itlajtol TOTECO tlen altepetl Jerusalén [2:3 O Sion.] huan ajsis ipan nochí tlaltini ipan tlaltepactli. ⁴Huan TOTECO quitlajtolsenahuas tlatlajco nochí tlaltini huan quisencahuas nochí cualantli tlen quipiya se tlali ica sejcoyoc. Huan tlacame tlen nochí tlaltepactli quitejtzonase inimachetes para quichihuase azadones. Huan incuatlaminhua quitejtzonase para quichihuase huíngaros. Ayoc oncas tlatehuillistli huan soldados ayoc monequis momachtise para tlatehuise. ⁵Xihualaca nochí inisraelitame [2:5 O iniixhuihua Jacob.] huan ma tinejnemica ipan nopa tlahuili tlen TOTECO temaca.

TOTECO quintlatzacuiltis tlen mohueyimatij

6 TOTECO, titechtlahuelcajtoc timoisraelita tla-cajhua tlen tiiixhuihua Jacob. Totlal temitoc ica tlamantli tlen quichihuaj tlacame tlen ehuaj campa quisa tonati. Ama israelitame tetlajchi-huiaj huan tetonalitaj queja quichihuaj nopa filisteos. Huan quichihuaj tlajtolsencahuали ica tlacame tlen sequinoc tlaltini.

7 Nojquiya totlal tiisraelitame temitoc ica miyac tomi tlen plata huan oro huan tlamantli tlen pajpatiyo. Quinpiya tlahuel miyac cahuayos huan carros para quintequihuese ipan tlatehuijcayotl.

8 Huan ni tlali temitoc ica teteyome. Ni tlacame motlancuaquetzaj huan quinhueyichihuaj tlamantli tlen yajuanti quinmachijchijtoque.

9 Nochi tlacame moechcapanojtoque huan mopinahualtijque huan quinhueyichijtoque tiotzitzi, huajca amo xi quintlapojo polhui, TOTECO.

10 Huajca inisraelitame, xicholoca hasta campa onca tepexitl huan ximotlatica tlen TOTECO tlen tlahuel temajmatis quema hualas ica nochi itlatlanex huan ihueyitilis. **11** Pampa TOTECO quinechcapantlalis nochi tlacame tlen mohueyimatij huan nochi imojuanti inmechpinahualtis. Ipan nopa tonal, san TOTECO inquihueyitlalise. **12** Pampa ipan nopa tonal, TOTECO Dios Tlen Quinyacana Iehuicac Ejcahua Ma Tlatlanitij hualas para quintlatzacuiltis nochi tlen mohueyimatij huan tlen motlepanitaj huan tlen mohueyichihuaj. Huan TOTECO quinechcapantlalis hasta tlalchi.

13 Quintzonquis nochi nopa huejcapantique tiocuatini tlen tlali Líbano huan nopa ahua cuatini tlen tejtetique tlen

tlali Basán. ¹⁴ Quinechcapantlalis nochi tepetini huejcapantique huan nochi tlachiquili. ¹⁵ Quinechcapantlalis nochi caltini tlen huejcapantique para ipan tlamocuitlahuise huan quixolehuas nochi tepamitl tlen tlahuel tilahuac. ¹⁶ Quena, quinxolehuas nopa huejhueyi cuacanahua tlen altepetl Tarsis tlen quihualica tlamantli para tlanamacase. Huan quinxolehuas nopa miyac cuacanahua tlen tlahuel yejyectzitzitl tlen eltoque ateno. ¹⁷ Ininhueyitilis nochi tlacame, tlamis. Huan nochi tlen mohueyimatiyayaj huetzise hasta tlalchi. Huan san yajaya TOTECO quihueyitlalise israelitame ipan nopa tonal. ¹⁸ Huan nochi tiotzitzitl huan tlaixcopincayome quintlamiixpolihuiltis.

¹⁹ TOTECO motlalanas tlen isiya para quiojolinis ni tlaltepactli huan quintlatzacuiltis nochi tlen itztoque ipani. Huan nochi icualancaitacahua cholose ica majmajtli para motlatitij tetzala huan ipan tlacacahuaya, pampa tlahuel quiimacasise TOTECO ica ihueyitilis huan itlatlanex. ²⁰ Huan ipan nopa tonal, nochi tlacame quintepehuase inintiotzitzitl tlen oro huan plata tlen yajuanti quinmachiijchijque para quinhueyichihuase. Quinmajcahuase campa itztoque quimichime huan tzotzome. ²¹ Huan quema hualas para quiojolinis ni tlaltepactli, tlacame motlalose hasta campa onca tepexitl para motlatise ipan tlacajcahuaya huan tetzala iixpa TOTECO pampa tlahuel quinmajmatlis quema yajaya hualas ica nochi itlatlanex huan ihueyitilis. ²² Huajca ayoc ximotemachica ipan se tlacatl pampa yajaya ax tleno ipati. Iyolis tlalochpolihuise queja se ijiyotl.

3

*TOTECO quintlatzacuiltis Jerusalén huan Judá
ehuani*

¹ Xijcaquica, TOTECO Dios Tlen Quinyacana Ielhuicac Ejcahua Ma Tlatlanitij quiijcuenis tlen altepetl Jerusalén huan tlali Judá, nochi tlapalehuili huan nochi tlamatli tlen ica mopanoltíaj; quinquitilis inintlacualis huan nochi atl.

² Quintzontlamiltis nochi soldados hasta tlen más motemaca ipan tlatehuijgayotl. Quinquixtilis nochi jueces, tiocamanalohuani, tetonaltani huan huehue tlacame. ³ Quintzontlamiltis nopa tlayacanani tlen soldados, tlapijpiyani, tetlalnamictiani huan tlen quimati quisencahuaj tlen hueli tequitl huan quinmictis nochi tetlajchihuani. ⁴ Huan quintlalis telpocame para ma tlayacanaca ipan tlali Israel huan coneme para ma tlanahuatica. ⁵ Huan elis más fiero que achtohuiya quema axaca tlanahuatiyaya. Pampa tlacame motehuise inihuaya sequinoc tlacame tlen itztoque inincalnechca. Telpocame motlalanase huan quintehuise huehuentzitzti. Huan nochi tlacame tlen ipa aya aca quinequiyaya inihuaya mohuicas, san quinhuetzquilise nopa tlacame tlen quinamiquiyayaj quintlepanitase.

⁶ Huan ipan nopa tonali tlacame ipan san se familia quitlapejpenise se tlen inihuical huan quiilhuise: “Ta tijpiya se tlamatli para timoquentis, huajca xieli titotlanahuatijca huan xijsencahua nochi ni tlamatli tlen tlami sosolijtoque.”

⁷ Pero nopa tlacatl quinanquilis huan quiilhuis: “¡Axtle! Ax hueli nimechpalehuis pampa ipan

nochaj ax nijpiya más tlacualistli, niyon ax nijpiya más yoyomitl, huajca amo xinechtlalica queja ni-imotlanahuatijca.”

⁸ Quena, altepetl Jerusalén huan tlali Judá mocahuas tlamitlasosolijtoc pampa nochí nopa israelitame ica inincamac san quijjtohuaj tlamantli tlen ax cuali tlen TOTECO. Huan san quichihuaj tlamantli tlen TOTECO ax quinequi quiitas. San quinequij quicualancamacase TOTECO tlen más quipiya itequihuejcayo. ⁹ Hasta ininxayac quintelhuía huan quipannextía para quihuicaj tlajtlacoli. Tlajtlacolchihuaj tlamiyacapa huan motlepanitaj ica tlen quichihuaj queja altepetl Sodoma ehuani quichihuayabaj. ¡Ax mopinahuaj niyon se pilquentzi! Nelía teicneltique pampa hualas se hueyi tlatzacuiltyli ininpani tlen ya-juanti ininseltitzi motemohuilijtoque.

¹⁰ Pero nochí elis cuali para se tlacatl tlen xitlahuac. Xiquilhuica: “Ipampa nochí motequi tlen cuali, tjselis se yejyectzi tlaxtlahuili.” ¹¹ Pero nopa tlacatl tlen fiero iyolis xiquilhuica: “Titecnelti pampa ax tleno quisa cuali para ta. TOTECO mitztlatzacuiltylic chicahuac. Motlaxtlahuil elis queja tlen quinamiqui tjselis ica nochí tlen fiero tlen tijchijtoc.”

¹² Teicneltique notlacajhua pampa tlen quintlaijyohuiltyaj itztoque coneme tlen huihuitique. Huan sihuame mochijtoque inintlanahuatijcahua. Nelía teicneltique notlacajhua pampa inintlayacancahua quincajcyahuaj, quinyacanaj ipan se ojtli tlen nesi yejyectzi, pero ax cuali.

¹³ TOTECO ya ijcatoc para quinteihuis itlaca-jhua. Ya mocualtlalijtoc para quintlajtolsencahuas. ¹⁴ TOTECO achtohui quintlatzacuiltis nopa huehue tlacame huan tlayacanani. Quinteihuis tlamiyacapa huan quinilhuis: “Imojuanti inquintlamiltijitoque noisraelita tlacajhua tlen eliyayaj queja noxocomecamil. Huan eltoc queja inquitlamicuajtoque tlen eliyaya noaxca. Inmoaxcatijtoque nopa trigo tlen eliyaya iniaxca teicneltzitzti. Temitoc imochajchaj ica miyac tlamantli tlen inquintlaxtequilijtoque.

¹⁵ “¿Ajqueya inmechmacac caquihuili para inquintlaijiyohuilitáj notlacajhua queja inquinchi-huaj?” Queja nopa niquijtohua niDIOS Tlen Niquinyacana Noelhuicac Ejcahua Ma Tlatlanitj.

Inintlatzacuilty sihuame ipan altepetl Jerusalén

¹⁶ Nojquiya TOTECO quijjtohua: “Niquintlatzacuilty nopa sihuame tlen altepetl Jerusalén pampa tlahuel mohueyimatij huan nejnemij ajcotlachixtiyohuoj ipan nochilados. Iniixtiyohua quichijtoque nelyejyectzitzti para quinyoltilanase tlacame. Huan quema nejnemij quichihuaj queja mijtotijtiyohuoj pampa quinequij para ma caquisti tlen ica moyectlalijtoque iniicxiquechtla. ¹⁷ Huajcana niquinmacas nopa sihuame tlen Jerusalén se sahua cocolistli ipan inintzon-teco. Huan quinchihuas ma mocahuaca tzonpepestique para ma mopinahuaca iniixtla nochitlacame.”

¹⁸ Ipan nopa tonali TOTECO quinquixtilis nochiniyejyejca; nochitlen eltoc ipan iniicxiquechtla tlen tzilintinemij quema nejnemij. Quinquixtilis

nochi tlen ica quitacanaltíaj inintzoncal huan nopa quechcostli tlen tlajco metztli. ¹⁹ Quinquixtilis nochí quechcostli, maquechcostli huan nopa yoyomítl para ica quitzacuaj ininxayac. ²⁰ Huajca tlámis nochí tzontzajcayotl, tzinquechilpicayotl, tlaajhuiyacayotl, pijpiloli huan piltepos mecatzitzi tlen motlaliliáj ipan iniiqxiquechtlá. ²¹ Nojquiya nopa anillos para ininmacpil huan iniyacatzol. ²² Nojquiya tlámis nochí yejyectzitzi yoyomítl tlen moquentíaj quema ilhuichihuaj huan nopa yoyomítl tlen moquentíaj quema itztoque ipan inincalijtic. Nojquiya tlámis ininyoyo tlen san ica mopiquij huan nopa piltzonecahuiltzitzi huan nopa pilcuetlax bolsajtzitzi tlen ipan quihuicaj inintomi o tlamantzitzi tlen ica moyejyectlaliáj. ²³ Nojquiya tlámis nopa tescatl tlen ipan motlachiliáj, huan inintlatzintlanyoyo tlen tlachijchihuali ica lino tlen nelía canactzi, huan nopa yejyectzi yoyomítl tlen ica motzontzacuaj huan nopa tlaquemítl para ica mopiquise. ²⁴ Ama ayoc mijyotise queja se tlaajhuiyacayotl tlen neltzopelic. Ama quipiyase tlapotexcayotl. Huan para inintzinquechilpica quitequihuise se tlen hueli mecatl. Inintzonco tlen quiyectlaliyaya ica inintzoncal ama pepestic. Moquentise yoyomítl tlen fiero huan ayoc tlen yejyectzitzi. Nochi iniyejyejca tlámis huan itztose ipan se hueyi pinahualistli. ²⁵ Nopa tlacame tlen nopano ehuani huan más motemacayayaj miquise ica machete ipan tlatehuijcamayotl. ²⁶ Huan nochí tlen ehuaj nopa altepetl quinchoquilise huan nopa altepetl

mocahuas iselti. Elis queja se sihuatl tlen xolotl mosehuijtoc tlalchi huan choca iselti.

4

¹ Ipan nopa tonali san mocahuase se quesqui tlacame tlen noja yoltoque, huan yeca chicome sihuame motehuise ipampa se tlacatl huan qui-ilhuise: “Tijnequij timonamictise mohuaya. To-juanti tijtemose totlacualis huan timocohuise toy-oyo. San xitechcahuili timonamictise mohuaya para ax techpinajtise sequinoc pampa ax tijpiyaj tohuehue.”

Nopa tlen cuali tlen panos teipa

² Ipan nopa tonal, nopa ichamanca tlen TOTECO quichihuas ma onca elis hueyi huan tlahuel yejyectzi. Huan nopa israelitame tlen noja mocahuase tlahuel paquise ica nochi nopa pixquistli huan cuatlactli tlen temacas nopa tlali.

³ Huan nochi nopa tlacame tlen ijcuilijtoc inintoca pampa mocajque yoltoque ipan altepetl Jerusalén, quintocaxtise “tlatzejtzelotlique para TOTECO”.

⁴ Huan TOTECO quintlajtolsencahuas huan quintlatzacultis nopa tlacame tlen Jerusalén. Huan quinpajpacas tlen nochi nopa estli tlen quitojajtoque huan nochi tlamantli tlen ax cuali quichijtoque. ⁵ Huan TOTECO iselti quiecahuilis altepetl Jerusalén ipan sesen cali huan ipan nochi lugares campa mosentilíaj tlacame. Tonaya quitlalis se mixtli yayahuic queja poctli para quinecahuilis huan ica tlayohua quitlalis se mixtli queja se tlilt tlen tlahuis ipan nochi nopa altepetl. Huan huejcpa iixtla nochi itlatlanex elis queja se lona tlen quiecahuilis. ⁶ Huan ni

mixtli quinecahuilis nopa tlacame tlen nopa tlatotonilotl huan quinpalehuis quema huetzis atl huan quema tlaajacas chicahuac.

5

Ixocomecamil TOTECO

¹ Na nihuicas para nohuampo tlen más niquicnelía se huicatl tlen ixocomecamil.

Nohuampo quiyiya se xocomeca mili ipan se tlaixtlejcolis,
campa cuali tlaeli.

² Achtohui tlapoxajqui huan quinijcueni nochitetini.

Quintlapejpeni sequin xocomeca cuatini tlen más cuajcualtzitz huan yejyectzitz,
huan ya nopa quintojqui.

Nojquiya quichijqui se tepamitl yahualtic.

Teipa quichijchijqui se cali huejcapantic para nopa tlamocuitlahuijquetl.

Huan quicoyoni se lugar campa quipatzcas itlajca nopa xocomeca mili.

Huan ica noch iyolo quichixqui ma temaca itlajca tlen cuajcuali para quitequis.

Pero nopa xocomeca cuatini temacaque inintlajca tlen tlahuel xococ,

huan ax tzopelic queja ya quinequiyaya.

³ Huajca ama intlacame tlen altepetl Jerusalén huan tlali Judá, xihualaca huan xitlatlajtolsencahuaca ica na huan noxocomecamil para tiquitase ajqueya quiyiya tlajtlacoli. ⁴ ¿Huelis monequiyaya ma nijchihuilitosquía noxocomecamil

seyoc tlamantli huan ax nijchijqui? Na nijchiyayaya ma temacas itlajca tlen tzojtzopelic. ¿Para tlen huajca nechmacac itlajca tlen xococ?

⁵ Ama nimechilhuis tlachque nijchihuolis noxocomecamil: Nijxolehuas nochí nopa tepamitl tlen quiyahualohua. Nijcahuas para nopa huacaxme huan borregojme ma quitlamicuaca huan ma ipan moquejquetzaca. ⁶ Nijchihuas noxocomecamil ma eli queja huactoc tlali. Ax nijtzontequilis imacuayohua tlen ax tlaqui, niyon ax nijtlamehuis. San nijcahuolis ma moscalti huitztl huan sahua mecatl para ma quitzontlamilti. Nijnahuatlis ne mixtli para ma ax quihualicas atl nopano.

⁷ Nopa xocomeca mili quinnextía israelitame, huan yajuanti iaxcahuia TOTECO Tlen Quinyacana Ielhuicac Ejcahua Ma Tlatlanitij.

Tlali Judá huan altepetl Jerusalén eltoc nopa yejyectzitzi tlaltini tlen iaxca TOTECO.

Huan nopa tlacame eltoc nopa xocomeca tzontli tlen nelía cuajcualtzi.

Quichiyayaya nopa tlacame tlen nopa tlaltini ma quichihuaca tlen xitlahuac huan cuali, pero quicajqui tzajtziyayaj chicahuac nopa tlacame tlen quintlaijiyohuiltyayaj.

Huan quinitac para senquistoc temictiyayaj.

Temachtli TOTECO quintlamiltis israelitame tlen ax cuajcualme

⁸ Nelía teicneltique nopa tlacame tlen quicohuaj miyac caltini huan miyac tlaltini hasta quinequij moaxcatise nochí, para sequinoc ma ayoc quipantica campa itztose. Temachtli hualas tlatzacuiltonistli ininpani. Quinequij itztose ininseltitzi

tlatlajco ni tlali. ⁹ Pero TOTECO Tlen Quinyacana Ielhuicac Ejcahua Ma Tlatlanitij quijtojtoc para panos se tlamantli tlen tlahuel temajmati ica yajuanti. Nijcajqui quema yajaya quijito: “Miyac caltini tlen huejhueyi huan más yejyectzitzi mocahuase sosoltique pampa miquise tlen eliyaya iniaxcahua nopa caltini. ¹⁰ Yonque quichihuase se xocomeca mili ipan eyi hectáreas tlali, ax quiqxistse se lata tlen iayo. Huan intla quitocase 10 coxtali tlen trigo, ax quipixcase niyon se coxtali.”

¹¹ Teicneltique nopa tlacame tlen mehuaj cualca para yase quitemotij tlaili huan quisenhuiquíaj moihuintíaj hasta tlayohua. Temachtli hualas tlatzacuiltlistli ininpani. ¹² Ipan nopa huejhueyi ilhuitl tlen yajuanti quichihuaj, onca miyac xocomeca atl tlen nelcococ. Onca tlatzotzonali tlen yejyectzi quema quitzotzonaj nopa arpas, salterios, panderos huan flautas. Pero yajuanti ax moilhuíaj tlen TOTECO huan tlen nochí tlamantli tlen yajaya quichijtoc. Huan niyon quentzi ax quiitaj tlen yajaya ama quichihua. ¹³ Yeca temachtli hualase tlacame huan quinhuicase notlacajhua ipan sequinoc tlaltini pampa yajuanti ayoc nechixmatij. Miquise ica mayantli nochí nopa huejhueyi tlacame campa notlacajhua tlen yajuanti tlahuel quinhueyitlepanitayabaj huan nochí nopa sequinoc tlacame huan sihuame tlen ax más huejhueyi miquise ica amiquistli.

¹⁴ Yeca mictla quihueyilía icamac queja se hueyi tecuajquetl para quintolos nochí nopa tlacame tlen Jerusalén tlen más tlapijpixtoque. Huan inihuaya quintolos nochí itlayacancahua. Nopano nojquiya yase nochí nopa tlacame tlen quinpactía

ilhuichihuaj huan moihuintíaj. ¹⁵ Ipan nopa tonal nochí tlacame tlen motlepanitayayaj huetzise hasta tlalchi. Huan teipa tlen mohueyimatiij, TOTECO quinechcapantlalis. Huan teipa tlen tlahuél mohueyimatiyyayaj ayoc ajcotlachixtine-mise. ¹⁶ San quihueyitlalise TOTECO Tlen Quinyacana Ielhuicac Ejcahua Ma Tlatlanitij pampa quiitase yajaya tetlajtolsencahuas xitlahuac. Nochi tlamantli tlen quichihuas TOTECO quinextis para yajaya Tlatzejtzelotic huan quichihua tlen senquistoc cuali. ¹⁷ Huan ipan nopa tonali borregojme huan chivojme tlacuajtinemise ipan nopa altepetini tlen mocahuaj xolejtoque huan campa eltoyaj ininchajchaj tominpiyani.

¹⁸ Teicneltique nopa tlacame tlen ax quinequij quincahuase inintlajtlacolhua pampa temachtli hualas tlatzacuiltlistli ininpani. Quitilantiyohují inintlajtlacolhua queja quihuicasquíaj se carro iniica ica mecatl. ¹⁹ Yajuanti quiijtohuaj: “Ma moisihuili Dios, ma quichihua nimantzi tlen quiijtojtoc quichihuas para tiquitase. Ma monechcahuí huan techtlatzacultis nimantzi toDios Tlen Tlatzejtzelotic Tlen Itztoc Inihuaya Israelitame. Queja nopa nelía tiquixmatise.”

²⁰ Teicneltique nopa tlacame tlen quiilhuíaj cuali tlen ax cuali, huan tlen ax cuali quiilhuíaj cuali. Tzintlayohuilotl quiilhuíaj tlahuili, huan tlahuili quiilhuíaj tzintlayohuilotl. Tlen tzopelic quiilhuíaj chichic, huan tlen chichic quiilhuíaj tzopelic. Temachtli hualas tlatzacuiltlistli ininpani.

²¹ Teicneltique nopa tlacame tlen moilhuíaj nelt-lalnamiquij huan moilhuíaj quimachilíaj nochí

tlamantli. Temachtli hualas tlatzacuiltylistli ininpani. ²² Teicneltique nopa tlacame tlen tlahuel yajatij tlaise miyac huan quijtohuaj axaca hueli quintlanis. Quijtohuaj quipiyaj miyac chicahualistli para quimanelose huan quiise tlen hueli tlaili. Temachtli hualas tlatzacuiltylistli ininpani. ²³ Ipampa se tlaxtlahuili yajuanti quito-caxtiaj xitlahuac nopa tlen fiero quichihua se tlacatl tlen ax cuali para ma ax quiselis tlatzacuiltyli. Huan yajuanti quicahuaj malacantoc tlen tlaxpanotoc huan quitlatzacuiltyaj tlen ax tleno quichijtoc. ²⁴ Pero yajuanti tlamiixpolihuise queja tlasoli huan sacatl tlen tlamitlatla ica tlilt. Itztose queja se tzontli tlen palanis inelhuayohua, huan ixochiyohua huaquise queja tlaltejpoctli. Queja nopa panos pampa yajuanti quitlahuelcajtoque itlanahuatilhua TOTECO, Yajaya Tlen Quinyacana Iehuicac Ejcahua Ma Tlatlanitij. Ax quichihuilejque cuenta tlajtol nopa Dios Tlen Tlatzejzelotic Tlen Toteco tiIsraelitame. ²⁵ Yeca TOTECO tlahuel cualani ica itlacajhua huan ya quitlanantoc ima para quintlatzacuiltyis. Nochi tlachiquili huihuipicase huan inintlacayohua nopa mijcatzitzi mocahuase tepejtoque ipan calles queja tlasoli. Pero ica nochi ya nopa, noja ax tlamis icualancayo huan yeca quejipa quixitlajtos ima para más quintlatzacuiltyis.

²⁶ Huan TOTECO quitlalanas se bandera para ma quiitaca nopa tlacame tlen nopa tlaltini tlen mopantiaj huejca para quinmatiltis ma hualaca. Huan ica se tlapitzali quinnotzas tlen itztoque campa hueli hasta campa ontlami tlaltepactli. Huan yajuanti moisihuiltise para hualase ipan

altepetl Jerusalén. ²⁷ Axaca tlen yajuanti tlaxicos, niyon motepotlamis, niyon cochmiquis, niyon cochhuetzise. Quihuicase intintzinquechilpica cuali ilpitoc huan motlalilise tecactli tlen ax nimantzi cotoní. ²⁸ Quihuicase cuatlamintli tlen tlahuél tlatequi iyecapa huan inincuahuitol tlen cuali quitetzilojtoque. Huan nopa cahuayos iniisti eltose tetique hasta quiyolitise tlimoyotl quema motlalojtihualase. Huan quema motlalojtihualase inincarros, ininruedas caquistis queja se ajcomalacatl. ²⁹ Nopa tlacame tlahuélchihuase queja nanalca se tecuani. Huan queja se tecuani huitonis ipan tlen quiitzquía huan quihuicas huejca para quicuas, yajuanti quinitzquise notlacajhua huan quinhuicase ipan seyoc tlali campa axaca huelis quinmanahuis. ³⁰ Huan ipan nopa tonali nopa tlacame tlen hualase tlahuélchijti-hualase campa notlacajhua queja mocojcoxonijtihuala nopa hueyi atl quema mosisiniá. Huan ni tlali temis ica se mixtli tlen tlahuél yayahuic huan nopa israelitame quipiyase miyac cuesoli. Huan nopa mixtli quitlamitzacuas nopa tlahuili tlen elhuicac.

6

TOTECO quinotza Isaías ma eli se tiocamanalojquetl

¹ Ipan nopa xihuitl quema mijqui Tlanahuati-jquetl Uzías, na niquitac TOTECO mosehuijtoya ipan isiya yejyectzi nelhuejcapa nepa ipan elhuicac huan quipixqui tlahuél huehueyac iyoyo queja moquentía se tlanahuati-jquetl huan iteno quitemiti nopa tiopamitl. ² Huan itzonpac itztoyaj

ielhuicac Ejcahua TOTECO tlen inintoca serafines huan sese yajuanti quipiyayaya chicuase ieltlapalhua. Ica ome inieltlapal quitzacuayayaj ininxayac, ica nopa seyoc ome quitzacuayayaj iniicxihua huan ica seyoc ome patlaniyayaj. ³ Huan nochí yajuanti san sejco huicayayaj ni huicatl: “Tlatzejzeloltic, Tlatzejzeloltic, Tlatzejzeloltic, TOTECO Tlen Quinyacana Ielhuicac Ejcahua Ma Tlatlanitij.

Nochi tlaptepactli temitoc ica ihueyitilis.”

⁴ Inintos tlen huicayayaj elqui nelchicahuac hasta quichijqui ma mojmolini nopa tiopamitl hasta itzinpehualtil. Huan nopa tiopamitl temic ica poctli.

⁵ Huajca na niquipijo: “Nelía niteicneltzi pampa na se nitlajtlacolchijca tlacatl. Ax tlajtoli tlen niquipijtohua huan niitztoc tlataljco tlacame tlen nojquiya fiero camatij. Temachtli hualas tlatzacuilitlistli ipan na pampa ama niquistzoc nopa Tlanahuatijquetl, yajaya TOTECO Tlen Quinyacana Ielhuicac Ejcahua Ma Tlatlanitij.”

⁶ Huajca se tlen nopa serafines patlanqui huan yajqui campa nopa tlaixpamitl. Huan ica se tepostli quiqxixti se tlicoli xahuantoc huan teipa hualajqui campa na. ⁷ Huan ica nopa tlicoli xahuantoc quitoxonqui notenxipal huan nechilhui: “Xiquita, ni tlicoli quitoxontoc motenxipal huan ayoc tihuica tlajtlacoli. Huan TOTECO mitzlapojpolhuijtoc nochí motlajtlacolhua.”

⁸ Teipa nijcajqui itos TOTECO tlen quijtohuayaya: “¿Ajqueya nijtitlanis queja se

tlayolmelajquetl campa notlacajhua? ¿Ajqueya yas para tojuanti?”

Huan na niquijto: “Na niyas. Na xinechtitlani.”

⁹ Huajca yajaya nechilhui: “¡Cualtitoc! Xiya ta huan quej ni xiquinilhuiti notlacajhua: ‘Inquicaquise notlajtol, pero ax inquinequise inquimachilise. Inquiitase quema njchihuas tlanextili, pero ax inquinequise inquimachilise tlachque quijtosnequi.’ ¹⁰ Huajca xiquinchihua ni tlacame yoltetique. Xijtzacua ininnacas huan iniixtiyol para ma ax tlachiyaca, niyon ma ax tlacaquica, niyon ma ax quimachilica, niyon ma ax mocuepac aca na para ma niquinchicahua.”

¹¹ Huajca na niquijto: “TOTECO Dios, ¿hasta quesqui tonali queja nopa njchihuas?”

Huan yajaya nechilhui: “Tijchihuas hasta quitlamixolehuase inialtepehua huan ayoc mocahuas niyon se tlacatl nopano. Tijchihuas hasta tlatzitzicas ipan nochí caltini huan nochí nopa tlali mocahuas tlaxolehuali. ¹² Tijchihuas hasta nimoTECO niquintlamititanis nochí notlacajhua ipan sequinoc tlaltini huan tlali Israel mocahuas senquistoc queja huactoc tlali. ¹³ Huan intla ipan 100 tlacame, noja mocahuase yoltoque se 10 ipan nopa tlali; nopa tlacame sampa hualase quintzontlamiltiquij. Israelitame elis queja icuatzyonyo se ahua cuahuitl tlen quitzontectoque, pero elis se cuatzomil ica ixinajcho tlen tlatzejzelotic huan sampa chamanis.”

7

Itlajtol TOTECO para Acaz

¹ Quema quihuicayaya tequitl ipan tlali Judá nopa Tlanahuatijquetl Acaz tlen elqui icone Jotam huan iixhui Uzías, hualajque tlanahuatiani para quitehuise. Hualajque Tlanahuatijquetl Rezín tlen tlali Siria huan Tlanahuatijquetl Peka, icone Remalías, tlen tlali Israel huan pejque quitehuise altepetl Jerusalén, pero ax huelque quitlanise. ² Huan nopa tlajtoli ajisco hasta campa ichaj nopa tlanahuatijquetl tlen iixhui David huan quinilhuicoj: “Nopa Siria ehuani mosejcotilijtoque ininhuaya nopa tlali Israel [7:2 Nojquiya quitocaxtiyayaj tlali Israel ica norte ica ‘Efraín’] ehuani para techtehuise.” Queja nopa quinilhuicoj. Huan quema nopa tlanahuatijquetl huan nopa tlacame quicajque ya nopa, pejque huihuipicaj ica majmajtli queja mojmoliníaj nopa cuatiní quema tlaajaca. ³ Huajca TOTECO nechilhui na niIsaías: “Xiya ihuaya mocone Sear Jasub para xijnamiquiti Tlanahuatijquetl Acaz. Yajaya tipantiti campa ontلامi nopa aojtli tlen quisa tlen huejcapa campa meya nopa atl. Itztos nechca nopa ojtli tlen yohui hasta imila nopa Tlachicuenijquetl. ⁴ Huan quej ni xiquilhui Tlanahuatijquetl Acaz: ‘Amo ximocueso, niyon amo xiquimacasi icualancayo Rezín huan nopa Siria ehuani, niyon amo xiquimacasi Peka, icone Remalías pampa ax tlatlanise. Yajuanti itztoque queja tlicuatini tlen san popocatoque. ⁵ Quena, ni tlanahuatiani tlen tlali Siria huan Israel quisencajtoque san sejco para mitztehuise. ⁶ Quijtohuaj para moaxcatise tlali Judá huan inmechtemajmatise nochí tlen initztoque nopano. Teipa moilhuíaj tlatehuitiyase hasta ajsitij ipan altepetl Jerusalén huan nopano

quitlalise icone Tabeel queja inintlanahuatijca.

⁷ “Pero na niimoTECO niquijtohua para ax quema panos. Ax hueli quichihuase tlen ya-juanti moilhuijtoque quichihuase, niyon ax tlatlanise. ⁸ Pampa Tlanahuatijquetl Rezín san tlanahuatía ipan altepetl Damasco huan nopa tlali Siria. Ax quema quinnahuatis sequinoc tlaltini. Huan nopa tlali Israel [7:8 Quemantzi quito-caxtía tlali Israel, Efraín,] san huejcahuas 65 xi-huitl. Teipa quitlamixolehuase huan ayoc elis se tlali ica se itlanahuatijca. ⁹ Altepetyl Samaria san quinahuatía tlali Israel, huan Peka, icone Remalías, san quinahuatía altepetl Samaria. Xinech-neltoquili tlen nimechilhuía para ax tlatlanise intla inquinequij ma nimechmanahui, monequi inquineltocase tlen niquijtohua.”

Nopa tlanescayotl para tlacatis Emanuel

¹⁰ Nojquiya TOTECO quititlanqui ni seyoc tlajtoli para Isaías ma quiilhuis Tlanahuatijquetl Acaz huan Isaías quiilhui: ¹¹ “Acaz, TOTECO moDios quijtohua para xitlajtlani ma mitzchihuili se tlanescayotl para tijmatis temachtli panos queja mitzilhuijtoc. Xijtlajtlani tlen hueli tlanescayotl tlen tijnequi ma panos tlatzintla ipan ni tlaltepactli o hasta huejcapa ipan elhuicactli.”

¹² Pero Acaz quinanquili: “¡Axtle! Ax tleno nitlatlanis huan ax nijyejyecos TOTECO.”

¹³ Huajca Isaías quijito: “Xijtlacaquili ta tlen tiixhui David. Tlahuel tinechylolaxitía. Pero ax san na tlen tinechylolaxitía, pero nojquiya tijyolaxitía TOTECO Dios. ¹⁴ Yeca ama TOTECO iselti inmechmacas se tlanescayotl. Quena, se ichpocatl

tlen ax quiixmajtoc se tlacatl, cone cuiis huan quitlacatiltis se oquichpil huan quitocaxtis Emanuel. (Emanuel quinequi quijtos ‘TOTECO itztoc tohuaya’.) ¹⁵ Yajaya quicuas lechi ololtic huan sayol nectli huan moscaltis ipan tonali tlen tlaohuijcayotl hasta quimatis quihuejcamajcahuas tlen ax cuali huan quichihuas tlen cuali. ¹⁶ Huan quema nopa conetl noja aya quimati quejatza quihuejcamajcahuas tlen ax cuali huan quitlapejpenis tlen cuali, nopa ome tlanahuatiani tlen tlahuel tiquinimacasi, ya mictose.

¹⁷ “TOTECO quihualicas tonali tlen tlaohuijcayotl ipan ta, ipan motlaca jhua huan ipan mofamilia. Ax oncatoc tonali queja nopa ohui hasta quema tlali Israel moi yocatlali tlen tlali Judá. Hualas imopani nopa tlanahuatijquetl tlen tlali Asiria ica noch i soldados.” ¹⁸ Ipan nopa tonali, TOTECO quichihuas para ma hualaca queja sayolime nopa soldados tlen campa ontلامي nopa atemitl ipan tlali Egipto. Huan quinnotzas ma hualaca nopa soldados tlen tlali Asiria tlen mosisínáj queja cuajnecme. ¹⁹ Huan nopa soldados ajachica hualase hasta quitemitise noch i tlamayamitl ipan huactoc tlali, huan ipan noch i tlacajcahuaya ipan tetl, huan ipan cuatitlamitl campa onca huitzli huan ipan nopa tlali tlen tlahuel tlaeli. ²⁰ Ipan nopa tonali TOTECO quintequihuis nopa Asiria ehuani tlen inquintlaxtlahuijtoque para inmechmanahuise para inmechtlatzacultise. Yajuanti elise queja se cuchillo tlen inmechhuatanise ipan imotzon teco, ipan imoicxihua huan ipan imotentzo pampa inmechquixtilise noch i tlen inquipiyaj. Inmechquixtilise

imotlal, imotlacajhua huan tlen inquitoctoque.

²¹ Ipan nopa tonali, intla se tlacatl san mocahuas ica se huacax huan ome chivojme para quintomahuas, ²² temacase tlahuel miyac lechi. Yeca nochí nopa tlacame tlen noja mocahuase ipan nopa tlali mopanoltise ica lechi tlen ololtic huan sayol nectli queja quichihuaj teicneltzitz. ²³ Huan nojquiya ipan nopa tonali, san moscaltis huitztl huan sahua mecatl campa achtohuiya oncayaya tlahuel miyac xocomeca tzontli tlen yejyectzitz huan ipati eliyaya tlahuel miyac tomi.

²⁴ Nochi tlali Judá san quipiyas huitztl huan sahua mecatl. Elis se tlali campa tlapehuani calaquise para tlapehuase ica cuahuitoli huan cutlamintli. ²⁵ Huan ayoc aca huelis yas ipan nopa tepetini campa achtohuiya tlapoxahuayayaj ica azadón pampa quiimacasise nopa huitztl huan sahua mecatl tlen oncas nopano. San huacaxme, borregojme huan chivojme tlacuase nopano.

8

Icone Isaías itztos nopa tlanescayotl

¹ TOTECO sampa nechcamahui huan nechilhui: “Xijcui se hueyi huapali huan ipan xitlajcuilo para titeyolmelahuas itlacatilis nopa conetl tlen nimitzmacas. Xitlajcuilo ica huejhueyi tlajcuiloli. Itoca elis Maher Salal Hasbaz. (Maher Salal Hasbaz quinequi quijitos ‘nimantzi xiquestlamiltax-tequilica huan xiquestzontlamiltica’.) Queja nopa elis itoca nopa conetl pampa queja nopa nopa tlanahuatiquetl tlen hualas quinnahuatis isoldados ma quichihuaca.”

² Nijnotzqui Urías, nopa totajtzi, huan Zacarías, iconē Jeberequías, tlen nochī quinixmatiyayaj para tlacame tlen itztoyaj xitlahuac. Niquinnotzqui testigos para quitase niquijcuilohuayaya nopa tlajtoli tlen itoca nocone huan tlachque itoca quinextis para teipa panos. Huan yajuanti hualajque huan quiitaque niquijcuilo nochī quema nosihua noja aya quinemiltiyaya nopa conetl.

³ Huajca na nicochqui ihuaya nosihua tlen nojquiya eliyaya se sihua tiocamanalojquetl. Huan yajaya coneucic huan quitlacatilti se piloquichpiltzi. Huan TOTECO nechilhui: “Xijtocaxtlali ‘Maher Salal Hasbaz’. ⁴ Nopa tocaitl teyolmelahua para quema nopa conetl noja aya huelis quiijtos ‘papá’ o ‘mamá’, nopa tlanahuatijquetl tlen tlali Asiria calaquis ipan tlali Damasco huan Samaria huan quinixtequilis nochī ininricojoyo.”

Nopa tlanahuatijquetl tlen Asiria huala

⁵ Teipa TOTECO sampa nechcamahui huan nechilhui: ⁶ “Pampa nopa tlacame ax paquij ica nopa yejyectzi atl tlen niquinmacac ipan Siloé campa oncac tlasehuilistli, huan tlahuel quinequij quitlajtlanise tlapalehuili nopa tlanahuatiiani Rezín huan Peka tlen iconē Remalías, ⁷ huajca ama niininTeco niquintlaijiyohuiltis queja elisquía ica nopa atl tlen tlahuel mosisinía tlen nopa atemitl Éufrates. Elis queja quema tlahuel tlatemis huan nopa atl quiteritis nochī aojtli huan panos campa hueli. Quena, queja atl tlen tlahuel mosisinijtihuala, hualas nopa tlanahuatijquetl tlen tlali Asiria ihuaya isoldados tlen tlahuel quipiyaj

chicahualistli huan nochí quintzontlamiltise.
⁸ Huan nopa tlanahuatijquetl huan isoldados hualase queja miyac atl huan ajsis ipan ni tlacame tlen tlali Judá. Huan nica ajsis nopa atl hasta ininquechtlá. Huan nopa soldados mosemanase campa hueli queja atl tlen mosemana huan quitzacuas nochí. O nopa atl elis queja se hueyi cuajtli tlen quipatlahua ieltlapal ipan nochí. Huan quitlamixolehuase tlali Judá, notlal na niEmanuel.

⁹ “Huan nopa tlali Asiria ehuani quijtose: Xijtlacaquilica nochí imojuanti ipan tlaltini tlen inmopantíaj huejca. Ximosentilica para intlatehuise pero san tlapic pampa intzontlamise. Ximocualtlalica para inmomanahuise, pero san tlapic pampa inmechtlamihuejhuelose. Ximotemacaca ipan nopa tlatehuijcayotl, pero san tlapic pampa inmechtlamiixpatholihuiltise.
¹⁰ Xiquinsentilica tlen inmechtlahnamictise quejatza monequi intlatehuise, pero san tlapic pampa ininconsejo tlamisosolihuis. Xiquixtlalica nopa tonal quema intechlanise, pero ax huelis inquichihuase pampa Dios itztoc tohuaya.”

San TOTECO ma tijhueyimatica

¹¹ TOTECO nechcamahui chicahuac huan nechilhui: “Amo xijtoquilica iniojhui Judá ehuani ipan niyon se tlamantli. ¹² Amo ximosentilica inihuaya quema quisencahuaj quejatza tlacajcayahuase. Niyon amo xiquimacasica nopa tlamantli tlen yajuanti quiimacasij.
¹³ San xinechimacasica na, niimoTECO Tlen Niquinyacana Noelhuicac Ejcahua Ma Tlatlanitij. San na xinechitaca para nitlatzejzelotic huan

san noixtla na ximomajmatica. ¹⁴ Na nielis queja se lugar campa initztose temachtli. Pero para tlali Israel huan tlali Judá ehuani nielis queja se tetl tlen ipan motepotlamise o queja se hueyi tetl tlen ipan huetzise. Huan para nopa tlacame tlen altepetl Jerusalén nielis queja se laso o queja se matlatl tlen temasiltía. ¹⁵ Miyac tlen yajuanti motepotlamise, huan huetzise huan miquise. Sequinoc momasiltise huan mocahuase ilpitoque.”

Amo xiquintemoca tlen quinnojnotzaj mijcatzitzí

¹⁶ Huajca imojuanti innomomachtijahua, xitzacuaca cuali nochí nopa tlajtoli tlen TOTECO nechmacatoc huan niquijcuilojtoc, pampa elis para nopa tlacame tlen itztose teipa.

¹⁷ Na nimochiyas san ipan TOTECO para nechpalehuis. Yonque ama moicancueptoc ica tiisraelitame [8:17 O tiiixhuihua Jacob.] san ipan ya nimotemachis. ¹⁸ Xiquitaca, nica niitztoc na inihuaya nocone hua tlen TOTECO nechmacatoc. Tojuanti tiitztoque queja se tlanescayotl pampa totoca quinextía tlen TOTECO quichihuas ica itlaca jhua. Tiitlayolmelajcahua TOTECO tlen itztoc ipan tepetl Sion [8:18 Se tepetl ipan Jerusalén campa huejcajquia mosehui icaltlanahuatil Tlanahuati jquetl David.] Yajaya TOTECO Tlen Quinyacana Ielhuicac Ejcahua Ma Tlatlanitij. ¹⁹ Pero tlacame inmechilhuise: “Xiyaca campa tetonalitani huan tlen quincamahuái ajacame tlen ixtaca camatij huan camaleletij.” Huan monequi quej ni

xiquinilhuica: “¿Quejatza huelis mijcatzitzitl rayolmelahuase tlachque panos teipa ica tlacame tlen yoltoque? ¿Huelis ax quinamiqui para tlacame ma yaca ica ininteco Dios para quitlajtlanise ya?

²⁰ “Xijtlachilica inintlajtol nopa tetonalitani intla eltoc san se ica notlanahuatil huan notlajtol niimoTECO. Intla ax eltoc san se, huajca ax ya notlajtol. Pampa inintlajtol ax quipiyatlahuili niyon ax melahuac.”

Nopa tonali tlen tlaohueijcayotl tlen huala

²¹ Quinhuicase ni tlacame ipan seyoc tlali huan nopalano quintlaijiyohuiltise, quinsiyahuiltise huan quinmayanaltise. Huan yajuanti cualanise huan quitlalanase ininma ica cualantli huan quitelchihuase inintlanahuatijca huan ininDios. ²² Huan yonque tlachiyase ica huejcapa o ipan ni tlaltepactli, san quipantise tlaijiyohuilstli, cuesoli huan tzintlayohuilotl. Huan teipa quinmajcahuase campa tzintlayohua huan nopa tzintlayohuilotl quintolos.

9

Itlacatilis nopa tlanahuatijquetl tlen tlasehuilstli

¹ Pero ax oncas tzintlayohuilotl huan tlaijiyohuilstli para nochipa. Achtohui TOTECO Dios quiechcapantlalis huan quitlatzacuilitis tlali Zabulón huan Neftalí, pero teipa ica miyac tonali, ni tlaltini quipiyase tlatiochihuali. Temis ica ihueyitis TOTECO nopa tlali tlen hueyi atl Mediterráneo ica campa oncalaque tonati hasta nopa tlali ipan sejcoyoc nopa atemitl Jordán

para campa quisa tonati huan hasta tlali Galilea ica norte campa itztoque nopa tlacame tlen ax israelitame. ² Nopa tlacame tlen nemiyayaj ipan tzintlayohuilotl quiitase se hueyi tlahuili. Quena, se tlahuili quintlahuilis nochí nopa tlacame tlen ya miquisnequiyayaj. ³ Pampa ta, TOTECO, tijchihuas para nochí ni tlali Israel sampa ma eli hueyi huan para israelitame sampa quiipyase miyac paquilistli. Paquise queja paquij pixcani quema onca miyac pixquistli huan queja paquij soldados tlen tlatlantoque quema moxelhuilíaj nopa tlamantli tlen quipantijtoque. ⁴ Pampa ta, TOTECO, tijtlamiltis nochí tepos cadenas tlen ica quinilpitoque motlacajhua. Huan tijpostequis nopa cuahuasastli tlen ica quinmaquiliyayaj. Titlatlanis san se queja tiquintlanqui nopa soldados tlen tlali Madián ica Gedeón huan se quesqui ihuampoyohua. ⁵ Ipan nopa tonali tlen tlasehuilistli, nochí tecactli tlen nopa tlatehuiani quitequihuiyayaj ipan tlatehuilistli huan nochí yoyomitl tlen espoltic, quinmajcahuase ipan tlítl para ma tlatlaca queja sacatl tlatla ipan tlítl.

⁶ Pampa ya tlacajtoc se piloquichpiltzi para tojuanti. TOTECO techmacatoc se conetl. Yajaya quiipyas nochí tequihuejcayotl para tlanahuatis. Huan quitocaxtise: Tlasentlachiyaltijquetl, Tetlalnamictijquetl, TOTECO Tlen Más Quipyia Chicahualistli, Totata Tlen Itztoc Para Nochipa, Tlanahuatijquetl Tlen Temaca Tlasehuilistli. ⁷ Itlanahuatilis moscaltijtiyas hasta ajsis campa hueli. Huan campa yajaya tlanahuatis oncas tlasehuilistli tlen ax quema tlamis. Yajaya mosehuis ipan ihueyi siya ihuejcapan tata David

huan tlanahuatis para nochipa. Huan nochí tlamantli tlen mochijtos ipan itlanahuatijcayo elis xitlahuac huan cuali. Queja nopa elis pampa TOTECO Tlen Quinyacana Ielhuicac Ejcahua Ma Tlatlanitij, ya motemamac para queja nopa mochihuas.

Icualancayo TOTECO ica israelitame ama

⁸ TOTECO ya quijjtojtoc tlen ininpantis israelitame huan itlajtol ya ajsito campa hueli ipan ni tlali. ⁹ Huan quicaquise nochí israelitame tlen tlali Israel [9:9 Efraín huan Samaria elque sequinoc itoca tlali Israel ica norte quema eltoya iyoca tlen tlali Judá ica sur.], tlen tlahuel mohueyimati huan quijjtohuaj: ¹⁰ “Yonque quitlamixolehuase tottal huan tlamitepehuis nopa soqui tabiques, tojuanti sampa tijcualtlalise ica tetl. Yonque quitlamitzontequise nopa apechtli tlen cuahuitl tlen cabrahigos, tojuanti sampa tijcualtlalise ica tiocuahuitl.” ¹¹ Pero san tlaptic quichihuase pampa TOTECO quinmacas chicahualistli icualancaitacahua Rezín huan quinyoltlanas para ma hualaca ma quitehuiquij Rezín huan nopa tlali Israel ehuani. ¹² Ica campa quisa tonati hualase nopa sirios huan campa oncalaqui tonati hualase nopa filisteos para quintehuise tlali Israel ehuani. Pero TOTECO noja ax moyoltlalis ica ya nopa. Ya jaya noja quixitlajtos ima para quintlatzacuiltis. ¹³ Pero yonque TOTECO tlahuel quintlatzacuiltis, israelitame tlen itztoque nopano noja ax moyolcuepase tlen inintlajtlacolhua, niyon ax quitemose TOTECO Tlen Quinyacana Ielhuicac Ejcahua Ma Tlatlanitij. ¹⁴ Yeca TOTECO san ipan

se tonal quintzontlamiltis nochí nopa tlacame ipan nochí tlali Israel yonque tlapijpiyani o teicneltzitzi. ¹⁵ Quintzontlamiltis nopa huehue tlacame tlen nochí quinhueyitlepanitaj huan nojquiya quintzontlamiltis nopa istlacatica tiocamanalohuani. ¹⁶ Pampa nopa tlayacanani tlahuel quincajcajyajtoque huan quincuapolojtoque tlacame tlen quitemohuayayaj se para quinyacanas.

¹⁷ Yeca TOTECO ax quincahuas ma choloca nopa telpocame. Niyon ax quintlasojtlas nopa coneme tlen icnotzitzti, niyon cahual sihuame pampa nochí yajuanti senquistoc tlajtlacolchihuaj. Nochi yajuanti itztoque ax cuajcualme huan fiero ininyolis. Nochi tlen quisa tlen inincamac israelitame nopano eltoc fiero. Pero yonque quej ni TOTECO quintlatzacuiltis, noja ax moyottlalis ica yajuanti huan quejipa quixitlajtos ima para más quintlatzacuiltis. ¹⁸ Tlen fiero yajuanti quichihuaj tlatlas queja se tlitl tlen quitlatía huitztl huan sahua mecatl. Huan nopa tlitl tlen quisas nopano tlatlas queja se tlitl tlen quitlatís se hueyi cuatitlamitl huan se hueyi poctli tlejcos nopano queja se ajcomalacatl. ¹⁹ Ica icualancayo TOTECO Tlen Quinya-cana Ielhuicac Ejcahua Ma Tlatlanitij quichihuas ma tzintlayohuilis nopa tlali ica nopa poctli tlen quisas tlen nopa hueyi tlitl. Nopa tlitl lemenis ica nopa tlacame huan niyon se nopa fiero tlacame ax quitlasojtlas iicni. ²⁰ Tlacame mayanase hasta sesen tlacatl quiixtequilis itlacualis iicni tlen itz-tos ica inejmatl o iarraves. Pero yonque quichihuas ya nopa, ax ixhuis. Yeca teipa quincuase hasta inincone-hua. ²¹ Huan nopa hueyi familia

tlen Manasés quitehuis nopa hueyi familia tlen iixhuihua Efraín. Huan iixhuihua Efraín quintehuis iixhuihua Manasés. Huan iixhuihua nopa ome hueyi familias ica norte quintehuise iixhuihua Judá ica sur. Pero yonque TOTECO queja nopa quintlatzacuiltis, noja ax tlamic ihueyi cualancayo. Yajaya quejipa quixitlajtos ima para más quintlatzacuiltis.

10

¹ Teicneltique nopa tequihuejme tlen quitlalíaj tlanahuatili tlen ax xitlahuac huan tlanahuatili tlen ica tetlaijiyohuiltise. Temachtli huala tlatzacuiltili ininpani. ² Ax quinequij quichihuase tlen xitlahuac ica tlacame tlen teicneltzitz. Quinchihuilíaj fiero nopa tlacame tlen tlaijiyohuiaj huan quintlaxtequilíaj cahual sihuame huan coneme tlen icnotzitz.

³ Huan ¿tlachque inquichihuase ipan nopa tonali quema TOTECO inmechtlatzacuiltis? ¿Ajqueya inquilhuise ma inmechpalehui quema nopa sejcoyoc ehuani quitlamixolehuaquij imotlal? Huan ¿canque inquicahuase nochí tlen inquipiyaj para inquimanahuise? ⁴ TOTECO ax inmechpalehuis. Huajca san inmoechcapano huan inmechhuicase ipan sequinoc tlaltini. O huelis inmiquise huan imotlacayohua huetzise tlatlajco nopa mijcatzitz. Pero yonque ya nopa, TOTECO noja aya moyoltlalis ica imojuanti huan quejipa quixitlajtos ima para inmechtlatzacuiltis.

TOTECO quitequihuis nopa tlanahuatijquetl tlen Asiria

⁵ Huan TOTECO quijito: “Nopa tlanahuatijquetl tlen tlali Asiria eltoc queja nocuatopil tlen nijtequihuía para niquintlatzacuiltis tlen tlahuel nicualantoc ininhuaya. Nochi nohueyi cuan-cayo nijtlalijtoc imaco. ⁶ Nijtitlani nopa tlanahuatijquetl huan isoldados ipan se tlali tlen quinpiyaj tlacame tlen tlahuel fiero ininyolis huan tlen tlahuel nechcualancamacaj. Niquintitlanis ma quintlaxtequilica, ma quintlacuijculica huan ininpan ma moquejquetzaca queja soquitl ipan calles. ⁷ Pero nopa tlanahuatijquetl tlen tlali Asiria ax quimatis, niyon ax quimachilis intla na nijtitlani. Yajaya moilhuis quintehuis not-lacajhua san pampa quinequi quintlanis miyac tlaltini ipan tlaptepactli. ⁸ Pampa yajaya quijitos: ‘Nochi notlayacancahua tlen nosoldados se tonali itztose tlanahuatiani ipan sese tlali tlen tijtlanise. ⁹ Tijxolehuase altepetl Calno ihuical queja tijxolejque altepetl Carquemis. Huan Hamat huetzis toixtla queja huetzqui Arfad. Huan Samaria tijxolehuase queja tijxolejque Damasco. ¹⁰ Quena, ya tiquinixpolihuiltijque miyac tlanahuatili campa quinpiyayayaj más miyac tiotzitzitl tlen huejhueyi que altepetl Jerusalén huan Samaria. ¹¹ Huajca queja tijxolejque Samaria huan itiotzitzitl, queja nopa nojquiya tijtlamixolehuase altepetl Jerusalén huan itiotzitzitl.’”

¹² Pero teipa, quema TOTECO ya quitequihuijtos nopa tlanahuatijquetl tlen tlali Asiria para quintlatzacuiltis altepetl Jerusalén ehuani, nojquiya quitlatzacuiltis nopa tlanahuatijquetl pampa yajaya tlahuel mohueyimati huan

motlepanita. ¹³ Nopa tlanahuatijquetl tlen Asiria quiijtojtoc: “Nochi tlatehuijcayotl nijtlantoc ica nochicahualis huan notlalnamiquilis pampa tlahuēl ntlalnamiqui. Ica nochicahualis nijhueloni tepamitl huan niquinxolejqui altepetini huan niquintlamitlaxtequili. ¹⁴ Ica nochicahualis, nijcalaquijtoc noma campa quiajcoctoyaj nochi ininricojoyo nopa altepetini huan niquinixtequili nochi tlen quipiyayaya. Queja se acajya quisentilia tejquistli ipan se tepasoli, niquinsentilijtoc miyac tlaltini para noaxcahua. Huan axaca huelqui quiolinia imacpil o quitlapos icamac huan nechtlacahualtis ica tlen nijchihua.”

¹⁵ Pero ¿huelis nopa hacha hueli moilhuis quipiya más chicahualistli que nopa tlacatl tlen quitequihuía nopa hacha para cuatzontequis? ¿Huelis se sierra más ipati que nopa tlacatl tlen cuatequi? ¿Huelis nopa cuahuasastli tehuitequis iselti? O ¿huelis nopa cuatopili nejnemis iselti?

¹⁶ Huajca xijtlacaquili, titlanahuatijquetl ipan Asiria. Pampa tlahuēl timohueyimajtoc, TOTECO Tlen Quinyacana Ielhuicac Ejcahua Ma Tlatlanitij quititlanis se hueyi cocolistli ipan nochi mosol-dados tlen tlahuēl tejtetique. Nopa cocolistli elis queja tlitl tlen tlahuēl quincocos huan tlahuēl tliquisas. ¹⁷ TOTECO tlen itztoc queja inint-lahuil nopa israelitame mochihuas queja se tlitl. Quena, yajaya Tlen Tlatzejtzeloltic huan Toteco tiisraelitame elis queja se hueyi tlitl tlen inmechtzontlamiltis intlali Asiria ehuani. San ipan se yohuali inmechtlamitlatis inAsiria ehuani queja huitzli huan sahua mecatl nimantzi tlatlas.

18 Nopa soldados tlen tlali Asiria itztoque queja se yejyectzi cuatitlamitl, pero san tlapic pampa nochí tzontlamisse. TOTECO quitzontlamiltis in-intlacayo huan inialma queja se cocoxquetl tlen quiipiya se cocolistli tlen temictía huan tlantiya ichicahualis yonque noja yoltoc. **19** Tlen nopa miyac soldados san mocahuase se quentzi, hasta se conetl huelis quinpoahuas.

San se quesqui tlacame mocuepase

20 Huan ipan nopa tonali, nochí tlen noja mocahuase ipan tlali Israel huan ipan tlali Judá ayoc motemachise ipan nopa Asiria ehuani tlen quinequiyayaj quintzontlamiltise. San motemachise ipan ininTECO Tlen Tlatzejzelotic Huan Tlen Itztoc Inihuaya. **21** San se pilquentzi tlen yajuanti noja itztose para mocuepase ica Toteco Dios Tlen Chicahualiso. **22** Huan yonque nopa israelitame momiyaquiliroque hasta itztoque queja imiyaca nopa xali iteno hueyi atl, san se pilquentzi tlen yajuanti mocuepase ipan inintlal ipan nopa tonali. TOTECO Dios ya quisencajtoc quintzontlamiltis itlacajhua queja quinamiqui ipampa inintlajtlacolhua. **23** Quena, campa hueli ipan ni tlali quintlamiixpolihuiltis itlacajhua pampa queja nopa quijtojtoc TOTECO Tlen Quinyacana Ielhuicac Ejcahua Ma Tlatlanitij.

TOTECO quitlatzacuiltis Asiria

24 Huajca TOTECO Tlen Quinyacana Ielhuicac Ejcahua Ma Tlatlanitij quijtohua: “Innotlaca-jhua tlen initztoque ipan altepetl Jerusalén, amo xiquinimacasica nopa tlali Asiria ehuani quema inmechtlaijyohuilitáj san se queja nopa egiptome

inmechchihuili que huejcajquiya. ²⁵ Pampa ayoc huejcahuas. Tlamis nocualancayo ica imojuanti huan teipa nijtitlanis nocualancayo ipan yajuanti huan niquintzontlamiltis.

²⁶ “Huan niimoTECO Tlen Niquinyacana Noelhuicac Ejcahua Ma Tlatlanitij nimotlalanas huan niquinhuitequis ica nocuahuasas queja nijchijqui quema Gedeón quintlanqui tlali Madián ehuani ipan nopa tepexitl tlen itoca Oreb. O nijchi-huas queja nijchijqui quema nijtlalanqui nocu- atopil para nijsejcotilis nopa hueyi atl huan niquinatzonpolihuilty nopa soldados tlen tlali Egipto. ²⁷ Huan ipan nopa tonali niimoTECO nijtlamiltis nochí nopa tlatequipanojcayotl tlen not-lacajhua nopano ipan sequinoc tlaltini. Niquin-quixtilis nochí inintlamamal tlen etic, huan nijtlamiltis nochí nopa tlanahuatili tlen ohui tlen ipan ilpitoque.”

Pehuaj tlatehuise Asiria ehuani

²⁸ ¡Xiquitaca! ¡Ya hualahuij nopa soldados tlen tlali Asiria! Ya itztoque ipan altepetl Ajat huan ama ya ajiscoj ipan Migrón. Nojquiya ya quicuallalíaj inintepos ipan Micmas. ²⁹ Apanoj nopa atlajtli huan ni tlayohua mosehuij se quentzi ipan Geba. Ama ajsitij ipan altepetl Ramá. Onca se hueyi majmajtli ipan altepetl Gabaa, ialtepe Saúl, huan nochí nopa tlacame cholohuaj para momanahuise. ³⁰ Intlacame tlen altepetl Galim, xitzajtzica ica majmajtli para nojquiya ma inmechcaquica tlen itztoque ipan altepetl Lais. Xitzajtzica pampa monechcahuíaj miyac soldados tlen tlahuel quipiyaj fuerza. Huan teicneltique

imojuanti tlen inehuani altepetl Anatot, nelía fiero tlen mopantis. ³¹ ¡Xiquitaca nopa tlacame tlen altepetl Madmena san cholojtinemij huan nopa tlacame tlen altepetl Gebim nojquia mocualtlalíaj para cholose! ³² Ama nopa soldados moquetzaj ipan altepetl Nob. Huan nopa tlanahuatijquetl tlen Asiria momahuihuixohua ica tepetl Sion ipan Jerusalén pampa san tonilis quiitzquis.

³³ Pero xiquitaca, TOTECO Tlen Quinyacana Ielhuicac Ejcahua Ma Tlatlanitij huala quitzontlamiltqui nopa tlanahuatijquetl queja se quitzontectihuala cuatini tlen más huejcapantic. TOTECO quintlamiltijtihualla nochi nopa miyac soldados. Nopa tlayacanani huetzise ica pinahualistli. ³⁴ TOTECO Tlen Quinyacana Ielhuicac Ejcahua Ma Tlatlanitij quintzontequis icualancaitacahua queja se hacha imaco se cuatzontejquetl quintzontequis cuatini ipan tlali Líbano.

11

Tlanahuatijquetl tlen Tlasehuilistli elis se iixhui David

¹ Se tonali nopa tlanahuatiani tlen ifamilia Isaí [11:1 Isaí elqui itata David tlen elqui tlanahuatijquetl. Huajca nica camati tlen ininteipan ixhuihua David huan itata Isaí, tlen tlacajtiyajque huan elque se familia tlen tlanahuatiani ipan Jerusalén.], nesis queja tlantoc. Eltoc queja san mocahuas icuatzyo se cuahuitl tlen quitzontectoyaj. Pero ipan nopa cuatzomitl yolqui

se ichamanca tlen yancuic tlen quisas tlen inelhuayo nopa cuatzomil tlen eltoya hasta huejcajquiya. ² Huan quema tlacatis nopa yancuic tlanahuatijquetl, Itonal TOTECO motlalis ipan ya. Huan nopa Tonaltzi quimacas tlamachilistli, tlannamiquilistli, huan quichihualtis se cuali consejomacaquetl. Nopa Tonaltzi quipiyas chicahualistli huan tlaixmatili huan tlamachtis para ma tlahuatl tittlepanitaca TOTECO huan ma tijmahuila para tiquixpanose. ³ Ica paquelistli quineltoquilis TOTECO. Ax tetlajtolsencahuas san quejanesis para melahuac, pero ax melahuac. Huan ax tetlajtolsencahuas queja tlen hueli tlajtoli tlen nemi ipan tecamac. ⁴ Yajaya quintlajtolsencahuas queja xitlahuac para yajuanti tlen teicneltzitzti huan quinmanahuis tlen casempatzitzti ipan nopa tlali. Quema tlanahuatis ica icuatopil imaco, quintlatzacuiltis ax cuajcualme huan quinmicitis ica iijiyo. ⁵ Pampa quema yajaya tlanahuatis, quichihuas senquistoc tlen xitlahuac huan nochipa itztos temachtli.

⁶ Ipan nopa tonali, se tepechichi itztos ica paquelistli ica se pilborregojetzi. Se tecuajquetl motecas para mosiyajcahuas ica se pilchivojetzi. Se pilbecerro, se león huan se pilborregojetzi nemise san sejco, huan se oquichpil quinyacantine mis para quintlamacas. ⁷ Se oso huan se huacax tlacuajtinemise san sejco huan ininconehua mosiyajcahuase san sejco. Huan leones quicuase sacatl queja huacaxme. ⁸ Pilconetzitzti tlen noja chichij huelise nejnemise ica temachili tlatlajco tlen nopa cohuame tlen quipiyaj ininpajyo. Huan se conetl tlen quicalaquis ima campa itlalcoyo se

cohuatl, ax tlenó ipantis. ⁹ Ax oncas niyon se tlamantli tlen mahuilili o tlen tetlanahuía ipan notlanahuatijcayo [11:9 Xiquita Ez. 2:2.] tlen tlatzejzeloltic, pampa queja atl quitemitía nopa hueyi atl, nopa tlali temitos ica tlacame tlen quiixmatij TOTECO.

Mocuepase tlen quinhuicatoque ipan sequinoc tlaltini

¹⁰ Ipan nopa tonali, nopa yancuic tlanahuatijquetl tlen iteipa ixhui David [11:10 O Isaí tlen elqui itata David.] elis queja se bandera tlen quinilhuiáj tlacame tlen nochí tlaltepactli campa ma mosentilica intla quinequise ma quinmaquixtis. Huan tlacame tlen campa hueli tlaltini ipan tlaltepactli hualase campa ya, huan nopa tlali campa yajaya itztos elis tlahuel yejyectzi. ¹¹ Huan ipan nopa tonal, TOTECO sampa quitequihuis ichicahualis huan quichihuas ma mocuepaca ipan tlali Israel nopa se quesqui itlacajhua tlen noja mocajtose ipan tlali Asiria, Egipto, Patros, Etiopía, Elam, Babilonia huan Hamat. Huan quichihuas ma mocuepaca tlen itztoque huejca ipan nopa tlaltini ipan hueyi atl huan iteno hueyi atl. ¹² Huan TOTECO quitlalanas se bandera para quinnextilis tlacame tlen nochí tlaltini para quinsentilía itlacajhua tlen quinquixtijtoque ipan tlali Israel huan tlali Judá. Huan quinsentilis itlacajhua tlen itztoque campa hueli ipan nochí tlaltepactli. ¹³ Huan nopa tlali Israel [11:13 O nojquiya quitocaxtía Efraín.] ica norte ayoc cualanis ica tlali Judá ica sur, niyon tlali Judá ehuani ayoc itztose icualancaitacahua tlali Israel ehuani. ¹⁴ Huan san sejco

quintehuise nopa filisteos campa calaqui tonati huan calaquise ipan inintlal nopa tlacame campa quisa tonati huan quintlanise. Moaxcatise nopa tlaltini tlen Edom huan Moab huan nopa tlacame tlen Amón quinneltocase.

¹⁵ Huan TOTECO quihuatzas campa nesi para inenepil nopa hueyi atl tlen tlali Egipto para nopano huelis apanose tlacame tlen mocuepaj. Nojquiya quitlalanas ima ica nopa atemitl Éufrates huan quititlanis se ajacatl tlen chicahuac para ma quixelo ica chicome pilhueyatitzitzi tlen ax ohui apanos se tlacatl yonque san iicxipa. ¹⁶ TOTECO quichijchihuas se hueyi ojtli tlen tlali Asiria tlen ipan hualase nopa se quesqui itlacaiahua tlen noja mocajtose yoltoque nopano san se queja quinchijqui ica nopa israelitame quema quisque tlen tlali Egipto huejcajquiya.

12

Huicatl tlen tlascamatili para TOTECO

¹ Hualas se tonal quema tlacame huicase:
“Nimitzhueyitlalía, TOTECO.

Yonque tlahuel ticualaniyaya ica na,
ama timoyoltlalijtoc huan tinechtlasojlatoc.

² Xiquitaca intlacame, Toteco Dios yajaya notemaquixtijca.

Huajca nimotemachis ipan ya huan ayoc nima-jmahuis.

TOTECO itztoc tlen nechmaca nochicahualis huan yeca san para ya nihuicas.

San yajaya notemaquixtijca.

³ Queja se ajhuiyac atl quinmaca paquelistli tlen amiquij,
queja nopa tipaquij tojuanti, tiitlacajhua TOTECO tlen yajaya techmaquixtijtoc.”

⁴ Huan ipan nopa tonal quiijtose:

“¡Xijtlascamatica TOTECO!

¡Xijhueyitlalica ya!

¡Xitepohuilica ipan nochí tlaltini nopa huejhueyi tlamantli tlen yajaya quichijtoc!

¡Xiteilhuica para TOTECO yajaya nelía hueyi!

⁵ Xihuicaca tiohuicatl para TOTECO pampa yajaya quichijtoc huejhueyi tlamantli.

Ma quimatica tlen quichijtoc nochí tlacame ipan tlaltepactli.

⁶ Huan ma huicaca huan ma tzajtzica ica paquelistli,

nochí tlen itztoque ipan altepetl Jerusalén.

Pampa tlatlajco tlen tojuanti itztoc TOTECO tlen nelía hueyi.

Quena, yajaya nopa Dios Tlen Tlatzejzeloltic Huan Itztoc Tohuaya Tiisraelitame.”

13

TOTECO teyolmelajqui para quitlatzacuiltis Babilonia

¹ Ya ni nopa tlanextili tlen TOTECO nechnextili na, niIsaías niicone Amoz. Huan ipan ni tlanextili tlayolmelajqui tlachque panos teipa ica altepetl Babilonia:

² “Xijtlalica banderas ipan se huejcapantic tepexitl para ma mojmolinica quema pehuas tlatehuijcayotl. Xiquintzajtzilica chicahuac nopa soldados. Xijtlalanaca imoma para xiquinilhuica ma

yaca quintehuitij altepetl Babilonia huan quixolehuase tlen iniaxcahua yajuanti tlen tlahuel huejueyi huan tlahuel tlapijpixtoque. ³ Na ni-Dios niquintequimacatoc nosoldados tlen tlaiyocatlalilme para na para quintehuise Babilonia ehuani. Niquinnnotztoc yajuanti tlen más montlalíaj ipan tlatehuijcayotl para ica yajuanti niquintlatzacuiltis ica nohueyi cualancayo. Huan yajuanti tlahuel paquise quema nitlatlanis huan nochí nechhueyitlalise.” ⁴ ¡Xijcaquica! ¡Nelía tlacaquisti ipan cuatitlamitl! Caquisti queja mosentilíaj tlahuel miyac tlacame. Tlahuejchijtihualahuíj miyac soldados tlen ehuani ipan miyac tlaltini. TOTECO Tlen Quinyacana Ielhuicac Ejcahua Ma Tlatlanitij quinsentilíaj huan quincuallalíaj isoldados para tlatehuisse. ⁵ Isoldados hualahuíj tlen tlaltini tlen mopantíaj huejca hasta campa ontلامi tlaltepactli. TOTECO quintequihuise nopa soldados para senquistoc quixolehuas altepetl Babilonia pampa yajaya tlahuel cualantoc ininhuaya tlen nopano ehuani.

⁶ Xitzajtzica ica majmajtlí pampa ya monechcuhuijtoc nopa tonal tlen TOTECO quema yajaya tetlatzacuiltis. Ya ajsic tonali para TOTECO Tlen Quipyia Nochi Chicahualistli tetzontlamiltis. ⁷ Ayoc quipiyase chicahualistli nochí tlacame. Ininma san mocuapilojtose queja tlamatli mictoque. Huan tlen tlahuel eliyayaj yoltetique, yolpitzahuiyase. ⁸ Nochi tlacame majmahuise huan quinitzquis tlaijiyohuclistli huan tlacuajcualocayotl. Cuajcualose hasta momimilose queja se sihuatl tlen quitlacatiltia icone. Huan quema nopa altepetl noja lementos huan nopa

tlitl noja quinixtlahuilijtos, san mosentlachilise se ica seyoc pampa ax tlen o huelise quichihuase para momanahuise.

⁹ Xiquitaca. Monechcahuía nopa tonal tlen TOTECO quema yajaya tetlatzacuiltis. Nopa tonali elis tlahuel fiero pampa TOTECO quititlanis ihueyi cualancayo para quitlamixolehuas nopa tlali huan quintzontlamiltis nochí tlajtlacolchi-huani tlen itztoque nopano. ¹⁰ Tzintlayohuas nepa elhuicac huan ayoc tlahuise sitlalime niyon sequinoc tlamantli nopano. Tonati tzintlayohuolis nimantzi quema quisas huan nopa metztli ayoc tlatalnextis.

¹¹ TOTECO quijjtohua: “Nijtlatzacuiltis ni tlaltepactli ipampa nochí tlamantli tlen ax cuali, huan niquintlatzacuiltis tlacame ipampa nochí inintlajtlacolhua. Niquintzontlamiltis tlacame tlen mohueyimati huan niquintlamiltis tlen tlahuel motlepanitaj huan tlen quipiyaj miyac chicahualistli.

¹² “Huan quema tlamic nitetlatzacuitlá, san mocahuase yoltoque se quesqui tlacame. Nopa tlacame tlen mocahuase elise tlahuel ininpati queja nopa cuali oro tlen tlali Ofir. ¹³ Pampa ipan nopa tonali, nijchihuas ma mojmolini elhuicactli, huan ni tlaltepactli nijchihuas ma mijcueni tlen campa ipa eltoc. Queja nopa elis ipan nopa tonal quema nijnextis nocualancayo, na niDIOS Tlen Niquinyacana Noelhuicac Ejcahua Ma Tlatlanitij.

¹⁴ “Huan nopa tlacame tlen itztose ipan alte-petl Babilonia tlen sequinoc tlaltini cholose queja masame hasta ajsitij ipan inintla. Huan san nentinemise campa hueli queja nopa borregojme tlen

ax quipiyaj inintlamocuitlahuijca. ¹⁵ Huan nochí tlen ax cholose huan quinpantise, quinmictise ica cuatlamintli. Huan tlen quinitzquise, quinmictise ica machete. ¹⁶ Inixtla tlatepachose tlalchi ininconehua para quinmictise. Nopa soldados tlen hualahuij quinxtequilise nochí tlen quipiyaj huan quicahuase cactoque ininchajchaj. Tlen hueli quinchihuilise ininsihuajhua tlen nopano ehuani. ¹⁷ Pampa na niquinyoltlanas nopa soldados tlen tlali Media para ma quitehuitij altepetl Babilonia. Huan axaca huelis quintzacuiliba para ax quichihuase más, yonque quintlaxtlahuisquía ica miyac tomi tlen plata huan oro. ¹⁸ Nopa miyac soldados tlen hualahuij ax quitlasoxtlase niyon se tlen itztoc ipan altepetl Babilonia. Ica inincuahuitol quinmictise nochí telpocame huan coneme huan pilconetzitzi ax quintlasoxtlase.

¹⁹ “Huan huajca Babilonia, nopa tlanahuatijcayotl tlen eliyaya más yejyectzi tlen nochí sequinoc huan tlen eliyaya queja ininxochiyo nopa caldeo tlacame, mocahuas tlaxolehuali san se queja ininpantic altepetini Sodoma huan Gomorra quema niimoTeco Dios nijtitlanqui tlitl tlen elhuicac para niquntzontlamiltis. ²⁰ Huan altepetl Babilonia ayoc quema motlalanas. Yonque panos tlahuel miyac xihuitl huan ipan sequinoc tlaltini tlacame tlacajtiyase, ayoc aca mochantisoc ipan altepetl Babilonia, niyon axaca itztos nopano. Nopano ayoc quiquetzase ininyoyoncalhua nopa árabes tlen san panotiyohuij, niyon ayoc tonilise nopano nopa tlacame tlen quinmocuitlahuij borregojme. ²¹ Pero tecuanime tlen itztoque ipan huactoc tlali nopano calaquise campa quixolejtoque nopa al-

tepetl. Huan nopa caltini tlen tlacame quincajtehuase nopano, temise ica cuamojmojme tlen tzatzij ica cuesoli. Huan nopano motepasoltise nopa avestruces. Huan cuatitlan chivojme hualase nopano para huitontinemise. ²² Quena, cuatitlan chichime cuayochocase ipan tlen eliyaya se caltlanahuatili huan ipan caltini tlen achtohuiya elque tlen más yejyectzitzti cochise tepechichime. Pampa ya tlanti itonal altepetl Babilonia huan monechcahuía nopa hora para huetzis.”

14

Israelitame mocuepase tlen sequinoc tlaltini

¹ Pero TOTECO quintlasojtas nopa israelitame huan noja quintlapejpenis para iaxcahua. Quinhuicas sampa ipan inintla para sampa ma quitemitica. Huan miyac tlacame tlen ehuani ipan miyac tlaltini hualase huan mosejcotilise inihuaya. ² Tlacame ipan miyac tlaltini tlen ni tlaltepactli quinpalehuise israelitame para ma mocuepaca ipan inintla. Huan tlacame tlen ehuani ipan sequinoc tlaltini tlen itztoquij ipan tlali Israel quintequipanose israelitame. Huan israelitame quintequihuise tlacame tlen achtohuiya quintequihuijque. Huan israelitame quinnahuatise inincualancaitacahua.

Itlanahuatijca Babilonia quema itztoc campa mijcatzitz

³ Huan ipan nopa tonal quema TOTECO quinsiyajcahuaultis israelitame, ax oncas tlaijiyohuclistli, ax oncas majmajtli huan ayoc itzose iniaxcahua sequinoc tlacame tlen

quinchihuaj ma tequipanoca tlahuel chicahuac.

⁴ Quema queja nopa quichihuas TOTECO, israelitame quipinajtise nopa tlanahuatijquetl tlen tlali Babilonia huan quiilhuise: “¡Xiquitaca nopa hueyi tlanahuatijquetl tlen tlahuel tetlaijiyohuiliyaya! ¡Ya quitzontlamiltijtoque!

⁵ TOTECO ya quitlamiltijtoc ichicahualis nopa fiero tlanahuatijquetl tlen quichihuayaya miyac tlamantli tlen ax cuali. Nojquiya quitlamiltijtoc itlanahuatilis. ⁶ Yajaya tetlatzacuiltiyaya huan ajachica quinmaquiliyaya chicahuac hasta quintlamicocoyaya. Huan ica ihueyi cualancayo quinnahuatiyaya miyac tlaltini tlen eliyayaj imaco. Quintlaijiyohuiliyaya tlacame tlahuel miyac huan ax quintlasojtlayaya. ⁷ Pero ama nochí tlaltepactli ya quipiya tlasehuilistli huan nochí tlacame hueli mosehuíaj huan huicaj ica paquelistli. ⁸ Hasta eltoc queja nopa pino cuatini huan tiocuatini tlen tlali Líbano nojquiya yolpaquij pampa huetzto nopa hueyi tlanahuatijquetl. Huan eltoc queja nopa cuatini quijtohuaj: ‘Ya tlanqui ichicahualis. Huajca ama ayoc aca techcuatotonis niyon techtzonquis. Ama ya tijpiyaj tlasehuilistli.’

⁹ “Nopa mijcatzitzí tlen itztoque nepa mictla momajmatíaj para quiselise nopa tlanahuatijquetl quema calaquití nepa. Isaj tlen cochtoyaj pampa ajsis. Nopa mijcatzitzí tlen elque tlayacanani hualahuij pampa quinequij quinamiquitij. Tlen eliyayaj tlanahuatiani moquetzaj tlen ininsiyas para quiselise. ¹⁰ Huan sentic tzajtzise huan quiilhuise: ‘¡Ama ta nojquiya tiitztoc queja tojuanti huan ayoc tijpiya niyon quentzi chicahual-

istli! ¹¹ Tlanqui nochí mohueyitilis huan mochicahualis. Nochi ya nopa yajque ipan ostotl quema mitztlalpachojque. Mitztlepanitayayaj ipan nopa tequicali campa titlanahuatiyaya ica huicatl tlen yejyectzitztli tlen quichihuayayaj ica arpas. Huan ama motlapech eltoc tlen tlalocuilime huan motlaque eltoc pilocuitzitztli.’

Quejatza huetzqui nopa hueyi sitlali

¹² “Quejatza tihuetzqui tlen elhuicac ta tiLucero. Tieliyaya queja nopa sitlali tlen más quipiya chicahualistli tlen tlahuiyaya ica ijnaloc quema noja aya quisa tonati. Mitzmajcajtoque tlalchi, ta tlen tijpiyayaya tlahuel miyac chicahualistli huan tiquinxolehuayaya miyac tlaltini. ¹³ Ta timoilhuiyaya ipan moyolo quej ni: ‘Nitlejcos elhuicac huan nijtlalis nosiya más huejcapa que nopa sitlalime tlen Dios. Nepa nijtlalis nosiya huan nitlanahuatis ipan nopa tepetl ica norte campa mosentilíaj nochí totiotzitztli. ¹⁴ Nitlejcos más huejcapa que nopa mixtli huan nielis san se queja Toteco Tlen Más Hueyi.’ ¹⁵ Queja nopa tiquijto, pero san tlápic pampa tiyas hasta campa más tlatzintla ipan nopa ostotl tlen más huejcatla campa mocahuaj mijcatzitztli. ¹⁶ Huan nopano nochí mitzsentrachilise huan quiijtose: ‘¿Huelis yajaya ni tlen quichihuayaya ma huihuipica tlaltepactli huan nochí tlanahuatijcayotl nopano? ¹⁷ ¿Huelis yajaya ni tlen quixolejqui tlaltepactli huan quicajqui queja se huactoc tlali? ¿Huelis yajaya ni tlen quintlanqui ialtepehua huan ax quema

quinquixti nopa tlacame tlen quintzactoyaj ipan tlatzactli para huelis yase ininchajchaj?"

¹⁸ "Tlanahuatiani tlen sequinoc tlaltini quintlalpachojoque ica yejyectzi huan ica miyac tlatlepanitacayotl. Sese yajuanti quipiya itlalcoyo tlen nelcuali. ¹⁹ Pero ta motlacayo quicuamajcajtose tlen motlalcoyo queja quicuamajcahuase se cuamacuayotl tlen nochí quijiyaj. Quitepehuase motlacayo queja inintlacayohua mijcatzitzí tlen mijque ica machete huan teipa ipan moquejquetztoque nopa cahuayojme. San quicuamajcahuase motlacayo ipan iteyo nopa tlalcoyoctli tlen tlahuel huejcatla huan mopani quitepehuase nochí inintlacayohua nopa tlacame tlen mijque ipan tlatehuilistli. ²⁰ Ta ax tijpiyas se tlalcoyoctli tlen nelcuali queja yajuanti pampa moselti tijxolejqui motlal huan tiquinmicti motlacajhua. Huan niyon se mocone ax mosehuis ipan nopa siya campa ta titlanahuatiyaya para quiselis motequi quema timquis. Iconehua se tlacatl tlen fiero queja ta ax huejcahuase. ²¹ Quena, xiquinmictica iconehua ni tlajtlacolchijca tlacatl. Amo xiquincahuilica motlalanase para quintlanise tlaltini. Nyon amo xiquincahuilica ma momiyaquilise para sampa quicualtlalise huan quitemitise nopa altepetini ipan nochí tlaltepactli."

TOTECO quintzontlamiltis Babilonia ehuani

²² TOTECO Tlen Quinyacana Ielhuicac Ejcahua Ma Tlatlanitij. Quijtohua ya ni: "Na noselti nimotlanantoc para nijtehuis nopa tlanahuatijquetl tlen Babilonia huan niquixpolos itoca para nochipa.

Niquinhuejhuelos iconehua huan iixhuihua para axaca tlen yajuanti tlanahuatis ipan isiya." Queja nopa quijtohua TOTECO. ²³"Huan nijchihuas tlali Babilonia tlaxolehuali huan nijchihuas para elis campa nemise xonpime tlapiyalime. Nojquiya nijchihuas ma momana miyac atl huan soquitl campa hueli ipan Babilonia huan nijtlamixolehuas nopa tlali." Queja nopa quijtoohua TOTECO Tlen Quinyacana Ielhuicac Ejcahua Ma Tlatlanitij.

TOTECO quintlatzacuiltis Asiria ehuani

²⁴ TOTECO Tlen Quinyacana Ielhuicac Ejcahua Ma Tlatlanitij ya tlatestigojquetztoc para tetlatzacuiltis. Quej ni quijto: "Temachtli nitetlatzacuiltis senquistoc queja nimoilhujtoc. ²⁵ Niquintzontlamiltis nochi nopa soldados tlen tlali Asiria quema itztose ipan tlali Israel. Ininpan nimoquejquetzas para niquintlamiixpatholihuitlis ipan notepe. Huan queja nopa niquinquixtilis nopa tlaohuijcayotl notlacajhua para ayoc quintequipanose Asiria ehuani. ²⁶ Huan nijsencajtoc nojquiya para nitetlatzacuiltis ipan nochi tlaltepactli. Huan nijchihuas ica nohueyi chicahualis tlen ajsi ipan nochi tlaltini." ²⁷ Ya nopa quijtojtoc TOTECO Tlen Quinyacana Ielhuicac Ejcahua Ma Tlatlanitij. Huan ¿ajqueya huelis quitlacahualtis TOTECO para ma ax quichihuas tlen quinequi? Quema quiolinía ima para tetlatzacuiltis, axaca huelis quitzacuilis. Nochipa quichihuas tlen quisencajtoc para quichihuas.

TOTECO quintzontlamiltis nopa filisteos

28 Ipan nopa xihuitl quema mijqui Tlanahuatij-quetl Acaz, na niIsaías nijseli ni tlajtoli:

29 Amo xipaquica infilisteos pampa mijqui nopa tlanahuatijquetl tlen inmechtehui. Melahuac ya postejqui nopa cuatopili tlen yajaya quitequi-hui, pero icono noja más fiero inmechchihuilis que itata. Tlen nopa tlanahuatijquetl tlen el-toya queja se cohuatl tlacatis seyoc cohuatl ica ipajyo tlen elis queja se tlitl, huan yajaya inmechtzontlamiltis. **30** Queja se tlamocuitlahuij-quetl, na niquintlamacas notlacajhua tlen teic-neltzitzi ipan na nopotrero. Huan tlen achto-hui ax quipiyayayaj tlen ica panose, cochise ica paquilibrium. Pero infilisteos, nimechtzontlamiltis ica mayantli huan ica tlatehuijgayotl. **31** Huajca nochí imojuanti ipan altepetini tlen tlali Filistea, xitzajtzica huan xichocaca ica majmajtli pampa ya nijsencajtoc ajqueya inmechixpolihuiltis imojuanti huan nochí imotlal. Hualase inmechte-huiquij soldados tlen nopa tlaltini tlen moc-ahuaj ica norte. Tlahuel motemacaj ipan tlatehuijgayotl huan itztose tlahuel miyac yajuanti hasta nesise queja tlaltejpoctli. **32** Huan ¿tlachque tiquinilhuise nopa tlayolmelahuani tlen nopa tlali? Xiquinilhuica para na nIDIOS nijquetztoc altepetl Jerusalén [14:32 O Sion.] huan niquijitojtoc para napano momanahuise notlacajhua tlen teicneltzitzi.

15

TOTECO tlayolmelahua Moab ehuani tlachque ininpantis

¹ Ya ni nopa tlajtoli tlen nijseli tlen tlachque ipantis tlali Moab:

Ipan se yohuali quixolehuase altepetl Ar huan altepetl Kir huan mocahuas tlasosolijtoc ipan nopa tlali Moab. ² Nopa moabita tlacame ipan altepetl Dibón yase inintiopa ica miyac cuesoli para mochoquilitij ipampa tlen ipantis altepetl Nebo huan Medeba. Nojquiya moximase huan quihuatanise inintentzo para quinextise tlahuel mocuesohuaj. ³ Moquentise ininyoyo tlen cuesoli huan nejnentiyase ipan calles. Inincalpani huan ipan lugares campa mosentilíaj tlacame caquistis tlen tlahuel chocase. ⁴ Tzajtzise chicahuac nopa tlacame tlen altepetl Hesbón huan Eleale hasta caquistis huejca ipan altepetl Jahaza. Huan nopa tlatehuiani tlen más motemacaj tlen tlali Moab chocase ica majmajtli.

⁵ Ipan noyolo nichoca ipampa tlali Moab. Nochi itlacajhua cholohuaj hasta altepetl Zoar huan Eglat. Huan ixtlejcoj ipan altepetl Luhit huan chocatiyohuij. Caquisti choquistli hasta ipan nopa ojtlí tlen ajsi ipan altepetl Horonaim. ⁶ Onca tlaijiyohuilistli hasta huactoc nopa atemitl Nimrim. Atentli campa quipixqui xihuitl tlen xoxohuic, ama nochi san mocahua queja tlatlatoc. ⁷ Nopa tlacame tlen cholohuaj quihuicaj nochi ininricojojo tlen huelij huan apanoj nopa atemitl campa onca nopa álamo cuatini. ⁸ Nochi Moab ehuani chocaj tlen altepetl Eglaim hasta Beer Elim. ⁹ Nopa atemitl tlen Dimón eltoc chichiltic ica estli. Huan ax san nopa tlatzacuiltlistli quiselis Dimón. Elis queja TOTECO quintitla-

nis leones para ma quincuaca nochí nopa tla-came tlen quinequiyaya j cholojtehuase huan no-jquiya yajuanti tlen mocajtoque nopalno huan noja yoltoque.

16

Moab ehuani momanahuise ipan Judá

¹ Tlacame tlen cholohuaj tlen tlali Moab huan momanahuijtoque ipan altepetl Sela ipan nopa huactoc tlali, quintitlanilíaj borregojme nopa tlanahuatijquetl ipan nopa tepetl ipan Jerusalén para quinextise motemacaj ica ya. ² Huan nopa sihuame tlen cholohuaj tlen tlali Moab itztoque ipan atemitl Arnón queja totome tlen quinmajmatijtoque huan quinquixtijtoque tlen inintepasol. ³ Quej ni Moab ehuani quinilhuía nopa tlali Judá ehuani, quijtohuaj: “¡Xitechilhui tlen huelis tijchihuase! ¡Xitechmanahuica huan xitechmocuitlahuica! Xitechtlatica huan amo xitechcahuilica ma tihuetzica ininmaco tocualancaitacahua. ⁴ Xiquincahuilica ma mocahuaca imohuaya nochí tlen quinquixtijtoque ipan tlali Moab. Xiquintlatica para ax quinpantise tocualancaitacahua.”

Huan quema panotos ni hueyi majmajtli huan ya tlamic nopa tlaxolehualistli huan nochí tocualancaitacahua mocueptoque ipan inintlal, ⁵ huajca TOTECO ica iteicnelijcayo quitlalanás sampa itlanahuatilis David. Huan quichihuas ma mosehui nopalno se tlanahuatijquetl tlen temachtli huan tlen tetlajtolsencahuas xitlahuac huan cuali.

6 Tijcactoque cuali para tlen ehuani tlali Moab tlahuel mohueyimatiyayaj, motlepanitayayaj huan eliyayaj itzcuintij, pero ama nochi ya nopa tlanqui. **7** Huan nochi ipan tlali Moab tlahuel chocaj huan mocuesohuaj pampa ayoc quicuase xocomecatl huactoc tlen altepetl Kir Hareset. **8** Nojquiya chocaj ipampa nopa huejhueyi tlaltini tlen quintlahuelcajtoque nechca altepetl Hesbón huan ipampa nochi nopa xocomeca mili tlen eliyayaj nechca altepetl Sibma. Nopa tlacame tlen miyac tlaltini quitzontectoque nopa xocomeca cuatini tlen quipixque ininmecayo tlen ajsitoj hasta altepetl Jazer ipan nopa huactoc tlali huan hasta nopa Mictoc Hueyi Atl. **9** Yeca na niIsaías, nojquiya nichoca ipampa nopa xocomeca cuatini tlen Jazer huan ipampa nochi nopa xocomeca mili nechca altepetl Sibma. Huan nojquiya nichoca ipampa altepetl Hesbón huan Eleale ehuani pampa nopa tlatzacuiltli ajsic ipan nochi pixquistli huan ayoc onca nopa tlatzopelcayotl nopano. **10** Tlanqui nochi huetzquistli huan paquilibrium tlen oncayaya quema pixcayabaj. Nojquiya ayoc caquistis nopa yejyectzitzi huicatl tlen huicayabaj ipan nopa xocomeca mili. Ayoc quema quipatzcase itlajca nopa xocomecatl para quichihuase iayo. Pampa na nijtlamilti nochi nopa paquilibrium tlen oncayaya quema pixcayabaj.

11 Nelía nimocuesohua ipampa tlali Moab huan nijpiya miyac cuesoli ipampa altepetl Kir Hareset. **12** Nopa tlacame tlen tlali Moab yase campa nopa tepetini huan ica miyac cuesoli momaijtose ica ininteteyohua hasta tlaxicose, pero san tlapic pampa ax quinpalehuise. Nojquiya yase

ipan inintiopa nopa tiotzitz huan quintzajtzilise, pero nopa tiotzitz ax hualase quinmaquixtiquij. ¹³ Nochi ya ni eltoc tlen TOTECO quiijto huejcajquiya para panosquía ipan tlali Moab. ¹⁴ Pero ama TOTECO quej ni quiijtohua: “Ica eyi xihuitl tlamic nochi ihueyitilis tlali Moab. Huan yonque itztoque miyac tlacame, san mocahuase yoltoque se ome tlen ayoc quiipyase chicahualistli.”

17

TOTECO tlayolmelajqui tlachque ipantis altepetl Damasco

¹ Ya ni nopa tlajtoli tlen nijseli tlen TOTECO ica tlachque ipantis altepetl Damasco, quiijto:

“Xiquitaca, altepetl Damasco ayoc elis se altepetl. Ya tlamiixpolihuis huan san elis se tlamontomitl tlen tlasoli. ² Mocahuase quintlahuelcajtoque nopa altepetini tlen tlali Siria para nochipa. Nopano tlacuase huan cochise borregome ica paquillistli huan axaca quinmajmatis. ³ Quixolehuase nopa huejhueyi altepetini ipan tlali Israel [17:3 Tlali Israel ica norte nojquiya quitocaxtía ica Efraín.] tlen quinpiyaj tepamitl tlen quinyahualohuaj. Huan quitlamiltise ichicahualis altepetl Damasco. Nopa tlacame tlen noja mocahuase ipan tlali Siria ayoc elis se tlanahuatijcayotl. Tlamis inintlanahuatilis queja tlami ihueyitilis Israel.” Queja nopa quiijto TOTECO Tlen Quinyacana Ielhuicac Ejcahua Ma Tlatlanitij.

Tlachque ipantis tlali Israel

⁴ “Ipan nopa tonali ihueyitilis Israel [17:4 O Jacob.] tlantiyas huan mochihuas se tlali tlen

nelteicneltzi. ⁵ Ax tleno mocahuas tlen tlali Israel. Queja quitlahuelcahuaj nochí trigo mili tlen ya quinpixcatoque ipan nopa tlamayamitl tlen itoca Refaim, queja nopa quitlahuelcahuase tlali Israel. ⁶ Elis queja quema quitequij itlajca se olivo cuahuitl huan noja mocahua ome o eyi olivos campa más huejcapa. Huan quemantzi mocahuas nahui o macuili ipan iyecapa imacuayohua tlen más tlaquiyaya. Queja nopa nojquiya san mocahuas se pilquentzi itlacajhua tlali Israel.” Queja nopa quiijo TOTECO tlen ininDios tlali Israel ehuani.

⁷ Huan huajca ipan nopa tonali, nopa israelitame pehuase moyolilhuise tlen TOTECO Tlen Quinchijchijqui. Quena, quitlepanitase nopa Dios Tlen Tlatzejzelotic Huan Tlen Itztoc Inihuaya Israelitame. ⁸ Ayoc motemachise ipan totiotzitz huan tlaixpamitl tlen quinmachiijchijque. Ayoc motlancuaquetzase iixtla nopa tlaixcopincayotl tlen tonati o tlen totiotzi Asera tlen quinchijtoque.

⁹ Ipan nopa tonali, nochí israelita altepetini tlen achtohuiya moyahualojtoyaj ica tepamitl mocahuase tlamicolejtoque huan quintlahuelcajtoque. Nesise queja nopa altepetini huejcajquiya tlen quintlahuelcajque nopa amorreos quema israelitame ajsicoj huan quintojtoque. ¹⁰ Pero ¿para tlen queja nopa elis? Elis pampa israelitame quitlahuelcajtoque Toteco Dios tlen quinmaquixtia, yajaya nopa Tetl tlen quinmanahuiyaya. Huajca yonque quichihuase cuajcuali mili huan quintocase tzontli tlen más caultzi, ¹¹ huan yonque yejyectzi ixhuasquíaj huan xochiyohuasquíaj, ica mostlaijqui nelía

nimechilhuía ax quipixcase niyon se xocomecatl. San quipantise pinahualistli huan tlaijiyohuilistli tlen ax quipiya pajtli.

*TOTECO quintlanis inincualancaitacahua
israelitame*

¹² Xijcaquica quejatza tlacaquistihualaj tlen nopa soldados para quintehuiquip tlen itztoque ipan itlal TOTECO. Chicahuac hualahuaj hasta caquisti queja nopa hueyi atl tlen ajachica mocoj-coxonía. ¹³ Pero yonque tlahuelchihuaj chicahuac nopa tlacame queja quema chicahuac mojmolinía hueyi atl, Toteco Dios quintlatzacuiltis huan ayoc molinise. Cholose nopa soldados queja mosemana tlasoli quema tlaajaca chicahuac o queja tlaltepoctli mosemana quema huala se ajcomalacatl. ¹⁴ Ica tlapoyahui israelitame momajmatise ininpampa inincualancaitacahua, pero tonili quema tlanesis nochí inincualancaitacahua ya mictose. Nopa eltoc nopa tlaxtlahuili tlen quiselise nochí tlen quintlaxtequilíaj huan quintzontlamiltíaj itlajhua TOTECO.

18

TOTECO quintlatzacuiltis tlali Etiopía ehuani

¹ Nelía teicneltique nopa tlali Etiopía ehuani tlen itztoque ica campa pehua nopa atemitl Nilo pampa temachtli TOTÉCO quintlatzacuiltis. Nopano caquistic queja miyac sayoltzitzí tlen patlantinemij pampa motlalohuaj inincuacanahua tlen quipiyaj inieltlapal huejhueyi tlen patlajtoque para ma quincuatopehuas ajacatl. ² Nopa tlali quintitlanqui inintlayacancahua

tlen quisencahuaj tlajtoli para ma yaca ipan nopa atemitl Nilo ipan miyac cuacanahua tlen motlalohuaj chicahuac. Pero xiyaca imochaj, intlayacanani tlen innejnemij chicahuac. Xiyaca ipan imotlal huan nopano xijhuicaca se tlajtoli tlen imopantis. Xijhuicaca nopa tlajtoli para imotlacajhua tlen huejcapantique huan tlen quipiyaj inincuetlaxo nel yejyectzitz. Imotlal motlajcoitztoc ica miyac atemitl huan quiimcasij miyac tlacame campa hueli. Quiimcasij imotlal pampa tlahuel intlatlantoque huan intlaxolejtoque, pero ax queja nopa elis teipa.

³ Quema se quitlalanas nopa bandera ipan nopa tepetl para pehuas tlatehuijcayotl, ma quitlachilica nochi tlacame tlen itztoque ipan nochi tlaltepactli. Quema molinis tlapitzali, nochi ma quitlacaquilica. ⁴ Pampa TOTECO quej ni nechilhui: “Tlen campa niitztoc ipan elhuicac, nitlachixtos tlatzintla ipan tlaltepactli huan ax nimolinis niyon quentzi. Nochi elis tlatzitzicatoc queja quema huetziyaya atl huan sampa pehua tona o elis tlatzitzicatoc queja quema huetzi ajhuechtli ica ijnaloc ipan tonali tlen pixquistli.

⁵ Pero quema aya pehuaj tlatehuíaj huan nochi sanoc quisencahuayayaj tlen quichihuase, niDIOS niquintzon tequis tlen motehuisnequi queja se quintzon tequilíaj ininmacuayohua xocomecatl tlen ax tlaquij. ⁶ Nochi imosoldados tlen tlahuel tejetique, miquise campa hueli ipan mila para ma quincuaca nopa totome huan nopa tecuanime tlen mosisiníaj. Tzopilome quicuase ininnacayo nopa mijcatzitzti nochi tonali quema tlatotoniya. Huan teipa tecuanime quicuajcuase nopa omitl

ipan nochí nopa tonali quema tlaseseya.” ⁷ Pero ajsis se tonal quema TÓTECO Tlen Quinyacana Ielhuicac Ejcahua Ma Tlatlanitij quiselis ofrendas tlen nopa tlacame tlen huejcapantique huan yejyectzitzin inincuetlaxo. Yase ipan altepetl Sion yajuanti tlen tlali Etiopía tlen quinmajmatiyayaj nochí tlaltini pampa tlahuel tlatlaniyayaj huan tlaxolehuayayaj. Quena, nopa tlacame tlen Etiopía tlen quipiyaj miyac pilhueyatzitzin ipan inintlal quihueyichihuase TÓTECO Tlen Quinyacana Ielhuicac Ejcahua Ma Tlatlanitij.

19

TÓTECO quintlatzacuiltis tlali Egipto ehuani

¹ Ya ni nopa tlajtoli tlen TÓTECO nechmacac ica tlachque ininpantis tlali Egipto ehuani:

Xiquitaca, TÓTECO huala ipan se mixtli para quintlatzacuiltis tlen itztoque ipan tlali Egipto. Totiotzitzin tlen Egipto huihuipicase iixpa ya huan nochí Egipto ehuani tlahuel majmahuise ipan ininyolo. ² TÓTECO quijtohua: “Na niquinchihuas ma motehuica se tlali Egipto ejquetl ica seyoc Egipto ejquetl. Se tlacatl motehuis ihuaya iicni huan seyoc motehuis ihuaya tlen icalnechca. Se altepetl motehuis ihuaya seyoc altepetl huan tlen tlayacana ipan se piltlaltzi motehuis ihuaya tlen tlayacana ipan seyoc piltlaltzi. ³ Huan niquinchihuas tlali Egipto ehuani ma quipoloca inintlalnamiquilis huan axaca quinconsejomacas tlachque ma quichihuaca. Yeca yase quintlatlanitij ininteteyohua, huan nopa tlacame tlen quincamahuíaj mijcatzitzin, huan tetlajchihuiani

huan tetonalitani para quimatisse tlachque quichihuase, pero na nijxolehuas nochi tlamantli tlen quinequise quichihuase.

⁴ “Na nijtemactilis tlali Egipto imaco se tecojtli tlen yoltetic. Yajaya elis se tlanahuatijquetl tlen tlanahuatis chicahuac huan niyon quentzi ax tetlasoxtlas.” Queja nopa quiijtohua TOTECO Tlen Quinyacana Ielhuicac Ejcahua Ma Tlatlanitij.

⁵ Nopa atl tlen nopa atemitl Nilo tlantiyas hasta elis huactoc huan nochi nopa pilhueyatzitzitzi tlamihuaquise. ⁶ Huan nopa atl tlen onca ipan aojtli miyyotis ica nopa ohuatl huan acatl tlen lochoni. ⁷ Pilinis nochi tlamantli xihuitl tlen xoxohuixtoc iteno nopa atemitl Nilo huan quihiucas ajacatl. Huan nochi mili huaquis huan nochi tlapiyalime miquise. ⁸ Nochi michtlajtlamani chocase pampa ax onca tequitl. Quena, yajuanti tlen tlajtlamayayaj ica anzuelo huan tlen tlajtlamayayaj ica matlatl mocuesose pampa ayoc quimatisse tlachque quichihuase. ⁹ Nopa tlajtzomani ayoc quipiyase icpatl tlen lino, niyon ichcatl, pampa ax oncas pixquistli. ¹⁰ Nochi yoyonchihuani mocuesose, huan nochi tequipanohuani ayoc quimatisse tlachque quichihuase.

¹¹ Nelía huihuitique nopa tlayacanani tlen itztoque ipan altepetl Zoán ipan Egipto. Nopa tetlalnamictiani tlen quitlalnamictijque nopa tlanahuatijquetl tlen tlali Egipto, quimacac tlayacanani ipan Zoán consejos tlen huihuitic huan ax cuali. ¿Quejatza huelis mohueyimatise huan quiilhuisquiáj Faraón: “Tojuanti tiininconehua huan tiiniixhuihua tlalnamiquini huan tlanahuatiani tlen itztoyaj

huejcajquiya?” ¹² ¿Canque itztoque nopa tlacame tlen mitztlalnamictiyayaj, Faraón? ¿Canque yajqui inintlalnamiquilis? Intla nelía tlalnamiquij, huajca huelis mitzilhuise tlachque quichihuas TOTECO ica tlali Egipto, yajaya Tlen Quinyacana Ielhuicac Ejcahua Ma Tlatlanitij. ¹³ Nopa tlayacanani tlen altepetl Zoán nelía huihuitique. Huan nopa tlayacanani tlen altepetl Menfis mocajcaya jtoque. Yajuanti eliyayaj tlen más cuajcualme, pero ama quixolejtoque tlali Egipto pampa temacaque consejo tlen ax xitlahuac. ¹⁴ TOTECO quintitlanili se ajacatl tlen quinchijqui ma elica huihuitique para queja nopa nochí tlamatli tlen yajuanti quiijtose ma mochihua, ayoc quisas cuali. Yeca ama quicuapololo jtoque Egipto huan quichihuaj ma ixacanejnemi queja se ihuintquetl tlen huetzi ipan iisotlal. ¹⁵ Huan ama axaca ipan tlali Egipto huelis quipalehuis, niyon tlen rico, niyon tlen teicneltzi, niyon tlen hueyi tlacatl tlen nochí quiixmati, niyon tlen más pilsiltzi iniixtla sequinoc. Axaca hueli quinextilía Egipto se cuali ojtili.

Tlali Egipto ehuani quihueyichihuase TOTECO

¹⁶ Ajsis se tonali quema egiptome elise queja sihuame tlen ax quipiyaj niyon quentzi chicahualistli. Quiitase para TOTECO Tlen Quinyacana Ielhuicac Ejcahua Ma Tlatlanitij ya momatlalantoc para quintzontlamiltis, huan huihuipicase iixpa. ¹⁷ Huan intla san quicaquise se quito-caxtía nopa tlali Judá, nochí egiptome tlahuel majmahuise. Momajmatise ipampa nopa tlamatli tlen TOTECO Tlen Quinyacana Ielhuicac Ejcahua

Ma Tlatlanitij quijtojtoc para quichihuas ica yajuanti.

¹⁸ Ipan nopa tonali, macuili altepetini tlen tlali Egipto tlatestigoquetzase para quitoquilise TOTECO Tlen Quinyacana Ielhuicac Ejcahua Ma Tlatlanitij. Huan pehuase camatise ica hebreo tlajtoli. Se tlen nopa altepetini elis Herez. (Herez quinequi quijitos “altepetl tlen tonati”.)

¹⁹ Huan ipan nopa tonali oncas se tlaixpamitl para TOTECO tlatlajco tlali Egipto. Huan nojquiya campa nopa nepamitl ica tlali Egipto quiquetzas se hueyi tetl para quinilnamiquiltis TOTECO. ²⁰ Huan ya ni eltos queja se tlanescayotl tlen tenextilis para TOTECO Tlen Quinyacana Ielhuicac Ejcahua Ma Tlatlanitij itztoc ipan tlali Egipto. Huan quema tlacame quintlaijiyohuiltise, Egipto ehuani quitzajtzilise TOTECO, huan yajaya quintitlanilis se temaquixtijquetl; se tlen itztoc hueyi para quinmanahuis.

²¹ Huan ipan nopa tonali TOTECO mopannextis ica nopa egiptome. Huan quinixmatis huan yajuanti nojquiya quiixmatise. Huan quihueyichi-huase TOTECO huan quimacase tlacajcahualistli huan ofrendas. Nojquiya tlatestigoquetzase para quichihuase tlamantli para TOTECO, huan quena, quichihuase. ²² Achtohui TOTECO quicocos tlali Egipto, pero teipa sampa quichicahuas. Huan nopa egiptome mocuepase ica TOTECO huan yajaya quintlacaquilis quema momaijtose ica ya huan quinchicahuas.

²³ Ipan nopa tonali oncas se ojli tlen patlahuac tlen quisas tlali Egipto huan ajsis hasta tlali Asiria. Huan nopa Egipto ehuani ica paquelistli yase ipan

tlali Asiria huan nopa Asiria ehuani yase ica paquilibrium ipan tlali Egipto. Huan sentic quihueyichihuase TOTECO.

²⁴ Ipan nopa tonali quema Asiria huan Egipto cuali mohuicase, Israel mohuampochihuas ininhuaya nojquiya. Huan ipan nopa tonali Israel cuali mohuicas ica Asiria huan Egipto elis se tlatiochihualistli tlatlajco ni tlattepactli. ²⁵ Huan TOTECO Tlen Quinyacana Ielhuicac Ejcahua Ma Tlatlanitij quintiochihuas huan quijitos: “Ma eli tlatiochihualme Egipto ehuani pampa notlaca-jhua. Ma eli tlatiochihualme nopa Asiria ehuani pampa na niquinsencajqui. Huan ma elica tlatiochihualme israelitame pampa noaxcahua.”

20

Asiria quintlanis tlali Egipto huan Etiopía

¹ Se xihuitl Tlanahuatijquetl Sargón tlen tlali Asiria quititlanqui nopa tlayacanquetl tlen isoldados para ma yaca ipan Asdod, se inialtepe nopa filisteos. Huan yajqui quitehuito huan moaxcatito. ² Huan ipan san se nopa xihuitl, TOTECO quinojnotzqui Isaías, icono Amoz, huan quilhui: “Xiya ximoquixtiliti moyoyo tlen cuesoli huan ximoquixtiliti motecac. Huan xinentinemi tixolotl huan san moicxipa.” Huan na nijchijqui senquistoc queja TOTECO nechnahuati. ³ Huajca teipa TOTECO quijito: “Notlatequipanojca Isaías nentinentoc iicxipa huan xolotl para eyi xihuitl. Ya ni eltoc se tlanextili tlen nopa hueyi tlaijiyohuclistli tlen hualas ipan tlali Egipto huan ipan tlali Etiopía. ⁴ Pampa nopa tlanahuatijquetl

tlen tlali Asiria hualas huan quinhuicas ilpitoque nochí nopa tlacame tlen quinitzquis tlen tlali Egipto huan tlali Etiopía. Quinchihualtis nochí ma nejnemica iniicxipa huan xolome yonque telpocame o huehuentzitzitzi. Huan nempa nesis nochí inintzinpa para ma mopinahuaca nopa egiptome. ⁵ Huan huajca nopa filisteos tlen motemachiyayaj ipan ichicahualis tlali Etiopía huan ipan itlapalehuil tlali Egipto, tlahuel mocuesose huan mopinahuase. ⁶ Quema nopa panos, nochí filisteos tlen itztoque iteno hueyi atl quiijtose: ‘Xiquitaca tlachque ininpantitoc nopa tlaltini Egipto huan Etiopía tlen ipan timotemachiyayaj para techmanahuisquíaj tlen nopa tlanahuatijquetl tlen tlali Asiria. Huajca ¿tlachque tijchihuase tojuanti? ¿Quejatza timomanahuise tojuanti?’ ”

21

Huetzis tlali Babilonia

¹ Ya ni nopa tlajtoli tlen TOTECO nechmacac tlen ipantis tlali Babilonia tlen eltoc ipan nopa huactoc tlali nechca hueyi atl:

Queja se ajcomalacatl tlen tlachpantihuala tlen nopa Neguev, hualas ipan Babilonia tlen nopa huactoc tlali se tlamatli tlen tlahuel fiero. ² Quena, niquita se tlanextili tlen tlahuel temajmati huan fiero. Ipan ni tlanextili Toteco Dios nechnextilía tlachque panos ica nopa tlali Babilonia. Niquitac quejatza hualajtoyaj tlacame tlen quintlaxtequilijtoyaj huan quintzontlamiltijtoyaj. Huajca xiyaca xitlatehuitij insoldados tlen tlali Elam huan

tlali Media. Quena, huetzis Babilonia huan ayoc chocase tlen ehuani nochí nopa tlaltini tlen Babilonia quintlaijiyohuilitiyaya. ³ Noijti tlahuēl nechcocohua huan tlahuēl tliquisa. Nimomimilohua ica tlacuajcualocayotl tlen quitzquitoc notlacayo queja se sihuatl quema coneipiya. Quema nijcaqui nochí tlen TOTECO quiijtojtoc quichihuas, nijnequi nitlapolos. Tlahuel nimomajmatía hasta nopa tlaijiyohuilitli nechchihualtía ma nipopoyotiyas. ⁴ Na ayoc nijmati tlachque nijchihuas. Nechitzquitoc se hueyi majmajtli huan noyolo huitoni. Nochi nopa yejyectzitzi yohuali quema nimosehuiyaya ica paquilibrium, ya tlanqui. Ama yonque nimoteca ipan notlapech, ax hueli nicochi. San nitlachixtoc seyohual huan nihuihuipica.

⁵ ¡Xiquitaca! Quicualtlalíaj mesas para se hueyi ilhuitl. Quicualtlalíaj campa mosehuise nopa tlacame para tlacuase. Ya pehua tlacuaj huan tlaij. Huajca nimantzi ximoquetzaca, intlayacanani, huan xiayaca nimantzi. Xijcuica imoteposixtzajca huan ximocualtlalica para intlatehuise.

⁶ Huan TOTECO nojquiya quej ni nechilhui ipan nopa tlanextili: “Xijtlali se tlamocuitlahuijquetl ipan nopa tepamitl tlen quiyahualohua nopa altepetl Babilonia para ma tlāyolmelahuas tlen quitas. ⁷ Intla quinitas hualahuij tlacame ipan miyac tlatehuijca carros tlen quintilanaj ojome cahuayos o intla hualahuij soldados tlen tlejcotoque ipan burros huan camellos, ma tlachixto cuali.”

⁸ Huajca na nijtlali se tlamocuitlahuijquetl ipan nopa tepamitl huan teipa ajsic hora quema ya-

jaya tzajtzic queja se león huan quiijto: “NoTeco, tonaya huan tlayohua niitztoc ipan ni tepamitl campa nechtlalijtoque ma nitlamocuitlahui huan niitztoc nitlachixtoc.”⁹ Huan ama, quena, niquita, nica hualahuij tlacame ipan se tlatehuijca carro ica ome cahuayos tlen quitilanaj.” Hua-jca nopa tlamocuitlahuijquetl quiijto: “Ya huetzqui, ya huetzqui tlali Babilonia. Huan nochí nopa teteyome tlen tlali Babilonia huetzque hasta tlalchi huan nochí tlapanque.”

¹⁰ Innotlacajhua tlen ininpan moquejquetztoque Babilonia ehuani huan inmechhuejcamajcrajque, na nimechilhuijtoc nochí tlen nechilhuijtoc TOTECO Tlen Quinyacana Ielhuicac Ejcahua Ma Tlatlanitij, yajaya tlen toDios tiisraelitame.

Tlachque ipantis tlali Edom

¹¹ Ya ni nopa tlajtoli tlen TOTECO nechmacac ica tlachque ipantis tlali Edom [21:11 O Duma.]:

Se tlen imojuanti ipan altepetl Seir nechtzajtzilía ajachica huan nechilhuí: “Tlamocuitlahuijquetl, ¿tlachque horas amantzi ipan ni tlayohua? Tlamocuitlahuijquetl, ¿tlachque horas amantzi ipan ni tlayohua? ¿Quesqui horas polihui para tlanesis?”

¹² Pero nopa tlamocuitlahuijquetl quiilhui: “Tlanestihuala pero ax huejcahuas tonaya, sampa hualas tlayohua huan tlaohuijcayotl. Pero intla ipan imoyolo inquinequij inquimatisé tlen cuali, xijtemoca TOTECO. Ximoyolcuepacá huan xihualaca campa ya para huelis inmechtlapojojpolhuis.”

Tlachque ipantis tlali Arabia

13 Ya ni nopa tlajtoli tlen TOTECO nechmacac ica tlachque ipantis tlali Arabia:

Teicneltique nopa tlacame tlen altepetl Dedán tlen nejnemij campa hueli ipan nopa huactoc tlali tlen tlali Arabia. Mocahuaj ipan piloxtitzi campa axaca nemi para momanahuise tlen nopa tlaijiyohuilstli tlen huala ininpani. **14** Intlacame tlen tlali Tema, quema ajsis nopa tonal; xiquinhuiquilita tlacualistli huan atl nopa tlacame tlen mochololtíaj huan tlaxicojtoque. **15** Nopa Arabia ehuani mochololtíaj tlen ininmachete inincualancaitacahua tlen ya quinequij quinmictise. Cholohuaj para momanahuise tlen nopa cuahuitoli huan tlen nochí nopa tlaijiyohuilstli tlen onca ipan tlatehuijcayotl. **16** Pero TOTECO quej ni quiijito: “Ica san se xihuitl ya tlantos nochí ihueyitilis huan ichicahualis tlali Cedar ipan Arabia. **17** San mocahuase se ome isoldados tlen tlahuel motemacayayaj para tlatehuise ica cuatlamintli.” Queja nopa quiijito TOTECO tlen toDios tiisraelitame.

22

Tlachque ipantis altepetl Jerusalén

1 Ya ni nopa tlajtoli tlen TOTECO nechmacac ica tlachque ipantis altepetl Jerusalén:

¿Tlachque inmechpano ama? ¿Para tlen incholohuaj huan inyohuaj imocalpani? **2** Ipan nopa altepetl onca miyac tlahuelchihualistli. ¿Tlachque ipanti nopa altepetl tlen sen pactoya? Niuita campa hueli tepejtoque mijcatzitz. Pero ax nochí yajuanti mijque ica machete o ipan tlatehuijcayotl. Sequin mijque ica cocolistli

huan mayantli. ³ Nochi motlayacancahua cholosnequiyaya, pero san motemactilijque ica inincualancaitacahua para ma amo quinmictica ica cuatlamintli, niyon ax tlatehuijque. Nochi motlacajhua quinequiyaya, cholose nojquiya, pero quinitzquijque. ⁴ Xinechtlalcahuica huan xinechcahuaca ma nichoca. Amo xijchihuaca campeca para innechyoltlalise. Xinechcahuaca ma nichoca ipampa notlacajhua tlen quintzontlamiltíaj. ⁵ Pampa ya ni elis se tonal tlen tlaijiyohuilistli huan cuesoli. TOTECO Tlen Quinyacana Ielhuicac Ejcahua Ma Tlatlanitij quititlantoc ipan Jerusalén se tonali tlen nelía ohui huan mahuilili. Quihuelonise nopa tepamitl tlen quiyahualohua Jerusalén, huan ipan ni lugar tlen tlanextili, caquistis tzajtzij nopa tlacame tlen quinmictíaj.

⁶ Nopa tlacame tlen tlali Elam quihualicase cutlamintli huan hualase tlejcotoque ipan tlatehuijca carros huan ipan cahuayos. Nopa Kir ehuani quipixtose ininmaco ininyolixtzajcayo. ⁷ Yajuanti quitemitise nochi nopa tlamayamitl tlen más yejyectzitzí ipan imotlal ica carros para tlatehuise. Huan campa ipuertas Jerusalén moquetztose miyac soldados tlen tlejcotose cahuajtipa para tlatehuise.

⁸ Inmechquixtilise tlali inJudá ehuani nochi tlen inquipixtoyaj para ica inmomanahuise. Imojuanti inmotlalose para inquietmotij tepostli ipan nopa cali ipan cuatitlamitl campa inquiajcocuij tlatehuijca tepostli. ⁹ Inquietose campa coyontoc nopa tepamitl tlen quiyahualohua ialtepe David huan

inquisencahuase. Inquitemitíaj nopa pila tlen tlazintla ica atl para inquipiryase atl ipan se tlatehuijgayotl. ¹⁰ Nojquiya inquinijitaque nopa caltini tlen mocahuayayaj ipan Jerusalén, huan sequin caltini inquinxolejque para inquisencajque nopa tepamitl ica nopa tetl. ¹¹ Pero nochí tlen inquichihuaj ax tleno ipati elis pampa ax inquitlajtlanijtoque itlapalehuil TOTECO tlen quittlanqui ni hueyi tlazacuiltli imopani. Elqui yajaya tlen quisencajqui huejcajquiya para quej ni panosquía. ¹² Toteco Dios, yajaya tlen TOTECO Tlen Quinyacana Ielhuicac Ejcahua Ma Tlatlanitij inmechnotzqui para ximoyolcuepaca huan ximochquilica. Inmechilhui para xijhuatanica imotzonteco huan para ximoquentica yoyomitl tlen cuesoli para ma nesi inmocuesohuaj ipampa imotlajtlacolhua huan inmoyolpatlatoque. ¹³ Pero imojuanti ax inquichihuaj ya nopa. Imojuanti noja más inhuicaj ica paquilstli, inmijtotíaj huan inmahuiltíaj. Inquinmictíaj huacaxme huan borregojme tlen elqui para tlacajcahualistli. Huan inquiucuaj ininnacayo huan intlaij. Huan yonque inquimatij huala tlazacuiltli, ax inmoyolpatlaj. San inquijtohuaj: “Ma titlacuaca huan ma titlaica pampa mostla timiquise.” ¹⁴ Yeca TOTECO Tlen Quinyacana Ielhuicac Ejcahua Ma Tlatlanitij nechilhui: “Ni tlajtlacoli ax niqintlapojpolhuis hasta miquise.” Queja nopa quiijtohuia TOTECO Tlen Quinyacana Ielhuicac Ejcahua Ma Tlatlanitij.

¹⁵ Nojquiya TOTECO Tlen Quinyacana Ielhuicac Ejcahua Ma Tlatlanitij nechilhui ya ni: “Xiya xiq-

uitati Sebna nopa tlayacanca tequitquetl ipan caltlanahuatili huan xiquilhuiti: ¹⁶ ‘¿Para tlen timochijchihuilá nopa yejyectzi tlacajcahuaya para ipan mitztlalpachose ipan nopa tepexitl? ¿Ajqueya mitzmacatoc nopa tequihuejcayotl? ¹⁷ Xiquita, TÓTECO monechcahuía para mitzitzquis, mitzixtzacuas huan mitzmajcahuas huejca. Sejcoyoc ehuani mitzhuicase para tiquintequipanos ipan inintla. ¡Queja nopa mopantis ta, tihueyi tlacatl! ¹⁸ Quena, imaco TÓTECO tielis queja se pelota huan mitzmajcahuas huejca ipan se tlali tlen hueyi. Nepa timquis nechca nopa tlatehuijca carros tlen ica timohueyimatiyaya. Tielis se pinahuali para motlal huan moteco. ¹⁹ Quena, na nimitzquixtis tlen motequi huan tlen molugar tlen hueyi campa amantzi tiitztoc.

²⁰ “ ‘Huan ipan nopa tonali nimantzi nijnotzas notlatequipanojca Eliaquim, icono Hilcías, para tequitis ipan molugar. ²¹ Nimitzquixtilis moyoyo huan yajaya nijtlalilis. Nojquiya nijtlalilis motzinquechilpica huan motequihuejcayo, huan yajaya elis queja inintata nochí nopa tlacame tlen altepetl Jerusalén huan tlali Judá. ²² Nijmacas tequihuejcayotl queja Tlanahuatijquetl David quipixqui para ma quinnahuati notlacajhua. Yajaya nijmacas nochí tequihuejcayotl huan nochí llaves. Quitlapos puertas huan axaca huelis quitzacuas. Huan quema yajaya quitzacuas puertas, axaca huelis quintlapos. ²³ Nijtlalis queja se estaca tlen cuali ijcatoc. Huan nijchihuas ma eli temachtli huan ipampa ya, nochí quintlepanitase ifamilia, iteipa ixhuihua David. ²⁴ Pero nochí ifamilia tlen

más hueyi hasta tlen más pilsiltzi motlatzquilise ipan ya para mohanoltise huan elis se tlamamali tlen tlahuol etic para ya.’”²⁵ Huan nojquiya TOTECO Tlen Quinyacana Ielhuicac Ejcahua Ma Tlatlanitij quijtohua: “Ipan nopa tonali na ni-jquixtis yajaya tlen itztoc queja se estaca tlen cuali tlatzquitoc huan huetzis hasta tlalchi. Huan nojquiya huetzis tlalchi nochí nopa tlamamali tlen quihiucayaya, quinequi quijtos nochí tlen motlatzquiliyayaj ipan ya.” Queja nopa quijtojtoc TOTECO.

23

Tlachque ipantis altepetl Tiro

¹ Ya ni nopa tlajtoli tlen TOTECO nechmacac ica tlachque ipantic altepetl Tiro:

Imojuanti tlen inquinnemiltíaj nopa huejhueyi barcos tlen altepetl Tiro huan inyohuij tlaltini tlen mocahuaj huejca, xichocaca pampa Tiro nopa piltlaltzi campa inajsiyayaj ya ixpolijtoc. Ya ixpolijtoc nochí caltini tlen nopano eltoya huan ax tleno mocahua campa huelis mosehuis imohueyi barco. Nochi tlajtoli tlen inquicajque ipan tlali Chipre elqui melahuac. ² Amo ximolinica, imojuanti tlen initztoque iteno nopa hueyi atl huan intlanamacani tlen altepetl Sidón tlen campa hueli inquiixcotonayayaj ipan hueyi atl para intlacohuase huan intlanamacase. Nopa cuesoli tlen inmechajsitoc eltoc onpano hueyi hasta ayoc aca hueli choca. ³ Achtohuiya nopa huejhueyi barcos tlen tlali Sidón inmechhualiquiliyayaj, inTiro ehuani, miyac tlamanli tlen nopa tlaltini ipan sejcoyoc nopa hueyi atl. Quihualicayayaj miyac

tlamantli tlen temaca tlali Egipto tlen eltoc iteno nopa atemitl Nilo. Imoaltepe Tiro elqui se tianquis campa tlanamacayabaj tlacame tlen nochitlaltini, pero ama nochitlanqui. ⁴ Ximopinahuaca imojuanti tlen inehuani altepetl Sidón nopa altepetl nelnechca altepetl Tiro. Ta tlen nelía tiipiayaya chicahualistli nopalitoque nopa hueyi atl. Ama eltoc queja ayoc aca inmechnequi. Eltoc queja nopa hueyi atl quiijtos: “Nimocahua noselti. Ni-moiyocacajtoc tlen nochitlaltepetini. Nopalitoque nopa tlanacame tlen Tiro ehuani tlen quinnehmiliyabaj barcos polijtoque huan nojquiya polijtoque nopa yancuic colonias tlen elque iaxcahua nopa altepetl.”

⁵ Quema tlali Egipto ehuani quimatise tlen ipan titoc altepetl Tiro, tlahuell mocuesose huan quiijtose: ⁶ “Xichocaca nochitlaltepetl Tiro huan xicholoca hasta altepetl Tarsis.” ⁷ ¿Quejatza ni altepetl Tiro tlen ama tlamicolejtoc eltosquía san se nopalitoque nopa achtohuiya sen pactoya huan ipa eltoya hasta huejcajquiya? Itlacajhua nopalitoque tettitlanayabaj ipan tlaltini campa hueli tlaltini para mochantise nopalitoque nojquiya.

⁸ ¿Ajqueya quihualicac ni tlatzacuiltylistli ipan ni altepetl Tiro? Ni altepetl quintlaliyaya tlanahuatiyaya campa hueli huan eliyaya inintlanahuatiyaca nochitlanamacani ipan tlaltepactli. ⁹ Elqui yajaya TOTECO Tlen Quinyacana Ielhuicac Ejcahua Ma Tlatlanitij tlen quititlanqui ni tlatzacuiltylistli. Yajaya quiechcapantlalis ihueyitilis nopalitoque huan

para quinicnotlalis nochí tlen mohueyimatiyayaj ipan nochí tlaltepactli. ¹⁰ Tiro ayoc quipiyas niyon quentzi fuerza. Huajca ama inaltepetyl Tarsis ehuani hueli inquintlaniquij altepetl Tiro ehuani huan inquintlamixolehuase queja nopa atemitl Nilo tlejco huan moapachohua miyac tlali. ¹¹ TOTECO quixitlajtoc ima ipan nochí huejhueyi atl campa hueli. Quinchihua ma huihuipicaca nochí tlanahuatiani ipan tlaltepactli. Huan yajaya tlen quijtojtoc quixolehuas nochí nopa chicahuac altepetl campa tlanamacaj huan tlacohuaj.

¹² TOTECO quej ni quijtohua: “Nopa paquelistli tlen tlacame quimatiyayaj ipan altepetl Sidón ya tlamis huan amantzi quintlaijiyohuiltise tlen hualase tlen seyoc tlali. Yonque cholose huan yase hasta tlali Chipre, ax quipantise campa mosehuise.”

¹³ Xijtlachilica ni tlali campa achtohui ajsiyaya huejhueyi barcos. Nopa Babilonia ehuani quichijque huejcapantique caltini para quitlanise huan quixolejtoque nopa yejyectzitzí caltini nopano huan quicajtejque queja se tlamontomitl tlen tlasioli. Elqui Babilonia ehuani ax tlali Asiria ehuani tlen quitlanque. ¹⁴ Huajca ximochoquilica imojuanti tlen innemij ipan barcos tlen altepetl Tarsis ipan nopa hueyi atl pampa ya ixpolijtoc nopa pilatlaltzi Tiro tlen ipan inmotemachiyayaj para inajsitij.

¹⁵ Huan ipan nopa tonali nochí quilcahuase altepetl Tiro para 70 xihuitl, queja imiyaca nopa xihuitl tlen itztos se tlanahuatijquetl. Pero teipa quema tlanahuatijtos seyoc tlanahuatijquetl, nopa altepetl sampa motlalanas. Pero quema

tlamis nopa 70 xihuitl, ipan Tiro elis san se queja tlen quihuicatía se momecatijca sihuatl. Quiijtose:
16 “Ta timomecatijca sihuatl tlen mitzilcajtoque momecahua, xijcui moarpa huan xijyahualo nopa altepetl. Xijtzotzona nopa huicatl tlen más yejyectzi huan xihuica miyac huicatl para sampa ma mitzilnamiquica.” **17** Huan quema ya tlantos nopa 70 xihuitl, TOTECO sampa quicahuilis ma motlalanas altepetl Tiro. Pero nopa altepetl ax quipatlas iyolis. Sampa monamacas ica tlen ehuani tlen hueli tlali ipan tlaltepactli. **18** Pero ica miyac tonali, nochí tlen nopa tlacohuani huan tlanamacani quitlaniyayaj quiyocatlalise para TOTECO, ax san quiajcocuise para yajuanti. Huan se tonal inintlanca motequihuis para quicohuase tlacualistli huan yoyomitl tlen cuali para nopa totajtzitzi tlen quitequipanose TOTECO.

24

Tlatzacuiltli ipan nochí tlaltepactli

1 ¡Xiquitaca! TOTECO ya itztoc para quixole-huas ni tlaltepactli huan quichihuas ma eli cactoc huan tlaxolehuali. Yajaya quinquixtis itlachhua huan quintitlanis ipan campa hueli tlaltini.
2 Quinquixtis nochí totajtzitzi huan nochí tlen ax totajtzitzi. Quinquixtis tlaca tequipanohuani huan sihua tequipanohuani, tlaca tecojme huan sihua tecojme, tlanamacani huan tlacohuani, tlen tetlanejtiyayaj se tlenijqui huan tlen motlanelhuiyayaj, tlen quitlahuiquiliyayaj huan tlen tlahuicayayaj. Huan niyon se tlen yajuanti, ax momanahuis. **3** Nochi nopa tlali mocahuas cactoc

huan tlaxolehuali pampa queja nopa quiijtojtoc TOTECO. ⁴ Nopa tlali tlamihuquis huan mocahuas tlanenpolijtoc pampa ax huetzis atl huan inintoshui nochí huaquis. ⁵ Tlaijiyohuis nopa tlali ipampa nochí nopa tlajtlacoli tlen quichijque itlacajhua. Nopa tlacame quicueptoque itlanahuatilhua TOTECO para ma quiijtose seyoc tlamantli. Quipatlatoque nopa tlamachtili tlen quinmacac huan quiixpanotoque nopa tlajtolsencahuali tlen quichijqui para huejcahuasquía para nochipa. ⁶ Yeca ama TOTECO quititlantoc se tlatelchihualistli ipan tlaltepactli ipampa inintlajtlacol tlacame. Tlacame tlaijiyohuíaj ipampa tlen quichijtoque. Huan san se quesqui yajuanti noja mocahuase yoltoque.

⁷ Xocomeca atl tlamic huan xocomeca mili pilinise. Nochi tlen paquiyayaj, ama mocuesose huan chocase. ⁸ Nojquiya ayoc moquaquis más nopa yejyectzitz huicatl tlen quichihuaj ica arpas huan pandero, pampa nochí nopa paquillistli tlen oncayaya mojmostla, tlanqui. ⁹ Nojquiya ayoc huicase quema tlaise. Huan nopa tlaili quimachilise chichic ipan inincamac.

¹⁰ Ipan altepetl axaca quimatis tlachque quichihuas. Mopantise ipan se hueyi cuesoli ipampa nochí tlamantli tlen ax cuali. Nochi caltini quintzactose cuali para axaca ma calaqui para tlaxtequis. ¹¹ Tlacame mosejcotilise ipan calles huan tzajtzitinemise pampa ax onca tlaili. Nochi paquillistli tlamic ipan nopa tlali. ¹² Nopa altepetl mocahuas sosolijtoc huan ipuertas nochí quimajcajtoque tlalchi. ¹³ Ya ni panos ipan nochí tlaltini ipan ni tlaltepactli. San mocahuase se ome tla-

came tlen yoltoque. Elis san se queja quema quitlamitequij itlajca se olivo cuahuitl huan san mocahua se ome nica huan neca. O elis queja quema quitlamitequij itlajca nopa xocomecatl huan san mocahua se ome. San se quesqui tlacame mocahuase yoltoque.

¹⁴ Huan nopa se ome tlacame tlen noja moca huase, tzajtzise huan huicase ica paquillistli. Tlen itztoque nechca nopa hueyi atl ica campa on calaqui tonati quihueyichihuase TOTECO ipampa ihueyitilis. ¹⁵ Nojquiya nochí tlen itztoque ica campa quisa tonati hasta tlen itztoque iteno hueyi atl quihueyichihuase TOTECO tlen ininDios israelitame. ¹⁶ Xijtlacaquilica quejatza huicaj nopa tlacame tlen itztoque campa ontantoc tlaltepactli tlen se lado hasta seyoc huan quijtohuaj: “Xijhueyitlalica yajaya tlen xitlahuac.”

Pero na niquijtohua: ¡Niteicneltic na! Nijpiya se hueyi cuesoli ipan noyolo pampa campa hueli noja tlatlani tlen ax cuali huan campa hueli tlacame quisenhuiquilíaj tlacajcayahuaj. ¹⁷ Nochi tlacame tlen itztoque ipan ni tlaltepactli quipantse majmajtli, tlaquetztlí huan tlacoyoctli tlen huejcatla para ipan huetzise. ¹⁸ Huan queja nopa nochí tlen momanahuise tlen nopa hueyi majmajtli huetzise ipan tlaquetztlí. Huan nochí tlen momanahuise tlen nopa tlaquetztlí huetzise ipan nopa hueyi tlacoyoctli. Pampa elis queja TOTECO quitlapos nopa ventanas ipan el huicac huan huetzis onpano miyac tlaxolehualistli. Huan nochí tlaltepactli tlahuél mojmolinis hasta campa tlatzquitoc. ¹⁹ Nochi tlaltepactli tlamihuehuelcas, tlamitlatlapacas huan tlami

mojmolinis. ²⁰ Huan ni tlaltepactli ma ixacayanej-nentinemis queja se ihuintiquet huan mohuisos queja se xajcali quema tlaajaca chicahuac. Quihuicas ietica nochitlacame inintlajtlacolhua huan huetzis huan ayoc quema motlalanas.

²¹ Ipan nopa tonal TOTECO quintlatzacuiltis nochitlacolli. Huan ipan ni tlaltepactli quintlatzacuiltis nochitlacolli. Huan ipan cuajcualme tlen tlanahuatiyayaj campa hueli ipan nochitlacolli. ²² Huan nochitlacolli ipan cuajcualme quinmontonos ipan se hueyi tlacoyocli tlen eltoc tlalijtic huan nopano quintzacuas. Huan nopano itztose miyac tonali hasta ajsis hora para quintlajtolsencahuas huan quintlatzacuiltis. ²³ Huan huajca TOTECO Tlen Quinyacana Ielhuicac Ejahua Ma Tlatlanitij mosehuis ipan isiya ipan tepetl Sion. Huan tlanahuatis ipan altepetli Jerusalén iniixtla nopa huehue tlacame tlen quinyacanaj itlacajhua. Huan tlahuis itlatlanex hasta nesis queja tonati huan metztli tzintlayohuilijtose.

25

Nopa huicatl tlen ica quihueyichihuase TOTECO

¹ TOTECO, na nimitzpaquilismacas huan nimitzhueyitlalis pampa ta tinoDios. Ta tijchihua huejhueyi tlamantli. Tlen huejcajquiya tijsencajqui para tijchihuas, ama melahuac tijchijtoc senquistoc queja tiquijto. ² Yonque onca huejhueyi altepetini, ta tihueli tiqintlamixolehua

huan tiquinchihua queja se tlamontomitl tlen tlasioli. Yonque quipiyaj tepamitl tlen tilahuac, ta tijhuelonía huan tijchihua queja tlasoli. Tiquinxolehua nopa yejyectzitzti caltlanahuatili tlen onca ipan campa hueli tlaltini huan ayoc quema quincualtlalise.³ Yeca tlacame ipan tlaltini tlen tlahuel quipiyaj chicahualistli mitzhueytlatlalise. Huan nopa tlaltini ica tlacame tlen mosisiniáj ama, teipa mitzimacasise huan mitzlepanitase.

⁴ Pero ica tlen teicneltzitzti, ta tiquinmanahuía quema quinajsi tlaijiyohuclistli. Tiquinecahuilía quema tona huan quema tlahuel huetzi atl. Huan tiquinmanahuía tlen mosisinijca tlacame pampa inincualancayo eltoc queja se ajcomalacatl tlen quihuelonía tepamitl. ⁵ Tetlaijiyohuilstíaj queja nopa tlatotonilotl ipan se huactoc tlali. Pero ta tiquintlamiltis nopa mosisinijca tlacame tlen mohueyimatij huan tlen hualahuij ipan tlaltini campa hueli. Tlen tlahuelchihuaj tiquinechcapantlalis huan elis queja se mixtli huala huan quiseseltía nochí nopa tlali tlen eltoc tlatzintla.

⁶ Quena, ipan nopa tonal, TOTECO Tlen Quinyacana Ielhuicac Ejcahua Ma Tlatlanitij quichihuas se hueyi tlacualistli ipan Jerusalén para nochí tlacame ipan tlaltepactli. Huan oncas miyac tlamantli tlacualistli tlen tlahuel ajhuiyac. Onicas huacax nacatl tlen más tlapejpenili huan onicas miyac xocomeca atl tlen más cuali. ⁷ Huan ipan nopa tepetl TOTECO quiijcuenis nopa tlaecharuilotl tlen cuesoli tlen eltoc ipan nochí tlacame. Quiijcuenis nopa ecahuili tlen miquistli tlen elqui itzonpac nochí tlacame ipan nochí tlaltepactli. ⁸ Huan yajaya TOTECO Tlen Más Quipiya Tlanahu-

atili quitlamiltis miquistli para nochipa huan quinhuachilis iniixayo nochí tlacame. Nojquiya quitlamiltis para nochipa nochí tlaijiyohuìlistli huan pinahualistli tlen quiajsiyaya itlá huan itlacajhua. Queja nopa quiijtojtoc TOTECO para quichihuas.

⁹ Huan ipan nopa tonal tlacame quiijtose: “Yajaya ni toDios. Ipan ya timotemachijke huan techmaquixtijtoc. Timochixque ipan ya, huajca ama ma tipaquica pampa techmaquixti.”

¹⁰ Pampa TOTECO quitlalis ima ipan altepetl Jerusalén huan itlanahuatijcayo para quitiochihuas. Pero tlali Moab ipan moquejquetzas queja elisquía tlasoli. ¹¹ TOTECO quixitlahuas ima para quincuatopehuas tlali Moab ehuani para tlatzintla, queja se tlacatl tlen ajqui quicuatopehua nopa atl. Quinechcapantlalis tlacame tlen Moab para ayoc mohueyimatise. Quitlamiltis nochí tlamantli tlen ax cuali quichihuaj. ¹² Huan nopa tepamitl tlen huejcapantic huan tilahuac tlen quipiya Moab, TOTECO quihuelonis huan quixolehuas hasta quichihuas tlatixtic.

26

Israelitame quihuicatise TOTECO

¹ Ipan nopa tonali nochí tlacame ipan tlali Judá huicase ni huicatl:
“Ama tijpiyaj se altepetl tlen cuali huan quipiya chicahualistli.
TOTECO tlen techmaquixtijtoc, techyahualohua queja se hueyi tepamitl para techmocuitlahuis.

² Xijtlapoca puertas para ma calaquica nochí nopa
tlacame tlen itztoque xitlahuaque.
Xiquincahuaca ma calaquica nochí tlen
temachme.

³ TOTECO, mojmostla tiquinmacas yoltlase-
huilistli nopa tlacame tlen motemachíaj
ipan ta, nochí tlen quisenhuiquilíaj
mitztemohuaj.

⁴ Yohuali tonali ximotemachica ipan TOTECO
pampa san yajaya TOTECO Tlen
Más Quipiya Tlanahuatili huelis
inmechmanahuis para nochipa.

⁵ Yajaya quinechcapantlalía nopa tlacame tlen
mohueyimatij.

Quintepexihuía nopa altepetini tlen ipan itztoyaj.
Quinmajcahua hasta tlalchi huan quihuelonía in-
intepa.

⁶ Ama nopa teicneltzitzí tlen quintlaijiy-
ohuiliyayaj ipan moquejquetzaj tlen
mocahua tlen inialtepe.”

⁷ TOTECO tijchihua nopa ojtli tlen quitoquilíaj tlen
xitlahuaque moixtla ax cana fiero, niyon ax
ixtlejcolis.

Pampa ta, TOTECO, ax titemaca se ojtli tlen fiero o
tlen ax cuali. Ta tijxitlahua nopa ojtli huan
tijchihua yejyectzi.

⁸ TOTECO, tojuanti tijtoquilíaj moojhui tlen xit-
lahuac huan timochiyaj san ipan ta.

Techpactía miyac tijchihuase tlen ta tijnequi.

Ipan toyolo san tijnequij timitzhueyichihuase.

⁹ Seyohual nimitztemohua ica nochí noyolo.

Huan quema niisa ica ijnaloc noja nimitztemohua.

Pampa fiero tlacame ax quicahuase quichihuase tlen ax cuali huan quipehualtise quichihuase tlen xitlahuac, hasta quema ta tihualas para tiquintlajtolsencahuaqui huan tiquintlatzacuiltiqui tlen itztoque ipan ni tlali.

¹⁰ Pero yonque tiquinnextilía teicnelijcayotl nopa tlacame tlen fiero ininyolis, ax moxitlahuaj.

Quisenhuiquilíaj quichihuaj tlamatli tlen ax cuali ipan nopa tlali campa sequinoc quichihuaj tlen xitlahuac.

Huan ax quichihuilise cuenta mohueyitilis, TOTECO.

¹¹ Yajuanti ax mitztlacaquiliáj quema tiquintlacahuáltia.

Huan quema tijtlalana moma para tiquintlatzacuítis, yajuanti ax quiitaj, niyon quichihuiliáj cuenta.

Pero xiquinnextili quejatza tiquinicnelía motlachhua, huan mopinahuase.

Huan nopa tliltl tlen ticajoctoc para mocualancaitacahua ya eltoc para quintzontlamiltis.

¹² TOTECO, ta tlen techmaca tlasehuilistli.

Nochi tlen cualquisa tlen tojuanti tijchihuaj eltoc pampa ta tijchijtoc nopa tequitl ipan tojuanti.

¹³ TOTECO ta tlen titoDios, quipiya miyac tonali technahuatiyayaj sequinoc tecojme,

pero ama san ta timitzhueyitlepanitase.

¹⁴ Nochi yajuanti tlen tiquintequipanojque, ama ya mictoque huan ayoc hualase sampa,

ixpolijque huan ayoc quema motlalanase.
 Pampa ta tiquintlatzacuilti huan tiquintlamiix-
 polihuilti.
 Ama ayoc aca quinilnamiqui.
 15 TOTECO, ta tiquinmiyaquilijtoc motlacajhua
 ipan totlal.
 Tijchijqui para más ma monextis mohueyitilis.
 Huan tijchijtoc totlal nojquiya ma eli más hueyi.
 16 TOTECO, quema israelitame tlaijiyohuiyaya,
 timitztemojque.
 Quena, quema ta titechtlatzacuilti, timomaijto-
 jque ica ta.
 17 Tiitztoyaj moixtla queja se sihuatl tlen momim-
 ilohua ica tlacuajcualocayotl quema quitla-
 catiltia icona.
 18 Tojuanti tiitztoyaj ica tlacuajcualocayotl huan
 tichocayaya queja se sihuatl,
 pero san tlapič titlaijiyohuijque pampa ax tleno
 tijtlacatiltijque.
 Ax tihuelque titlatlanise para totlal huan ax tleno
 quisqui tlen totlaijiyohuilis.
 Axaca tlacatqui para mochihuase más tlacame
 ipan ni tlaltepactli.
 19 Pero tijpiyaj ni tlajtoli tlen temachtli:
 Nochi tlen ya mictoque tlen moaxcahua TOTECO,
 sampa moyolcuise
 Huan inintlacayohua sampa motlalanase campa
 quintlapachojtoque.
 Quena, nochi tlen itztoque ipan tlacajcahuaya
 sampa isase huan huicase ica paquillistli.
 Itlahuil TOTECO tlen temaca yolistli motlalis ipan
 yajuanti queja elisquía ajhuechtli.

Tlatzacuiltli huan tlayancuilistli

²⁰ Innotlacajhua, xiyaca imochaj huan xijtzacuaca imopuertas campa initztose temachtli. Ximotlatica se tlalochtli hasta quema ya panotos icualancayo TOTECO huan ya quintzontlamiltijtos noch i cuaucitacahua. ²¹ TOTECO quisas tlen ichaj huan hualas ipan ni tlaltepactli para quintlatzacuitli qui noch tlacame ipampa inintlajtlacolhua. Huan monextis ajqueya temictijtoc ipan ni tlaltepactli huan ayoc huelis motlatis. Mopannextise noch i tlen quihuicaj tlajtlacoli.

27

Israelitame elise malacantoque

¹ Ipan nopa tonali TOTECO quicuis imachete tlen temajmati, hueyi huan tlatequi, huan quittlatzacuitis nopa hueyi tlapiyali tlen itoca leviatán; nopa cohuatl tlen nemí chicahuac huan moyahualohti. Huan quimictis nopa hueyi tlapiyali tlen itoca dragón tlen itztoc ipan hueyi atl.

² Ipan nopa tonali TOTECO huicas tlen nopa xocomeca mili tlen tlahuatl quiicnelía. Quej ni quiijtos: ³ “Israelitame itztoque noxocomecamil. Na niquinmocuitlahuía. Ajachica nijtequilía atl noxocomecamil, huan nijmanahuía tonaya huan tlayohua para ax tleno quichihuise nocualancaitacahua. ⁴ Na ayoc nicualani ininhuaya. Huan intla niquitas quinpiyase inincualancaitacahua tlen quincuatotoníaj queja huitzli huan sahua mecatl, huajca na niquinhuihuitlas huan niquintlatis. ⁵ Huan san huelis momanahuise

inincualancaitacahua intla moyoltlalise nohuaya huan nechtlajtlanise ma nimoyoltlali inihuaya."

⁶ Ajsis tonali quema israelitame [27:6 O iix-huihua Jacob.] sampa quipiyase ininnelhuayo huan chamanise huan xochiyohuas queja se cuahuitl quichihua. Nochi tlattepactli temis ica itlajca. ⁷ TOTECO ax quintlatzacuiltytoc israelitame queja quintlatzacuiltytoc inincualancaitacahua, niyon ax quinmictijtoc israelitame queja quinmicti sequinoc tlen temictijtoque. ⁸ Pampa TOTECO san quintlatzacuiltytoc nelquentzi. San quinquixti tlen inintla huan quintitlanqui ipan sequinoc tlaltini. Eltoc queja quinhuicac nopa hueyi ajacatl tlen huala ica campa quisa tonati. ⁹ Huan ¿tlachque monequi quichihuase israelitame para quiselise tlapojo polhuili tlen inintlatlacolhua? San se tlamantli monequi quichihuase: Ma quichihuaca tlatixtic nochi nopa tetini tlen quintequihuijtoque para tlaixpamil, ma quintlamiaxpolihuiltica nopa teteyome tlen Asera huan nopa tlaixcopincayome tlen tonati. Huan queja nopa ayoc quema quinhueyichihiuase. ¹⁰ Pampa nochi ialtepehua tlen moyahualojtoque ica tepamitl mocahuase cactoque queja huactoc tlali. Nochi caltini quintlahuelcahuase huan nochi nopa calles temis ica miyac tlamantli xihuitl. Huan nopano mosehuise huan tlacuajtinemise huacaxme. Huan quitlamicuase ininmacuayohua nochi cuatini.

¹¹ Notlacajhua itztoque queja se cuahuitl imacuayohua tlen huactoque. Huan yeca postequivij huan nopa sihuame hualahuij huan quinhuicaj para quintlatise. Notlacajhua

tlahuel huihuitque huan ax tlalnamiquij pampa mohuejcatlalijque tlen TOTECO Tlen Quinchijchijqui. Yeca TOTECO ax quintlapojpolhuis, niyon ax quintlasojtas.

¹² Pero ajsis tonali quema TOTECO quinsentilis sese yajuanti queja quichihua se tlacatl quema quitlapejpenía etl ipan ima. Quintlapejpenis sesen yajuanti campa hueli ipan nopa imil tlen pe-hua campa atemitl Éufrates huan ontlami campa nopa nepamitl ica tlali Egipto. ¹³ Ipan nopa tonali quipitzase nopa hueyi tlacitzali, huan nochí ya-juanti tlen itztose ipan tlali Asiria huan tlen quin-huicatose tlali Egipto, hualase quihueyimatiqij TOTECO ipan nopa tepetl tlen tlatzejzeloltic tlen eltoc ipan altepetl Jerusalén.

28

TOTECO quitlatzacuiltis altepetl Samaria huan Jerusalén

¹ ¡Teicneltique altepetl Samaria ehuani pampa hualahuíj tlen quixolehuase inialtepe! Nochi ihuintini tlen tlali Israel [28:1 Efraín.] mohueyimatiqipampa nopa altepetl huan quimatiq quipixtosquíaj se inincorona pampa tlahuel yejyectzi nopa tlamayamitl tlen quiyahualojtoc. Pero nimantzi pilinis iyejyejca nopa altepetl tlen quipiya itlacajhua tlen ihuintitoque huan tepejtoque ipan nochí calles. ² Nelía teicneltzi pampa TOTECO quintitlanis miyac soldados tlen tlahuel quipiyyaj chicahualistli para quitehuise. Hualase ipani queja tesihuitl, o queja se hueyi ajacatl o queja atl tlen huetzi chicahuac. O hualase ipani queja

se atemitl tlen temitoc ica atl huan nochí quimajcahua hasta tlalchi. ³ Altepetyl Samaria elqui se altepetl tlen tlahuél ica mohueyimatiyayaj ihuintini tlen tlali Israel huan quiitayayaj queja se corona. Pero icualancaitacahua nopa altepetl quimajcahuase hasta tlalchi huan ipan moquejquetzase. ⁴ Samaria elqui se altepetl tlen tlahuél yejyectzi huan moyahualojtoc ica se tlamatayamitl, pero ama tlanqui nochí iyejyejca. Ixpolihuis ipan se tlalochtli queja nopa higo tlen icsi achtohui, huan quema se acajya quiita, nimantzi quitequi huan quicua.

⁵ Huan ipan nopa tonali, mohueyimatise israelitame ica TOTECO Tlen Quinyacana Ielhuicac Ejcahua Ma Tlatlanitij. Elis yajaya tlen quinpaquilismacas itlacajhua tlen noja mocahuase. ⁶ Yajaya quinmacas nopa tetlajtolsencahuani ininyolo tlen cuali para ma tetlajtolsencahuaca xitlahuac. Huan quichihuas para nopa soldados tlen tlamocuitlahuáj campa ipuerta nopa altepetl ma motemacaca para quintzontlamiltise nochí inincualancaitacahua.

Tlatiochihuali para Jerusalén

⁷ Pero ama ihuuntini quinahuatíaj nopa tlali. Hasta nochí nopa totajtzitzí huan tiocamanalo-huani mocuapolotoque ica tlaili tlen nelchichic huan ixacanejnemij pampa ihuuntitoque. Tlahuel mohuihuichijtoque ipan inintequi, mocuapolotoque huan quichijtinemij miyac tlamtli tlen ax cuali. ⁸ Nochi ininmesas temitoc ica iniisotlal hasta ayoc onca niyon se lugar tlen tlapajpactic.

9 Pero nopa totajtzitzi huan tiocamanalohuani quijtohuaj tlen na niIsaías: “¿Ajqueya itztoc ni tlacatl para techilhuis ni tlamantli? Ax monequi tijtlacaquilise itlamachtil. ¿Huelis moilhuía tiitztoque queja conetzitzi tlen aya huelij ticalmatij huan tlen sanoc tiquinchiiincahualtijtoque?

10 Pampa nochipa techilhuía san se tlamantli. Techmachtía ica tlajtoli tlen ax ohui. Eltoc queja quinmachtisquía coneme tlen pehua tlapohuaj: ba be bi bo bu.”

11 ¡Cualtitoc! Pampa ni tlacame ax quinequij quitlacaquilise tlen na niIsaías niquinilhuía, TOTECO quincamahuis ica tlajtoli tlen ohui para quimachilise ica sejcoyoc ehuani tlen quintlaijiyohuiltise, pampa TOTECO quintitlanilis sequinoc tlali ehuani para quintlatzacuiltise.

12 Eltoc queja TOTECO achtohuiya quinilhui: “Intla innechtlepanitase huan inquipiryase se cualli yolistli, huajca nica ipan imotlāl inquipiryase tlasehuilistli huan tlasiyajcahuали.” Pero yajuanti ax quinejque quitlacaquilise. **13** Huajca TOTECO quincamahuis ajachica ica tlajtoli tlen ax ohui. Huan ajachica quiompahuis itlajtol para quimachilisquíaj. Pero yajuanti noja ax quimachilise nopa tlajtoli tlen ax ohui huan elis queja motepotlamise, huan ajquetzhuetzise huan tlahuel mococose. Quinmasiltise huan quinitzquise huan quinhuicase sejcoyoc.

14 Huajca nochí intetlaijilhuijca tlacame tlen inquinahuatíaj altepetl Jerusalén, xijtlacaquilica itlajtol TOTECO. **15** Eltoc queja imojuanti inquiijtohuaj: “Tojuanti tijsencajtoque se tlajtoli para axaca huelis techmictis huan ax huelis tiyase

campa mijcatzitz. Timonamacatoque ica tlen techmanahuise ininmaco nopa tlali Asiria ehuani. Huajca ax tleno huelise techchihuise pampa timotemachijtoque ipan tlen tlacajcayahua huan ipan istlacaticayotl.”

¹⁶ Pero TOTECO Tlen Más Quipiya Tlanahu-
utili quiijtohua: “Xiquitaca, na nijtlalía se tetl
senquistoc campa monequi ipan altepetl Sion
[28:16 O Jerusalén.] para se tlatzinpehualtili.
Tetic nopa tetl huan cuali tlapojpenili. Tlahuel
miyac ipati. Yajaya eltoc temachtli para ipan
moquetzas nopa hueyi cali. Tlen quineltocas
ya, itztos temachtli huan ax tleno quichihuilis
ma momajmatis. ¹⁷ Queja se quiyejyecos se
cali ica se mecatl tlen tlayejyecoli, na niquij-
itas intla notlacajhua quichihuaj tlen xitlahuac.
Huan queja tlen quitequihuis se nivel para qui-
itas intla cuali mantoc nochí nopa itzinpehualtil,
niquijitas intla quichihuaj tlen cuali. Tlen ipan
inmotemachíaj nesi yejyectzi, pero ax quipiya
chicahualistli. Intla ipani huetzis tesihuitl, ni-
mantzi huelonis pampa san istlacaticayotl. Huan
queja miyac atl tlen pano huan quimajcahuas
nochí tlalchi, imocualancaitacahua inmechquix-
tise.” ¹⁸ Na nijtlamiltis nopa tlajtoli tlen in-
quichijtoque ica miquistli para ax inmechmic-
tise huan inyase campa mijcatzitz. Huan yeca
quema hualase imocualancaitacahua queja se
atemitl, inhuetzise huan imopani moquejquet-
zase. ¹⁹ Huan imocualancaitacahua itztose queja
se atemitl tlen hualase mojmostla; tlayohua huan
tonaya inmechtzontlamiltiquij hasta ajsis tonali
para inmechhuicase ipan sejcoyoc. Huan san

para quicaquise nopa tlajtoli tlen ajsitihuala, inmechchihuilis inhuihuipicase.

²⁰ Ax cana huelis inmotlatise pampa ax inmechpalehuis tlen ipan inmotemachijtoque. Eltoc queja nopa tlapechtli tlen inquichijchijque para ipan incochise pilsiltzi huan ax inmechaxilía. Huan imotlaque nojquiya cototzi huan yeca ax inmechaxilía para inmopiquise. ²¹ TOTECO hualas ica ihueyi cualancayo tlalochtli quema ax inquichiyaj huan inmechtehuis queja hualajqui huejcajquiya ininpan nopa filisteos ipan tepetl Perazim huan nopa amonitame ipan tepetl Gabaón. Yajaya hualas para quichihuaqui se hueyi tlamantli tlen ax quema aca quiitztoc para pano. Huan ax quema quicactoque pampa yajaya quintzontlamiltis tlen ya itlacajhua. ²² Huajca ayoc más xitetlajilhuica para ax inquiselise se tlatzacuiltli tlen noja más hueyi, pampa TOTECO Tlen Quinyacana Ielhuicac Ejcahua Ma Tlatlanitij nechyolmelajtoc para yajaya quisencajtoc inmechtzontlamiltis.

Itlalnamiquilis TOTECO

²³ ¡Xijtlacaquilica notlajtol! Quena, cuali xijtlacaquilica tlen nimechilhuis: ²⁴ Se miltlatequipanojquetl ax ajachica quipoxatinemi itlal huan ax quema tlatoca. Ax nochipa tlamehua huan ax quema quitoca ixinach. ²⁵ Quema ya quicualtlalijtoc itlal, yajaya yohui huan quitoca ixinach nopa eneldo huan comino. Nojquiya ica surcos quitoca trigo, cebada huan avena. Huan sesen tlamantli xinachtli quitoca ipan ilugar campa quitocarohua. ²⁶ Yajaya quimati

tlachque quichihuas huan quejatza quitocas pampa Toteco Dios quimacatoc tlalnamiqualistli.

²⁷ Yajaya quimati para sese tlamatli xinachtli monequi quiyolquixtis queja quinamiqui. Nopa eneldo ax quiyolquixtia ica se cuahuitl tlen etic. Huan nopa comino ax quipanoltlis ipani se cuacarro para quiyolquixtis pampa eneldo huan comino monequi quihuitequise ica yamanic ica se acatl para quiyolquixtise. ²⁸ Monequi quitejtepachos trigo para quiyolquixtis, pero ax hueli quisenhuiquilis quitejtepachos miyac. Huelis quipanoltia ipani se cuacarro, pero ax hueli quicahuilis ma eli tlatixtic. ²⁹ Pampa TOTECO Tlen Quinyacana Ielhuicac Ejcahua Ma Tlatlanitij, yajaya itztoc se yejyectzi tlamachtijquetl huan temaca se cuali tlalnamiqualistli.

29

TOTECO quiyolmelahua altepetl Jerusalén

¹ ¡Teicneltique tlen ehuani altepetl Jerusalén [29:1 Quiijtohua Ariel tlen quinequi quiijtos ‘tlaixpamitl’. Ya ni eltoya seyoc itoca Jerusalén ipampa nopa tlaixpamitl tlen nopano oncac.], nopa Altepetyl tlen David! Sesen xihuitl intemacaj miyac tlamatli tlacajcahualistli nopano. ² Pero na nijtitlanis ininpan Jerusalén ehuani se hueyi tlatzacuiltoni huan oncas miyac choquistli huan tlacuajcualocayotl. Altepetyl Jerusalén quipiyas miyac estli. Elis queja nopa sejcoyoc tlen itoca Ariel. (Ariel quinequi quiijtos: “Tlaixpamitl campa toyajtoc miyac estli.”) ³ Na nielis niicualancaitaca nopa altepetl huan niyahualos ica miyac soldados para

nijtehuis. Huan nijsencahuas huejcapantic caltini para ipan tlejcose para quitlanise nopa altepetl. ⁴ Huan Jerusalén elis queja se animajtzi tlen quinequi camatis tlen nopano tlalijtic campa quitlapachojtoque, huan itos caquistis queja se tlen ixtaca camati.

⁵ Pero san ipan se tlalochtli niquintojtocas nochí nopa miyac icualancaitacahua Jerusalén tlen tlahuel temajmatijque huan yajuanti ixpolihuise queja tlaltejpoctli. Icualancaitacahua Jerusalén elise queja itlasolo trigo tlen quihuica ajacatl pampa ipan se tlalochtli quema ax inquichiyaj niquinajsis. ⁶ Quena, na, niimoTECO Tlen Niquinayacana Noelhuicac Ejcahua Ma Tlatlanitij, niquinajsis ica tlatomonilotl tlen nelchicahuac para nimechmanahuis inJerusalén ehuani. Huan nijchihuas ma mojmolini tlali huan caquistis nelía chicahuac. Huan nijtitlanis se hueyi ajcomalacatl huan se tlilt tlen nochí quitlatis. ⁷ Huan nochí tlacame tlen ehuani sequinoc tlaltini tlen quitehuise altepetl Jerusalén huan icalhua tlen cuali tlasencahuali, nochí ixpolihuise ica san se tlalochtzi queja elisquía se temictli tlen tiquita ipan motlalnamiquilis ica tlayohua. ⁸ Se tlacatl tlen tlahuel mayana quitemiqui para tlacua, pero quema isa ax tleno quipiya ijítico huan noja mayana. Huan se tlacatl tlen tlahuel amiqui quitemiqui para atli, pero quema isa quimati noja yamaniya huan tlaxicojtoc pampa amiqui. Ijquiyampa nopa tlacame tlen sequinoc tlaltini tlen quitehuise altepetl Jerusalén [29:8 O Sion.] quitemiquise tlatlanij, pero san tlapic pampa ax tlatlanise.

⁹ Huelis sequin inJerusalén ehuani ax inquinel-tocaj tlen niquijtohua. ¡Huajca, cualtitoc! San xissenhuiquilica xijchihuaca tlen fiero. Noja xi-ixtzactoca para ax tleno huelis inquiitase. Xihuet-ztinemica queja ihuintini yonque ax ininhuinti-toque. Xiixacanejnentinemica yonque ax inquito-jque xocomeca atl tlen nelchichic. ¹⁰ TOTECO quititlantoc imopani se hueyi cochistli. Quitza-jqui iniixtiyolhua imotiocamanalojcahua huan quitzajqui ininxayac imotlachixcahua. ¹¹ Para ya-juanti nochí ni tlanextili huan tlen quiijtosnequi ica tlen panos teipa elis queja se amatlajcuiloli tlen cuáli tzactoc. Huan yonque quimactilise nopa libro se tlen hueli tlapohua huan quiilhuise: “Xijpohua ni amatl.” Yajaya quiijtos: “Ax ni-hueli nijpohuas pampa nopa amatlajcuiloli cuáli tzactoc.” ¹² Huan intla quimactilise seyoc tlen ax hueli tlapohua huan quiilhuise: “Xijpohua ni amatl.” Yajaya quinanquilis: “Ax nihueli nitlapohua.” Pampa nochí itztoque queja popoyotzitzí.

¹³ Huajca TOTECO quiijtohua: “Ni tlacame quiij-tohuaj para noaxcahua huan yajuanti nechhuey-imatij ica inincamac, pero ininyolo eltoc huejca tlen na. Huan quema nechhueyichihuaj san quite-quihuíaj tlanahuatili huan tlajtoli tlen tlacame quinmachtijtoque. ¹⁴ Huajca yeca, na nijchihuas huejhueyi tlamtli iniixtla nochí ni tlacame tlen quichihuaj ome ininxayac huan yajuanti tlahuel mosentlachilise. Huan niquinhuihuichihuas tlal-namiquini huan nijnextis para inintlamachtil tlacame ax tleno ipati.”

¹⁵ Nelía teicneltique nopa tlacame tlen quisenc-ahuaj quichihuase tlen fiero huan quichihuaj

campeca quitlatise tlen TOTECO, pampa temachtli TOTECO quintlatzacuiltis. Quichihuaj miyac tlamanli ipan tzintlayohuilotl huan quiijtohuaj: “TOTECO ax huelis techitas huan ax quimati tlachque pano nica.”

¹⁶ Nelía hueyi mocuapolojtoque yajuanti tlen quiijtohuaj ya nopa. TOTECO inmechchijchijqui. Yajaya itztoc queja se chachapalchijquetl tlen más hueyi que imojuanti tlen initztoque queja miyac soqui chachapali tlen yajaya inmechchijchijqui. Se soqui chachapali ax quiilhuis iteco: “Ax ta tlen tinechchijchijqui.” Se comitl ax huelis quiilhuis tlen quichijchijqui: “Ax tijmati tijchihua comitl.”

TOTECO quinmaquixtis israelitame

¹⁷ Ayoc miyac tonali polihui para nopa huactoc tlali Líbano mochihuas se hueyi mila tlen yejyectzi huan tlen temaca miyac itlajca. Huan nopano elis cuatitlamitl tlen xoxohuic huan yejyectzitz.

¹⁸ Ipan nopa tonali tlacame tlen ax hueli tla-caquij quicaquise nopa tlajtoli tlen quipohuilia tlen nopa amatlajcuiloli. Huan nopa popoyotzitzi tlen itztoque ipan cuesoli huan ipan tzintlayohuilotl quiitase. ¹⁹ Nochi tlen moicnonequij sampa quipiyase nopa hueyi paquilistli tlen huala tlen TOTECO. Huan tlen teicneltzitzi paquise ipan TOTECO Tlen Tlatzejzelotic Huan Tlen Itztoc In-inhuaya Israelitame. ²⁰ Pampa ayoc itztose yajuanti tlen mosisiníaj huan tetlailhuíaj. Tzontlamise nochi yajuanti tlen senquistoc quinequij quichihuase tlen ax cuali. ²¹ Tlamise nochi ax cuajcualme tlen quitlajtlacoltíaj se tlacatl tlen ax tleno quichijtoc. Ayoc itztose ax cuajcualme tlen

tlacajcayahuaj huan quitzacuilise se juez para ax quintlatzacuilty tlacame tlen quichihuaj tlen fiero. Ya tlantos nochitlen istlacatij para se juez ax hueli quichihuas tlen xitlahuac ica se tlacatl tlen ax tlaixpanotoc.

²² Yeca TOTECO, tlen quimanahui Abraham, quej ni quinilhuía israelitame [29:22 Iixhuihua Jacob.]: “Ayoc ixchipahuase israelitame sampa ica majmajtli, niyon axaca quinpinahualtis. ²³ Pampa quema quiitase quejatza nijchihuas tlahuel ma momiyaquilica, quiitase notlatzejtzeloltijcayo na tlen niTlatzejtzelotic Huan Niitztoc Inihuaya Israeltame. Huan nechimacasise huan nechtlepanitase. ²⁴ Huan huajca nochitlen mocuapolojtoque quinelto case tlen melahuac, huan nochitlen mosisiníaj motemacase para ma quinmachtica.”

30

Ax cuali nopa tlajtolsencahualli ica Egipto

¹ TOTECO quijtohua: “Nelía teicneltique noisraelita tlacajhua pampa temachtli niquintlatzacuilty. Tlahuel mosisiníaj. Tlen hueli quiilhuíaj ma quintlalnamicti, pero na ax tleno nechilhuíaj para ma niquintlalnamicti. Huan quisencahuaj quejatza quichihuase miyac tlamantli tlen na ax niquinilhui ma quichihuaca. Mosejcotilíaj huan quichihuaj tlajtolsencahualli ica sequinoc tlen Notonal ax quinequi ma quichihuaca. Huan queja nopa inintlajtlacolhua noja más momiyaquilíaj. ² Yajuanti yajque ipan tlali Egipto para tlajtlanitij tlapalehuili, pero ax nechlajtlanijque caquihuili para yase. Ama yajuanti motemachíaj ipan

Faraón para ma quinmanahui. ³ Pero Faraón ax huelis quinmanahuis yonque quintlajtolcahuilijtoc para quichihuas. Huan pampa motemachijtoque ipan Faraón, teipa mopinahualtise huan ax quimatisé tlachque quichihuase. ⁴ Huan yonque ichicahualis Faraón yas hasta altepetl Zoán huan ajsis hasta altepetl Hanes, ⁵ niyon se pilquentzi ax huelis quinpalehuis nopa israelitame. San quinhualiquilis pinahualistli huan tlaijiyohuclistli pampa motemachijque ipan ya.”

⁶ Ya ni nopa tlajtoli tlen TOTECO quititlani tlen nopa tlapiyalime tlen mopantíaj ipan tlali Neguev. Israelita tlayacanani yohuij ipan tlali Egipto ica burros huan camellos tlen quimamajtiyohuij miyac tlamanli tlen patiyo para quintlaxtlahuitij tlali Egipto ehuani ipampa itlapalehuil. Apanoj nopa huactoc tlaltini campa tlahuel mahuili pampa nopano itztoque leones tlen mosisiníaj huan cohuame tlen temictíaj huan motlalohuaj chicahuac. Pero nochí tlen quichihuaj eltoc san tlaptic, pampa Egipto ax tleno huelis quinchihuilis. ⁷ Nochi itlapalehuil tlali Egipto ax tleno ipati. Yeca na nijtocaxtía Egipto: “Nopa hueyi cohuatl tlen ax tleno hueli quichihua.”

⁸ Xiya huan xiquijcuilo ipan se huapali nochí tlajtoli tlen niquijtohua tlen tlali Egipto. Ma mocahua hasta nopa tlamiya tonali para quinteilhuis nopa israelitame pampa ax quineltocaj TOTECO. ⁹ Pampa israelitame tlahuel mosisiníaj. Nochipa istlacatij huan ax quinequij quitlacaquilise itlajtol TOTECO. ¹⁰ Quinilhuíaj nopa tlachiyani: “Ayoc xiquitaca niyon se tlanextili.” Huan nopa tiocamanalohuani quinilhuíaj: “Ayoc xitechilhuica

tlen melahuac. Xitechpohuilica tlajtoli tlen techpactis. Xitechpohuilica istlacayotl. ¹¹ Xijcahuaca nopa ojtli tlen xitlahuac. Ayoc xitechcuatotonica ica cuesoli tlen intechilhuáj para ajsise. Techyolajsitoc miyac tlajtoli tlen TOTECO Tlen Tlatzeloltic Tlen Itztoc Tohuaya Tiisraelitame.”

¹² Huajca TOTECO tlen Tlatzeloltic tlen itztoc inihuaya israelitame quijjtohua: “Pampa inquihuejcamajcajtoque notlajtol huan inmotemachíaj ipan tlatehuijcayotl huan ipan tlamatli tlen ax cuali, huan ax inquinequij inmoyolcuepase; ¹³ tlaloch hualas imopani se hueyi tlatzacuiltoni quema ax inquichiyaj. Inelise queja se tepamitl tlen ya pejtoc motolonchihua huan teipa huelonis ica se tlalochtli. ¹⁴ Queja se quitlapanas se soqui comitl, TOTECO moquejquetzas imopani huan inmechchihuas tlatixtic, niyon ax inmechtlasojtlas. Huan ax mocahuas niyon se pedazo tlen huelis quitequihuise para ipan quihiuicase tlicoli o para quiquixtise atl ipan se ameli.” ¹⁵ TOTECO Tlen Más Quipiya Tlanahuatili tlen Tlatzeloltic huan tlen itztoc inihuaya israelitame quijjtohua: “Intla inmoyolcuepase ica na huan inmosiyajcahuase, na nimechmaquixtis. Intla inmotemachise ipan na huan ax inmolinise, inquipyase chicahualistli. Pero ax inquinequij inquichihuase.”

¹⁶ Huan inquijjtohuaj: “¡Ax tijneltocaj motlajtol! Tlali Egipto techpalehuis. Nopa egiptome techmacase cahuayos tlen motlalohuaj chicahuac para titlatehuise.”

Pero nimechilhuía, achi más motlalose chicahuac imocualancaitacahua tlen

inmechtojtocase. 17 Se imocualancaitaca quintojtocas se mil tlen imojuanti. Huan maculti tlen yajuanti inmechtojtocase nochí hasta ax mocahuase ome san sejco. Huan inmocahuase imoseltitzitzi queja se icuayo bandera tlen ijcatoc iselti ipan se tepetl tlen mocahuaj huejca.

TOTECO quintiochihuas itlacajhua

18 Pero TOTECO inmechchiya inquitemose para huelis inmechnextilis iteicnelijcayo. Yajaya quinequi inmechtlaosjtlas queja quijtojtoc, pampa TOTECO, yajaya se Dios tlen senquistoc quichihua tlen xitlahuac. Huajca ma paquica nochí tlacame tlen motemachiyaj ipan ya para ma quinpalehui.

19 Innotlacajhua tlen initztoque ipan altepetl Jerusalén, ajsis tonali quema ayoc inchocase. Ipan nopa tonali, quema TOTECO quicaquis inquitzajtzilise para ma inmechpalehui, inmechtlaosjtlas miyac huan nimantzi inmechnanquilis.

20 Huan yonque TOTECO mojmostla inmechmacatoc tlaijiyohuclistli huan cuesoli, yajaya itztos imohuaya para inmechmachtis. Yajaya tlen imotlamachtijca ayoc motlatis huan ica imoixtiyol inquitase. 21 Huan intla imojuanti inquicahuase iojhui TOTECO huan immocuapolose, huajca ica imoica inquicaquise se itos tlen quijtos: “Ax ya ni nopa ojli. Huajca ximocuepaca huan xijtoquilica ne ojli.”

22 Huan huajca inquintlapanase imoteteyohua tlen plata huan nopa tlaixcopincayome tlen oro. Huan inquintepehuase queja se yoyomitl tlen

tlahuel fiero tlen inmechtlaijiyaltía quema inquinechcahuíaj. Huan inquinilhuise nopa teteyome: "Xquisaca pampa ayoc timechnequij."

²³ Huan huajca TOTECO inmechtiochihuas huan quichihuas ma huetzi atl ipan nopa tonali quema inquitocase imoxinach. Nojquiya quichihuas ma oncas miyac pixquistli. Huan quimiyaquilis nopa sacatl campa tlacuajtinemise imohuacaxhua. ²⁴ Huan nopa torojme huan pilburrojtzitzi tlen quipoxoníaj nopa tlali, quicuase trigo tlen tlapajpactic, tlen ya quiyejyecijtoque ica pala para ajacatl ma quihuica itlasolo huan san mocahua iyol. ²⁵ Ipan nopa hueyi tonali tlen miquistli quema TOTECO quintzontlamiltis icualancaitacahua huan quimajcahuas nochí torres huan caltini tlen más cuálí tlasencahuali, TOTECO quichihuas ma oncas miyac atl tlen quintemitis miyac pilatlajtzitzí huan miyac atemítl tlen temose tlen nochí tepetini huan tlachiquili. ²⁶ Huan ne metztlí tlahuis queja tonati, huan ne tonati tlahuis chicome hueltas más chicahuac queja elisquía chicome tonati. Queja nopa elis quema TOTECO pehuas quinchicahuas itlacajhua huan quinpajtis campa quincocojtoc.

TOTECO quintlatzacuiltis Asiria ehuani

²⁷ Xiquitaca, ya huala TOTECO tlen huejca ica nochí ichicahualis huan yajaya tlahuel cualani. Yahualtic tlen ya tlejco miyac poctli. Icamac temítoc ica miyac cualantli huan itlajtol tetzontlamiltía queja tlitl. ²⁸ Iijiyo hualas ipan icualancaitacahua queja se atemítl para quintzontlamiltis. Nochí tlacame tlen mohueyimatij ipan nochí tlaltini

quintzejzelos. Quena, ica ihueyi cualancayo quintzejzelos queja tlacame quichihuaj ica trigo para quiquixtilise itlasolo. Quintlalilis tepos camachali nochí nopa tlaltini ehuani huan quinhuicas ipan nopa lugar campa quintzontlamiltis.

²⁹ Pero imojuanti tlen initlacajhua TOTECO inpaquise huan inhuicase queja inhuicaj tlayohua ipan nopa ilhuitl tlen tlatzejzeloltique. Quena, inpaquise miyac ipan imoyolo queja paqui se tlacatl tlen tlapitza quema quinyacana paxalohuani para ma yaca Jerusalén campa eltoc itiopa TOTECO, nopa tlamanahuijquetl tlen israelitame.

³⁰ Huan TOTECO quichihuas para nochí tlacame ma quicaquica itos tlen quipiya tequihuejcaj-otl huan nochí tlacame quimachilise icualancayo. Huan ica ima quintlatzacuiltis icualancaitacahua. Huan ica icualancayo hualas titl tlen tlahuel totonic, huan huejhueyi ajcomala-ctl, huan tlatomonilotl huan tesihuitl. ³¹ Quema quicaquise TOTECO itos huan quiselise inintlatzacuiltil tlen nelía chicahuac, tlahuel momajmatisse nopa Asiria ehuani. ³² Huan sesen huelta quema TOTECO quinmaquilis nopa Asiria ehuani, israelitame más paquise ica tlatzotzonali tlen panderos, arpas huan ica huicatl. ³³ Hasta huejcajquiya TOTECO quisencajqui se lugar para se hueyi tlidelemectli tlen quitlatis nopa tlanahuati-jquetl tlen Asiria. Nopa tlacoyoctli eltoc tlahuel huejcatla huan patlahuac huan ya quipiya tlahuel miyac cuahuitl para nopa titl. Huan TOTECO iijiyo quipehualtis nopa titl tlen tlatlas tlahuel totonic queja tlatla se hueyi tepetl.

31

Ax quisa cuali itlapalehuil Egipto

¹ Nelía teicneltique nopa tlacame tlen yohuij tlali Egipto para quitemose tlapalehuili huan motemachíaj ipan nopa cahuayos huan carros tlen nopano. Temachtli TOTECO quintlatzacuiltis pampa ax motemachíaj ipan yajaya tlen Tlatzeloltic tlen itztoc ininhuaya israelitame, niyon ax quitemohuaj para ma quinpalehui. ² Pero TOTECO ica ihueyi tlalnamiquilis quititlanis huejhueyi tlaohuijcayotl huan ax moyolcuepas. Motlalanas para quintlatzacuiltis israelitame ipampa nochi tlamantli tlen ax cuali tlen quichijtoque huan nojquiya quintlatzacuiltis nopa sequinoc tlali ehuani tlen ininhuaya mopalehuíaj. ³ Pampa nopa egiptome san tlacame huan ax yajuanti dioses. Inincahuayos san nacatl tlen ax tleno ipati. Nopa cahuayos ax neli tonaltzitzli tlen quipiyaj chicahualistli. Huajca quema TOTECO quitlalanas ima iniixtla, nochi yajuanti huetzise. Huetzise tlen quitemohuayayaj tlapalehuili huan tlen tepalehuisquíaj. Nochi ome huetzise san sejco.

⁴ Pero TOTECO nechilhuijtoc ya ni: “Quema se león yonque noja conetzi quitzontlamiltía se borrego, ax momajmatía yonque quitzajtzilía nopa tlamocuitlahuijquetl. Huan quisenhuiquilía quitzontlamiltía nopa borregojme. Queja nopa nojquiya elis quema na niimoTECO Tlen Niquinayacana Noelhuicac Ejcahua Ma Tlatlanitij nihualas para niquinmanahuis notlacajhua ipan Jerusalén [31:4 O tepetl Sion]. Axaca huelis

nechquetzas. ⁵ Na nipatlantinemis itzonpa altepetl Jerusalén queja se totol patlantinemi yahualtic itepasol. Teipa nitemos ipan nopa altepetl huan nijmocuitlahuis, nijmanahuis, nijmaquixtis huan nijchololtis.”

⁶ Yeca inisraelitame, yonque tlahuel inmosisiníaj huan fiero imoyolo, xihualaca huan ximocuepaca ica TOTECO. ⁷ Ajsis se tonali quema sese imojuanti inquinmajcahuase imoteteyohua tlen plata o oro tlen imojuanti intlajtlacolchijca tlacame inquinmachijchijtoque. ⁸ Huan tlacame quintzontlamiltise nochí nopa Asiria ehuani. Pero ax miquise ica machete tlen quitequihuíaj tlacame, pero elis TOTECO tlen quinmictis. Huan nopa asirios ax quimatise tlachque quichihuase. Tlahuel momajmatise huan cholojtehuase. Huan quinhuicase nopa telpocame asirios tlen tlahuel quipiyaj chicahualistli para tlatequipanotij san tlapic. ⁹ Huan hasta nopa tlayacanca soldados tlen más quipiyaj tlanahuatili huihuipicase ica majmajtli huan cholojtehuase. Huan soldados quicajtehuase ininbanderas para cholose. Queja nopa quijtohua TOTECO yajaya tlen quipiyas itli lementoc ipan itlaixpa ipan Jerusalén huan ihorno para ipan tetlatzacultis.

32

Se tlanahuatijcayotl tlen xitlahuac

¹ ¡Xiquitaca! Se tonal hualas se tlanahuatijquetl tlen tlanahuatis xitlahuac. Huan ihuaya hualase itlayacancahua tlen nojquiya tlanahuatise xitlahuac huan quichihuase tlen senquistoc cuali.

² Huan nopa tlanahuatijquetl quimanahuis tlali Israel tlen nopa tlaohuijcayotl tlen hualas queja se hueyi ajacatl o queja atl tlen huetzi nelchicahuac. Huan quinseseltis israelitame queja se atlajtli teseseltia ipan se huactoc tlali. Quinpalehuis queja iecahuilo se hueyi tetl ipan se huactoc tlali tlen tlahuol totonic. ³ Huan hua-jca israelitame tlapohuis iniixtiyol para quiitase TOTECO huan tlapohuis ininnacas para quitla-caquilise itos. ⁴ Ipan nopa tonal hasta nopa tlacame tlen mosisiníaj nojquiya quimachilise itlamachtil TOTECO huan tlalnamiquise. Huan tlacame tlen ax nelia huelij tlatenquixtiaj, camatise cuali.

⁵ Ipan nopa tonali israelitame ayoc quinsentlachilise tlacame tlen huihuitique huan ax quineltocaj TOTECO. Huan ayoc quintocaxtise cuajcualme nopa ricos tlen itzcuintique, niyon ayoc quinitase para huejhueyi. ⁶ Tlacame quinixmatise huihuitique tlacame. Quimatise para quichihuaj tlen ax cuali. Ipan ininyolo san quisencahuaj tlen fiero huelis quichihuase. Quichihuaj ome ininxayac para tlacajcayahuase huan quiistlacahuíaj TOTECO. Se tlacatl queja nopa quinquixtilia inintlacualis tlen mayanaj huan quinquixtilia atl tlen teicneltzitz huan amiquij. ⁷ Tlacame tlen queja nopa huihuitique huan tlacajcayahuaj mopannextise ipan nopa tonali. Nojquiya mopannextise noch iiniistlacaticayo tlen ica quinequiyayaj quintlajiyohuultise nopa teicneltzitz quema itztoque iniixtla tequihuejme. ⁸ Pero cuajcualme ipan nopa tonali moyolilhuise

quejatza huelis quinpalehuise sequinoc huan TOTECO quintiochihuas.

Tlajtoli para sihuame

⁹ Xinechtlacaquilica insihuame tlen intlatzi-huij. Xinechtlacaquilica tlen nimechilhuis ica tlen hualas imopani. ¹⁰ Xinechtlacaquilica imo-juanti tlen ama intemachme. Ipan ne seyoc xi-huitl hualas se hueyi cuesoli imopani ipan se tlalochtli quema ax inquichiyaj pampa ax on-cas niyon quentzi cuatlajcayotl, niyon pixquistli. ¹¹ Huajca xihuihuipacaca insihuame tlen ama ax inquipiyaj niyon se cuesoli. Ximocuesoca imo-juanti tlen ax initztoque ica temachili. Ximoquix-tilica imoyoyo tlen yejyectzi huan ximoquentica nopa fiero yoyomitl tlen quinextis inmocuesohuaj ipampa tlaijiyohuilistli. ¹² Ximoyoltejtetzonaca ica cuesoli ipampa nopa huejhueyi tlali tlen tlahuel tlaelilitiyayaj tlen inquipixque huan ama elis solejtoque. Huan nochí nopa xocomeca mili tlen temacaj miyac inintlajca tlamis. ¹³ San huitztlí huan sahua mecatl moscaltis ipan nopa tlali tlen iniaxca notlacajhua. Tlamiixpolihuise nopa caltini huan altepetini tlen ama quipiyaj paquilistli. ¹⁴ Ipan nopa caltlanahuatili, niyon se axaca itztos. Nopa altepetini tlen temitoyaj ica tlacame mocahuase cactoque. Huan nochí caltini mocahuase tlatzitzicatoc. Axaca itztos ipan nopa huejcapantique caltini ipan tlachiquili campa tlachiyayayaj para tlamocuitlahuise. Nopano san tlacuase nopa burrojme huan huacaxme. ¹⁵ Huan queja nopa eltos hasta quema TOTECO quititlanis Itonal tlen itztoc ipan elhuicac para motlalis

ipan tojuanti ica nochí ichicahualis. Huan huajca sampa oncas pixquistli hasta mocahuas. Huan nopa huactoc tlali mochihuas se mili tlen temacas tlahuēl miyac pixquistli huan campa achtohuiya elqui mili, mochihuas cuamili ica cuatini tlen tlahuēl temaca inintlajca. ¹⁶ Huan ipan nochí nopa tlali campa hueli quichihuase tlen senquistoc cuali huan xitlahuac. ¹⁷ Huan pampa nochí quichihuase tlen xitlahuac, oncas tlasehuilistli huan nochí itztose ica temachili para nochipa.

¹⁸ Huan queja nopa nochí notlacajhua itztose ica cuali huan itztose campa onca tlasehuilistli. Nochi itztose temachme huan campa hueli mosiyajcahuase. ¹⁹ Quema huetzis tesihuítl, elis ipan cuatitlamitl, pero ipan altepetl Jerusalén axtle. ²⁰ TOTECO miyac quintiochihuas itlaca-jhua. Campa hueli tlatojtocase, quiselise miyac pixquistli. Huan nochí inintlapiyalhua huan inborregojhua tlacuase campa onca miyac sacatl tlen xoxohuic.

33

Tlen mochiyaj ipan TOTECO

¹ ¡Inteicneltique inAsiria ehuani! Temachtli TOTECO inmechtlatzacuilitis. Campa hueli intlaxolejtoque yonque axaca yajtoc ipan imotlal para quixolehuas. Inquintlaijiyohuilitíaj sequinoc yonque axaca inmechtlaijiyohuilitijtoc. Inquinchiuhaltíaj sequinoc ma quichihuaca tlen inmechtlajtolcahuilíaj, pero imojuanti ax inquichihuaj. Pero ama ya ajsic hora para nojquiya inmechcajcahuase huan

inmechtzontlamiltise, queja imojuanti inquichijtoque.

² ¡Ay TOTECO! Xitechicneli huan xitechtlasotla tojuanti timotlacajhua pampa san ipan ta timochiyaj. Xieli tochicahualis mojmostla huan xitechpalehui quema huala se hueyi tlaohuijcayotl. ³ Nochi tocualancaitacahua cholohuaj quema quicaquij motos. Huan quema ta timotlalana, nochi tlen ehuani sequinoc tlaltini mosemanaj huan cholojtehuaj. ⁴ Queja chapolime quiixtequij nopa pixquistli huan itlajca xocomecatl, queja nopa Jerusalén ehuani quintlanise huan quintlaxtequilise nopa soldados tlen tlali Asiria.

⁵ TOTECO tlahuél hueyi huan itztoc nepa el-huicac. Yajaya quichihuas para altepetl Jerusalén ma eli se lugar campa senquistoc quichihuase tlen xitlahuac huan tlen cuali. ⁶ Yajaya nochipa itztos nopano para tlalochtzitzí huelis techmaquixtis tiisraelitame. Yajaya techmacas tlalnamiquilistli huan tlaixmatilistli. Huan tlen israelitame quiitase para más ipati elis para ma quihueyitlepanitaca TOTECO.

⁷ Pero amantzi nochi inintlatitlanilhua israelitame tzajtzij ipan calles huan nochi inintlayolmelajcahua tlen quitemohuaj tlasehuilistli, chocaj ica miyac cuesoli. ⁸ Nochi ojtli ipan tlali Israel tlamixolejtoc. Paxalohuani quitoquilíaj ojtli campa tlatzitzica. Nopa Asiria ehuani quiixpanotoque nopa tlajtoli tlen quichijque para quipiyase tlasehuilistli. Ax quichihuilíaj cuenta niyon se tlamantli tlen quitlajtolcajque iniixtla testigos para quichihuasquíaj. Yajuanti ayoc aca quitlepanitaj.

⁹ Quichijtoque ma onca tlaijiyohuclistli ipan tlali Israel. Quitlamixolejtoque tlali Líbano. Nopa tlamatayamitl Sarón quicajtejtoque queja se huactoc tlali. Huan quintlamitlaxtequiliptoque tlali Basán huan tepetl Carmelo.

¹⁰ Pero ama TOTECO quej ni quiijtohua: “Ama nimotlalanas huan nijnextis nochicahualis huan noyajatil. Ama, quena, nechhueyimatise huan nechhueyitlalise. ¹¹ InAsiria ehuani, ax tlen inquitlanise yonque inquichihuase campeca ica nochimochicahualis. Nochi tlen inmoihuijtoque inquichihuase elis queja tlasoli huan noijiyo inmechtzontlamiltis queja se tlilt. ¹² Imosoldados, inAsiria ehuani, tlatlase huan mochihuase queja cuanextli. Yajuanti elise queja huitzli tlen quitzonterquij huan quimajcahuaj ipan tlilt para ma tlatla.

¹³ “Huajca nochimojuanti tlen inmopantíaj ipan tlaltini tlen huejca, xijtlacaquilica nochimopa tlamatli tlen na nijchijtoc. Imojuanti tlen inmopantíaj nechca, xiquixmatica nochicahualis.” ¹⁴ Nochi nopa tlajtlacolchihuani huan tlen quichihuaj ome ininxayac tlen itztoque ipan altepetl Jerusalén [33:14 O Sion.] huihuipicaj ica majmajtli. Quiijtohuaj: “¿Ajqueya tlen tojuanti huelis quijiyohuis para moquetztos iixpa TOTECO? Yajaya queja se tlilt tlen tetzontlamiltia huan tlen ax quemasehuis.”

¹⁵ Huelis itztose nica iixtla tlen quiijtose huan quichihuase tlen senquistoc xitlahuac, tlen ax quinequij quitlanise tomi ica tlacajcayahualistli huan ax monamacaj para se tlaxtlahuili. Cuali

itztose iixpa tlen ax quintlacaquiláj tlen quisenciahuaj quejatza huelis temictise. Huelis itztose iixtlá tlen quitzacuaj iixtiyol para ax quitlachilise tlamatli tlen quinyoltlanasquíaj para tlajtlacolchihuase. ¹⁶ Tlen queja nopa quichihuase temachtli itztose nepa huejcapa. Huan momanahuise ipan nopa huejhueyi tetini tlen onca ipan cuatitlamitl. Huan itztose tlen quinhuiquilise tlacualistli huan atl para ax tleno quinpolos.

¹⁷ Ica imoixtiyol inquiitase imotlanahuatijca ica nochí iyejyejca ipan itlanahuatilis huan inquiitase nopa tlali tlen yohui hasta huejca.

¹⁸ Huan inquiilnamiquise nopa tonali quema inmajmahuiyayaj huan inquipanoque miyac tlaohujcayotl. Huan inmoilhuise:

“¿Canque itztoque ama nopa Asiria ehuani tlen techinamayayaj impuestos huan tlen quipohuayayaj quesqui cali huejcapantic oncayaya para quiitzquise? ¿Canque itztoque ama tocualancaitacahua tlen calaquiyyayaj ipan toaltepe para techtlaxtequilise?” ¹⁹ Nimechilhuía para ajsis se tonal quema ayoc inquinítase nopa Asiria ehuani tlen tlahuel mohueyimatij. Ayoc inquinítase nopa tlacame tlen fierojtique, huan tlen tlahuel mosisiníaj huan tlen camatiyyayaj tlajtoli tlen ax hueli inquimachilise. Yajuanti tlamiixpolihuise ipan se tlalochtli. Huan ayoc quema inquinítase.

²⁰ Pero inquiitase altepetl Jerusalén. Huan inquiitase para se altepetl campa nochí quihueyitlepanitaj TOTECO huan ilhuichihuaj para ya. Huan inquiitase para se altepetl tlen

quipiya tlasehuilistli huan se altepetl tlen cuali huan temachtli. Elis queja se yoyoncali tlen axaca huelis quihuihuitlas iestacas, niyon axaca quicotonas nopa laso tlen ica quiilpitoque pampa tlahuatl temachtli. ²¹ Pampa TOTECO itztos nopano tohuaya, huan ihueyitilis monextis. Huan yajaya techmanahuijtos queja se atlajtli tlen patlahuac. Huan niyon se tocualancaitaca ax huelis panos nopano. ²² Pampa TOTECO yajaya tojuez, yajaya tlen temacas nochí tlanahuatili huan yajaya totlanahuatijca. Yajaya iselti techmocuitlahuis huan techmanahuis. ²³ Nochi ininbarcos tocualancaitacahua tlamixolejtoque. Nopa mecatl tlen ica quiilpijtoyaj cotonqui huan nochí icuayohua postejqui. Huan nopa huejhueyi yoyomitl tlen quihuicayayaj, huetzqui. Huajca itlacajhua TOTECO moaxcatise nochí tlen eliyaya iniaxca huan moxelhuilise. Huan hasta tlen metzcuauchotique nojquiya quintocaros ininparte. ²⁴ Huan nopa israelitame tlen itztoque nopano ayoc quiijtose para mococohuaj pampa Toteco Dios quintlapojpolhuis inintlajtlacolhua.

34

Tlatzacuiltyli para tlali Edom ehuani

¹ Nochi imojuanti tlen initztoque ipan nochí tlaltini, xihualaca xinechtlacaquiliquij. Ximonechcahuica nochí intlacame ipan ni tlaltepactli. Xihualaca huan xijtlacaquilica notlajtol. ² Pampa TOTECO tlahuatl cualantoc ica tlen itztoque ipan nochí tlaltini huan ica nochí inintlayacancahua huan ininsoldados. Yajaya iselti quintlamiixtolihuiltis huan quintemactilis ipan se hueyi

miquistli. ³ Huan ininmijcahua mocahuase tepejtoque tlalchi, niyon ax quintlalpachose. Ni tlali temis ica tlapotexcayotl tlen quisas tlen inintlacayohua tlen lochontos. Huan nochí cuatitlamitl nesise chichiltic ica inieso. ⁴ Ipan nopa tonali elis queja nochí tlamantli nepa elhuicactli momimilos huan ayoc nesis. Nopa sitlalime tepehuise queja tepehui ixihuiyo xocomecatl o nopa higuera cuahuitl.

⁵ Huan quema nomachete tlamiche itequi nepa elhuicac, xijpiyaca cuidado pampa ajsis ipan tlali Edom para nijtlajtolsencahuas. Nopa eltoc se tlali tlen niquiyocatlalijtoc para nijtlatzacuiltis huan niquinmictis tlen nopano ehuani. ⁶ Imachete TOTECO eltoc espoltic huan quihiya miyac ininchiyajca tlen quinmicti. Eltoc queja quinquechtzontectosquía borregojme huan oquich chivojme para tlacajcahualistli nopano ipan altepetl Bosra pampa TOTECO nelía quichihuas se hueyi miquistli ipan tlali Edom. ⁷ Huan tlacame nopano miquise yonque tlahuel quihiya chicahualistli. Miquise nopa telpocame huan huehuentzitzi. Nopa tlali tlamicolonis ica estli huan nopa tlaltejpoctli mocahuas chiyahuac ica tlachiyajcayotl. ⁸ Pampa ya nopa elis se tonali quema TOTECO momacuepas ica nopa Edom ehuani ipampa nochí tlen fiero quinchihuilijque israelitame. ⁹ Nochi pilatlajtzitzi tlen tlali Edom temise ica chapopojtli tlen lementos huan nopa tlali temis ica tlitl.

¹⁰ Nopa tlitl tlen tlatzacuiltlistli ipan tlali Edom lementos tlayohua huan tonaya huan ax quema sehuis. Huan nopa poctli tlejcos para

nochipa. Nopa tlali elis queja se huactoc tlali huan queja nopa mocahuas iniixtla nochi tlen tlacatise teipa. Huan ayoc aca sampa mochantis ipan nopa tlali. ¹¹ Huan nopano senquistoc itztose cuamojmojme huan xonpime. Nojquiya itztose cacalome. TOTECO quiitas nopa tlali huan yeca quiitas para quinamiqui quixolehuas. ¹² Ipan tlali Edom ayoc oncas tlanahuatiani tlen teyolmelahuase tlen melahuac pampa nochi inintlayacancahua tlamiixpolihuise nimantzi. ¹³ Ipan inincaltlanahuatil moscaltis huitztl. Huan ipan caltetzoptli moscaltis tejzonquilitl huan sahua mecatl. Huan nopa tlali elis se tlali campa mochantise tecuanime huan nopa totome avestruces. ¹⁴ Huan nopano momanelose nopa tecuanime tlen itztoque ipan huactoc tlali ica nopa cuatitlan tlapiyalime tlen inintoca hienas huan lobos. Huan nopa tlapiyalime tzajtzise seyohual. Huan nopa huejhueyi tlapiyalime tlen temajmatijque huan fierojtique tlen nemij tlayohua motzajtzilise se ica seyoc. Cuatitlan chivojme tlen quipiyaj iajacahua Axcuatlacatl nopano mocahuase huan mosiyajcahuase. ¹⁵ Nopano quichihuas itepasol nopa hueyi cuamojmojtli. Nopano quintlalis itejquis, huan tlacatise iconehua huan quinmocuitlahuis ieltlapatzala. Nojquiya nopano mosentilise tzopilome huan sesen oquichtli quipiyas se tlen sihuatzi.

¹⁶ Xijtemoca iamatlaphual TOTECO huan xijphuaca nochi tlamantli tlen yajaya quiijtojtoc quichihuas. Ax polihuis niyon se tlamantli tlen ijcuilijtoc nopano. Nojquiya ax polihuis niyon

se tlapiyali huan nochí tlen oquichme quipiyase ininsihuajhua pampa TOTECO quiijtojtoc para quichihuas huan Itonal quichihuas nochí ma pano queja quiijtojtoc. ¹⁷ Yajaya quiyejyecojtoc huan quixelojojtoc nopa tlali Edom, huan quinmac-tilijtoc nopa tlapiyalime tlen tlaijiyohuáj. Huan yajuanti moaxcatise nopa tlali para nochipa.

35

Israelitame sampa mocuepase Jerusalén

¹ Ipan nopa tonali elis queja paquis nopa huactoc tlali huan campa tlatzitzica pampa xochiyohuase queja se yejyectzi xochitl. ² Oncas miyac xochitl campa hueli, huan oncas huicatl huan miyac paquillistli. Nochi huactoc tlaltini xoxohuiyase queja nopa cuatitlamitl tlen onca ipan tlali Líbano. Nesise yejyectzitzi queja nopa sacatl tlen onca ipan tepetl Carmelo huan queja nopa saca petlatl tlen onca ipan nopa tlamayamitl tlen Sarón. Huan nochí quiitase ihueyitilis huan iyejyeca TOTECO yajaya tlen toDios.

³ Huajca ica ni tlajtoli xiquinyolchicahua tlen siyajtoque huan tlen tlancuahuipicaj ica majaatl. ⁴ Xiquinilhui tlen moyolcuesohuaj: “¡Xi-moyoltetilica! Amo ximajmahuica pampa imoDios hualas para momacuepas ica imocualancaitacahua huan quintzontlamiltis. Yajaya iselti hualas huan inmechmaquixtis.” ⁵ Huan quema yajaya hualas, nopa popoyotzitzi tlachiyase, huan tlen ax tlacaquij, quinchihuas ma tlacaquica. ⁶ Tlen metzcuauchotique huitonise queja masame, huan tlen nonotzitzi tzajtzise huan huicase. Huan ipan

nopa huactoc tlali oncas miyac pilhueyatitzitzi tlen quipiyase atl. ⁷ Nopa ipan huactoc tlali momanas atl. Huan campa más tlahuactoc meyas atl tlen mochihuas miyac atlajtli. Huan campa achtohuiya oncac inioshohua nopa tepechichime, oncas acatl.

⁸ Huan nopano ipan nopa huactoc tlali oncas se hueyi ojtlí huan quitocaxtise: “Ojtli tlen Tlatzejzelotijcayotl.” Huan niyon se tlacatl tlen ax yoltlapajpactic iixpa TOTECO ax huelis nejne-mis ipan nopa ojtlí pampa nopano nejnemis tlen quichihua ipaquilis TOTECO. Huan nojquiya tlen huihuitic ax nemis nopano. ⁹ Ipan nopa ojtlí ax oncas tecuanime para tecuase, niyon ax oncas niyon se tlamantli tlen mahuilili. Ipan nopa ojtlí mocuepase ininchaj nopa tlacame tlen TOTECO quinmaquixtijtoc tlen campa hueli itztoyaj ipan sequinoc tlaltini. ¹⁰ Nopa tlacame tlen TOTECO quinmaquixtijtoc huicatiyase huan tzajtzitiyase; huan ajsise altepetl Jerusalén [35:10 O Sion.], ica miyac paquelistli. Ayoc quema quipiyase tlaijy-ohuclistli, niyon cuesoli pampa nopano senquis-toc oncas paquelistli.

36

Senaquerib quitehui Judá

¹ Quema Tlanahuatijquetl Ezequías yohuiyaya para 14 xihuitl para tlanahuatis, hualajqui Senaquerib, nopa tlanahuatijquetl tlen tlali Asiria para quintehuiqui nopa altepetini ipan tlali Judá tlen moyahualojoque ica tepamitl. Huan yajaya quintlanqui. ² Huan teipa quema nopa tlanahuatijquetl tlen tlali Asiria ehuani mopantiyaya

ipan altepetl Laquis, quititlanqui itlayacanca tlen tlatehuijcayotl ica miyac isoldados ipan altepetl Jerusalén para ma quicamahuiti Tlanahuatijquetl Ezequías. Huan nopa asirios moquetzque nechca nopa aojtli tlen nopa piletá tlen eltoc ica ajco, ipan nopa ojtli tlen yohui ipan nopa mila tlen nopa Tlachicuenijquetl.

³ Huajca quisqui Eliaquim, iconē Hilcías, tlen eliyaya se tlayacanca tequihuejquetl ipan icaltlanahuatil Ezequías, huan quisque itlajcuilojca Ezequías tlen itoca Sebna, huan quisqui Joa, iconē Asaf, tlen quiijcuilo tlen pano mojmostla ipan itlanahuatilis. ⁴ Huan nopa tlayacanquetl tlen soldados tlen tlali Asiria quimacac ni tlajtoli para ma quiilhuitij Tlanahuatijquetl Ezequías:

—Ya ni tlen quiijtohua nopa tlanahuatijquetl tlen tlahuel quipiya chicahualistli tlen tlali Asiria: ¿Para tlen tijmachilía para tihuelli titechtlanis tiAsiria ehuani? ¿Ipan ajqueya timotemachijtoc? ⁵ ¿Timoilhuía para nopa yejyectzi tlajtoli tlen mitzhuijtoc nopa tlali Egipto ejquetl mitzpalehuis queja soldados tlen quipiyaj fuerza huan cuali quimatiq quejatza tlatehuise? Itlajtol ax tleno ipati. Huajca, ¿ipan tlachque timotemachía para mitzpalehuis para timosisinis ica na? ⁶ Niquita para tlahuel timotemachía ipan nopa tlayacanquetl tlen tlali Egipto para mitzpalehuis, pero yajaya eltoc queja se acatl tlen tlapanis quema se ipan motoctis. Huan ax san tlapanis nopa acatl, pero nojquiya quixahuas ima tlen ipan motoctijqui. Queja nopa, Faraón tlen tlanahuatía ipan tlali Egipto quinchihuilis nochí tlen motemachía ipan ya.

7 “Pero huelis tiquijtos para imojuanti inmotemachíaj ipan imoTECO Dios. Pero ¿ax inmomacaj cuenta para Tlanahuatijquetl Ezequías quicualancamacac imoTECO quema quinxolejqui nochí nopa tiocaltini huan nopa miyac tlaixpamitl tlen oncayaya ipan tepetini? Yajaya quinchihualti nochí Judá ehuani ma quihueyichihuaca san ipan se nopa tlaixpamitl tlen eltoc ipan altepetl Jerusalén.

8 “Huajca más cuali xijchihua se tlajtoli ica noteco, yajaya tlen tlanahuatía ipan tlali Asiria. Ax tleno tijpiya. Intla tiquinpantis ome mil motlacajhua tlen huelij nemij cahuajtipa, noteco mitzmacasquía ome mil cahuayos para ipan tlejcose, pero ax tihueli. **9** Mosoldados ax tleno ininpati, ¿huajca quejatza huelis timotehuis ihuaya se itlatequipanojca noteco yonque nelquentzi soldados quinpiya? Pampa nopa tlanahuatijquetl tlen tlali Egipto ax mitzmacas niyon se tlapalehuili. Ax mitzmacas carros para tlatehuise, niyon ax mitzmacas cahuayos. **10** Huan ¿timoilhuía para na nihualajtoc nica san pampa nijnequi nijtehuis ni tlali? ¡Ax melahuac! Na nihualajtoc pampa imoTECO nechtitlanqui. Yajaya tlen nechilhuijtoc: ‘Xiya huan xijxolehuati nopa tlali.’”

11 Huajca Eliaquim, Sebna huan Joa quiilhuijque nopa tlayacanquetl tlen soldados tlen Asiria:

—Se favor, tojuanti timotlatequipanojcahua timitztlajtlaníaj xitechcamahui ica arameo tlajtoli pampa tojuanti tijmachilíaj cuali. Amo xitechcamahui ica hebreo tlajtoli pampa tlacactoque nochí ne israelitame tlen itztoque campa tepamitl.

12 Pero nopa tlayacanquetl tlen soldados quiijo:

—Noteco quinequi ma quicaquica ni tlajtoli nochí tlen itztoque ipan nopa tepamitl huan nochí Jerusalén ehuani; ax san imojuanti. Quinequi xijmatica intla ax inmotemacase ica tojuanti, ti-jyahualose ni altepetl huan ax tijcahuilise tleno ma calaqui hasta nochí tlacame mayanase huan amiquise hasta quicuase inincuitl huan quiise ini-axix.

¹³ Huajca nopa tlayacanquetl tlen soldados moquetzqui huan quintzajtzili chicahuac nopa israelitame tlen moquetztoyaj campa tepamitl. Huan quincamahui ica hebreo tlajtoli huan quinlhui:

—Xijcaquica cuali nopa tlajtoli tlen inmechilhuía nopa hueyi tlanahuatijquetl tlen tlali Asiria. ¹⁴ Quej ni quijjohua nopa tlanahuatijquetl: ‘Ma ax inmechcajcajyahua Tlanahuatijquetl Ezequías pampa yajaya ax huelis inmechmanahuis. ¹⁵ Niyon amo xijcahuilica para Ezequías inmechchihualtis ximotemachica ipan imoTECO. Inmechilhuía para temachtli imoTECO inmechmanahuis huan ax quicahuilis nopa tlanahuatijquetl tlen tlali Asiria para quiaxcatis imoaltepe, pero ax neli.’

¹⁶ “Amo xijtlacaquilica Ezequías pampa nopa tlanahuatijquetl tlen tlali Asiria inmechilhuía para ximotemacaca ica tojuanti huan xijsencahuaca tlajtoli ica tojuanti para inquipiyase tlasehuilistli. Xijtlapoca imopuertas huan xiquisaca. Huan nijchihuas para sese imojuanti mocahuas ica tlen iaxca. Quicuas itlajca ixocomecamil huan ihigueramil, huan quiis nopa atl ipan iamal. ¹⁷ Teipa quemá nochí

ya nijsencajtos niyas huan nimechhuicas ipan se tlali tlen tlahuel cuali queja cuali imotlal. Nimechhuicas ipan se tlali tlen tlahuel quieliltía trigo huan xocomecatl para inquichihuase pantzi huan tlaili. ¹⁸ Ma ax inmechcajcajahuia Tlanahuatijquetl Ezequías huan inmechilhuis para imoTECO huelis inmechmanahuis tomaco. Nyon se tiotzi tlen onca ipan nochí nopa tlaltini campa tinejnentoque ax hueltoc quimanahuía itlá tlen nopa tlanahuatijquetl tlen tlali Asiria. ¹⁹ ¿Ax inquiilnamiquij tlachque tiquinchihuilijque nopa altepetini Hamat huan Arfad? ¿Huelis quinmanahui inindios? ¡Ax quinmanahui! Huan ¿tlachque panoc ipan altepetl Sefarvaim huan Samaria? ¿Canque itztoque ama inindioses? Nyon se ax huelqui quinmanahui itlacajhua nomaco. ²⁰ Huajca tlen nochí dioses tlen onca ipan ni tlaltini, ¿catlía quimanahuijtoc itlá tlen na nomaco? ¡Nyon se! Huajca ¿inmoilhuíaj imoTECO huelis quimanahuis altepetl Jerusalén nomaco?"

²¹ Pero nopa tlacame ax quinanquilijque ica niyon se tlajtoli pampa Tlanahuatijquetl Ezequías quinilhuijtoya para ax tleno ma quinanquilica. ²² Huajca Eliaquim icone Hilcías, tlen eliyaya nopa tlayacanca tequihuejquetl ipan icaltlanahuatíl Ezequías, huan Sebna tlen elqui itlajcuilojca, huan Joa, icone Asaf, tlen quiijcuilo tlen pano mojmostla ipan itlanahuatilis, quitzayanque ininyoyo huan yajque campa Tlanahuatijquetl Ezequías. Quipohuilijque nochí tlen quinilhuijtoya nopa tlayacanquetl tlen soldados tlen tlali Asiria.

37*Ezequías quitemo TOTECO*

¹ Huan quema Ezequías quicajqui nochí ya ni, quitzayanqui iyoyo huan moquenti seyoc yoyomitl tlen quinextía para mocuesohua huan ya-jqui ipan itiopa TOTECO para momaijtos. ² Huajca quitlapejpeni Eliaquim nopa tlayacanca tequi-huejquetl ipan icaltlanahuatil, huan itlajcuilojca, Sebna, huan nochí totajtzitzi tlen más hue-huentzitzí, huan quintitlanqui para ma nechitatiij na, nitiocamanalojquetl Isaías tlen niicone Amoz. Huan nochí yajuanti moquentijtoyaj fiero yoyomitl para quinextise mocuesohuaj. ³ Huan nechilhuijque: “Quej ni quijjtohua Tlanahuatijquetl Ezequías: ‘Ni tonali eltoc se tonali tlen tlaijy-ohuclistli, tlatzacuiltlistli huan tlatelchihualistli. Eltoc se tonali tlen tlahuel ohui, tiitztoque queja se sihuatl tlen cuajcualo pampa ya ajsic hora para coneziyas, pero ax quipiya fuerza para quitl-acatiltis icones. Huan yeca nopa conetzi ax hueli tlacati. ⁴ Pero huelis TOTECO tlen moDios quicac-toc nochí nopa fiero tlajtoli tlen quijjto nopa tlay-acanquetl tlen soldados, tlen quititlanqui nopa tlanahuatijquetl tlen tlali Asiria para quimahuis-polos huan quitelchihuas nopa Dios tlen itztoc. Ni-mochiya para TOTECO ma quitlatzacuilti ipampa nochí nopa tlajtoli tlen ica quitelchijqui. Huajca ta tiIsaías, ximomaijto topampa tojuanti tlen noja timocajtoque.’”

⁵ Huan quema itlatequipanojcahua Tlanahuatijquetl Ezequías ajsitoya campa na niIsaías niitztoya, nechpohuilijque nochí tlen

Ezequías quinilhuijtoya. ⁶ Huan niquinilhui: “Xiquilhuica imoteco Ezequías para TOTECO quiijtohua ya ni: ‘Amo ximocueso, niyon amo ximajmahui ipampa nochí nopa tlajtoli tlen ica nechmahuispolojoque itlatequipanojcahua nopa tlanahuatijquetl tlen tlali Asiria. ⁷ Xiquitaca, na nijchihuas para tlacame ma hualaca tlen tlali Asiria huan quiyolmelahuaquij nopa tlanahuatijquetl para nimantzi ma mocuepa ipan itlá pampa tlahuel monequi nepa. Pero quema ajisiti ipan itlá, nepa quimictise ica machete.’”

⁸ Huan ipan ya nopa tonali quema nopa tlayacanquetl tlen soldados yajqui para quicamahuis nopa tlanahuatijquetl tlen tlali Asiria, quipanti para ya quisqui ipan altepetl Laquis huan ama quitehuiyaya altepetl Libna. ⁹ Pero nopano, nopa tlanahuatijquetl tlen tlali Asiria quiilhuijque: “Tlanahuatijquetl Tirhaca tlen tlali Etiopía hualahuij ica isoldados para mitztehuiqui.” Huajca quema quicajqui ya nopa, sampa quintillanqui tlacame ica se amatlajcuijoli para ma yaca ipan altepetl Jerusalén campa Tlanahuatijquetl Ezequías itztoya huan ma quiilhuitij ni tlajtoli:

¹⁰ “¡Ma ax mitzcajgayahua moDios tlen ipan timotemachía! Ma ax mitzilhuis para nopa tlanahuatijquetl tlen tlali Asiria ax moaxcatis altepetl Jerusalén.

¹¹ Xiquilnamiqui nochí tlen quichijtoque nopa tlanahuatiani tlen tlali Asiria ipan campa hueli tlaltini campa tlatehuijtoque. Nochi tlaltini tlen mosisinijque ica tlali Asiria, quintzontlamilti. Huajca ¿inmoilhuíaj inmomanahuise? ¹² ¿Ax

inquimatij para niyon se dios ax huelqui quinmanahui nochí nopa altepetini tlen nohuejcapan tatahua quintzontlamiltijque? Nopa altepetl Gozán, Harán, Resef huan nochí nopa tlacame tlen itztoyaj ipan altepetl Edén ipan tlali Telasari, nochí quintlamitlanque nopa tlanahuatiani tlen tlali Asiria. ¹³ Nojquiya xiquilnamiqui tlachque ininpantic nopa tlanahuatiani tlen tlali Hamat huan tlali Arfad. Ximoilhui tlen panoc ica tlanahuatiani ipan altepetl Sefarvaim, Hena huan Iva. ¿Canque itztoque ama?”

Ezequías momaijto ica TOTECO

¹⁴ Huajca Ezequías quiseli nopa amatlajcuiloli tlen quihuiquiliyayaj nopa tlayolmelahuani huan quipojqui. Huan teipa yajqui itiopa TOTECO huan quipatlajqui nopa amatl iixpa TOTECO, ¹⁵ huan momaijto ica ya. Quej ni quijito: ¹⁶ “¡TOTECO Tlen Tiquinyacana Moelhuicac Ejcahua Ma Tlatlanitij, ta titoDios tiisraelitame! Ta tiitztoc tlalajco nopa elhuicac ehuani ipan elhuicac tlen intoca querubines. San ta tiitztoc Dios tlen nochí tlaltini huan nochí tlanahuatiani ipan ni tlaltepactli. Ta tlen tiquinchijchijqui nochí elhuicactli huan tlaltepactli. ¹⁷ Xinechtlacaquili TOTECO huan xinechtlachili nica campa nimo-maijtohua ica ta. Xijtlachili ni amatlajcuiloli tlen nechtitlanili Tlanahuatijquetl Senaquerib para mitzmahuispolos ta, nopa tiDios tlen tiitztoc. ¹⁸ TOTECO, nelía melahuac nopa tlanahuatiani tlen tlali Asiria quinxolejtoque miyac tlaltini huan

inialtepehua. Panotoc senquistoc queja quijjtohua ni amatlajcuiloli. ¹⁹ Nojquiya quinmajcahuilijque ininteteyohua ipan tlitl para ma tlatlaca. Pero panoc pampa nopa teteyome ax nelía eliyayaj Dios, pero ta, quena. Nochi yajuanti san eliyayaj teteyome tlen cuahuitl huan tetl tlen tlacame quinmachijchijtoyaj huan yeca nopa Asiria ehuani huelque quintzontlamiltijque. ²⁰ Huajca ama, TOTECO, ta tlen titoDios, xitechmanahui tlen nopa tlanahuatijquetl tlen tlali Asiria para queja nopa nochí tlaltini huan tlanahuatiani quimatisé para san ta tiTOTECO tiitztoc tiDios huan axaca seyoc.”

TOTECO quinanquili Ezequías

²¹ Huajca na nilsaías, niicone Amoz, nitlatitanqui ma quiilhuitij Tlanahuatijquetl Ezequías para quej ni quijito TOTECO tlen toDios tiisraelitame para quinanquilis. TOTECO quijjtohua: “Na nijcactoc queja timomaijtojtoc ipampa tlen quichijtoc Senaquerib, nopa tlanahuatijquetl tlen tlali Asiria huan nijpiya ni tlajtoli para ya.”

²² Tlanahuatijquetl tlen tlali Asiria: “Noaltepe Jerusalén [37:22 O Sion.] huan tlen itztoque nopano mitzpinajtíaj, mitztlajilhuíaj huan quijoliníaj inintzonteco ica moica. ²³ ¿Ajqueya timoyolilhuíaj para tijpinajtijtoc huan tijmahuispolojtoc? Tinechtelchijtoc huan tinechtlajilhuijtoc na tlen niTlatzejzeloltic tlen niininTeco israelitame. Noixtla na timosisinijtoc huan timohueyimajtoc. ²⁴ Tiquintitlanqui motlayolmelajcahua para ma nechmahuispoloca na. Ininpampa yajuanti tiquijtojtoc para mosoldados huan miyac

mocarros para tlatehuise titlejcotoc ipan nopa tepetini tlen más huejcapantique. Quena tiajsítoc hasta nepa ipan nopa cuatitlamitl tlen Líbano. Huan tiquintzontejqui nopa tiocuatini tlen más huejcapantique huan nopa cipreses tlen más tlapejpenilme. ²⁵ Tiquijtohua para ipan miyac tlaltini tijchijtoc ameli huan mitzmacatoc fuerza quema tiquic nopa atl. Huan ta tijchijtoc ma huaquica nopa miyac atemitl ipan tlali Egipto para huelis panose mosoldados. Queja nopa tiquijtojtoc. ²⁶ ¿Pero noja ax tijmachilijtoc para nochí ya ni na, nIDIOS, nijsencajqui huejcajquiya para queja nopa ma panos? Quena, na nijchijqui para nochí tlamantli ma pano senquistoc queja nijtlalijtoc. Na tlen nimitzmacac chicahualistli para ta tiquintzontlamiltisquía miyac tlaltini tlen moyahualojoque ica tepamitl huan tiquincahuasquía queja se tlamontomitl tlasoli. ²⁷ Nopampa na, nopa tlacame tlen itztoyaj ipan nopa tlaltini itztoyaj queja sacatl tlen ax quipiyaj chicahualistli huan mitzimacasque huan yeca nimantzi tihuelqui tiquintzontlamilti. Nochi momajmatijque huan mopinajque moixtla. Yajuanti itztoyaj queja xihuitl tlen mosohua calpani tlen quiajsi tonati huan nimantzi huaqui. ²⁸ Pero na nimitzixmati cuali huan nijmati tlachque timoilhuía. Nijmati quesqui hueltas tihualajtoc huan tiyajtoc, huan nijmati nochí tlen tijchijtoc. Nojquiya nijmati quejatza tlahuel ticualantoc ica na. ²⁹ Huajca pampa tlahuel ticualanqui nohuaya huan timohueyimatqui noixtla, ama na nimitzlalilis se tepos chijcoli ipan moyacatzol huan se tepos camachali mocamaco. Huan nimitzchi-

haultis ximocuepa sampa ipan motlal ipan nopa ojtlí campa tihualajqui.”

Nopa tlanextili para Ezequías

³⁰ Huajca na, niIsaías niquilhui Ezequías ni tlatoli tlen TOTECO quijito: “Ya ni elis nopa tlanextili tlen inmechnextilis para na nijmanahuía ni altepetl tlen nopa tlanahuatijquetl tlen tlali Asiria. Ipan ni xihuitl huan ipan ne seyoc xihuitl inquicuase nopa trigo tlen ixhuas iselti. Huan ipan nopa expa xihuitl intlatojtocase huan inquipixcase. Inquitocase xocomecatl huan inquicuase itlajca. ³¹ Huan nochí nopa tlacame tlen noja mocahuase ipan tlali Judá sampa itztose ica cuali huan momiyaquilise queja se tzontli tlen quiipyas inelhuayo huan ixochiyo huan tlaquis miyac. ³² Pampa ipan altepetl Jerusalén mocahuase se quesqui tlacame tlen TOTECO quinmaquixtis. Huan yajuanti sampa quitemitise inintlá. Ichicahualis TOTECO Tlen Quinyacana Ielhuicac Ejcahua Ma Tlatlanitij quichihuas ma pano ya nopa.

³³ “Huan ya ni tlen TOTECO quijtohua tlen nopa tlanahuatijquetl tlen tlali Asiria:

“ Isoldados nopa tlanahuatijquetl tlen tlali Asiria ax calaquise ipan altepetl Jerusalén, niyon ax quimajcahuilise ininflechas. Ax nejnemise calteno itepa, niyon ax quitlaltemise nechca nopa tepamitl para ipan tlejcose. ³⁴ Nopa tlanahuatijquetl mocuepas ipan itlá ipan nopa ojtlí ica campa hualajqui. Huan ax quema calaquise ipan altepetl Jerusalén. Queja nopa quijtohua TOTECO. ³⁵ Pampa na nijmanahuis ni altepetl

huan nijmaquixtis. Huan ya nopa nijchihuas para tlacame ma nechtlepanitaca huan pampa niquipanelía notlatequipanojca David.’”

³⁶ Huan ipan nopa tlayohua ielhuicac ejca TOTECO quisqui huan yajqui ipan nopa lugar campa mochijtoyaj nopa soldados tlen tlali Asiria huan quinmictito 185 mil soldados. Huan hualmostla ijnaltzi quema nopa sequinoc mejque tlen noja mocajtoyaj, quiitaque para iniixtla tepejtoque tlahuel miyac mijcatzitzti. ³⁷ Huajca Senaquerib, nopa tlanahuatijquetl tlen tlali Asiria mocuepqui ichaj ipan nopa hueyi altepetl Nínive ipan itlal. ³⁸ Huan se tonali quema yajaya momaijtohuayaya ipan itiopa nopa teteyotl tlen itoca Nisroc tlen yajaya quihueyimatiyaya, calajque ome itelpocahua tlen inintoca eliyaya Adramelec huan Sarezer, huan quimictijke ica machete. Teipa yajuanti cholojque hasta tlali Ararat. Huan icone tlen itoca Esarhadón mochijqui tlanahuatijquetl ipan tlali Asiria.

38

Icocolis Ezequías huan quejatza mochicajqui

¹ Huan ipan nopa tonali, Ezequías quipixqui se cocolistli tlen chicahuac huan ya itztoya para miquis. Huan na nitiocamanalojquetl Isaías, niicone Amoz, niyajqui nijpaxaloto huan niquilhui:

—Quej ni quijtohua TOTECO: ‘Xijcualtlali nochitlamantli ipan mochaj pampa ax timochicahuas tlen ni cocolistli.’

² Huajca Ezequías moixijcueni huan tlachixqui ica campa tlapepecholi huan momaijto ica TOTECO, ³ huan quijto: “TOTECO, na

nimitztlajtlanía xiquilnamiqui quejatza nelía nimitztequipanojtoc ica temachili huan nimonejnemiltijtoc ica noyolo xitlahuac huan nochipa nijchijtinentoc tlen mitzpactía.”

Teipa Ezequías mochoquili ica miyac cuesoli.

⁴ Huajca TOTECO sampa nechnojnotzqui ni-Isaías huan nechilhui, ⁵ ma niya huan ma niquilhuiti Ezequías quej ni: “TOTECO tlen iTeco mo-huejapan tata David, quijtohua ya ni: ‘Na nijcajqui quejatza timomaijto huan niquitztoc quejatza timochoquili. Huajca na nimitzmacas noja xiitzto seyoc 15 xihuitl. ⁶ Huan ta huan ni altepetl nimechmanahuis tlen nopa tlanahuatijquetl tlen tlali Asiria huan na nitlatehuis ipampa ni altepetl.’”

⁷ Huan na niIsaías niquijto:

—Ya ni nopa tlanextili tlen mitzmatiltis TOTECO para mitznextilis melahuac quichihuas tlen mitzilhujtoc. ⁸ Quichihuas para iecahuilo tonati ma mocuepa majtlactli pasos ipan ireloj Tlanahuatijquetl Acaz.

Huan ne tonati mocuepqui majtlactli pasos tlen ya panotoya.

⁹ Teipa quema Tlanahuatijquetl Ezequías mochicajqui tlen icocolis, quijcuilo ni huicatl tlen nochitlen quipanoc:

¹⁰ San ninejnentoc tlajco tlen nochitlen noyolis huan ama monequi nijcajtehuas pampa nimiquis.

Ayoc huelis nicaxitis noxihui queja monequiyaya. Ama ya monequi niyas ipan nopa tlali tlen miquistli.

11 Niquijto: “Ayoc quema niquitas TOTECO ipan ni tlali campa itztoque tlen yoltoque.

Ayoc quema niquinitas nohuampoyohua tlen itztoque ipan ni tlaltepactli.”

12 Nopa ajacatl ya quihuahuatatzqui noyolis queja se ajacatl quihiica iyoyoncal se tlamocuitlahuijquetl tlen tlapiyalime.

Huan queja nopa tlajtzonquetl quitequi se icpatl, queja nopa nojquiya ni cocolistli quitequis noyolis.

Nechtlaijiyohuiltía tlayohua huan tonaya.

13 Nitzajtziyaya seyohual ipampa nopa tlacuajcualocayotl ipan notlacayo.

Hasta nijmachiliyaya queja elisquía se león nechpojpostequilía noomiyohua.

San se yohuali huan se tonali huan nim quis.

14 Niayijtiyaya queja nopa tototl gruya huan queja nopa tepantototl.

Nitlaijiyohuiyaya queja se paloma.

Noixtiyolhua nechcocohuayayaj pampa senquistoc nitlachixtoya nepa elhuicac para njichiayas itlapalehuil TOTECO.

Niquijtohuayaya: “¡NoTECO Dios, xinechpalehui!

Niitztoc ipan se hueyi tlaijiyohuclistli.”

15 ¿Pero tlachque huelis niquijtos?

TOTECO iselti nechmacac ni cocolistli.

Na ayoc nimohueyimatis sampa ipampa nochinoyolis,

pampa ipan noyolo tlahuel nitlaijiyohuictoc.

16 NoTECO Dios, nelía cuali nopa tlatzacuiltyli tlen tinechmacatoc,

pampa nechyacana ipan se yolistli xitlahuac ica ta,

huan nechhualiquilía chicahualistli.
 Ama tinechchicajtoc huan techchihuilijtoc noja
 ma niitzto.

¹⁷ Quena, ni tlaijiyohuclistli tlen hualajqui ipan na,
 ama nijmachilía para nelía cuali,
 pampa ica ya nopa ta tinechmanahui tlen
 miquistli,
 huan ama ayoc tijtlachiliya notlajtlacolhua.

¹⁸ Tlacame tlen ya mictoque huan ya quintalpa-
 chojtoque, ayoc hueli mitzhueyichihuase.
 Ayoc quichiyaj para ta tlen titemachtli tiquinpale-
 huis.

¹⁹ San quichiyaj yajuanti tlen itztoque.
 Quena, san yajuanti hueli mitzhueyichihuaj queja
 na nijchihua ama ni tonali.
 Huan nochí tatame quinpo huilise inincone hua
 para ta nelía titemachtli.

²⁰ TOTECO yajaya techchicajqui.
 Huajca ama mojmostla nihuicas ipan
 itiopa TOTECO miyac huicatl para
 nijhueyichihuas.

²¹ Achtohuiya na niIsaías niquinilhuijtoya it-
 latequipanojcahua Ezequías: “Xijtisica higos huan
 nopa higo tlatixtli xijpepechohuilica ipan icoco-
 hua Ezequías huan ica ya nopa mochicahuas.”

²² Nojquiya achtohuiya Ezequías tlatzintocatoya
 tlachque tlanextili quimacas TOTECO para
 quinextilis temachtli quichicahuasquía huan
 sampa huelis yas ipan itiopa.

39

Ezequías quinseli Babilonia ehuani

¹ Teipa quema panotoya tonali, nopa tlanahuatijquetl tlen tlali Babilonia tlen itoca Merodac Baladán, tlen icone Baladán, quititlanili Ezequías se regalo huan nojquiya contlajpalo. Quimatqui para mococohuayaya huan ama ya mochicajtoya.

² Huan Ezequías quinseli nopa tlacame tlen hualajtoyaj ica paquelistli. Teipa quinhuicac ipan icaltlanahuatil huan quinnextili nochi tlamantli tlen quipiyayaya. Quinnextili nopa plata, oro, tlacualpajyotl huan nochi tlamantli tlaajhuiyacayotl. Nojquiya quinhuicac ipan ichaj campa quiajcocui tepostli para ica tlatehuise para ma quiitaca huan nojquiya quinnextili campa oncayaya nochi tlamantli tlen miyac ipati. Huan niyon se tlamantli ax quintlatili.

³ Huajca na, nitiocamanalojquetl Isaías, ni hualajqui campa itztoya Tlanahuatijquetl Ezequías huan quiilhui:

—¿Tlachque mitzilhuijque nopa tlacame? Huan ¿canque hualahuij?

Huan Ezequías quiilhui:

—Hualahuij huejca ipan nopa tlali Babilonia.

⁴ Huajca niquilhui:

—¿Tlachque quiitaque ipan mocaltlanahuatil?

Huan Ezequías quiilhui:

—Niquinnextili nochi tlamantli tlen tlahuel papatiyo tlen nijpiya ipan nocaltlanahuatil. Huan niyon se tleno ax niquintlatili. Nochi quiitaque.

⁵ Huajca na, niIsaías niquilhui Ezequías:

—Xijtlacaquili tlachque quijtohua TOTECO Tlen Quinyacana Ielhuicac Ejcahua Ma Tlatlanitij: ⁶ ‘Ajsis tonali quema nochi tlen tijpiya ipan mocaltlanahuatil huan nochi tlamantli

tlen pajpatiyo tlen mohuejapan tatahua quiajcoctoyaj hasta ama, mitzcuiliquij huan quihuicase ipan tlali Babilonia huan niyon se tlamatli ax mocahuas nica.⁷ Huan hasta sequin moconebla huan moixhuihua quinhuicase ipan tlali Babilonia. Huan nopano quincaparose para tlatequipanose ipan icaltlanahuatil nopa tlanaquatijquetl tlen tlali Babilonia.'

⁸ Huan Ezequías nechilhui ni Isaías:

—Cualtitoc nochí tlen TOTECO quijtojtoc.

Quijto ni pampa quimachili para oncasquía tlasehuilistli nochí iyolis.

40

TOTECO quinyolchicahuas Jerusalén ehuani

¹ “Xiquinyolchicahuaca, quena, xiquinyolchicahuaca notlacajhua”, queja nopa quijtohua ininteco Dios. ² Ica yejyectzi xiquincamahuica altepetl Jerusalén ehuani huan xiquinilhuica para nopa tonali tlen inintlaijyohuilis ya tlanqui pampa TOTECO ya quinquixtilijtoc inintlajtlacolhua. Ya quintlamitlatzacuitlijtoc queja quinamiqui ipampa nochí inintlajtlacolhua.

³ Inquicaquise itos se tlen camati chicahuac ipan nopa huactoc tlali huan quijtohua: “Xijcualtlalica se ojli para TOTECO ipan nemis ipan nopa huactoc tlali. Xijchihuaca para Toteco Dios se ojli tlen xitlahuac huan sepantic ipan huactoc tlali. ⁴ Xijtemitica nochí tlamayamitl huan xijsepanoca nochí tlachiquili. Xijxitlahuaca nochí ojhuijhuicoli huan xijtlaltemica nochí tlacomoli.

⁵ Huan huajca monextis ihueyitilis TOTECO, huan nochí tlacame ipan tlaltepactli sentic quiitase. TOTECO iselti quijtojtoc para queja nopa panos.”

⁶ Huan nijcajqui itos se tlen nechilhuiyaya: “Xitzajtzi chicahuac.” Huajca na niquilhui: “Huan ¿tlachque niquijtos?” Huan ya nechilhui: “Xitzajtzi chicahuac huan xiquinilhui para nochí tlacame ipan ni tlaltepactli itztoque queja sacatl tlen ax huejcahua huan iniyejyejca eltoc queja xochitl tlen nimantzi pilini. ⁷ Nochi sacatl huaqui huan nochí xochitl pilini huan huetzi pampa iijiyo TOTECO quiilpitzaco. Tlacame nojquiya itztoque queja nopa sacatl. ⁸ Nopa sacatl huaqui huan nopa xochitl pilini, pero Itlajtol Toteco Dios mocahua para nochipa.”

⁹ Ta tlen tijhualica ni cuali tlajtoli ipampa tlen itztoque ipan altepetl Jerusalén [40:9 O Sion.], xitlejco hasta itzonpac ne tepetl huan xiquintza-jtzili. Xiquintzajtzili chicahuac huan amo ximajmahui. Xiquinilhui nopa altepetini tlen tlali Judá: “¡Xiquitaca, ya huala imoTeco Dios!” ¹⁰ TOTECO Tlen Más Quipiya Tlanahuatili huala ica ihueyi chicahualis huan tlanahuatis ica nochí tequihuej-cayotl. Huan quihualicas miyac tlaxtlahuili para ica quitlaxtlahuis sese tlacatl queja quinamiqui ica tlen quichijtoc. ¹¹ Huan quinmocuitlahuis itlacajhua queja se tlamocuitlahuijquetl quinmocuitlahuía iborregojhua. Ipan ima quinhuicas nopa pilborregojtitzti nechca iyolixpa. Huan ica yejyectzi quinyacanas nopa sihua borregojme tlen sanoc quintlacatiltijoque ininconehua.

Ihueyitilis Toteco

¹² San ya quiyejyeco nopa huejhueyi atl ica imacomol huan ica mistitl quiyejyeco elhuicactli. San ya quiyejyeco quesqui ietica ni tlaltepactli, tepetini huan cuatitlamitl. ¹³ Niyon se ax hueli quiconsejomaca Itonal TOTECO. Niyon se ax huelis quimachtis tlen cuali o tlen ax cuali para quichihuas. Axaca hueli quitlalnamictis. ¹⁴ TOTECO ax quema quitemo se acajya para ma quiconsejomaca. Axaca quimachti ya para ma quichihua tlen xitlahuac. Axaca huelis quitlalnamictis. ¹⁵ Pampa yajaya quinita nochí tlaltini queja ax tleno ininpati. San elij queja se tlachipimitl atl o queja tlaltejpoctli tlen quitlalíaj ipan balanza huan ax tleno ietica. Yajaya quichihua ma ixpolihuica tepetini queja elisquía tlasoli. ¹⁶ Nochi tlapiyalime tlen itztoque ipan nopa cuatitlamitl tlen tlali Líbano, ax quiaxilis para se tlacajcahualistli para quitencahuilise ipan tlaixpamitl. Niyon nochí nopa cuatini nopano ax quiaxilis para quichihuas nopa tliltl. ¹⁷ Nochi tlaltini quinita queja ax tleno ininpati. Iixtla ya nesij queja tlasoli.

¹⁸ ¿Ica ajqueya huelis inquihuicalotise Toteco Dios? ¿Quejatza huelis titeyolmelahuas quejatza itztoc? Ax itztoc queja se tlaixcopincayotl. ¹⁹ Yajaya ax queja se teteyotl tlen san quimachijchijtoc se tlacatl. Xiquitaca, se tlacatl quichijchihua se totiotzi huan nopa teposchijquetl quiyejyectlalía itejteno ica oro huan iyolixco quitlalilía pilteposmecatzitz tlen plata. ²⁰ Pero intla se tlacatl tlen tlahuel teicneltzi ax hueli quicohua ni yejyectzi totiotzi, yajaya quitemohua se cuali cuahuitl tlen ax palani.

Huan quema quipantía, quitlanehui se tlacatl tlen tlahuel tlalnamiqui para ma quichijchihuili se totiotzi. Huan tlen nopa cuahuitl quichihua se itotiotzi tlen ax hueli moojolinía.

²¹ ¿Ax tijmati? ¿Axaca mitzilhuijtoc quejatza pejqui ni tlaltepactli? ¿Huelis hasta ipejya axaca mitzmachtijtoc ajqueya quichijqui? ²² Quichijqui TOTECO tlen mosehuijtoc ipan isiya tlen eltoc itzonpac ni tlaltepactli tlen tolontic, huan nochí tlacame tlen itztoque nica quinita queja elisquíaj chapolime. Yajaya quipatlahua elhuicactli queja elisquía se hueyi cortina. Quena, ica elhuicactli quichihua tlen eltoc queja se iyoyoncal. ²³ Yajaya quinquixtilía ininchicahualis huejhueyi tlacame huan quinechcapantlali tlen quinahuatiáj ni tlaltepactli. ²⁴ Yajuanti elise queja tzontli tlen sanoc quintoque huan pejtoque motlatzquilíaj o sanoc pejtoque monelhuayotíaj ipan tlali pero aya quipiyaj chicahualistli. Huan Toteco Dios quinilpitzas huan quipilinaltis nochí inintequi tlen yajuanti quichijtoque. Huan quihuicas ajacatl queja elisquía tlasoli.

²⁵ “Huajca ¿ica ajqueya intechhuicalotise? ¿Ajqueya itztoc san se queja na?” Queja nopa tlatzintoca Toteco Dios tlen Tlatzejzeloltic.

²⁶ ¡Xajcotlachiyaca nepa elhuicac! ¿Ajqueya quinchijchijqui nochí ne sitlalime? Yajaya quinyacana nopa sitlalime queja itztosquíaj ielhuicac Ejcahua para tlatehuise. Yajaya quimati quesqui sitlalime eltoque huan sesen quinotza ica itoca. Pampa TOTECO quipiya nochí yajatili huan chicahualistli ax quema polijtoc niyon se.

²⁷ Huajca inisraelitame tlen iniixhuihua Israel, ¿para tlen huelis inquijtohuaj para TOTECO ax inmechita quema initztoque ipan tlaijiyohuclistli? Huan ¿para tlen huelis inquijtose para TOTECO ax quicaqui quema sequinoc inmechchihuila tlen ax xitlahuac? ²⁸ ¿Ax inquimachilíaj? ¿Ax inquicac-toque para TOTECO yajaya nopa Dios tlen itztoc para nochipa? Yajaya tlen quichijqui nochí tlen onca hasta campa itejteno ni tlaltepactli. Yajaya ax quema tlami ichicahualis, niyon ax quema tlaxicohua. Itlalnamiquilis eltoc nelhueyi hasta axaca hueli quitlamimachilis. ²⁹ Yajaya quinfuerzajmaca tlen siyahuij huan quinmaca yan-cuic chicahualistli tlen cuatij. ³⁰ Hasta telpocame quemantzi tlaxicohuaj, huan nopa tlacame tlen sanoc moscaltíaj cuatij huan huetzij. ³¹ Pero tlen motemachíaj ipan TOTECO para quinpalehuis, mojmostla quipiyase fuerza. Ixtlejcose chicahuac queja quipixtosquíaj ieltlapal se cuajtli. Motlalose chicahuac huan ax cuatise. Nejnemise huejca huan ax siyahuisse.

41

Toteco quimocuitlahuía Israel

¹ TOTECO quijtohuia: “Nochi intlacame ipan nochí tlaltini tlen inmopantíaj iteno hueyi atl, xinechtlacaquilica huan amo ximolinica. Xisencahuaca tlachque inquijtose noixtla. Ximonechcahuica huan xijpehualtica xicamatise noixtla. Nopa tetlajtolsencahuani mocualtlalij-toque para quicaquise motlajtol para tijpantise ajqueya quichihua tlen xitlahuac.

² “¿Ajqueya inmoilhuíaj quiyoltilantoc nopa tlacatl tlen nochipa tlatlani huan quichijtoc ma huala tlen campa quisa tonati para quichihua tlen xitlahuac queja nijtequimaca ma quichihua? Na niDIOS, na niyyoltilantoc. Na tlen nijchijtoc ma quintlani miyac tlaltini, huan nijchijtoc ipan ma moquejquetza miyac tlanahuatiani. Na nijchijtoc para ma quintzontlamilti miyac soldados ica imachete hasta quinchihuas cuechtic queja tlatlejpoctli huan quinxolehuilis queja tlasoli tlen quinmictia ica icuahuitol. ³ Quema yajaya quintojtoca icualancaitacahua, ax tleno quiimacasi ipan ojli. Yahui chicahuac huan ica temachtli yonque ipan se ojli campa ax quema nejnentoc. ⁴ ¿Ajqueya inmoilhuíaj quinnahuatía tlanahuatiani ma quichihuaca tlen quichihuaj? ¿Ajqueya quinyacana nochitlacame tlen tlacajtihualajtoque ica tlen quichihuaj tlen ipejya ni tlaltepactli? Na niDIOS nijchihua. Na tlen niipejya huan niitlamiya. San na.

⁵ “Nochi nopa tlaltini tlen mopantíaj iteno hueyi atl quiitase huan momajmatise, huan mochiyaj para quicaquise tlachque yancuic tlamantli quichihuas Ciro. Nochi tlaltini tlen mopantíaj huejca huihuipicase huan mocualtlalise sentic para tlatehuise.”

⁶ Sesen tlacatl quiyolchicahuas ihuampo tlen itztoc icalnechca huan quiilhuis: “¡Amo ximoyoltetili!”

⁷ Nopa cuaxinquetl tlen quichihuas yancuic teteyome ica cuahuitl quiyolchicahuas nopa tlacatl tlen quinxahuas ica oro. Huan nopa tepos tejtejtzonquetl quiisihuittis nopa tlacatl tlen quimolonis nopa tepostli. Quiilhuis: “Nelía

quisas cuali totequi.” Huan ica miyac cuidado quitlatzquiltíaj iajcolhua huan iicxihua. Teipa quitlatzquiltíaj nopa teteyotl ica lavos para ax mojmolinis, niyon ax huetzis.

⁸ “Pero imojuanti inisraelitame, innotlatequipanojcahua. Innotlacajhua, iniiixhuihua Jacob tlen nimechtlapejpenijtoc huan ininteipa conehua Abraham tlen nonelhuampo. ⁹ Na nimechquixtijtoc tlen campa hueli hasta campa ontlami ni tlaltepactli huan nimechilhuijtoc: ‘Imojuanti innotlatequipanojcahua. San na xinechtequipanoca.’ Na nimechtlapejpenijtoc huan ax quema nimechtlahuelcahuas. ¹⁰ Amo ximajmahuica pampa na niitztoc imohuaya. Amo ximocuesoca pampa na niimoTeco. Nimechfuerzajmacas. Nimechpalehuis huan nimechmaitzquitos ica nonejmatl tlen ica nitlatlani.

¹¹ “Xiquita, nochí tlen mitzcocolíaj mopinahualtise huan ayoc quimatise tlachque quichihuase. Huan nochí tlen quinequise mitztehuise, miquise. ¹² San tlapic inquintemose tlen inmechcocoliyayaj, pampa ayoc inquinpantise. Nochí ya-juanti elise queja se tlamantli tlen ax quema itztoyaj. ¹³ Pampa na niDios huan niimoTECO, nimechitzquitoc ipan imomanejmatl huan nimechilhuía: ‘Amo ximajmahuica. Nica niitztoc para nimechpalehuis.’”

¹⁴ Huan TOTECO quiijtos: “Amo ximajmahuica inisraelitame [41:14 Iniiixhuihua Jacob.], yonque inpilsiltzitzi huan ax inquipiyaj fuerza, na nimechpalehuis. Na niimoTECO tlen nimechcojqui para innoaxcahua. Na

tlen niTlatzejzelotic huan niitztoc imohuaya inisraelitame. ¹⁵ Na nimechtlalijtoc queja se yancuic cuahuitl ica itlancoch tlen quitequihiúaj para quiyolquixtise trigo. Inquintzontlamiltise nochi imocualancaitacahua. Inquintlanise nochi. Elise queja se tlen quichihua tlatixtic tepetini huan tlachiquili ¹⁶ Queja se quimajcahuas ajacatipa trigo para ajacatl ma quinhuicas itlasolo, queja nopa elis queja inquinmajcahuase ajacatipa nochi imocualancaitacahua huan se hueyi ajcomalacatl quintlamixolehuas. Pero imojuanti tlahuel inmopaquilismacase ipan na, niimoTECO tlen niTlatzejzelotic huan niitztoc imohuaya inisraelitame.

¹⁷ “Quema teicneltzitz huan tlen ax tleno quipiyaj, quitemose atl, pero ax quipantise, huan inincamac huactos huan ininnenepil pepechijtos ipan inincamachal, niquinnanquilis na niDIOS tlen niimoTECO inisraelitame. Quema nechtzajtzilise para ma niquinpalehui, ax quema niquintlahuelcahuas. ¹⁸ Nijtlapos miyac atemitl ipan nopa tepetini tlen huejcapantique. Nijchihuas ma meya atl ipan nopa tlamatayamil. Ipan nopa huactoc tlali oncas ameli tlen quipixtos miyac atl. Huan ipan nopa tlaltini campa ax tleno onca huan campa ax huetzi atl, oncas miyac pilatlajtzitz tlen quisase campa mantoc atl o campa meya atl. ¹⁹ Ipan nopa huactoc tlali niquintocas miyac cuatini. Niquintocas miyac cuatini tlen tiocuahuitl, acacia, arrayanes, olivo, cipreses, pino huan abeto. ²⁰ Huan nochi tlacame quiitase ni hueyi tlamtli huan quimachilise para na nijchijqui, na niDIOS, niimoTECO

tlen niTlatzejzelotic huan niitztoc imohuaya
inisraelitame.

TOTECO quintlatzintlantlalis teteyome

21 “¡Inteteyome, xinechnextilica intla huelis inquichihuase ni huejhueyi tlamantli! Intla inteteyome inhuelisquíaj inquichihuaj se tlenijqui, xihualaca huan xinechnextilica.” Queja nopa niquipijtohua, na niDIOS, tlen nitlanahuatijquetl tlen tlali Israel. **22** “¿Huelis inteteyome intechilhuise tlachque panoc huejcajquiya huan tlachque panos teipa? Intla huelis intechilhuise, huajca timechtlacaquilise. **23** Intla nelía indioses, huajca xitechilhuica tlachque panos teipa. O xijchihuaca se hueyi tlamantli tlen cuali o tlen ax cuali, tlen techchihuilis ma timomajmatica huan techchihuilis ma timechimacasica. **24** Pero inteteyome ax tleno imopatij huan ax tleno hueli inquichihuaj. Huan tlen hueli tlacatl tlen quitlapejpenía se teteyotl para quihueyimatis mochihuas queja se tlamantli tlen niquipijya queja nopa teteyotl niquipijya.

25 “Pero na nijyoltilantoc nopa tlacatl tlen hualas tlen norte huan tlen campa quisa tonati. Yajaya quintehuiqui nochí tlaltini huan nechtocaxtis na. Huan na nijchihuas para ma quintlani nochí tlanahuatiani huan tlayacanani. Yajaya moquejquetzas ininpani queja se chachapalchijquetl moquejquetza ipan nopa soquitl tlen quisencahua ica iicxihua.

26 “Axaca seyoc inmechilhui huejcajquiya para melahuac panosquía ya ni para huelis ama inquiilhuise para xitlahuac tlen quiijo.

Axaca seyoc quijito niyon se tlajtoli tlen ya ni.
²⁷ ¡San na! Na tlen niachtohui niquinyolmelajqui Jerusalén ehuani. Nijtitlanqui se tlayolmelajquetl tlen quinlhui nopa cuali tlajtoli para nimantzi mocuepase imotlacajhua.

²⁸ “Niyon se teteyotl ax inmechilhui ya ni. Huan niyon se ax tlananquili quema tlatzintocaque.
²⁹ Pampa nochí nopa teteyome ax tleno hueli quichihuaj. Ax quinamiqui quinhueyimatise. Nopa teteyome ax tleno ininpati, san queja ajacatl.

42

Yajaya tlen itlatequipanojca TOTECO

¹ “Xiquitaca notlatequipanojca tlen nijfuerzaj-maca. Yajaya tlen nijtlapejpenijtoc huan nijpiya miyac paquelistli ica ya. Ipan ya nijtlalijtoc Notonal. Yajaya quichihuas para ipan nochí tlaltini ipan tlaltepactli ma quinchihuilica tlacame tlen xitlahuac. ² Yajaya cuali iyolo. Ax tzajtzi, niyon ax camatis chicahuac. Ax quicaquise itos tlamiyacapa ipan calles. ³ Ax quitlaijiyohuiltis tlen ayoc quipiya fuerza huan tlen ya quinequi miquis. ¡Quiyolchicahuas! Ax quisehuis se tlilt tlen pilquentzi lementoc. Yajaya tetlajtolsencahuas xitlahuac para nochí tlacame tlen sequinoc quint-laijiyohuiltijtoque. ⁴ Yajaya ax siyahuis hasta campa hueli ipan ni tlaltepactli nochí ya quichij-tose tlen senquistoc xitlahuac. Ax mosiyajcahuas hasta quema nopa tlaltini tlen mopantíaj hasta más huejca huan hasta iteno hueyi atl ya quichiyaj itlamachtil.”

⁵ TOTECO Dios quichijqui elhuicactli huan quipatlajqui nepa huejcapa. Yajaya tlen quichijqui tlaltepactli huan nochí tlen onca ipani. Yajaya tlen quinmaca yolistli huan inintonal nochí tlacame ipan tlaltepactli huan quej ni TOTECO quiilhuía itlatequipanojca: ⁶ “Na niDIOS nimoTECO, nimitznotztoc para titenextilis para na nixitlahuac huan nijchihua tlen cuali. Na nimitzmaitzquitos huan nimitzmocuitlahuis. Nimitzmactilijtoc notlacajhua para ma quimatica para melahuac nijchijtoc se tlajtolsencahuali ica yajuanti. Nojquiya tielis queja se tlahuili tlen tiquinyacanas tlacame tlen nochí tlaltini para ma hualaca campa na. ⁷ Tiquinchihuas ma tlachiyaca tlen popoyotzitzí. Tiquinquixtis tlen tzactoque ipan tlatzactli. Huan tiquinmalacanis tlen ilpitoque ipan tzintlayohuilotl.

⁸ “Na niDIOS, niimoTECO. Ya nopa notoca huan axaca seyoc nijcahuilis ma quipiya nohueyitilis. Nyon ax nimechcahuilis intechhueyimatise na inihuaya teteyome tlen quinmachijchijtoque tlacame. ⁹ Ximomacaca cuenta para melahuac pantotoc nochí tlen nitlayolmelajqui achtohuiya para panosquía. Huan ama seyoc huelta nitlayolmehahuas yancuic tlamantli tlen panos teipa. Huan nochí nopa tlamantli panos.”

Se huicatl para TOTECO

¹⁰ Xihuicaca para TOTECO se huicatl yancuic. Nochi imojuanti tlen initztoque ipan nopa tlaltini tlen más huejca ipan ni tlaltepactli, xihuicaca para TOTECO ipampa nochí tlamantli tlen quichijtoc.

¡Xihuicaca nochí imojuanti tlen initztoque ipan hueyi atl!

¡Xihuicaca nochí tlen initztoque ipan nopa tlaltini tlen mopantíaj iteno hueyi atl!

¹¹ Ma huicaca tlen itztoque campa hueli ipan nopa huactoc tlali. Tlen inehuani nopa pilalte-petzitzi ipan Cedar, xijhuicatica.

Nopa tlacame tlen Sela ma huicaca.

Nochi xihuicaca ica miyac paquillistli.

Huan nojquiya xihuicaca nochí imojuanti tlen initztoque itzonpac nopa tepetini.

¹² Nochi nopa tlaltini tlen mopantíaj iteno hueyi atl ica campa oncalaqui tonati ma quihuey-itlalica TOTECO,

huan ma quihuicatica ipampa nochí ichicahualis.

¹³ TOTECO hualas queja se hueyi tlatehuijquetl tlen tlahuel quipiya chicahualistli.

Hualas ica ihueyi cualancayo para quintzont-lamiltis icualancaitacahua.

Tzajtzis chicahuac para teyolmelahuas ya pehuas tlatehuijcayotl.

Quinextis ichicahualis ipan icualancaitacahua.

¹⁴ TOTECO quijjohua: “Ya quipiya tonali ax nimolinijtoc huan nimotzacuilijtoc para ax tleno nijchihuas.

Pero ama, quena, nijnextis nohueyi cualancayo.

Nitzajtzis queja se sihuatl tlen quitlacatiltía icone.

¹⁵ Nijhuelonis tepetini huan tlachiquiltini.

Nijhuatzas nopa sacatl huan cuatini.

Niquincuepas nochí atemitl huan ameli ica huactoc tlali.

Nijhuatzas campa momanayaya atl.

16 Huan notlacajhua tlen popoyotzitzi, niquiny-acanas ipan se ojtlí tlen ax quema quiitz-toque.

Huan iniixtla nijchihuas para nopa tzintlay-ohuilotl ma mocuepa tlahuili.

Nijchihuas nopa ojtlí tlen elqui fiero ma elis sepa-ntic huan xitlahuac iniixtla,
huan ax quema niquintlahuelcahuas.

17 Pero mopinahualtise nochí tlen motemachíaj ipan teteyome huan tlaixcopincayome huan quinilhuíaj: ‘Imojuanti intodioses.’

Tlacame queja nopa ayoc quimatise tlachque quichihuase.”

Israelitame ax quitlacaquilíaj TOTECO

18 TOTECO quinilhuía israelitame: “¡Xijtlacaquila-ica innonotzitzi! ¡Xinechtlachilica inpopoyotzitzi para huelis inquiitase! **19** Ipan nochí tlaltepactli, ¿ajqueya itztoc tlen tlahuél popoyotic queja in-notlacajhua tlen nimechtlapejpenijtoc para in-nechtequipanose? Huan ¿ajqueya tlahuél ax tlacaqui queja innotlacajhua tlen nimechita para innotlayolmelajcahua tlen nimechtítlantoc para inteyolmelahuase tlen melahuac? Imojuanti tlen innotlatequipanojcahua huan nimechiyocatlali-jtoc tlahuél inpopoyotique. **20** Imojuanti inisraelitame inquiitztoque miyac tlamatli tlen in-quimati j para xitlahuac, pero ax inquichihuilíaj cuenta. Inquicactoque tlen niquijtohua, pero in-quicahuaj se lado.

21 “Ica itlanahuatilhua TOTECO quisencajtoya para inquinnextilise nochí tlacame para yajaya nelía senquistoc xitlahuac. Huajca

quihueyitlalijtoc itlanahuatilhua huan quinchijtoc tlahuel yejectzi. ²² Pero ama initlacajhua initztoque se hueyi pinahualistli pampa imojuanti tlen inmechtlaejpenijtoc para intenextilise ihueyitis ipampa itlanahuatilhua, inhuetztoque ipan se hueyi huihuiyotl. Nochi imojuanti inmechtlaejquijque huan inmechhuicaque ipan sequinoc tlaltini para tlatequipanotij san tlapic. Inmechmasiltijque ipan tlalcoyoctli, inmechcalaquijque ipan tlatzactli huan inmechcuilijque nochi tlen inquiapiyayabaj. Huan axaca huelqui inmechmanahuis, niyon axaca quinilhui imocualancaitacahua ma inmechcuepilica tlen inmechixtequilijtoyaj."

²³ ¿Huelis axaca niyon se campa imojuanti tlen nelía quitlacaquilisquía ni tlamantli tlen panoc huejcajquia huan quimachilíaj nochi nopa fiero tlamantli tlen inmechajsis teipa? ²⁴ ¿Ajqueya inmechtemactili inisraelitame para ma inmechtlaejquilica huan ma inmechchihuilica miyac tlamantli? Elqui TOTECO iselti tlen imojuanti inquiixpanotoyaj pampa ax inquinejque inyase campa inmechtitlaniyaya, niyon ax inquinejque inquineltoquilise itlanahuatilhua. ²⁵ Yeca TOTECO quititlanqui ihueyi cualancayo ipan imojuanti initlacajhua huan quintzontlamilti miyac tlen imojuanti ipan tlatehuijcayotl. Pero yonque israelitame huetzque ipan tlilt huan tlatlayaya inintlacayo, noja ax quimachilijque para tlen Toteco queja nopa quinchihuiliyaya. Elqui pampa yajaya tlahuel quinequiyaya ma moyolcuepaca, pero

nopa israelitame ax quichihuilijque cuenta.

43

San TOTECO quinmanahuis israelitame

¹ Pero ama, israelitame, quej ni inmechilhuía TOTECO tlen inmechchijchijqui: “Amo ximajmahuica pampa na nimechcojqui para nimechmalacanis tlen tlatequipanojcayotl. Nimechnotzqui sesen imojuanti ica imotoca. Innoaxcahua. ² Quema inpanose ipan cuesoli queja se atl tlen huejcatla, na niitztos imohuaya. Quema inquipanose tlaohuijcayotl tlen eltoc queja se hueyi atemitl, ax inmechatzonpolihuiltis. Huan quema inpanose ipan se tlaijiyohuilistli queja se tlitl, ax inmechtlati. ³ Pampa na niimoTECO huan niimoDios. Na niimotemaquixtijca. Na tlen niTlatzejtzelotic Tlen Niitztoc Imohuaya Inisraelitame. Nijtemactili nopa tlaltini Egipto, Etiopía huan Seba queja mopatlaca para nimechmanahuis huan nimechmaquixtis. ⁴ Niquintemactili tlacame ipan sequinoc tlaltini ma miquica queja imopatlaca para nijmanahuis imoyolis pampa nimechita para nelía miyac imopati. Nimechtlepanita huan miyac nimechicnelía.

⁵ “Amo ximajmahuica pampa na niitztoc imohuaya. Na niquincuiti imoixhuihua tlen itztoque campa hueli tlen campa quisa tonati hasta campa oncalaqui, huan sampa niquinsejcotilis. ⁶ Niquincuiti tlen itztoque ica norte huan ica sur. Quena, niquincuiti noisraelita telpocahua huan

ichpocahua tlen itztoque hasta campa ontلامي ni tlaltepactli huan sampa niquinhualicas ipan ni tlali Israel. ⁷ Niquinhualicas nochi tlen nechto-caxtise para niininTECO pampa niquinchijchijqui para ma nechhueyitlalica. ⁸ Ma hualaca nopa tlacame tlen quipiyaj iniixtiyol, pero ax tlachiya; huan tlen quipiyaj inintlacaquilis, pero ax tla-caquij.

⁹ “Ma mosentilica nochi tlali huan altepetl ehuani. Niyon se altepetl o tlali iteteyo tlayolme-lajqui para panosquía nochi tlen ama pano. Niyon se teteyotl huelisquía teyolmelahuas tlachque panos teipa. Intla se teteyotl quiijtojtoc se tleni-jqui, ma hualaca testigos huan ma technextilica tlen quicajque. Ma technextilica para melahuac quisqui tlen quiijtojque para panos, pero ax tleno huelis teyolmelahuase totiotzitzti.”

¹⁰ Huan TOTECO quiijtohua: “Pero na niquin-piya testigos para niteyolmelahua tlen panos teipa, pampa imojuanti inisraelitame innotestigos. Innotlatequipanojcahua. Na nimechtlape-jpeni para innechixmatise, innechneltocase huan para inquimachilise para san na niDios huan ax onca seyoc. Ax quema itztoya seyoc Dios huan ax quema itztos seyoc. ¹¹ San na niimoTECO huan ax onca seyoc tlen hueli temaquixtis iyoca tlen na. ¹² Na niteyolmelajqui achtohui para nimechmaquixtis, huan teipa nimechmaquixti. Ax onca sejcoyoc tlen idios inmecchyolmelajqui achtohui tlen quichihuas. Huan intestigos para ya ni melahuac. ¹³ Hasta quema aya oncayaya tlat-lanextli, na ipa niitztoc. Axaca hueli momanahuis

tlen nochicahualis. Niyon axaca hueli quitzacuilis tlen na njchihua.”

¹⁴ NiimoTECO tlen nimechcojqui para innoaxcahua. Na tlen niTlatzejtzeloltic huan niitztoc imohuaya inisraelitame. Niquijtohua: “Pampa tlahuél nimechicnelía, niqüintitlanis ipan tlali Babilonia miyac soldados para ma quintehuica. Huan nopa Babilonia tlayacanani monequis cholose ipan nopa huejhueyi barcos tlen ica mohueyimatiyayaj. ¹⁵ Na niimoTECO tlen niTlatzejtzeloltic. Na niimotlachijchijca, inisraelitame, huan niimotlanahuatiyca. ¹⁶ Na niimoTECO tlen njtlapohua se ojtli ipan nopa hueyi atl. Quena, njchijqui se ojtli tlatlajco nopa atl tlen más mosisiniyaya. ¹⁷ Na niquinnotzqui nopa miyac soldados tlen tlahuél quipixque chicahualistli tlen tlali Egipto ma monechcahuica nochí inincarros huan inincahuayos. Huan niquinchijqui ma atzonpolihuica huan ma miquica. Ininyolis tlanqui queja tlami imechajyo se cera.

¹⁸ “Pero xiquilcahuaca nochí tlen njchijtoc tlen panoc huejcajquiya. Ayoc xiquilnamiquica pampa tlen njchihuas ama elis más hueyi que tlen njchijqui huejcajquiya. ¹⁹ Ama njchihuas se tlamatli tlen senquistoc yancuic. ¡Xiquitaca, ya pejtoc njchihua! ¿Ax inquitätaj? Na njtlapost se ojtli ipan nopa huactoc tlali para ipan ma mocuepaca notlacajhua hasta inintlal, huan njchihuas ma onca miyac atlajtli campa ax quema oncatoc. ²⁰ Huan paquise nochí nopa cuatitlan tlapiyalime tlen nopano nemij. Quena, nochí nopa tepechichime huan avestruces nechtla-

camatise huan nechhueyitlepanitase quema ya niquinmacatos atl ipan nopa huactoc tlali. Na nijchihuas ma meya atl ipan nopa huactoc tlali para atlise huan moseseltise noisraelita tlacajhua tlen niquintlapejpenijtoc. ²¹ Niquinchijchijtoc israelitame para elise noaxcahua huan se tonali nechhueytlalise iniixtla nochí ipan tlapalactli.

²² “Pero ama, innoisraelita tlacajhua, ax inquinequij innechtlatlanise notlapalehuil. Tlahuel nimantzi insiyajtoque ica na. ²³ Ax innechhualiquilijtoque borreojme para innechmacase queja se tlacajcahualistli tlatlatili nopano campa inmechhuicatoque para intlatequipanotij. Nyon ax innechhueyitlepanitztoque ica imotlapiyalhua tlen inquinmictijtoque para na. Pero ax nimechchihualtijtoc xinechhualiquilica nopa tlacajcahualistli, niyon tlen tlatoyahuali noixtla, niyon copali. ²⁴ Ax innechhualiquilijtoque tlaajhuiyacayotl, niyon ax inquitlatijtoque ininchiyajca tlapiyalime tlen na niquijnecui ajhuiyac. San innechhualiquilijtoque imotlajtlacolhua huan inquitlalijque nopani hasta nijmati nisiyajquiya pampa tlalochtzitzti innechixpanoj.

²⁵ “Pero na noselti niitztoc tlen niquixpolohua imotlajtlacolhua pampa tlahuel nimechicnelia huan ayoc quema niquinilnam quis imotlajtlacolhua. ²⁶ Pero yonque niquinilcahua imotlajtlacolhua, monequi nimechtlatzacultis. Huajca xinechilnamiquiltica para nimechtajtolcahuilijtoc nimechtlapojpolhuis. Ma tijchihuaca queja inmonextíaj iixpa se juez. Xicamatica para ximomanahuica huan inquipantise tlapojpolhuili

intla inhuelise. Huan na nicamatis nojquiya queja niquita para xitlahuac. ²⁷ Hasta ipejya imohuejcapan tatahua tlajtlacolchijque noixtla. Huan teipa noch i motlamachtiycahua nojquiya quiixpanoche notlanahuatilhua. ²⁸ Yeca niquinquixtili nopa totajtzitzi tlen tlayacanayayaj ipan tiopamitl, huan nijchijqui sequinoc ehuani ma inmechpinahualtica inisraelitame huan ma quixolehuaca imotlal.”

44

San TOTECO yajaya Dios

¹ “Xinechtlacaquilica inisraelitame tlen innolatequipanojcahua tlen na nimechtlapejpenijtoc:
² NiimoTECO tlen nimechchijchijqui inijtico imonana. Na tlen nochipa nimechpalehuis huan na niquijtohua: Inisraelitame, innolatequipanojcahua, amo ximajmahuica. Imojuanti tlen nimechtlapejpenijtoc, ax tleno xi quimacasica. ³ Na nijchihuas ma onca miyac atl para ax inamiquise huan para quixolonis imotlalhua campa tlahuuel tlahuactoc. Huan nijtitlanis Notonal huan notlatiochihual ipan imoconehua. ⁴ Huan yajuanti moscaltise cuali queja xihuitl tlen motlatzquiljitoque campa onca miyac atl huan queja nopa sauces cuatin tlen mopantíaj iteno hueyi atl. ⁵ Huan sequin imoixhuihua quijtose ica miyac paquilitli: ‘Tojuanti tiaxcahua TOTECO’, huan teipa sequinoc quijtose: ‘tojuanti tiiteipa ixhuihua Israel.’ Huan teipa sequinoc quijcuilose notoca

na, niimoTECO, ipan ininma huan noja teipa sequinoc quijcuilose itoca Israel.”

⁶ TOTECO, nopa tlanahuatijquetl ipan tlali Israel huan yajaya tlen quincojqui israelitame quema itztoyaj ipan tlatequipanojcayotl, quej ni quijj-tohua: “Na niipejya huan niitlamiya nochi tlamanli. Huan iyoca tlen na, ax onca seyoc Dios.

⁷ Axaca seyoc queja na. Axaca más hueli tlayolmehahuas tlen panos teipa huan teipa quitecpanas sesen tlamantli campa monequi para nochi panos queja niquijtojtoc. Intla itztoc se tlen hueli, ma huala huan ma nechilhuis tlen hualas teipa huan tiquitase intla mochihuas para queja nopa quinextilis ichicahualis. Queja nopa na nijchijtoc hasta huejcajquiya quema niquintlali israelitame ma elica notlacajhua. ⁸ Amo ximajmahuica, niyon amo xihuihuipicaca pampa na hasta huejcajquiya nimechyolmelajtoc nochi tlen panos huan imojuanti intestigos. Ax onca seyoc Dios iyoca tlen na. San na niDios. Ax onca seyoc tlen quipiya chicahualistli. ¡Axtle! Niyon se ax niquixmati.”

Huihuitic tlen quinhueyichihua teteyome

⁹ Nelía ax tleno ininpati nopa tlacame tlen quinchichihuaj teteyome huan tlaixcopincayome huan quijjohuaj para ya nopa inindioses. San tlapic pampa yonque motemachiyaj ipan ininteteyohua, ax tleno hueli quichihuase para quinpalehuis. Nopa tlacame itztoque testigos tlen ya ni, pampa quimatiy para ininteteyohua ax tlacaquij, niyon ax tlachiyaj. Yeca nelía quipantíaj pinahualistli nopa tlacame tlen quinhueyimati.

¹⁰ Axaca quichijchijtoc se tlaixcopincayotl o

se teteyotl huan quinotztoc idios huan teipa ya nopa tlen quimachijchijqui quipalehuijtoc ica se tlenijqui, yonque se flamantli pilsiltzi. ¹¹ Nochi tlen quinhueyichihuaj tlaixcopincayome mopinahuase quema moquetzatij iixpa Toteco para quimacase cuenta. Nojquiya mopinahuase nochi cuaximani huan teposchihuani tlen quinchijchijtoque huan quiijtohuaj para quichijchijtoque se dios. Pampa yajuanti san tlacame, ¿quejatza quichihuase se dios? Quena, yajuanti tlahuel mopinahuase huan momajmatise iixpa TOTECO. ¹² Xiquitaca, nopa teposchijquetl quitlalía se tepostli ipan tlítl huan quema ya totonixtoc, quicuis se martillo huan quitejtazonas ica nochi ifuerza para quisencahuas se teteyotl. Huan ipampa itequi nopa tlacatl mayanas huan amiquis, huan itlacayo yamaniyas huan tlaxicos huan ax tleno quipalehuis nopa teteyotl. ¹³ Nojquiya san se ica se cuaxinquetl tlen quicuis se hacha huan quitequihuis para quisencahuas se teteyotl. Achtohui quicuis se cuahuitl, huan teipa quiyejyecos huan ipan quiixcopinas se tlacatl. Teipa quitejtequis huan quialaxos ica se cepillo huan queja nopa quisencahuas se yejyectzi teteyotl huan quitlalis ipan ichaj. Huan nopa teteyotl niyon ax hueli mijcuenis tlen campa eltoc. ¹⁴ Huelis nopa cuaxinquetl quintzonterqui tiocuatini para quitequihuis, o huelis quitlapejpenía se tlen nopa ciprés huan ahua cuatini tlen moscaltía ininhuaya ipan cuatitlamitl. Huelis nojquiya quitoca se cuahuitl tlen pino huan quichiyase para ma

moscaltis quema huetzi atl. ¹⁵ Huan quema ya mochijtoc tomahuac, quitzontequis. Se quentzi tlen nopa cuahuitl quitequihuis para tlipitzas para mototonis huan para quiicxitis ipantzi. Teipa quicuis nopa tlatectli tlen mocajqui tlen nopa cuahuitl huan mochijchihuilis se teteyotl para quihueyichihuas huan para motlancuaquetzas iixpa queja elisquía se dios. ¹⁶ Quena, se quentzi tlen nopa cuahuitl quitequihuía san para quitlatis. Quicacatzos inaca huan tlacuas hasta cuali ixhuis. Teipa quema ya ixhuitoc, nopa tliltl quitequihuía para moscohua huan quijjtohua: “Nelía nechpactía niitztos nechca ni tliltl pampa nechtotonilía.” ¹⁷ Huan ica nopa cuahuitl tlen noja mocahua mochijchihuila se teteyotl tlen quiita queja elisquía idios. Teipa motlancuaquetza iixtla, quihueyimati huan quilhuía: “Xinechmanahui, pampa ta tinodios.”

¹⁸ Nelía huihuitique tlen queja nopa quichihuaj huan ax tleno quimatij. Quitzacua iniixtiyol para ma ax tlachiyaca huan ma ax quittaca tlen melahuac. Inintlalnamiquilis nojquiya tzactoc para ma ax quimachilica tlachque quichihuaj. ¹⁹ Nopa tlacatl tlen quinchijchihua teteyome ax moyolilhuía ipan itlalnamiquilis: “Se quentzi tlen nopa cuahuitl nijtequihui para nimiscos, para niquicxitis nopantzi, nonaca huan nijcuajqui. Huajca ¿quejatza nijchijchihuas se dios ica nopa cuahuitl tlen mocajqui? ¿Huelis quinamiqui ni-motlancuaquetzas iixpa se pedazo tlen cuahuitl?” ²⁰ Pero nopa huihui tlacatl nelía hueyi mocuapolotoc. Motemachía ipan se tlamatli tlen ax quema huelis quipalehuis ipan niyon se tlamatli. Eltoc

queja motlamaca ica cuanextli tlen ax tleno ipati. Pero yonque ya nopa, nopa huihui tlacatl noja ax moyolilhuía huan quijtohua para nelía hueyi mocuapolojtoc pampa melahuac ax tleno ipati ni teteyotl tlen quipixtoc imaco. San se istlacatili.

TOTECO quintlapojo polhuis israelitame

²¹ “Huajca xinechtlacaquilica ica miyac cuidado inisraelitame pampa innotlatequipanojcahua. Na nimechchijchijqui imojuanti para innoaxcahua huan ax quema nimechilcahuas. ²² Na niquixpolo nochimotlajtlacolhua queja ixpolihui nopa mixtli tlen motlalía ica ijnaloc. Huajca ximocuepaca ica na pampa na nitlaxtlajqui imopampa imojuanti para inmechmalacanis tlen tlatequiapanolistli.”

²³ Xihuicaca imojuanti ipan elhuicactli. Xihuicaca pampa TOTECO quichijtoc ni hueyi tlamantli. Huan imojuanti tlen initztoque ipan ni tlaltepactli, xitzajtzica ica paquillistli. Nochi xihuicaca hasta eltoc queja tepetini, cuatitlamitl huan cuatini paquij huan huicaj ica nochiminchicahualis TOTECO quincojtoc israelitame huan quinquixtijtoc tlen inintlatequipanolis. Quichijqui para quinmaquixtis iixhuihua Jacob huan para quinextis ihueyitilis campa hueli campa yajuanti mopantíaj.

²⁴ “Na tlen niimoTECO nimechtojtonqui tlen imotlatequipanojcayo. Na nimechchijchijqui ipan inijtico imonana. Nochi tlamantli tlen onca, na nijchijchijqui. Na noselti nijpatlajqui ne elhuicactli huan na ica noselti nijchijchijqui ni tlaltepactli.

25 “Na tlen niquinpannextía tetonalitani para istlacatini huan ax nijcahua ma mochihua tlen quijjtohuaj para mochihuas. Na niquinpinahaultía. Na nijchihua para tlalnamijca tlacame ma ax tetlalnamictica xitlahuac huan niquinhuihuitilia. **26** Pero nochí tlen na notiocamanalojcahua tlayolmelahuaj para panos, nijchihua ma pano senquistoc queja yajuanti quijjtohuaj. Quema yajuanti quijjtohuaj para altepetl Jerusalén momanahuis huan nochí altepetini tlen tlali Judá sampa temise ica tlacame huan sampa quicualtlalise nopa caltini tlen xolejtoque, melahuac queja nopa elis. **27** Huan quema niquincamahuis nopa miyac atemitl huan niquinilhuis: ‘¡Xihuaquica!’, huajca melahuac huaquise. **28** Huan quema nicamati tlen Ciro huan niquijtohua: ‘Ta tlen titlanahuatis para na, huan temachtli tijchihuas senquistoc tlen na nimitznahuatis. Huan yajaya tlanahuatis para sampa ma quicualtlalica altepetl Jerusalén huan para quisencahuase itzinpehualtil nopa tiopamitl.’”

45

TOTECO quitlapejpeni Ciro para quitequipanos

1 TOTECO quej ni quiilhuía Ciro tlen yajaya quitlapejpenijtoc huan quitequimacatoc para quintlanis tlen ehuani ipan miyac tlaltini. TOTECO quimaitzquis huan quimacas miyac chicahualistli huan iixtla ya nopa tlanahuatiani tlen tlahuel quipixque chicahualistli tlapolose. TOTECO quichihua ma motlapoca nopa puertas

tlen tlali Babilonia iixtla huan axaca huelis quitzacuas para ma ax calaqui. TOTECO quiijo:
² “Ciro, na nimitzyacantiyas huan nijxitlahuas nochi ojtlí tlen huijcoltic campa tipanos. Nijpostequis nopa tepos puertas huan nopa tepos barras tlen ica quitzacuaj nopa puertas. ³ Huan nimitzmacas miyac tlamantli tlen patiyo tlen ama motlatijtoc campa tzintlayohuilotl. Nimitzmacas miyac ricojyotl tlen eltoc ixtacatzi. Huan queja nopa, ta tijmatis para na niDIOS, tlen niinintECO israelitame huan nimitznotza ica motoca.

⁴ “Huan ¿para tlen nimitznotzqui, ta tiCiro, para tijchihuas ni hueyi tequitl? Nimitznotzqui pampa tlahuel niquinicnelía israelitame, notlatequipanojcahua tlen iteipa ixhuihua Israel tlen huejcajquia njtlapejpeni. Na nimitznotzqui ica motoca yonque ax tinechixmatiyaya. ⁵ Na niDIOS huan axaca seyoc. Iyoca tlen na ax onca seyoc Dios. Huan na nimitzmacas chicahualistli huan nimitztitlanis para xitlatlaniti yonque ax tinechixmajtoc. ⁶ Huan queja nopa tlaltini tlen mopantíaj huejca campa quisa tonati huan hasta campa oncalaque tonati quimatlise para melahuac ax onca seyoc tecojtli iyoca tlen na. San na niDIOS huan axaca seyoc. ⁷ Na nijchihua tlahuili huan tzintlayohuilotl. Na nijchihua ma onca tlasehuilistli huan tlaohuijcayotl. Na niDIOS tlen nijchihua nochi ni tlamantli. ⁸ Elis queja motlapos ne elhuicactli huan tlen nepa huejcapa nijchihuas titlatlanis. Huan ni tlaltepactli quiselis nochi tlen panos quema titlatlanis queja elisquía quiseliyayaj atl tlen huetzis tlen elhuicactli. Huan elis queja nochi ixhuas huan elis yejyectzi pampa

ta tiquintojtonqui israelitame tlen ilpitoque huan mopampa ta panos tlen xitlahuac campa hueli. Huan na niDIOS nijchijtoc para nochí queja nopa ma pano.”

TOTECO itztoc más hueyi que nochí tlacame

⁹ Tlahuel ax quinamiqui para se tlacatl ma motehuis ihuaya tlen quichijchijtoc. ¿Huelis nopa comitl quiteilhuis tlen quichijchijqui huan quiilhuis ax quisencajqui cuali? O ¿huelis nopa soquitl quitlaijilhuía se chachapalchijquetl tlen quichijchihua huan quiilhuía: “¿Tlachque tijchihua?” “¡Nelía tihuihuitic!” “Hueyi timocuapolojtoc.” ¹⁰ Nelía fiero elisquía intla se conetl quitzajtzilía itata huan inana huan quinilhuisquía: “¿Para tlen innechtlacatiltijque? ¿Huelis ax inquimatiq quejatza inquichihuase cuali se tlamantli?”

¹¹ Quej ni na niquijtohua, niimoTECO tlen niTlatzejtzeloltic. Na tlen niitztoc imohuaya inisraelitame huan na nimechchijchijqui huan niquijtohua: “¿Tlachque imotequi imojuanti para innechtlatlanise ipampa nochí tlen panos teipa ica noconehua? ¿Ax quinamiqui innechnahuatise tlachque tlamantli nijchihuas ica noma? ¹² Na nijchijqui ni tlaltepactli huan niquinchijchijqui tlacame para ipan itztose. Ica noma nijpatlajqui ne elhuicactli huan niquinnahuati ma monextica nochí nopa miyac millones tlen sitlalime tlen nopano mopantíaj. ¹³ Na nijyoltilanas Tlanahuatijquetl Ciro para ma quisencahuas tlamantli para ma elica xitlahuac. Nijcualtlalis iojhui iixtla huan nijyacanas ipan tlen quichihuas. Yajaya quinmalacanis notlacajhua tlen campa ilpitoque

ipan sequinoc tlaltini huan quicualtlalis noaltepe Jerusalén. Huan ax monequis se tlaxtlahuili o regalo para quichihuas.” Queja nopa quijjtohua TOTECO Tlen Quinyacana Ielhuicac Ejcahua Ma Tlatlanitij.

¹⁴ Huan TOTECO quinilhuía israelitame: “Nopa tlacame tlen tlali Egipto, Etiopía huan nochí nopa sabeos tlen tlahuel huejcapantique motemactilise ica imojuanti. Quihualicase campa imojuanti nochí inintlamantzitzí tlen quinamacaj, huan nochí ya nopa elis imoaxca. Nopa tlacame elise imoaxcahua huan inquinnahuatise. Yajuanti yase imotepotzco queja tlatequipanohuani tlen ilpitoque ica tepos cadenas. Motlancuaquetzase imoixtla, huan quijjtose: ‘Mela huac Dios itztoc imohuaya. Huan san yajaya Dios. Iyoca tlen ya axaca seyoc.’ ”

¹⁵ Ta tiToteco, mela huac san ta tiDios huan ta timotlatía. Ta tiToteco Dios tlen tiisraelitame huan ta titotemaquixtijca. ¹⁶ Nochi tlen quinchijchihuaj huan quinhueyichihuaj teteyome mopinahualtise huan momacase cuenta para nelía mocuapolotque. ¹⁷ Pero TOTECO quinmaquixtis israelitame, huan quinmaquixtis para nochipa. Ayoc aca quinpinahualtis, niyon ayoc aca quinechcapantlalis para nochipa. ¹⁸ Pampa TOTECO tlen quichijchijqui elhuicactli huan tlaltepactli, yajaya DIOS. Huan sesen tlamantli quitlali campa quinamiqui. Huan ni tlaltepactli ax quichijchijqui para eltos cactoc. Quichijchijqui huan quicualtlali para ipan ma itztoca tlacame. Yajaya tlen quijjto: “Na niDIOS huan ax onca seyoc. ¹⁹ Na nicamati tlamiyacapa quema nij-

tencahua se tlamantli tlen nijchihuas. Ax nica-mati ixtacatzi o ipan se lugar campa tzintlay-ohua para axaca ma quimati tlen niquijtohua. Ax niquinilhui israelitame ma nechtemoca huan teipa ax niquinnanquilía, pampa na niDIOS ni-ininTECO, niquijtohua tlen senquistoc xitlahuac huan melahuac.

TOTECO huan nopa teteyome tlen Babilonia

20 “Ximosentilica huan xihualaca noixtla nochí imojuanti tlen inehuani ipan tlaltini tlen incholohuaj imaco Ciro. Nelía huihuitique nochí tlacame tlen motemachíaj ipan se teteyotl tlen cuahuitl huan momaijtohuaj iixpa se dios tlen ax hueli temaquixtía. **21** Ximocuallalica huan xiquixnextica tlachque tlamantli cuali huelis inquijtose tlen imoteteyohua. Xinechnextilica tlachque tlamantli quichijtoque nopa teteyome para melahuac quinamiqui xiquinhueyichihuaca. Huan ximoilhuica intla inmechilhuijtoc tlamantli achtohuiya tlen panos teipa queja na nijchijtoc. San na niDIOS nitlayolmelahua tlamantli achtohui tlen teipa panos. Axaca seyoc Dios iyoca tlen na. San na niDios huan nixitlahuac huan nitemaquixtía. Axaca seyoc.

22 “Xihualaca campa na nochí intlacame tlen initztoque ipan ni tlaltepactli huan na nimech-maquixtis. Pampa san na niDios huan axaca seyoc. **23** Na noselti nimotestigojquetza para se tlamantli panos huan ax nimoyolcuepas pampa notlajtolsenquistoc melahuac. Huan na niquij-tojtoc ya ni: Nochí tlacame ipan ni tlaltepactli

motlancuaquetzase noixtla huan nechhueyimatisse. ²⁴Huan quijitose: ‘San TOTECO hueli techchi-huas tixitlahuaque huan san ipan ya tijpantise chicahualistli para titlatlanise.’ Huan nochí tlen quicocolíaj TOTECO, tlahuel pinahuase. ²⁵Pero ipan TOTÉCO nochí israelitame mochihuase xit-lahuaque huan ipampa ya mohueyitlalise.”

46

TOTECO qui piya chicahualistli, pero nopa teteyome, axtle

¹⁻² “¡Xiquitaca, ya tlantoque Bel huan Nebo, nopa teteyome tlen tlali Babilonia! Quintlalíaj ipan cahuayos. Huan nopa teteyome etique huan quinchihuaj nopa cahuayos ma tlaxicoca. Motepotlamíaj nopa cahuayos huan inintlamamal momimilohuaj. Nochi nopa teteyome onhuetzij hasta tlalchi huan tlapanij. Ax huelij momanahuíaj ininseltitzi para ax huetzise. Melahuac ax huelise huan quinhuicase nochí yajuanti para yase tlatequipanotij.

³ “Xinechtlacaquilica nochí imojuanti tlen noja inmocajtoque ipan tlali Israel pampa na nimechchijchijqui huan na nimechmocuitlahuijtoc hasta quema noja initztoyaj ipan iijtico imonana. ⁴ Na nielis niimoTeco ipan nochí imoyolis hasta quema ya inhuehuentzitzí huan ya chipahuixtos nochí imotzoncal. Na nimechchijchijqui huan na nimechhuicas. Nimechmocuitlahuis huan nimechmaquixtis.

⁵ “¿Ica ajqueya innechhuicalotise huan intechitase queja tisanseme? ⁶ Tlacame qui quixtíaj

oro huan plata ipan ininbolsas huan quiyejyeco-huaj ipan se balanza para quiitase quesqui ietica. Teipa quitemohuaj se teposchijquetl para ma quinchijchihuili se dios. Huan quema ya quisencajtoc, motlancuaquetzaj iixpa nopa tetey-otl huan quihueyichihuaj.⁷ Huan para quihuicase sejcoyoc, monequi quiuechpantlalise. Huan quema quiquetzase tlalchi, san nopano mocahuas pampa ax hueli mojmolinis, niyon ax hueli mijcuenis iselti. Quema tlacame quitzajtzilíaj chicahuac para ma quinpalehui, ax quinnanquilía, niyon ax hueli quinmanahuía quema huala se tlaohuijcayotl.

⁸ “Xiquilnamiquica nochí ya ni, intlajtlacolchi-huani, huan ximoyolilhuica para teteyome ax hueli inmechpalehuise. Amo xiquilcahuaca.

⁹ Xiquilnamiquica nochí nopa tlamantli tlen nijchijtoc huejcajquiya. Ximomacaca cuenta para san na niDios. Huan axaca seyoc queja na.

¹⁰ Na nitlayolmelajtoc tlen ipejya tlachque panos teipa. San na nimechyolmelahua para huala se tlamantli quema noja aya pano, huan teipa melahuac panos. Huan nochí tlamantli tlen na niquijtohua mochihuase, melahuac mochihuaj pampa na nijchihua ma pano nochí tlen nijnequi.

¹¹ “Tlen nepa campa quisa tonati nijnotzas se tlacatl ma huala. Huan yajaya elis queja se cuajtli tlen patlantihualas chicahuac huan temos nimantzi para quinitzquis tlen quinequis huan tetzontlamiltis. Yajaya hualas tlen huejca huan quichihuas tlen na nijnahuatis ma quichihua. Na nimechilhuijtoc tlen ya huan temachtli yajaya hualas. Na nisencajtoc para

queja nopa panos, huan melahuac queja nopa elis. ¹² Xinechtlacaquilica intlacame tlen inyoltetique huan inmoilhuáj para huejcahuas para nijsencahuas tlamatli para ma elica xitlahuac. ¹³ Ya niitztoc para nijsencahuas tlamatli huan ax huejcahuas nopa tonali. Amo ximoilhuica para hasta teipa ica miyac tonali njchihuas. Na nimocualtlalijtoc para nimechmanahuis nimantzi. Ama njimaquixtis altepetl Sion huan nijyectlalis tlali Israel.”

47

Inintlatzacuiltyl tlali Babilonia ehuani

¹ TOTECO quiijtohua: “Imojuanti tlen inehuani tlali Babilonia nochí intlatlaniyayaj, pero ama ayoc intlatlanise. Xihualaca ximosehuiquipij tlalchi ipan nopa tlaltejpoctli pampa ya tlanqui nopa tonali para intlanahuatise. Tlanqui nochí imohueyitilis huan ayoc aca inmechitas queja iichpoca nopa tlanahuatijquetl tlen nopa caldeo tlacame tlen yejyectzi huan selic. ² Ama monequi intlacame tlen Babilonia ximocuepaca intequipanohuani tlen sequinoc iniaxcahua. Xiquitzquica nopa metlatl huan xijtisica nopa trigo. Ximoquixtilica imoyejyejca ixtzajcahua huan xiquixtica imoyoyo tlen nelyejyectzi. Xijnextica imoquescuayohua quema inequitij huan xinejnemica queja elisquía inquiixcotonaj se atemitl pampa ama intlatequipanohuani. ³ Nochi quiitase imotlacayohua xolotl huan inhuetzise ipan pinahualistli. Na nimechcuepilis ica tlen inquinchihuiliytoque noisraelita tlacajhua huan axaca nechtzacuilib.”

⁴ Queja nopa quiijtohua TOTECO Tlen Quinya-cana Ielhuicac Ejcahua Ma Tlatlanitij, yajaya tlen techcojtoc para techtojtomas tlen tlatequipano-listli. Yajaya tlen Tlatzejzelotic huan itztoc to-huaya tiisraelitame. TOTECO quiilhuía Babilonia:

⁵ “InBabilonia ehuani, ximosehuica ipan tzintlayohuilotl huan ayoc ximolinica pampa ayoc quema inmechtocaxtise ‘nopa sihua tlanahuatijquetl tlen quinnahuatía miyac tlaltini.’

⁶ Nicualanqui ica noisraelita tlacajhua huan yeca niquintemactili imomaco inBabilonia ehuani para xiquintlatzacuiltica. Pero imojuanti ax inquintlasoxtlaque niyon se quentzi. Hasta notlacajhua tlen huehuentzitzi inquinchihualtijque ma quihuicaca tlamamali tlen tlahuel etic. ⁷ Inmoilhuiyayaj para imotlanahuatilis ax quema tlamisquía. Inquijtohuayayaj: ‘Nochipa titlanahuatise huan tiquinnahuatise nochí tlaltini ipan tlaltepactli.’ Ax inmoyolilhuijque tlen notlacajhua, niyon ax inmotlajtlanijque tlachque ininpantisquía nochí tlen quintlaijilhuisquíaj notlacajhua.

⁸ “Huajca ama xinechtlacaquilica, inBabilonia ehuani tlen ineliyayaj queja se sihua tlanahuatijquetl. Tlahuel inmopaquilis-macayayaj huan inmoilhuiyayaj para initztoyaj intemachme. Tlahuel inmohueyimatiyayaj huan inquijtohuayayaj para san imotlal más hueyi tlen nochí tlaltini. Huajca xijtlacaquilica tlachque tlatzacuiltili inquiselise ipampa nochí imotlajtlacolhua. Imojuanti inquijtojque: ‘Tojuanti tlen más tihuejhueyij. Tiitztoque queja dios. Axaca seyoc queja tojuanti. Axaca

techechcapantlalis. Ax quema tiitztose queja se cahuali, niyon ax quema tiitztose queja se tlen quinpolos iconehua.’⁹ ¡Cualtitoc! Pero na nimechilhuía para ni ome tlamantli hualas imopani san ipan se tlalochtli. Huan hualas ica miyac chicahualistli. Ipan se tonal inBabilonia ehuani inmocahuase queja se cahuali huan initztose queja se tlen quinpolojtoc nochí iconehua. Queja nopa imopantis yonque inquinpiyaj miyac tetlajchihuiiani huan tetonalitani tlen ipan inmotemachiyaya.

¹⁰ “Yonque miyac tlajtlacoli inquichihuayaya, inquimachiliyaya para initztoyaj temachatlí. Huan inmoilhuiyaya para axaca huelqui quiitas tlen fiero inquichihuayaya. Imotlalnamiquilis huan nochí tlamantli tlen inquiixmatiyaya, inmechcuapolojque. Huan yeca ipan imoyolo inquijtohuayaya: ‘Tojuanti tiDios huan axaca seyoc Dios iyoca tlen tojuanti.’¹¹ Yeca hualas imopani se hueyi tlatzacuiltyli. Huan ax inquimatise canque quisqui, niyon ax huelis inquitzacuiline. Huan hualas ipan se tlalochtli quema ax inmomacase cuenta.

¹² “Huajca xijsenhuiquilica xiquintzajtzilica iajacahua Axcuatlacatl tlen inquinhueyichi-jtihualajtoque hasta quema inquipixtoyaj se tlanahuatiycayotl tlen pilsiltzi. Xiquintlajtlanica ma inmechpalehuica para noja inhuelise inquinmajmatise tlacame tlen miyac tlaltini.
¹³ Pero san tlaptic pampa axaca hueli inmechpalehuis. Yonque inquinpiyaj tlahuel miyac tetlalnamictiani. Pero xiquinnotzaca nopa tlacame tlen quintlachilíaj sitlalime para

inmechmaquixtise tlen tlachque monechcahuía para inmechajsis. Pero yonque quinixcopinaj nopa sitlalime ipan elhuicactli huan sesen metztli inmechilhuiáj tlen panos, ax tleno huelis inmechpalehuise. ¹⁴ Yajuanti ax tleno ininpati pampa itztoque queja nopa tlasoli tlen nimantzi tlatla ipan tlitl. Yajuanti niyon ax huelise quimanahuise ininyolis ipan nopa tlitl tlen hualas. Huajca niyon quentzi ax huelis inmechpalehuise, pampa nopa tlitl tlen hualas ax elis se piltlitzí campa hueli inmosehuise para inmototonise. ¹⁵ Queja nopa ininpantis nopa tetlajchihuiani tlen ininhuaya intlajtlacolchijtoque hasta quema huejcajquiya. Sesen tlen yajuanti ixpolihuis huan axaca huelis inmechmaquixtis.

48

TOTECO quinajhuac israelitame

¹ “Xinechtlacaquilica, innotlacajhua. Imojuanti inisraelitame tlen iteipa ixhuihua Israel [48:1 O Jacob.]. Inquihiucat itoca Israel huan inhualahuij tlen imohuejcapan tata Judá. Intlatestigoquetzaj ica notoca niimoTECO queja innechtlepanitayayaj, pero ax neli. Inquijtohuaj para inmomaijtohuaj ica na tlen niiDios Jacob, pero ax inquichihuaj tlen melahuac, niyon tlen xitlahuac. ² Inmohueyimati j huan inquijtohuaj initztoque ipan nopa altepetl tlen tlatzejzelotic. Inmotlepanitaj miyac huan inquijtohuaj para inmotemachíaj ipan na, niimoTECO, na tlen niimodIOS inisraelitame, najaya tlen notoca DIOS Tlen Niquinyacana

Noelhuicac Ejcahua Ma Tlatlanitij. Pero ax neli immotemachíaj ipan na. ³ Hasta huejcajquiya ajachica nimechyolmelahuayaya nochí tlen panos teipa. Huan teipa nimantzi nijchijqui ma pano. ⁴ Na ipa nijmatiyaya para imojuanti tlahuel inyoltetique huan intochontique. Nopa imoquechcuayo ax hueli mocuelpachohua pampa tetic queja tepostli. Huan imotzonteco neltetic queja nopa tepostli bronce. ⁵ Yeca na nimechyolmelajqui huejcajquiya tlen nochí tlamantli tlen teipa nijchihuasquía para ax inquijtose para imoteteyo quichijqui ma pano nopa tlamantli, o imotepos tlaixcopincayohua tlanahuatijque ma eli. ⁶ Imojuanti inquicajque nochí tlen nitlayolmelajqui para panosquía, huan teipa inquiitztoque para melahuac panotoc senquistoc queja niquijto; pero imojuanti ax inquinequij inquineltocase intla melahuac na nijchijtoc. Pero ama nimechilhuis sequin tlamantli tlen yancuic tlen panose tlen ax quema nimechilhuijtoc. Nimechilhuis tlamantli tlen eltoya ixtacatzi hasta ama huan tlen ax quema inquicactoque. ⁷ San ama niquinchihua ma pano. Huan queja nopa ax huelis inquijtose para ya inquimatiyayaj para panosquía.

⁸ “Quena, nimechilhuis tlamantli tlen senquistoc yancuic pampa cuali nijmati para imojuanti tlahuel intlacajcayahua j huan inmosisiníaj hasta quema intlacatque. ⁹ Pero pampa nochí ya quimati j na nihueyi, nijquetzas nohueyi cualancayo huan ax nimechtzontlamiltis para tlacame ma nechtlepanitaca. ¹⁰ Quitlapajpacchihuaj plata

ipan se horno para quiquixtilise itlasolo. Huan na nimechtlapajpacchijqui ipan miyac tlaijiyohuclistli, pero eltoc queja ax oncac tebos plata tlen mocajqui ipan nopa chachapali, pampa ax tleno tlen cuali nijpantijtoc ipan imojuanti. **11** Pero pampa nimotlepanita, nimechmanahuis huan ax nimechtzontlamiltis. Ax nijnequi acamoilhuis para nopa dioses ipan sequinoc tlali nechtlantoque. Axaca nijcahuilis ma nechquixtilis nohueyitilis.

Toteco quiicnelía Ciro

12 “Xinechtlacaquilica innoisraelita tlacajhua tlen nimechtlapejpenijtoc. San na niDios. Na nipejya huan na niitlamiya nochitlamantli. **13** Ica noma nijtlali itzinpehualtil ni tlaltepactli huan ica noma nejmatl nijpatlajqui ne elhuicactli. Quema nicamati, tlaltepactli huan elhuicactli monextijque.

14 “Xihualaca huan xijtlacaquiliquip nochimojuanti. Tlen nochimoteteyohua, ¿catlía inmechyolmelajqui para panosquía nochitlen nimechilhuijtoc para huala? ¿Catlía teteyotl inmechilhui para niimoTECO níquicnelisquía Ciro, huan nijtequihuisquía para quitlamiltis nopa tlanahutilistli ipan tlali Babilonia, huan yajaya quintzontlamiltis nochitnopa soldados caldeos? Niyon setlen imoteteyohua ax inmechilhui ya nopa. **15** San na niquijto. Huan na nijnotztoc Ciro huan nijhualicatoc para quichihuas tlen na nijnequi. Huan nijchihuas ma tlatlani campa hueli campa yajaya yas.

16 “Ximonechcahuica achi más huan xinecht-lacaquilica. Na ax quema nicamatqui ixtacatzi. Nochipa nimechyolmelajtoc xitlahuac tlen panos para xijmachilica cuali.”

Ama TOTECO Tlen Más Quipiya Tlanahuatili huan Itonaltzi nechhualtitlantoque ica ni tlajtoli para ma nimechilhuiqui: **17** “Quej ni niquijtohua na, niDIOS, niimotlamahanhuijca, na tlen niTlatze-jzeloltic huan niitztoc imohuaya inisraelitame: Na niDIOS niimOTECO tlen nimechmachtía para inquimatise tlen cuali para inquichihuase. Huan nimechyacanas ipan nopa ojtli tlen quinamiqui inquitoquilise.

18 “Nelía cuali eltosquía intla inquichijtosquíaj tlen quijtohua notlanahuatilhua, pampa queja nopa inquipyasquíaj tlasehuilistli tlen ajachica huala queja se yejectzi atemitl tlen ax quema huaqui. Huan nojquiya ajachica inquichijtihualasquíaj tlamanli tlen xitlahuac huan nopa tlamanli tlen cuali inquichihuasquíaj ax tlamisquía. **19** Huan imojuanti inisraelitame ineltosquíaj tlahuel inmiyaqui queja imiyaca nopa xali tlen onca iteno hueyi atl, huan axaca huelisquía inmechpohuasquía. Huan ax monectosquía niquintzontlamiltijtosquía miyac tlen imojuanti.”

20 Pero ama, xiquisaca inisraelitame ipan tlali Babilonia. Xicholoca tlen nopa caldeo tlacame. Xihuicatihualaca ipan ojtli ica paquilistli. Xitlayolmelahua hasta huelis inmechcaquise campa ontlami ni tlaltepactli. Xitzajtzica quej ni: “TOTECO techmanahuijtoc tiiisraelita tlacajhua.”

21 Quema TOTECO quinyacanqui itlacajhua ipan

nopa huactoc tlali, ax quipanoque amiquistli pampa yajaya quichijqui ma quisa atl ipan nopa hueyi tetl para ma atlica.

²² Pero TOTECO quiijtohua: “Tlacame tlen quichihuaj tlen ax cuali ax quema quipiyase tlasehuilistli.”

49

Itlatequipanojca TOTECO elis queja se tlahuili

¹ ¡Xinechtlacaquilica nochí intlacame tlen initztoque ipan tlaltini tlen mopantíaj huejca! TOTECO nechnotzqui hasta quema aya nitlacatiyaya. Nechnotzqui ica notoca hasta quema noja niitztoya iijtico nonana. ² Nochi notlajtol TOTECO quichijtoc ma eli queja se machete tlen tlahuel tlatequi. Yajaya nechtlatijtoc ipan ima huan nechajcoctoc para quitequihuis quema monequi. Niitztoc queja se cuatlamintli tlen pitzactzi iyecapa huan hueli tetzontlamiltia. ³ Huan nechilhui: “Ta tiIsrael [49:3 Nica TOTECO quitocaxtía nopa temaquixtijquetl tlen hualas teipa, Israel.], tinotlatequipanojca. Mopampa ta tlacame nechhueyitlalise.”

⁴ Pero na niquilhui: “Niquita para san tlapic nopa tequitl tlen nijchijtoc. San tlapic nimosiyahuiltijtoc, pero nochí notequi nijtlalía momaco ta tinoTECO, ta tlen tinoDios. Nijchiya para ta xinechtlaxtlahui queja tiquita cuali.”

⁵ Huajca ama camati TOTECO tlen nechchijchijqui para ma nieli niitlatequipanojca hasta quema noja niitztoya iijtico nonana. Yajaya tlen nechtequimamac para niquincuepas nochí iisraelita tlacajhua tlen campa itztoque huan

para ma niquinhualicas campa ya. Nechmacac chicahualistli para nijchihuas ni tequitl huan nechhueyitlepanitztoc pampa nijchijtoc tlen yajaya quinequi. ⁶ Yajaya nechilhui: “Ax san tinechtequipanos para tiquincuepas campa na nopa quentzi tlen mocahuaj tlen noisraelita tlacajhua huan tiquinhueyichihuas, pero nojquiya nijchihuas xieli queja se tlahuili para tiquintlahuilis nochí tlacame ipan tlaltepactli tlen ax israelitame para yajuanti nojquiya hualase campa na para momaquixtise.”

⁷ Camati TOTECO tlen quincojqui israelitame para quintojtomas tlen tlatequipanolistli. Yajaya nopa DIOS Tlen Tlatzejzeloltic Tlen Itztoc Inihuaya Israelitame quej ni quinilhuía tlen quihuejcamajcahuaj huan quicocolíaj nochí tlaltini: “Quema mitzitase nopa tlanahuatiani huan nopa huejhueyi tlayacanani, yajuanti motlancuaquetzase moixtla huan mitzhueyitlepanitase pampa na, nimoTECO, tlen niTlatzejzeloltic huan niitztoc inihuaya israelitame, nimitztlapejpenijtoc huan najaya nitemachtli.”

TOTECO sampa quicualtlalis Jerusalén

⁸ Quej ni TOTECO quinilhuía itlacajhua: “Quema ajsis nopa tonali tlen cuali, na nimechtlacaquilis. Huan ipan nopa tonali, nimechpalehuis. Huajca nimechmaquixtis tlen nochí tlamantli tlen ax cuali tlen quinequis inmechajsis huan nimechmocuitlahuis. Huan imopampa imojuanti inisraelitame nijchihuas se tlajtolsencahuali ica nochí tlacame. Temachtli nijcualtlalis tlali Israel

sampa huan sampa nimechmactilis innoisraelita tlacajhua. ⁹ Huan niquinilhuis nochi tlen tzactoque ipan tzintlayohuilotl: ‘¡Xquisaca huan xihualaca nica campa onca tlahuili pampa na nimechmalacanis tlen campa inilpitoque para inelise inmalacantoque!’ Huan yajuanti elise queja noborregojhua tlen tlacuase ipan nopa potreros campa onca sacatl tlen xoxohuic huan ipan yejyectzitzi tlachiquili. ¹⁰ Ax quema quipanose mayantli, niyon amiquistli. Huan ax quema quintlatis tonati, niyon quinajsis nopa tlatotonilotl tlen nopa totonic ajacatl tlen huala ica campa quisa tonati. Pampa TOTECO tlen tlahuel quintlasojtla quinyacanas hasta campa onca miyac atl. ¹¹ Huan niquinchihuolis se ojtlí tlen tlamayantic ipan nopa tepetini para ipan nejnemise. Huan njittlejcoltis campa tlatzintla ipan nopa tlamayamitl para nopa ojtlí elis sepantic. ¹² ¡Xiquitaca! Hualase notlacajhua tlen itztoque huejca ipan sequinoc tlaltini. Mocuepase tlen itztoque ica norte, ica campa oncalaqi tonati huan tlen itztoque ica Sur ipan nopa tlali Sinim.”

¹³ ¡Nochi ipan elhuicactli ma huicaca ica paquilibrium! ¡Nochi ipan tlaltepactli xipaquiaca miyac! Elis queja nochi tepetini huicase ica paquilibrium pampa TOTECO quinyolchicajtoc itlacajhua huan quintlasojtlac tlen tlahuel tlaijiyohuiyayaj.

¹⁴ Pero tlacame tlen altepetl Jerusalén ama quijj-tohuaj: “TOTECO techtlahuelcajtoc huan techilca-jtoc.”

¹⁵ “¿Huelis se tenantzi hueli quitlahuelcahuas ipilcone? ¿Huelis ax quitlasojtla tlen quitla-

catilti? Yonque se tenantzi huelisquía quiilcahuasquía icona, na ax quema niquilcahuas altepetl Jerusalén, niyon imojuanti tlen inehuani nopano. ¹⁶ Xiquitaca, na niquijcuilojtoc imotoca ipan noma. Huan noixtla niquita ajachica itepa Jerusalén tlen huelontoc. ¹⁷ Pero ax huejcahuas para hualase imoisraelita icnihua tlen huejca para quicualtlalise nopa tepamitl huan quinquixtise nochí tlen quinpactía tlaxolehuaj. ¹⁸ Xijtlalanaca imoxayac, inisraelitame, huan xitlachiyaca para mosejcotiláj imotlacajhua huan hualahuij ininchaj. NiimoTECO nitlatestigoquetztox para nochí imojuanti san sejco inelise se tlamatli tlacame tlen yejyectzitzti. Inelise queja nopa piltetzitzti tlen más pajpatiyo tlen ica moyejyectlalía se ichpocatl tlen monamictía.

¹⁹ “Pampa nochí motlal tlen eltoya xolehuali queja se huactoc tlali temis ica tlacame hasta hualahuij tlen campa hueli. Huan nochí mocualancaitacahua tlen mitztlaijiyohuiltijque itztose huejca. ²⁰ Huan nochí nopa tlacame tlen tlacatque ipan nopa sequinoc tlaltini, hualase huan quijtose: ‘Ni tlali tlahuel pilsiltzi para tojuanti huan tlahuel timotetzopaj. Monequi tijpiyase más tlali para techcuis.’ ²¹ Huan huajca imojuanti inmoilhuise: ‘¿Ajqueya nechmacatoc nochí ni noconehua? Quinmictijque noconehua huan nopa se ome tlen mocajque quinhuicaque ipan sequinoc tlaltini. Huan nechcajtejque noselti. Huajca ¿ajqueya quintlacatilti nochí ni coneme para na? Huan ¿ajqueya quinmocuitlahui para ma moscaltica?’ ”

22 Quej ni quijtohua TOTECO Tlen Más Quipiya Tlanahuatili: “Xiquita, na niquinmacas se tlanextili nopa tlacame tlen ax israelitame huan iniixtla nijtlalanas se bandera. Huan inmechhualiquilise imooquichpilhua huan imosihuapilhua ipan inimma huan ipan iniajcolhua. **23** Huan inmechtequipanose tlanahuatiani huan sihua tlanahuatiani. Yajuanti quinmocuitlahuise imoconehua huan quinpalehuise ipan nochi tlamantli. Huan imoixtla mohuijtzomase hasta quiajsise tlali ica ininxayac, huan quipipitzose nopa tlateljpoctli tlen eltos ipan imoicxihua. Huan huajca inquimatisse para melahuac na niimoTECO. Huan nochi tlen motemachíaj ipan na, ax quema mopinahualtise.”

24 Axaca huelis quicuilis se tlatehuijquetl tlen yajaya moaxcatijtoc ipan tlatehuijcayotl. Niyon axaca huelis quichihualtis se hueyi tlanahuatijquetl ma quincahua ma yaca malacantoque tlen quinitzquitoc ipan tlatehuijcayotl. **25** Pero niimoTECO niquijtohua: “Ya nopa tlen panos. Quicuilise nopa tlatehuijquetl tlen moaxcatijtoc huan quinmajcahuase tlen quinitzquitoque nopa tlanahuatiani tlen más quipiyaj chicahualistli huan temajmatiyayaj. Pampa na niquintehuis tlen inmechtehuíaj huan niquinmanahuis nochi imoconehua. **26** Huan nijchihuas para nochi mocualancaitacahua ma quicuaca innacayo huan ma moihiuntica ica inieso queja elisquía tlalistli. Huan queja nopa nochi tlacame ipan tlaltepactli quimatisse para na niimoTECO, na nimotemaquixtijca, na tlen nimechcojqui para nimechmalacanis huan innemise in-

malacantoque. Na tlen Nijpiya Nochi Chicahualistli huan niitztoc ininhuaya inisraelitame.”

50

Itlatequipanojca Toteco moicnonequis

¹ TOTECO quej ni quintlatzintoquilía itlachhua: “¿Huelis na nimoamaxolejqui ica imonana san pampa ax nijnequi huan yeca nijquixti ipan nochaj? ¿Huelis nimechtemactili innoconehua ininmaco tlen niquintlahuiquiliyaya huan yeca monejqui inyase intequipanotij? ¡Axtle! ¡Ax quej nopa! Imojuanti inyajque intequipanotoj ipampa imotlajtlacolhua. Huan imonana quihuicaque queja se tlaxtlahuili ipampa nochi tlen fiero inquichijtoyaj. ² Imojuanti inmoicancuepque ica na huan yeca axaca tlananquili quema niyajqui campa imojuanti. ¿Huelis inmoilhuijque ax nijpixqui chicahualistli para nimechmanahuis? ¡Ax quej nopa! Na nihueli nicajhuas nopa hueyi atl huan huaquis. Hueli niquinchihuas nochi atemitl ma mocuepaca se huactoc tlali. Huan nochimichime miquise huan lochonise pampa ayoc oncas atl. ³ Na tlen niquixtzacua elhuicactli ica tzintlayohuilotl para mocahuas yayahuic queja eltoya ipan cuesoli.”

Itlatequipanojca TOTECO tlaneltoca

⁴ TOTECO Tlen Más Quipiya Tlanahuatili nechchijtoc nitlalnamijquetl para nijmachilis tlachque tlajtoli niquinilhuis nochi tlen siyajtoque. Mojmostla ica ijnaloc nechixitia huan quitlapohua notlacaquilis para ma nijmatis tlachque quinequi ma nijchihua. ⁵ TOTECO

Tlen Más Quipyia Tlanahuatili quitlapoxtoc notlacaquilis huan na nijtlacaquilía tlen nechilhuía. Ax nimosisinía ica ya, niyon ax nimohuejcatlalía.⁶ Na nitemactilis nocuitlapa para ma nechmaquilita. Huan nitemactilis noxayac para ma quihuihuitlaca notentzo. Huan ax nijtlatis noxayac quema nechtajilhuese huan nechixchajchase.

⁷ TOTECO Tlen Más Quipyia Tlanahuatili nechpalehuis huan yeca ax nimopinahuas ica tlen nechchihuilise. Noxayac nijtlalijtoc para san njichihuas tlen yajaya quinequi. Huan nijmati axaca nechpinahualtis. ⁸ Pampa itztoc nonechca tlen nechmanahuis. ¿Canque itztoque nocualancaitacahua? Ma monechcahuica huan timonextise san sejco iixtla nopa juez. ¿Ajqueya moilhuía quiyiya tlanahuatili para nechteilhuis iixpa ya?
⁹ TOTECO Tlen Más Quipyia Tlanahuatili nechpalehuis. Huajca ¿ajqueya huelis nechteilhuis o quiijtos para njihuica tlajtlacoli? ¡Axaca huelis! Nochi nocualancaitacahua ixpolihuise queja se yoyomitl tlen sosoltic huan cuałotoc.

¹⁰ Imojuanti tlen inquitlepanitaj huan inquiimacasij TOTECO huan inquineltocaj itlatequipanojca, intla ama innejnemij ipan tlaohuijcayotl huan tzintlayohuilotl huan ax quipiyaj niyon se quentzi tlahuili, ximotemachica ipan TOTECO moDios huan ximotlalica imaco.
¹¹ Pero xijpiyaca cuidado nochi imojuanti tlen inquinequij inquinxolehuase sequinoc ica tlitl tlen inquitlicultíaj imoseltitzitzi. Inquicualtlalíaj cuatlamintli para ica inquinmaquilise sequinoc, pero inhuetzise ipan nopa tlitl tlen

inquipehualtijtoque. Ya ni nopa tlaxtlahuili tlen inquiselise tlen na. Inmopantise ipan se hueyi tlaijiyohuilstli hasta inmiquise huan inmechtalpachose.

51

TOTECO quinyolchicahua nopa israelitame

¹ TOTECO quijjtohua: “Xinechtlacaquilica nochí imojuanti tlen inquinequij inquichihuase tlen xitlahuac huan inmotemachiyaj ipan na, niimoTECO, para ma nimechmanahuis. Xijtlachilica campa inhualajque. Xiquitaca para hueyi ipati tlen nimechchihuili quema nimechquixti. ² Ximoilhuica tlen imohuejcapan tata Abraham huan Sara isihua tlen eliyaya imohuejcapan tatahua. Abraham ax quipixtoya niyon se icone quema na nijnotzqui, pero quema na nijtiochijqui, yajaya quinpixqui miyac iconehua hasta mochijque tlahuel miyac tlacame tlen quitemitijque nopa tlali. ³ Huan TOTECO sampa quitiochihuas tlali Israel. Huan ipan nopa tlaltini tlen sosoltique, oncas xihuitini. Nopa huactoc tlaltini elise nelyejectzitz queja ixochimil TOTECO tlen itoca eliyaya Edén. Huan nopano senquistoc oncas huetzquistli huan paquilstli. Nojquiya oncas tlascamatili para TOTECO huan huicatl tlen yejyectzitz.

⁴ “¡Xinechtlacaquilica innoisraelita tlacajhua! Xinechtlacaquili tlen niquijtohua pampa niquinmacas notlanahuatilhua tlacame ipan nochí tlaltini huan niquinmachtis ma quichihuaca tlen xitlahuac. Huan elis

queja se tlahuili tlen quintlahuilis. ⁵ Ayoc más huejcahuas para nimechchihuilis tlen xitlahuac. Monechcahuía nopa tonali quema nimechmaquixtis. Huan na niquinnahuatis nochitlaltini. Yajuanti nechchixtoque pampa tlahuel quinequij ma nijnextis nochicahualis.

⁶ “Xitlachiyaca huejcapa campa elhuicactli huan xitlachiyaca tlatzintla campa tlaltepactli. Pampa ne elhuicactli ixpolihuis queja poctli, huan ni tlaltepactli sosolihuis queja se yoyomitl tlen tlahuel moquentijtoque. Nochi tlacame tlen itztoque ipan ni tlaltepactli miquise queja sayolime. Pero na nitemaquixtis para nochipa huan quema nitlanahuatis, notlanahuatilis elis xitlahuac huan ax quema tlamis.

⁷ “Xinechtlacaquilica nochí imojuanti tlen inquiixmatij tlen xitlahuac huan tlen ipan imoyolo inquiicnelíaj notlanahuatilhua: ‘Amo ximajmahuica yonque tlacame inmechpinajtíaj huan inmechhuetzquilíaj. ⁸ Pampa nopa tlacame tlamise queja se yoyomitl tlen quicuajtoque cuatzipime, huan quincuase ocuilime queja quicuaj ijhuiyo se borrego. Pero na nimechchihuilis tlen xitlahuac para nochitonalí huan nimechmaquixtis para nochipa.’”

⁹ ¡Xiisa TOTECO! ¡Ximoquetza huan ximocualtlali ica mochicahualis! Ximotlalana queja huejcajquiya quema tijxolejqui tlali Egipto huan tijmicti nopa hueyi tlapiyali tlen itztoya nopano ipan nopa atemitl Nilo. ¹⁰ Ta ica mohueyi chicahualis tijchijqui ma huaqui nopa hueyi atl, huan tlatlajco tijtlapo se ojtli para panoque motlacajhua tlen tiquinmanahuiyaya tlen

tlali Egipto. ¹¹ Ajsis tonali quema nochí nopa tlacame tlen ta, tiTOTECO tiquincojtoc para moaxcahua sampa mocuepase ipan inintlá. Huan huicatihualase quema calaquise ipan altepetl Jerusalén. Quena, huetzcatihualase huan pactihualase ica se paquillistli tlen ax tlámis. Huan ayoc oncas tlaohuijcayotl, niyon cuesoli.

¹² TOTECO quiijtohua: “Na tlen nimechyo-lchicahua huan nimechmaca paquillistli. Huajca ¿para tlen inquinimacasij nopa tlacame tlen san panoni huan miquij queja sacatl huan teipa ayoc aquij? ¹³ Intechilcajtoque niimoTECO tlen nimechchijchijqui. Na tlen niqüintlali nopa sitlalime nepa elhuicac huan nijchijchijqui ni tlaltepactli. ¿Huelis para nochipa inquinimacastose nopa tlacame tlen inmechtlaifiyohuiltíaj? ¿Huelis mojmostla inquiimacastose inincualancayo yajuanti tlen quinequij inmechtzontlamiltise? ¹⁴ Ayoc huejcahuas huan nochí tlen ama ilpitoque mocahuase malacantoque tlen campa tlatequipanohuaj san tlápic. Ax inmíquise ipan tlatzactli niyon ayoc quema inquipantise mayantli.

¹⁵ “Pampa na niimoTECO huan niimoDios. Na tlen nijtlacahualti nopa atl tlen mosisinía para ma ax mojmolini. Na notoca nopa DIOS Tlen Quinyacana Ielhuicac Ejcahua Ma Tlatlanitij. ¹⁶ Na nijtlalijtoc notlajtol ipan imocamac huan nimechtzactoc ica noma. Na niqüintlali ne sitlalime ipan ininlu-gar huan nijcualtlali ni tlaltepactli. Huan na tlen nimechilhuía inisraelitame: ‘Imojuanti innotlaca-jhua.’ ”

17 ¡Xiisaca, xiisaca, intlacame tlen altepetl Jerusalén! Inquijiyohuijtoque icualancayo TOTECO. Pero ama ayoc más onca. Eltoc queja quema se acajya quii se tlaili huan quitlamía hasta itetejtzo. **18** Huan yonque inquintlacatiltijtoque miyac imoconehua, niyon se tlen yajuanti ax mocajqui yoltoc para inmechpalehuis o para inmechilhuis tlachque monequi inquichihuase. **19** Inmechajsic ni ome tlamantli: “Tlatehuijcayotl quixolejqui imotlal huan ipampa nopa tlatehuijcayotl nechca nochimotlacajhua mijque ica mayantli.” Huan axaca noja mocajtoc para inmechtla sojtlas. ¿Ajqueya inmechylchicahuas? **20** Ipan nochimotlacajhua tlapolojtoque huan tepejtoque. Itztoque queja se masatl tlen masitoc ipan se matlatl. Inquimachilijtoque ihueyi cualancayo imoTECO DIOS. **21** Pero ama xinechtlacaquilica nochimotlacajhua tlen intlaijijohuijtoque huan inixacanejnentinemij queja se ihuintiquetl yonque ax intlaitoque. **22** Quej ni niquijtohua niimoTECO huan niimoDios tlen niimotlamana huijca: “Xiquitaca, na nimechquixtilis imotlaijijohuilis huan ayoc más inmechajsis nohueyi cualancayo pampa ayoc nicualanis imohuaya. **23** Huan ama nohueyi cualancayo quinajsis yajuanti tlen inmechtla jijohuiliyayaj huan tlen inmechilhuiyayaj: ‘Ximotecaca tlalchi para ma tipanoca imopani.’ Huan imojuanti inquitlalijque imocuitlapa queja elisquía tlali o queja elisquía ojti para imopani ma moquejquetzaca.”

52

Toteco quimanahuis altepetl Jerusalén

¹ ¡Xiisaca, xiisaca, inaltepetl Jerusalén ehuani! ¡Xiquitaca! TOTECO quimacas imoaltepe miyac chicahualistli. TOTECO quichihuas Jerusalén [52:1 O Sion.], nopa altepetl tlen tlatzejtzelotic para ma eli se altepetl tlen onpano yejyectzi. Huan ayoc quema calaquise nopano tlacame tlen fiero ininyolis huan tlen ax quittlepanitaj TOTECO. ² ¡Ximoquetzaca inJerusalén ehuani tlen initztoyaj ipan cuesoli! Ximotzejtzeloca para ma tepehui nopa tlaltejpocli tlen eltoc ipan imozonteco. Imojuanti tlen inmechhuicatoyaj ipan seyoc tlali para intlatequipanose san tlapic, ximotojtomilica nopa mecatl tlen ica inmechilpitoque ipan imoquechtla. ³ TOTECO quiijtohua: “Quema nimechtemactili para ma inmechhuicaca ipan sejcoyoc, na ax nijseli niyon se tomi queja notlaxtlahuil. Huajca ama nojquiya nimechcuiti campa initztoque huan ax niquinmacas niyon se tomi, huajca ax tleno monequi intechcuepilica na.” ⁴ Pampa TOTECO Tlen Más Quipiya Tlanahuatili quiijtohua: “Huejcajquiya notlacajhua ya-jque ipan tlali Egipto para itztotij nopano miyac xihuitl queja sejcoyoc ehuani. Huan ama itztoque nopa Asiria ehuani tlen quintlaijiyohuiliti-jque yonque ax tleno quinchihuilitoyaj.

⁵ “Huan ama, ¿tlachque panotoc? ¿Para tlen notlacajhua sampa quinhuicatoque para tlatequianotij huan quintlaijiyohuilitij chicahuac yonque ax tleno quichijtoque? Nopa tlanahuatiani tlen quinnahuatíaj tzajtizj ica paqulistli

huan mojmostla nechtlajilhuíaj. ⁶ Huajca ajsis se tonali quema notlacajhua nechixmatise pampa nimonextis ininhuaya. Yajuanti quiitase nochicahualis huan quimachilise para niitztoc na tlen niquincamahuía.”

⁷ Nelía yejyectzitzi iniicxihua tlen motlalojtihualahuij ipan tepetini para teyolmelahuaquij nopa cuali tlajtoli para ya onca tlasehuilistli huan para TOTECO ya temaquixtijtoc. Quinyolmelahuaquij Jerusalén [52:7 O Sion.] ehuani: “ImoTeco Dios itztoc Tlanahuatijquetl.” ⁸ Nochi nopa tlamocuitlahuiani ipan huejcapantique caltini tzajtzise huan huicase ica paquillistli pampa ica iniixtiyol quiitaj para TOTECO mocuepa huan quinhualicatihuala itlacajhua ipan altepetl Jerusalén. ⁹ Nochi ma huicaca ica paquillistli ipan Jerusalén yonque xolejtoc imoaltepe pampa Toteco Dios quintlasojtlatoc itlacajhua huan quimanahuijtoc inialtepe. ¹⁰ TOTECO quinnextilis ichicahualis iniixtla nochi tlaltini. Huan quinmaquixtis itlacajhua huan nochi tlacame tlen itztoque hasta itlamiya tlapactli quiitase.

¹¹ Huajca xi quisaca tlen tlali Babilonia huan xijcahuaca nochi tlen ax cuali nopano. Ximohuejcatlalica tlen nopa tlali huan amo xi quitzquica tlamanli tlen ax tlapajpacit nopano. Huan ximotlapajpacchihuaca nochi imojuanti tlen inquiuhualicaj nopa tlamanitzitzi tlatzejzelotic tlen iaxca TOTECO para ipan imotlal huan xi quisaca tlen nopano. ¹² Pero quema inquisase, ax monequi inmotlalojtihualase queja se tlen cholohua para

quimanahuis iyolis, pampa TOTECO tlen toDIOS tiisraelitame inmechyacantihualas huan inmech-mocuitlahuijtihualas.

Itlatequipanojca Toteco tlaijiyohuis

¹³ Xiquita, notlatequipanojca nemis ica miyac tlalnamiquilistli huan tlahuels quihueytlatlise.

¹⁴ Pero miyac san quisentlachilise quema quiitase pampa ixayac nesis fiero campa quimaquilijtoque hasta ayoc quiixmatise intla eliyaya ixayac se tlacatl. Huan itlacayo eltos espoltic pampa tlahuels quiuitequise. ¹⁵ Huan yajaya quinmajmatis tlacame tlen miyac tlaltini. Huan tlanahuatiani quisentlachilise huan ax molinise iixpa. Quiitase huan quimachilise tlamantli tlen ax quema quicactoque.

53

¹ Pero ¿quesqui tlacame quineltocase ni tlajtoli tlen ama titlayolmelahuaj? ¿Ajqueya TOTECO quinextilis ichicahualis para temaquixtis?

² TOTECO quichijqui para itlatequipanojca ma moscalti iixtla queja ichamanca se cuanelhuatl tlen panquisa campa huactoc tlali. Pero yajaya ax nesis yejyectzi, niyon ax nesis itlachiyalis intla se hueyi tlacatl. Ipan ya ax oncas niyon se tlamantli tlen techchihuilis ma tiquixtocaca.

³ Yajaya itztos se tlacatl tlen quihuejcamajcahuase sequinoc huan tlen tlacame quiitase para ax tleno ipati. Quipanos miyac tlacuajcualocayotl huan tlahuels tlaijiyohuis. Huan quema panos toixtla, tiquijcuenise toxayac pampa ax tijnequise

tijtlachilise. Nochi tlacame quiijiyase huan quicocolise, pero tijchihuile queja ax tiquitaque.

⁴ Pero yajaya quihuicac ipani nochi tococolis [53:4 O nopa tlaijijyohuilistli tlen elqui para tojuanti.] huan quiijiyohui nochi nopa tlacuajcualocayotl tlen quinamiquiyaya tiquijiyohuijtosquíaj. Pero tojuanti timoilmuiyayaj para Toteco Dios quitlatzacuiltyaya ipampa ya itlajtlacolhua.

⁵ |Pero axtle! Yajaya quicocojque topampa tojuanti totlajtlacolhua. Quitlaijijyohuiltijque ipampa totlaixpanolhua. Quitlatzacuiltyaya ya para tojuanti huelis tijpiyase tlasehuilistli ica TOTECO. Huan pampa quicocojque ya, tojuanti timochicajque.

⁶ Nochi tojuanti timocuapolojtoque queja borregome. Sesen tojuanti timoilyocaquixtijtoque tlen Toteco huan tijtoquilíaj nopa ojtli tlen tijnequij, pero TOTECO quimamalti ipan ya nochi totlajtlacolhua.

⁷ Yajaya quitlatzacuiltyaya huan quitlaijijyohuiltijque, pero ax quinilhui niyon se tlajtoli. Quihuicaque queja quihuicaj se pilborrego jtzitzipac para quimictitij. Huan queja se borrego ax tzajtzi iniixtla nopa tlacame tlen quiximaj, yajaya ax tleno quiijito para momanahuis iniixtla tlen quitlaijijyohuiltiyayaj. ⁸ Huan teipa quema ya quiqxijtijtoya ipan tlatzactli huan tlen campa quitlajtolsencahuayayaj, quihuicaque para quimictitij. Pero niyon se tlen nopa tlacame nopano, ax momacaque cuenta para yajaya miquiyaya ininpampa yajuanti inintlajtlacolhua, huan quiijiyaya nopa tlatzacuiltyili tlen yajuanti quinamiquiyaya quiselise. ⁹ Yajaya ax quema quichijqui niyon se tlamatli tlen ax cuali,

niyon ax quema istlacatqui. Quitlalpachojque queja se tlaixpanoquetl, pero quitlalijque ipan itecacahua se tlacatl tlen rico.

¹⁰ Pero elqui ipaquilis TOTECO para quitlatzacuiltis huan quitlaijiyohuiltis. Huan quema quitemactilis itlacayo queja se tlacajcahualistli ipampa nochi totlajtlacolhua, quinitas miyac iconehua. Huan yajaya itztos para nochipa huan ipampa ya, TOTECO paquis, pampa quisas senquistoc cuali nochi tlen TOTECO quisencajtoc para panos. ¹¹ Huan teipa quema ya tlaijiyohujtos miyac ipan ialma, yajaya quiitas para nelía quistoc cuali nochi tlen quichijtoc huan paquis tlahuel miyac. Huan ipampa nopa tlaijiyohuclistli tlen quipanoc notlatequipanojca tlen xitlahuac, yajaya quichihuas para miyac tlacame ma elica xitlahuaque iixpa TOTECO pampa yajaya quihuicas nochi inintlajtlacolhua. ¹² Yeca na nijmacas tlatlepanitacayotl queja quinamiqui se tlen quipiya hueyi tequihuejcayotl huan tlen quipiya miyac chicahualistli. Yajaya motemamac hasta mijqui pero nochi quiitayayaj queja elisquía se tlajtlacolchijquetl. Pero yajaya quihuicac ipani inintlajtlacolhua miyac tlajtlacolchijca tlacame huan momajito ica TOTECO para ma quintlapojpolhui.

54

Toteco quinicnelía israelitame

¹ Jerusalén eliyaya iselti queja se sihuatl tlen ax huelqui coneipiya huan ihuehue quicajtejqui. Pero ama ayoctle. Huajca xihuicaca chicahuac huan xipaquiça miyac inJerusalén ehuani. Pampa

yonque achtohuiya Jerusalén eliyaya queja se sihuatl tlen ax quema cuajcualojtoc para quitlacatiltis se icone: “Ama quinpiyas más miyac iconehua, que nopa sequinoc sihuame.” Queja nopa quiijtohua TOTECO.² Huajca xijhueyili mochaj campa initztoque inJerusalén ehuani huan xijchijchihuaca sequinoc cuartos. Xijchihuaca más huehueyac nopa mecatl tlen ica inquiilpíaj nopa yoyoncali. Xijquetzaca cuali nopa estacas tlen imoyoyoncalhua para mocahuase tetziltic nopa mecatl.³ Nimantzi inmohueyilise ica imonejmatl huan ica imoarraves. Huan imoconebla quitemitise altepetini hasta yase ipan inintlahua tlen ax israelitame huan moaxcatise nopa altepetini huan nopa tlaltini tlen xolejtoque.

⁴ Amo ximajmahuica pampa ayoc initztose ipan pinahualistli. Huan ayoc inquiilnamiquise nopa pinahualistli tlen inquipanoque huejcajquia quema san inonpejtoyaj queja se altepetl tlen tlacame, huan nopa tlaijiyohuolistli tlen inquipanoque quema initztoyaj imoseltitzitzi queja se cahualtzi. Nochi ya nopa inquiilcahuase.⁵ Pampa TOTECO imotlachijchijca, inisraelitame, yajaya elis queja imohuebla huan inmechmocuitlahuis. Yajaya itoca TOTECO Tlen Quinyacana Ielhuicac Ejcahu Ma Tlatlanitij. Yajaya imotemaqueixtijca tlen inmechcojqui para inelise iaxcahua. Yajaya nopa Dios tlen Tlatzejzeloltic tlen itztoc imohuaya inisraelitame. Yajaya Dios tlen quinahuatía nochi tlapactli.⁶ Yonque ineliyayaj queja se ichpocatl tlen ihuehue quitlahuelcajtoc, huan initztoyaj imoselti, ama TOTECO inmechnotztoc

para xijcajtehuaca imotlaijiyohuilis. ⁷ Quena, yajaya quiijtohua: “Na nimechtlahuelcajqui para se tlalochtli, pero ica miyac teicnelijcayotl sampa nimechcuiti. ⁸ Para se tlalochtli na nicualanqui imohuaya huan nijtlati noxayac para ayoc nimechitas, pero ama nimechtla sojtlas huan nimechicnelis para nochipa.” Queja nopa quiijtohua TOTECO tlen inmechcojtoc para iniaxcahua. ⁹ “Queja ipan nopa tonali quema itztoya Noé, nitlatestigojquetzqui huan niquijto para ayoc quema sampa nijtitlanis miyac atl tlen quiatzonpolihuiltis nochí tlaltepactli huan quintzontlamiltis nochí tlacame, queja nopa nojquiya ama nitlatestigojquetza para ayoc quema nimechtlatzacuiltis ica nohueyi cualancayo queja nijchijqui ipan nopa tonali quema initztoyaj ipan sejcoyoc. ¹⁰ Yonque nopa tepetini mijcuenise huan nopa tlachiquili ixpolihuise, ax quema mijcuenis notlaicnelil tlen nijpiya ica imojuanti. Huan nojquiya ax quema tlamis nopa tlajtolsencahualli tlen nijchijtoc imohuaya para nimechmacas tlasehuilistli.” Queja nopa quiijtohua TOTECO tlen inmechtlasojtlá.

Nopa yancuic altepetl Jerusalén

¹¹ “Teicneltique inJerusalén ehuani, imojuanti huan imoaltepe initztoque queja se cuahuitl tlen quitzohuitecōt miyac ajacatl tlen chicahuac. Inquipanotoque miyac tlaijiyohuilistli huan axaca inmechyolchicajtoc. Pero na sampa nijsencahuas Jerusalén huan nijchijchihuilis itzinpehualtil huan itepanyo nopa altepetl ica

tetl tlen tlahuel pajpatiyo huan yejyectzitzi.
12 Nochi nopa huejcapantique caltini para ipan intlachiyase niquinchijchihuas ica nopa rubio tetini tlen yejyectzitzi. Huan ipuertas altepetl Jerusalén nijchijchihuas ica carbunclo tetini huan itepa tlen quiyahualtzacuas nopa altepetl nijchijchihuas ica tetini tlen tlahuel pajpatiyo. **13** Huan na niimoTECO nielis niimotlamachtijca huan niquinmachtis nochimotlacajhua. Huan nochimocoñehua quipiryase miyac tlasehuilistli huan itztose ica cuali.
14 Inmechnahuatis se tlanahuatijquetl tlen xitlahuac huan tlen quichihua nochitlen cuali. Nochi imocualancaitacahua itztose huejca huan senquistoc inquipiryase tlasehuilistli. Ayoc inmajmahuise pampa axaca quinequis inmechtemajmatis. **15** Huan intla se acajya hualas inmechtehuiqui, amo ximoilhuica para na nijtitlantoc ma inmechtlatzacuiltiqui. Ax nijtitlantoc huan yajaya ax tlatlanis, pero Jerusalén tlatlanis pampa nopano na niitztos imohuaya.

16 “Xiquita, na nijchijchijtoc nopa teposchijquetl tlen quitliajacahuiltia hasta xahuantoc huan quisatlimoyotl, huan ica ya nopa quinchijchihua nopa tepestli tlen ica tlatehuise. Huan nojquiya na niquinchijchijqui nopa soldados tlen tetzontlamiltiaj. **17** Pero ipan nopa tonali tlen hualahuij, niyon se tepestli tlen quichijchijtoque tlacame ax huelis inmechtzontlamiltis. Huan inquincamatzacuase nochitlen inmechteilhuise ica se istlacayotl iniixtla tequihuejme. Nochi ya ni inquipantise tlen innotlatequipanojcahua ni-

imoTECO.” Queja nopa na niimoTECO niquijtojtoc.

55

Tlapojpolhuili para tlen hueli tlacatl

¹ “Nochi imojuanti tlen inamiquij ipan imoyolo: Xihualaca campa na xiatliquij, pampa na njsehuis imoamiquilis. Yonque ax inquipiyaj tomi, xihualaca tlen inmayanaj ipan imoyolo, xijcohuaquij cuali tlacualistli para xijcuaca. Xihualaca xijcohuaquij xocomeca atl o lechi pero ax monequi se tlaxtlahuili. ² ¿Para tlen inquitlamiltáj imotomi para inquicohuase tlamantli tlen ax ya tlacualistli huan ax inmechmaca chicahualistli? ¿Para tlen intequitij huan teipa inquitequihuíaj imotlaxtlahuil ica tlamantli tlen noja inmechcahua inmayantoque? Más cuali xinechtlacaquilica. Na nimechilhuis canque huelis inquipantise nopa tlacualistli tlen achi cuali tlen nochisequinoc para imoalma huan ayoc inmayanase.

³ “Xihualaca campa na huan xinechtlacaquilica. Quena, xinechtlacaquilica huan queja nopa temachtli inquipiyase yolistli ipan imoalma. Huan na njchihuas imohuaya se tlajtoli tlen ax quema tlamis. Huan nopano nimechtlajtolcahuilis para temachtli nimechtlasojtlas huan nimechtiochihuas senquistoc queja njtlajtolcahuili Tlanahuatijquetl David huejcajquia. ⁴ Na njtlali ya queja notlayolmelajca huan quinmatiltis nochti tlaltini tlen na. Huan njtlali queja se tlawayacanquetl huan queja se tlamachtijquetl ipan nochti altepetini. ⁵ Huan ama imojuanti nojquiya inquinnahuatise

tlacame tlen ax inquinixmatiyayaj. Huan nopa tlacame motlalojtihualase campa imojuanti para mosejcotilise imohuaya pampa niimoTECO tlen niTlatzejzelotic niitztoc imohuaya inisraelitame, huan nimechmacas miyac tlatlepanitacayotl huan nimechchihuas tlahuēl inhuejhueyi.

⁶ “Xinechtemoca na niimoTECO amantzi quema noja huelis intechpantise. Xinechtzajtzilica amantzi quema noja niitztoc imonechca. ⁷ Nochi tlajtlacolchijca tlacame ma quicahuaca nopa fiero ojli tlen quitoquilíaj huan ipan inintlalnamiquilis ma quiqxistica nochitlamantli tlen ax cuali tlen yajuanti moilhuíaj, huan ma mocuepacanoca na niDIOS niimoTECO. Huān na temachtli niquintlasojtlas huan niquintlapojpolhuis.

⁸ Pampa notlalnamiquilis ax eltoc san se ica imojuanti imotlalnamiquilis. Huan nopa ojli tlen na nijtoquilíaj, ax eltoc san se ica nopa ojli tlen inquitoquilíaj.” Queja nopa na niquipiyo huan niquijtohua niimoTECO. ⁹ “Pampa queja elhuicactli eltoc más huejcapa que ni tlaltepactli, queja nopa nojquiya noojhui huan notlalnamiquilis eltoc más huejcapa que imojuanti imoojhui huan imotlalnamiquilis.

¹⁰ “Nopa atl huan sitlalsetl huetzi tlen elhuicac huan mocahua ipan ni tlali para cuali quixolónis. Ya ni quichihuaj ma ixhua nochitlatocatl huan quipiya itlajca. Teipa onca xinachtli para quitocase nopa tlatocani huan tlacualistli para quicuase. ¹¹ Queja nopa nojquiya ica notlajtol tlen quisa ipan nocamac, ax mocuepa san tlaptic, nochipa quipiya itlajca. Quichihuas senquistoc

nochi tlen na nijnequi quichihuas, huan qui piyas itlajca campa hueli na nijtitlanis.

¹² “Initzose ica paquelistli huan inqui piyase tlasehuilistli. Huan elis queja nochí tepetini huan tlachiquili tlen inqui panotiyase, tlahuel paquise huan huicase imoixtla, huan nochí cuatini momatlazinise. ¹³ Huan campa oncayaya huitztlí, ama oncas cuatini tlen ciprés. Huan campa moscaltiyayaj sahua mecatl, ama ixhuase cuatini tlen arrayán. Huan nochí ni tlamantli yejyectzitzí quichihuase para tlacame ma quihueyitlalise TOTECO. Elis se tlanextili para nochipa tlen tenextilis ichicahualis huan iteicnelil TOTECO.”

56

TOTECO quinselis tlacame tlen nochí tlaltini

¹ TOTECO quijtohua: “Xijchihuaca tlen xitlahuac huan tlen cuali pampa monechcahuía nopa tonal quema nihualas para nimechmaquixtis huan monextis para nijchihua tlen xitlahuac. ² Quipantise se hueyi paquelistli nopa tlacame tlen quitlepanitase nopa tonali para mosehuise huan ax tequitise para ma ax quiixpanoca nopa tonali. Huan paquise tlen motlacahualtía para ax quichihuase niyon se tlamantli tlen ax cuali.

³ “Tlacame tlen ax israelitame tlen ica ininpaquilis motemactilijtoque ica na, niininTECO, ma ax quema quijjtoca para niquinchicoicnelía israelitame huan ax san se ni quintiochihua. Huan nojquiya niquinsejcotilis ica notlacajhua nopa tlacame tlen quincaparojtoque. Huajca yajuanti ma ax quijjtoca: ‘Tojuanti tiitztoque queja cuatini tlen huactoque.’” ⁴ Pampa TOTECO quijtohua:

“Intla nopa tlacame tlen quincaparojtoque ax tequitise ipan nopa tonali para mosehuise, huan intla quichihuase nopaquilis, huan quitlepanitase tlen quijjohua nopa tlajtoli tlen nijchijtoc ininhuaya, huajca niq quintiochihuas.⁵ Huan niquinmacas tlen más cuali que coneme. Niquinmacas se tocayotl tlen más hueyi que nopa tlatlepanitacayotl tlen quiselisquíaj intla quinpiyasquíaj in intelpocahua huan iniichpocahua. Pampa calitic ipan nochaj, nijchihuas para nochi ma quinilnamisque para nochipa huan ax quema ixpoli hui inintoca.

⁶ “Huan niq quintiochihuas nochi nopa sequinoc tlali ehuani tlen motemactilijtose para mochi huase notlacajhua huan nechtequipanose huan nechicnelise na, niininTECO. Huan intla yajuanti ax tequitise ipan nopa tonali para mosehuise huan intla quitlepanitase nopa tlajtoli tlen nijchijtoc ininhuaya,⁷ niquinhualicas yajuanti nojquiya ipan notepe tlen tlatzejzelotic. Huan nijtemitis ininyolo ica paquelistli nepa ipan nochaj campa momaijtohuaj. Huan nochi tlacajcahualistli tlatlatili huan nochi tlapiyalime tlen yajuanti quinhualicas huan quintlalise ipan tlaixpamitl, na nijselis. Pampa tlacame quitocaxtise nochaj: ‘nopa cali campa tlacame tlen nochi tlaltini momaijtohuaj.’”

⁸ Pampa TOTECO Tlen Más Quipyia Tlanahuatili, tlen quinsentilis nopa israelitame tlen quinquixtijtoque ipan inintlal quijjohua: “Nojquiya niquinhualicas sequinoc tlacame tlen ax israelitame huan niqinsentilis san sejco ica notlaca jhua.”

Tlatzacuiltonistli para tlayacanani

⁹ Huajca ma hualaca nochí tlapiyalime huan tecuanime tlen nemij cuatitla, ma quincuaquij notlacajhua. ¹⁰ Pampa itztoque queja popoyotzitzí nopa tlayacanani tlen notlacajhua tlen eliyayaj inintlamocuitlahuijcahuá. Ax quiitaj niyon se tlamantli tlen mahuilili. Itztoque queja chichime tlen ax tlaajhuaj, san quinpactía mote-case, cochise huan temiquise. ¹¹ Nochi inintlayacanahua israelitame itztoque queja chichime tlen tlahuél quinpactía tlacuase, pero ax quema ixhuij. Yonque itztoque tlamocuitlahuijani tlen ax tleno quimachilíaj, huan san huihuitique, sese yajuanti quichihua tlen ya quinequi huan san mocuatotoníaj para más tlamantli quipiyase.

¹² Yajuanti quijtohuaj: “Ma tiyaca tijtemotij tlaili huan ma timoihuintica. Huan mostla san se tijchihuase huan elis noja más cuali que ama.”

57

Israelitame tlen quintlepanitaj teteyome

¹ Tlacame tlen itztoque xitlahuaque huan tlen cuajcualme quemantzi miquij quema aya ajsi tonali para miquise. Pero axaca motlatzintoquilíaj para tlen miquij. Ax momacaj cuenta para Toteco Dios quinequi quinijcuenis tlen itztoque xitlahuaque para quinmanahuis tlen nochí tlahuíjcayotl tlen panos teipa. ² Pampa cuajcualme tlen miquij huan tlen nejnentoque ica Toteco Dios quipantise tlasehuilistli huan mosiyajcahuase ica yejyectzi.

3 Pero imojuanti tlen iniconehua tetlajchihuiani, huan iniixhuihua sihuanemini huan tlacanemini, xihualaca nica para nimechtlatolsencahuas. **4** ¿Ajqueya inquipinajtía huan inquihuetzquiliáj? ¿Ajqueya inquinene pilquixtilíaj? Imojuanti san ininiconehua tlajtlacolchihuani huan istlacatini.

5 Inquinhueyichihuaj teteyome ica nochimochicahualis inintzinla ahua cuatini huan nochimochicahualis inintzinla ahua cuatini huan nochisequinoc cuatini tlen quinpiyaj miyac ininmacuayohua. Nopano tlen hueli inquichihuaj ica imotlacayohua. Inquinmictiáj imoconeuhaqueja tlacajcahualistli ipan nopa tlamayamitlitzintla tepexitl.

6 “Inisraelitame, inquinquixtía tetini tlen alaxtique ipan atlajthi ipan tlamayamitl huan inquitaj queja imodioses. Huan inquitoahuaj tlaili iniixtla para inquinhueyichihuase, huan inquinmacaj tlacajcahualistli tlen trigo. Huajca ¿inmoilhuíaj nipaqui ica tlen inquichihuaj huan ax nimechtlatzacuiltis? **7** Nepa inintzonixco tepetini inquinhueyichijque teteyome huan inmochihuaj queja se momecatijca sihuatl tlen quicajtejtoc ihuehue. **8** Inquintlalijque imoteteyohua ipan imochajchaj iniica puertas tlen tzactoque. Queja se momecatijca sihuatl tlen calaqui ipan tlapachetli ica tlen yajaya iselti quitlaxtlahuijtoc para itztosihuaya, tlen hueli inquichihuaj ica tlen hueli quema inquintlachilíaj imotiotzitzi.

9 “Huan inquihuicaque aceite tlen oliva huan miyac tlaajhuiyacayotl queja se tlacajcahualistli para nopa tiotzi, Moloc. Inquintitanque imotlatitlanilhua huejca huan hasta campa mijcatz-

itzi para inquintemotij sequinoc tiotzitzi para inquinicnelise. ¹⁰ Yonque tlahuel insiyajtoque pampa innejnenque ipan miyac ojtli tlen huejca, ax inmomacatoque cuenta para nochimoojhui eliyaya san tlapic. Huajca san ica yolic inquipixtiyajque fuerza huan sampa inquisenhuiquilijque inquitemose seyoc tiotzi. ¹¹ ¿Para tlen más inquinimacasij nopa teteyome huan ax na? ¿Para tlen achi más inquineltocaj que na? Ayoc intechilnamiquij, niyon ax inmoilhuíaj tlen na. ¿Huelis ax intechimacasij pampa ax nimechtlatzacultijtoc hasta huejcajquiya?

¹² “Na nihuelis niteyolmelahuas tlen inquichijtoque tlen inquijtohuaj para elqui xitlahuac huan senquistoc cuali. Pero ax inmechpalehuis pampa niyon se tlamantli tlen inquichijtoque ax inmechpalehuis para inmomaquixtise. ¹³ Huan quema inquintzajtzilise imoteteyohua para intlajtlanise tlapalehuili, tiquitase intla inmechpalehuise. Ax hueli pampa nochiyajuanti ax tlenoininpati huan ax quipiyaj chicahualistli. Quema hualas se ajacatl, quinhuicas huan tlamiixpolihuise ipan san se tlalochtli. Pero nochitlen motemachíaj ipan na, moaxcatise nopa tlali huan quipiyase ininparte ipan notepe tlen tlatzejzeloltic.”

¹⁴ Huan na niquijtos: “¡Xijcualtlalica nopa ojtli huan xijchihuaca nelsepantic! ¡Xiquijcuenica nochihuejhueyi tetl huan piltetzitzi tlen tlatzacuilá! Xijsencahuaca se yejyectzi ojtli campa ipan hualase notlacajhua tlen mocuepaj tlen nopa tlaltini campa onitztoyaj.”

¹⁵ Pampa niimoTeco Tlen Más niHueyi, Na Tlen Niitztoc Huejcapa, na tlen niitztoc para

nochipa huan tlen notoca Tlatzejzeloltic niquijtohua ya ni: “Na niitztoc nepa huejcapa campa tlatzejzeloltic huan campa itztoque nochí tlen moyolcueptoque huan tlen moechcapanohuaj. Na niquinyoltlalía tlen moechcapanohuaj huan niquinmaca yancuic chicahualistli nochí nopa tlacame tlen moyolcueptoque huan quicajtejtoque tlajtlacoli.

¹⁶ Ax nimotehuis imohuaya innoisraelita tlacajhua para nochipa, niyon ax para nochipa nicualantos. Intla nochipa nicualantos imohuaya, huajca nochí tlacame tlen niquinchijchijqui tzontlamisquíaj.

¹⁷ Na nicualanqui imohuaya inisraelitame huan nimechtlatzacuilty pampa tlahuél inquiixtocayayaj miyac tlamantli. Nimoicancuepqui ica imojuanti, pero imojuanti inquisenhuiquílijque intlajtlacolchijque

queja inquinequiyayaj inquichihuase ipan imoyolo.

¹⁸ Na niquitztoc nochí tlen imojuanti inquichihuaj, pero na nimechchicahuas. Na nimechmocuitlahuis huan nimechyolchicahuas huan nimechyoltalis tlen inmocuesohuaj.

¹⁹ ‘Huan na niquinmacas israelitame tlasehuilistli yonque itztoque huejca huan itztoque nechca, pampa niquinchicahuas nochí notlacajhua.’” Queja nopa quijtohua TOTECO.

²⁰ “Pero nochí tlajtlacolchihuani itztose queja nopa hueyi atl tlen mojmolinía huan ax hueli motlalochquetzas huan san eltoc. San ajachica quimajcahuas soquitl huan tlassoli para nochipa.

²¹ Ax onca tlasehuilistli para ax cuajcualme.” Queja nopa quijtohuia noTeco Dios.

58

Quejatza monequi mosahuase israelitame

¹ TOTECO nechilhui: “¡Xitzajtzi chicahuac queja se tlapitzali huan xiquinteihui noisraelita tlacajhua [58:1 O iixhuihua Jacob.] ipampa nochí inintlajtlacolhua! ² Pero nochí yajuanti mochihuaj queja elisquíaj cuajcualme tlacame. Mojmostla nechtemohuaj huan quijtohuaj quinequij quiixmatise noojhui. Mochihuaj queja tlacame tlen nelía quichihuaj tlen xitlahuac o queja ax quema quitlahuelcajtosquíaj notlanahuatilhua niininTeco Dios. Quiijtohuaj quinpactía nechhueyimatise niininTeco, huan quinpactía tequipanose ipan tiopamitl.

³ “Pero yajuanti nechilhuíaj: ‘Moixtla timosaj-toque, pero ta ax titechchihuilá cuenta. ¿Para tlen timotlaijiyohuiltise intla ta ax titechita?’

“Nimechilhuis inisraelitame para tlen ax nimechchihuilá cuenta. Eltoc pampa quema inmosahuaj, san inquietemohuaj tlen imojuanti inmechpolohua huan inquisenhuiquilíaj inquintlaijiyohuiltíaj imotequipanojcahua.

⁴ Quema inmosahuaj, inmotlaijilhuíaj huan inmoculaníaj huan inmomaquilíaj. Ax quema nimechtlacaquilis nepa huejcapa quema inmomaijtose intla quej ni inquichihuaj quema inmosahuaj. ⁵ ¿Huelis inmoilhuíaj queja nopa nijnequi? Quema inmosahuaj, inmotlaijiyohuiltíaj, inmotlancuaquetzaj queja acatl tlen mocuelpachohua, o inmoquentíaj yoyomitl tlen cuesoli huan inmotemilíaj cuanextli ipan imotzonteco. ¿Huelis queja nopa inquiitaj

cuali para mosahuase tlacame? ¿Inmoilhuíaj ya nopa ‘se tonal yejyectzi para na, niimoTECO’?

⁶ “¿Ax inquimatiј tlachque nijnequi xijchihuaca quema inmosahuaj? Na nijnequi xiquinmajcahuaca tlen ilpitoque huan ax tleno quichijtoque. Ayoc xiquintlaijiyohuiltica imotequipanojcahua. Xiquinchihuilica tlen xitlahuac huan xiquinmacaca inintlaxtlahuil. ⁷ Nijnequi xiquintlamacaca tlen mayanaj huan xiquinselica ipan imochaj nejnemini tlen ax quipiyaj ininchaj. Xiquinyoyontica tlen ax quipiyaj ininyoyo huan amo ximotlatica quema imoteixmatcahua inmechtemohuaj para xiquinpalehuica. ⁸ Intla inquichihuase nochi ya ni, huajca na nimechtitlanilis notlahuil imopani huan elis yejyectzi queja quema tlanesi. Huan imococohua mochicahuase nimantzi huan nochi quimatise para inquichihuaj tlen xitlahuac. Huan na niitztos imohuaya para nimechmaquixtis huan ica nohueyitilis nimechmocuitlahuis imoica. ⁹ Huan quema intechtzajtzilise na, niimoTECO, para ma nimechpalehui, na nimantzi nimechnanquilis huan nimechilhuis: ‘Nica niitztoc.’

“Pero monequi ayoc xiquintlaijiyohuiltica tlen teicneltzitzi, ayoc xiteijilnamiquica huan ayoc xijmoyahuaca tlajtoli tlen fiero. ¹⁰ Xiquintlamacaca tlen mayanaj huan xiquinpalehuica tlen mopantíaj ipan tlaohuijcayotl. Huan queja nopa initztose queja se tlahuili tlen tlatlanextis campa tzintlayohua huan yeca nopa tzintlayohuilotl tlen quiyahualojtoc, tlatlanextis queja elisquía tonaya. ¹¹ Huan

na, niimoTECO, nimechyacanas nochipa huan nimechixhuitis ica miyac tlamatli tlen cuali. Nochipa nimechmacas chicahualistli ipan imotlacayo huan imojuanti inelise queja se xochi mili tlen nochipa quiatequijtoque o queja se ameli tlen ax quema huaqui.¹² Huan imoconehua quicualtlalise nopa altepetini tlen hasta huejcajquiya quinxolejque. Huan quintocaxtise ‘nopa tlacame tlen quicualtlalíaj inintepa huan inialtepehua.’

Nopa tonali tlen tlasiyajcahuali

¹³ “Xijtlepanitaca nopa tonali tlen tlasiyajcahualistli huan amo xijchihuaca tlen san imopaquilis ipan nopa tonali tlen tlatzejzeloltic. Xipaquica ipan nopa tonali huan nochipa xicamatica tlen nopa tonali ica miyac paquelistli. Xinechtlepanitaca niimoTECO ipan nochi tlen inquichihuaj ipan nopa tonali huan amo xiquinchihuaca sequinoc tlamatitz. Ipan nopa tonali amo xijtoquilica imotequi, niyon amo xiquijtoca tlajtoli tlen ax tleno ipati. Intla quej ni inquichihuase,¹⁴ temachtli inpaquise ipan TOTECO. Huan na nimechchihuas xiflatlanica ipan tlen inquichihuaj. Huan nimechmacas nochi nopa tlatiochihualistli tlen nijtlajtolcahuili imohuejcapan tata Jacob.” Queja nopa niquijtohua na, niimoTECO.

59

Ayoc ma tlajtlacolchihuaca

¹ Xiquitaca, TOTECO ax quipolojtoc ichicahualis para inmechmaquixtis, niyon ax quipolojtoc

itlacaquilis para ax huelis inmechtlacaquilis.
² Pero imotlaixpanolhua inmechhuejcatlalijtoc tlen imoTeco Dios. Huan imotlajtlacolhua quichijtoc para ma quitlati ixayac para ayoc inmechtlacaquilis. ³ Pampa imojuanti inquipiyaj imoma tlen espoltic huan inquichijtoque miyac tlajtlacoli. Inistlacatij, inteijilnamiquij huan inquicocolíaj tlen cuali. ⁴ Axaca mocuesohua para elis xitlahuac huan temachtli. Inquinhuicaj tlacame iniixtla jueces para inquinteilhuise ica istlacayotl. Nochi tonali inmoyolilhuíaj tlen ax cuali huelis inquisencahuase. Teipa inquichihuaj tlen inmoyolilhuijtoque. ⁵ Inquipolohuaj miyac tonali huan chicahualistli para inmoyolilhuise miyac tlamantli tlen fiero. Teipa intemictíaj.
⁶ Inquincajgayahuaj huan inquintlaxtequilíaj nochi tlacame. Ax tleno tlen cuali huala tlen imojuanti. Nochi tlen inquichihuaj eltoc senquistoc ax cuali. Tlen hueli tlacatl nimantzi inmechixmatij ica tlen inquichihuaj pampa inquichihuaj tlamantli tlen senquistoc fiero.
⁷ Inmotlalojtiyohuij para inquichihuatiж tlen ax cuali huan para inquinmictitij tlacame, yonque ax tleno quichijtoque. Imotlalnamiquilis nelía fiero pampa san inmonejnehuilíaj inquichihuase tlamantli tlen ax cuali. Huan campa hueli campa inyohuij, san intlaxolehuaj huan intemictíaj. ⁸ Ax inquiixmatij nopa ojtli tlen temaca tlasehuilistli, niyon ax inquimatiж quejatza inquichihuase tlen xitlahuac huan cuali. Inquitoquilíaj se ojtli tlen huijcoltic, huan nochi tlen yohuij imotepotzco nojquiya ax quema quipiyase tlasehuilistli.

⁹ Huan nopa israelitame quiijtohuaj: “Pampa

miyac titlajtlacolchijtoque, yeca TOTECO ax quintlajtolsencahua tlen techtlaijiyohuiltíaj huan ax techmanahuijtoc. Tojuanti tijchiyayabaj tlahuili, pero hualajqui tzintlayohuilotl. Nojquiya tijchiyayabaj tlatlanextli, pero tinejnemij ipan tzintlayohuilotl. ¹⁰ Yeca timotlatzquilijtinemij ipan tlapepecholi huan timoalajtiyohuij queja tielisquíaj tipopoyotzitz. Yonque tlajcotona timotepotlamíaj queja elisquía tlayohua. Tinesij queja mijcatzitz tlen itztoque ipan tzintlayohuilotl huan ax queja telpocame tlen tejtetique. ¹¹ Tojuanti tinanalcaj queja osome tlen ya mayancamictinemij. Huan tiayijtíaj queja palomas. Tijtemohuaj Toteco para ma techmanahuis huan ma techmaquixti, pero yajaya ax techmanahuía, niyon amo techmaquixtía. Eltoc pampa yajaya ayoc techchihuilá cuenta.

¹² “Pampa, ta TOTECO, totlajtlacolhua más momiyaquilía moixtla ta tlen tiitztoc tixitlahuac. Totlajtlacolhua techteilhuíaj moixtla. Quena, tojuanti tijmatij para nelía titlajtlacolchihuani.” ¹³ Tijmatij para timosisinijtoque ica TOTECO, huan tijtlahuelcajtoque. Tijmatij para timohuejcatlalijtoque tlen TOTECO tlen titoDios huan ax timonejnemiltijtoque xitlahuac. Titejilnamictoque, timosisinijtoque huan timoyolilhuijtoque istlacayotl para tiquincajcayahuase sequinoc. ¹⁴ Nochi totequihuejcahua quincocolíaj tlen itztoque xitlahuaque. Ax quinequij tetlajtolsencahuase queja quinamiqui. Ipan nochí calles axaca quiijtohua tlen melahuac huan axaca quichihua

tlen xitlahuac.

¹⁵ “Axaca quichihua tlen cuali. Huan se tlen nelía quichihua campeca para quicahuas tlamanli tlen ax cuali, sequinoc quicocolise huan quicalaquise ipan tlatzactli. Huan TOTECO quiitac tlen quichihua tequihuejme ipan tlamanli quej ni huan ax quipacti pampa quiitac para axaca quichihua tlen xitlahuac.”

Huan TOTECO quiijito: ¹⁶ “Huan niimoTECO nijsentlachili para axaca quinejqui quinpalehuis nopa tlacame tlen sequinoc quintlaijyohuitiyayaj. Yeca na noselti nimotlalanqui para niquinmaquixtis ica nochí nochicahualis huan niquinchihuili tlen xitlahuac. ¹⁷ Pampa na nixitlahuac huan nijpiya chicahualistli para nitemaquixtis, niitztoc nimocuallalijtoc para tlatehuilistli queja se soldado tlen motlalijtoc iyolixtzajcayo tlen tepostli huan ipan itzonteco quitlalijtoc itepostzontzajca. Na niimoTECO tlahuel nijnequi nijsencahuas nochí xitlahuac huan nijnequi nimomacuepas ica nocualancaitacahua ica nohueyi cualancayo. ¹⁸ Niquintlaxtlahuis nocualancaitacahua queja quinamiqui ipampa nochí tlen quichijtoque. Huan yeca nohueyi cualancayo quinajsis nocualancaitacahua tlen mopantíaj ipan tlaltini hasta tlen más huejca. ¹⁹ Huan quema quiitase nohueyitis, nochí tlen mopantíaj campa hueli ipan ni tlaltepactli nechimacasise huan nechhueyitlepanitase. Na nihualas chicahuac queja se atemitl tlen motlalohua chicahuac tlen Notonal niimoTECO quicuatopejtihuala. ²⁰ Quena, na tlen niimotlacojca, niajsis ipan

Jerusalén [59:20 O altepetl Sion.] huan nimechcohuas para noaxcahua inisraelitame tlen inmoyolcueptoque tlen imotlajtlacolhua.” Queja nopa quijjohua TOTECO.

²¹ Huan TOTECO quijjohua: “Ya ni elis nopa tlajtoli tlen nijchihuas ica imojuanti tlen innoaxcahua. Huan nimechtajtolcahuilis para Notonal tlen itztoc ipan imojuanti huan notlajtol tlen nimechmacatoc, ax quema inmechtlahuelcahuas. Niyon ax inquiilcahuase ni tlajtoli tlen nimechmacatoc. Huan ni tlajtoli eltos ipan ininnenepil imoconehua huan imoixhuihua huan iniihxuihua tlen tlacajtiyase para nochipa.”

60

Ihueyitis nopa yancuic Jerusalén

¹ Altepetyl Jerusalén motlalanas. Jerusalén elis yejyectzi huan quipiyas tlahuili queja tonati para nochí tlacame ipan nochí tlaltini ma quiitaca pampa ihueyitis TOTECO quitlahuilis. ² Yonque oncas tzintlayohuilotl ipan nochí tlaltini ipan tlaltepactli, pero ihueyitis TOTECO tlatlanextis ipan Jerusalén. ³ Tlacame tlen nochí tlaltini hualase Jerusalén campa itlahuil. Tlanahuatiani huan tlacame tlen quipiyaj miyac chicahualistli hualase Jerusalén para quitlachiliquij ihueyitis TOTECO.

⁴ Xitlachiyaca campa hueli, inJerusalén ehuani, pampa nochí imotelpocahua huan imoichpocahua tlen onitztoyaj huejca ipan sequinoc tlaltini, hualahuij ininchaj. ⁵ Huan quema inquinítase para hualahuij, imoixtiyolhua petlanise ica paquillistli huan tlahuel inyolpaquise, pampa yajuanti inmechhualiquilijtose

ininricojoyo nopa tlaltini nechca hueyi atl huan nopa tlaltini tlen campa hueli mopantíaj ipan tlattepactli. ⁶ Motecpantihualase miyac camellos ipan Jerusalén. Hualase camellos tlen nopa tlaltini Madián, Sabá huan Efa huan nochí quimamajtihualase oro huan copali para ica quihueyimatise TOTECO. ⁷ Inmechmacase borregojme tlen tlali Cedar huan oquich borregojme tlen tlali Nebaiot para inquintencahuase ipan itlaixpa TOTECO queja tlacajcahualistli tlatlatili tlen ajhuiyac mijmijyotía. Huan ipan nopa tonali TOTECO más quiyejyecchihuas itiopa.

⁸ ¿Ajqueya yajuanti nepa tlen eltoc queja patlantihualahuij queja mixtli huan ajsise ipan tlali Israel? Patlantihualahuij queja palomas tlen yohuij campa inintepasol. ⁹ Ya inon, nopa barcos tlen más cuajcualtzitzi tlen tlali Tarsis. Na niquinajcoctoc nopa miyac cuacanahua para quinhualicase ininchaj ipan tlali Israel imoconehua tlen itztoyaj huejca ipan sequinoc tlaltini. Nochi yajuanti quihualicase oro huan plata para quihueyimatise TOTECO tlen imoDios tlen Tlatzeloltic huan tlen itztoc imohuaya inisraelitame. Huan yajaya quinextis ihueyitilis ipan Jerusalén huan quichihuas tlahuel yejyectzi.

¹⁰ TOTECO quinilhuía Jerusalén ehuani: “Miyac tlacame tlen sequinoc tlaltini hualase huan quicualtlaliquij imoaltepehua. Huan inintlanahuatijcahua inmechtlanilise inintlapalehuil. Pampa yonque nijxolejqui nopa altepetl quema nicualantoya imohuaya, ama sampa nimechtlasojtas inisraelitame

pampa hueyi noyolo ica imojuanti. ¹¹ Nochi ipuertas altepetl Jerusalén mocahuase tlapojtoc tlayohua huan tonaya para huelis calaquise tlanahuatiani tlen miyac tlaltini para inmechhualiquilise ininricojo. ¹² Pero nochí tlaltini huan nochí tlanahuatiani tlen ax quinequise mosentilise imohuaya para inmechtequipanose, tlamiixpolihuise. ¹³ Nochi iyejyejca nopa cuatitlamitl ipan Líbano elis imoaxca. Huan nopa cuatini tlen pino, cipreses huan abetos inquintequihuise para inquiyejyeccihuase notiopa campa nijtlalis noicxihua para mosiyajcahuas.

¹⁴ “Huan nochí inincone hua imocualancitacahua tlen inmechtlaijiyohuiltyayaj hualase motlancuaquetzaquij imoixtlá huan quitzoponise imoicxihua. Huan quitocaxtise altepetl Jerusalén ‘Ialtepe TOTECO.’ Huan quitocaxtise ‘Sion, nopa Altepetyl tlen TOTECO tlen Tlatzejzeloltic tlen itztoc ininhuaya israelitame.’ ¹⁵ Yonque achtohuiya nochí quitlaijilhuiyayaj altepetl Jerusalén huan ax quinequiyayaj quiitase, niyon ax quinequiyayaj nejnemise ipan icalles, ama nopa altepetl elis yejyectzi para nochipa. Huan para nochipa Jerusalén elis se hueyi paquilistli para nochí tlen yohují nopalno. ¹⁶ Tlanahuatiani huan tlacame tlen miyac tlaltini tlen quipiyaj chicahualistli inmechhualiquilise nopa tlacualistli tlen más cuali para huelis inquipiyase tlen inquinequij. Huan huajca inquimatise para melahuac, na niimTECO, niitztoc niimotemaquixtijca, huan niitztoc niimotlacojca tlen nitlaxtlajqui para

nimechtojtomas tlen tlatequipanolistli. Na tlen Nijpiya Chicahualistli Niitztoc Imohuaya Inisraelitame.

¹⁷ “Huan nimechmacas oro ipatlaca bronce, huan nimechmacas plata ipatlaca hierro. Huan nimechmacas bronce ipatlaca cuahuitl huan nimechmacas hierro ipatlaca tetini. Huan imotlayacancahua ayoc inmechtlijiyohuiltise. Tlanahuatise xitlahuac huan oncas tlasehuilistli. ¹⁸ Ayoc quicaquise ipan imoaltepe nopa tlahuelchihualistli tlen tlatehuilistli. Ayoc aca tlaxtequis, niyon ayoc tlaxolehuas. Na nimechmocuitlahuis huan nimechyahualos para nimechmanahuis queja se tepamitl. Nochi tlen calaquise ipan imopuerta nechhueyichihuase na niimoTECO tlen nimechmaquiaxtijtoc.

¹⁹ “Ayoc monequis ne tonati para inmechtlahuilis ipan tonaya, niyon ne metztli ayoc inmechtlahuilis ica tlayohua, pampa na, niimoTECO nimechtlahuilis para nochipa, huan itlahuil nohueyitilis inmechtlahuilis. ²⁰ Elis queja nopa tonati huan metztli ax quema calaquise pampa niimoTECO nimechtlahuilijtos para nochipa. Huan ayoc quema inmocuese. ²¹ Huan nochि imotlacajhua elise xitlahuaque, huan imotlal elis imoaxca para nochipa pampa nopano nimechtalis ica noma. Huan nochि imojuanti inquinextise nohueyitilis. ²² Nopa familias tlen más pilsiltzitzi, niquinmiyaquilis hasta mochihuase se mil tlacame. Huan nopa tlacame tlen ayoc miyac mocajtoque, niquinchihuas ma quitemitica se tlali huan tlahuel quipiyase chicahualistli. Na niimoTECO njchihuas ma pano nochि ya ni ipan nopa tonali

tlen na niquixtlalijtoc.”

61

TOTECO quimaquixtis altepetl Jerusalén

¹ Itonal TOTECO Tlen Más Quipiya Tlanahuatili itztoc ipan na. Nechtlapecpenijtoc para ma niquinyolmelahaqui teicneltzitzi nopa cuali tlajitoli. Nechtilantoc para ma niquinyolchicahuaqui tlen tlahuel moyolcuesohuaj huan para nitlayolmelahuas para nochi tlen ilpitoque huan ipan tlatzactli huelise quisase. ² Nechtilantoc ma niquinilhuiqui nopa tlacame tlen chocaj para ya ajsic hora para TOTECO quintlasojtas. Huan nechtilantoc ma niquinyolmelahaqui para ya ajsic nopa tonali para Toteco Dios momacuepas ica icualacancaitacahua ipampa nochi tlen quinchihuilijtoque itlacajhua. ³ Nechtilantoc para nochi tlen mocuesohuaj ipan altepetl Jerusalén [61:3 O Sion.] ma quinquixtilica nopa cuanextli ipan inintzonco huan ma quinicpahuiltica se yejectzi corona. Ma quinquixtilica inincuesol huan quipiyase paquilistli. Quinequi ma niquinquixtili nopa fiero yoyomitl tlen quinextia inincuesol huan niquinmacas yoyomitl tlen quinextia para tlahuel yolpaquij. Huan yajuanti itztose queja cuatini tlen quipiyaj chicahualistli tlen TOTECO quitoctoc huan tlen quinextise ihueyitilis.

⁴ Huan sampa quicualtlalise nochi tlen xolejtoque. Quincualtlalise caltini queja eliyayaj achtohuiya huan sampa quintlalanase altepetini tlen para miyac xihuitl mocajtoque sosolijtoque.

⁵ Huan sequinoc tlali ehuan inmechtequipanose, innotlacajhua. Quinmocuitlahuise huan quintlamacase imoborregojhua. Quimehuase imotlal huan quimocuitlahuise imoxocomeca milhua. ⁶ Huan inmechtocaxtise initotajtzitzi TOTECO huan itlatequipanojcahua Toteco Dios. Huan inmopanoltise ica ininricojyo nochi tlaltini huan inmohueyichihuase ica nochi tlamatli tlen pajpatiyo tlen yajuanti ica mohueyichi-huayayaj. ⁷ Inmechtlaijiyohuiltijtoque huan inmechpinahualtijque onpano miyac huan ama inquiselise onpano miyac tlatlepanitacayotl huan paquilibrium tlen huejcahuas para nochipa.

⁸ Huan TOTECO quijtohua: “Pampa niimoTECO tlahuell niquipinelia tlen monejnemiltia xitlahuac. Pero ax njnequi niquinatas tlen tlaxtequij huan quichihuaj miyac tlamatli tlen ax cuali. Yeca na niqintlaxtlahuis notlacajhua queja quinamiqui ipampa nochi inintlaijiyohuialis. Huan ininhuaya njchihuas se tlajtolsencahualli tlen huejcahuas para nochipa.” ⁹ Ipan nochi tlaltepactli quiix-matise iniixhuihua itlacajhua TOTECO huan quinhueyitlepanitase. Huan nochi quinitase para nopa tlacame TOTECO quintiochijtoc.

Tlascamatili para TOTECO

¹⁰ Tlahuel nimopaqilismaca ipan TOTECO. Ni-paqui miyac ipampa noTeco Dios pampa yajaya nechmaquixti huan nechchijqui nixitlahuac iixtla. Nechmacatoc nochi tlen cuali. Ama niitztoc queja se telpocatl tlen quiquentijtoque cuali iyoyo pampa mocualtlalijtoc para mosihuajtis. O niitztoc queja se ichpocatl tlen quiyejyecchijtoque

ica miyac tlamantli para monamictis. ¹¹ TOTECO Tlen Más Quipiya Tlanahuatili quinextilis nochitlaltini para taja nelía tixitlahuac, huan nochiyajuanti quihueyimatise. Huan nopa tlamantli tlen xitlahuac tlen yajaya quichihuas quipiyas ichamanca. Elis queja se cuahuitl tlen yejyectzi chamanis o queja se tlali tlen quichihuas ma ixhua nopa xinachtli hasta temis campa hueli.

62

Quicualtlalía para quema hualas nopa temaquixtijquetl

¹ Pampa tlahuel niquicnelía tepetl Sion huan nijnequi niquitas nochí altepetl Jerusalén quema eltos yejyectzi, na ax nijcahuas nimomajitos iixpa TOTECO. Nimomajitos hasta nochí nopano elis xitlahuac huan nopa altepetl nesis queja se tlahuili para nochí sequinoc. Nimomajitos hasta quema TOTECO quimaquixtis huan ihueyitilis nesis queja se tlicuahuitl tlen xahuantoc huan tlahuel tlahuiya. ² Nochi tlaltini quiitase Jerusalén para se altepetl campa nochí mochihua xitlahuac, huan tlanahuatiani quiitase itlatlanex hasta nopa tlahuili quinixmictis. Huan TOTECO quimacas nopa altepetl seyoc itoca tlen yancuic. ³ Huan Jerusalén elis queja se yejyectzi corona para se tlanahuatijquetl. Huan tlahuis ica itlatlanex TOTECO, huan TOTECO imoDios quitlalanas ica ima para nochí huelis quiitase. ⁴ Ayoc quema quitocaxtise Jerusalén “Altepetl Tlen Quitlahuelcajtoque”, niyon ax quitocaxtise nopa tlali “Tlali Tlen Xolejtoc.” Teipa quitocaxtise Jerusalén “Nopa Altepetl

Tlen Quichihua Tlen Quipactía TOTECO” huan “Nopa Altepetyl Tlen TOTECO Más Quiicnelía” pampa mopaquilismacas TOTECO ipan Jerusalén tlayolmelahuas para iaxca ya.⁵ Pampa queja se telpocatl ica miyac paquili mocuilia se ichpocatl, queja nopa nojquiya paqui TOTECO ica Jerusalén huan quicualtlalis huan moaxcatis.

⁶ TOTECO quiijtohua: “Ni quintlalijtoc tlamocuitlahuiani ipan itepa Jerusalén tlen momaijtose tlayohua huan tonaya para nechilnamiquiltise niimoTECO para nijchihuas nochí tlen ni quijtojtoc para nijchihuas. Ax mosiyajcahuase para nechnojnotzase niimoTECO,⁷ niyon ax mocahuilise ma mosehuica hasta nijcualtlalis altepetl Jerusalén. Huan nijchihuas para nochí ma quitlepanitaca huan nochí ipan tlaltepactli ma quisentlachilica.

⁸ NiimoTECO nitlatestigojquetzqui para ayoc quema nijtemactilis Jerusalén huan itlacajhua ininmaco inincualancaitacahua, niyon ayoc quema hualase soldados tlen ehuaj ipan sequinoc tlaltini para quinixtequiliwij inintrigo o ininxocomeca iayo tlen yajuanti tlatequipanojtoque chicahuac para quitocase.

⁹ Huajca israelitame quipixcase tlen quitoctoque huan quicuase. Huan nechhueyimatisse niininteco ipampa inintlajca. Quena, quiise xocomeca atl tlen yajuanti quichijtoque ipan itlamapa notiopa.”¹⁰ ¡Xipanquisaca intlacame ipan Jerusalén! ¡Xipanquisaca! Xijsencahuaca se ojli para ipan hualase imotlacajhua tlen mocuepase tlen sequinoc tlaltini. Xijchijchihuaca ojli, xijquixtca nochí tetini. Xijtlalanaca nopa

bandera tlen quiixnextis tlali Israel para nochima quiitaca.

¹¹ TOTECO quintitlantoc itlayolmelajcahua ipan nochim tlaptepactli ica ni tlajtoli, quiijtohua: “Xiquinilhuica israelitame: ‘Xiquitaca, ya huala imo Temaquixtijca huan quihualica miyac regalo tlen ica inmechtlahtlouis.’”

¹² Huan inmechtocaxtise inisraelitame “Tlacame Tlen Tlatzejtzelotlique” huan “Tlacame Tlen TOTECO Quincojtoc para Iaxcahua.” Huan altepetl Jerusalén quitocaxtise “Altepetyl Tlen Nochi Quiixtocaj” huan “Altepetyl Tlen Ayoc Quema Elis Quitlahuelcajtoque.”

63

Totecó quintlatzacuiltis icualancaitacahua

¹ —¿Ajqueya ya tlen huala tlen altepetl Bosra ipan tlali Edom ica iyoyo chichiltic huan yejyectzi? ¿Ajqueya ya tlen moyoyontijtoc queja tlanahuatijquetl huan huala ica tlahuel miyac chicahualistli? Huan se quinanquilá: ‘Naja niDios tlen nicamati xitlahuac. Na niDios tlen nijpiya nochim chicahualistli para nitemaquixtis.’

Huan yajaya quinanquilá:

² —Pero ¿para tlen moyoyo eltoc nelchichiltic queja elisquía xocomeca atl tlen ipan timoquejquetzto?

³ —Eltoc pampa na noselti nitetlatzacuiltijtoc. Queja se tlen iselti moquejquetzqui ipan nopa xocomecatl itlajca, huan axaca quipalehui, nimoquejquetzqui noselti ipan nocualancaitacahua para niquintlatzacuiltis ica nohueyi cualancayo.

Huan inieso nechtzitzicuitzqui ipan nochí noy-
oyo huan yeca eltoc chichiltic.⁴ Pampa ya
ajsic hora para niquincuepilis nocualancaitac-
ahua ipampa nochí tlen quinchihuiliijque notlaca-
jhua huan para niquinmanahuis tlen nopa tlaltini
tlen quintlaijijohuilitáj.⁵ Na nitlachixqui campa
hueli, pero ax nijpanti niyon se tlen quinpale-
huisquía notlacajhua. Huan nelía nimosentlachili
pampa axaca nechpalehui. Huajca na noselti
nimomacuepqui ica inincualancaitacahua notla-
cajhua pampa tlahuel niquincocoliyaya huan nit-
latlanqui ica nochicahualis.⁶ Quena, ica nohueyi
cualancayo nimoquejquetzqui ininpani nopa tla-
came tlen miyac tlaltini tlen ax quineltocaj Toteco
huan niquintzontlamilti. Huan nijchijqui ma
momimiloca huan ma huetzica tlalchi huan ma
toyahuis inieso.

Iteicnelil Toteco para israelitame

⁷ Na nicamatis tlen iteicnelijcayo TOTECO. Ni-
jhueymatis ipampa nochí nopa huejhueyi tla-
mantli tlen techchihuilijtoc tiisraelitame. Tlahuel
miyac techtiochijtoc. Techchihuilijtoc tiisraeli-
tame tlen cuali pampa yajaya techtlasojtla miyac
huan tecnicnelía.⁸ Pampa yajaya quiijto: “Israeli-
tame nelía noconebla. Temachtli ayoc nechcaj-
cayahuase.”

Huan queja nopa yajaya mochijqui
inintemaqueixtijca.⁹ Ipan nochí inintlaijijohuiliis
yajaya nojquiya tlaijijohui, huan yajaya
iselti quinmaquixti queja elisquía nopa
ielhuicac ejca TOTECO tlen moquetza iixpa.
Quinmanahui pampa quinicnelía miyac huan

quintlasojtla, tlaxtlajqui para quincohuilis tlen campa quinpixtoyaj ilpitoque. Yajaya quintlanantoc israelitame ipan ima huan quincuatanantihualajtoc mojmostla queja ipa quichijtihualajtoc hasta huejcajquiya.

¹⁰ Pero israelitame sampa mosisinijke huan quicualancamacaque Itonal Tlen Tlatzejzeloltic. Huan yeca yajaya mochijqui inincualancaitaca huan iselti quintlatzacuili. ¹¹ Huajca yajuanti quilnamijque nopa tonali tlen huejcajquiya quema Moisés tlen eliyaya itlatequipanojca TOTECO, quinquixti israelitame ipan tlali Egipto, huan yeca nopa israelitame ama quijjtohuaj: “¿Canque itztoc ama TOTECO tlen huejcajquiya quinquixti israelitame huan quinpanolti ipan hueyi atl huan quitequihui Moisés queja elisquía inintlamocuitlahuijca? ¿Canque itztoc ama TOTECO tlen quihualtitlanqui Itonal Tlen Tlatzejzeloltic para ma itztoqui tlatlajco itlacajhua? ¹² ¿Canque itztoc ama TOTECO tlen ica nochí ichicahualis quitlapo nopa hueyi atl iniixtla tohuejcapan tatahua quema Moisés momatlalanqui huan ica ya nopa mohueyichijqui para nochipa? ¹³ ¿Canque itztoc ama TOTECO tlen quinpanolti tohuejcapan tatahua ipan nopa ojtlí tlen elqui tlatzintla hueyi atl? Huan pampa TOTECO quinyacanayayaj, ax motepotlamijque, niyon ax huetzque. Itztoyaj queja cahuayos tlen motlalohuaj chicahuac ipan huactoc tlali huan ax motepotlamíaj. ¹⁴ Itonal TOTECO quinsiyajcajqui itlacajhua queja huacaxme tlen tlacuajtinemij ipan tlamayamitl.” Quena, queja nopa TOTECO quinyacanqui itlacajhua huan quichijqui para

nochi tlacame ma quihueyitlepanitaca.

Se tlamajtoli para tlapalehuili

¹⁵ TOTECO, xitechhuatlachili tlen nopano el-huicac campa tiitztoc, campa tijpixtoc mochaj tlen yejyectzi huan tlatzejzeloltic. ¿Canque eltoc motlaicnelil para tojuanti? Huan ¿canque eltoc mochicahualis? ¿Huelis ayoc titechicnelía huan ayoc tijpiya hueyi moyolo ica tojuanti?

¹⁶ Pero melahuac ta tiTotata para nochipa, huan yonque Abraham huan Jacob ayoc techitasquíaj queja tiininconehua, ta tiTOTECO, quena, tiitztosquía tiTotata. Ta tlen hasta huejcajquiya titechcojqui para titechmalakanis campa titlatequipanohuayayaj san tlapic. ¹⁷ TOTECO, ¿para tlen titechcahuilijtoc ma tijcahuaca moojhui? ¿Para tlen titechcahuilijtoc tijpiyase tetic toyolo para ma ax timitzimacasica? Ximocuepa sampa huan xitechpalehuiqui pampa nochi tojuanti tlen timotlatequipanojcahua huan timoaxcahua, tlahuel timitztemohuaj. ¹⁸ ¡Tlahuel pilquentzi tonali tojuanti tlen timoaxcahua timoaxcatijtoyaj altepetl Jerusalén! Huan ama tocualancaitacahua techcuilijque huan quitlamixolejque. ¹⁹ ¿Para tlen titechchihuilía queja elisquía ax timotlacajhua? ¿Para tlen titechchihuilía queja elisquía titlacame tlen sejcoyoc tlen ax quema timitztocaxtijque titoTeco?

64

¹ ¡Cuali elisquía intla tijtlaposquía nopa elhuicactli huan titemosquía! ¡Nochi tepetini temachtli huihuipicasquíaj moixtla! ² Huan mohueyitilis hualasquía queja se tlitl tlen

tlahuel totonic. Quintlatisquía nochí tepetini huan quinmolonaltisquía nochí huejhueyi atemitl hasta huaquisquíaj. Moixtla ta huihuipicasquíaj nochí tlaltini, huan huajca nochí mocualancaitacahua mitzixmatisquíaj para nelía tihueyi.

³ Huejcajquiya quema titemoc, tijchijqui huejhueyi tlamantli tlen temajmati tlen tojuanti ax tijchiyayaya. Huan nochí tepetini mojmolinijque nelchicahuac. ⁴ Pampa hasta quema pejqui ni tlaltepactli, ax quema tijcactoque, niyon ax quema tiquitztoque intla onca seyoc Dios iyoca tlen ta. San ta tlen timopannextia para tiquinpalehuis nochí tlen motemachíaj ipan ta. ⁵ Ta tiquinselía nochí nopa tlacame tlen ica paquelistli quichihuaj tlen xitlahuac huan tlen quitoquilíaj moojhui tlen tlatzejzeloltic.

Pero ta ticualanqui tohuaya pampa tojuanti ax titlatzejzeloltique. Nochi tojuanti senquistoc titlajtlacolchihuani huan tijchijtihualajtoque tlajtacoli ipan nochí toyolis. ¿Huelis noja momaquixtise tlacame queja tojuanti? ⁶ Nochi tojuanti tlahuel tijtlacajtoque ica tlajtlacoli. Huan nochí tlamantli tlen tojuanti tijchihuaj tlen timoilhuíaj xitlahuac, nesi queja se yoyomitl tlen soquiyo huan fiero moixtla hasta tetlaijiyaltia. Nochi tojuanti tiitztoque queja xihuitl tlen pilinij huan huetzij. Huan nochí totlajtlacolhua techtehuía queja elisquía se ajacatl tlen techhuica huejca. ⁷ Pero ama axaca quitzajtzilíá motoca, niyon axaca mitztlajtlanía tlapoipolhuili. Yeca ta timohuejcatlalijtoc tlen tojuanti huan techtemactilijtoc ipan tlajtlacoli.

⁸ Pero TOTECO, ta tiitztoc tiTotata. Tojuanti tiitztoque queja soquitl huan ta se tichachapalchijquetl. Ta titechchijchijqui nochí tojuanti ica moma. ⁹ TOTECO, ax tlahuél xicualani tohuaya, niyon amo xiquilnamicto totlajtlacolhua para nochipa. Xitechtlachili huan xiquilnamiqui para nochí tojuanti timotlacajhua huan timoaxcahua.

¹⁰ Moaltepehwa tlen tlatzejzeloltic ama quintlamixolejtoque. Jerusalén mocajtoc queja huactoc tlali. ¹¹ Nopa tiopamitl tlen yejyectzi huan tlatzejzeloltic campa mitzhueyimatiyayaj tohuejcapan tatahua, quitlamitlatijque. Huan nochí nopa tlamantzitzi yejyectzitzi tlen tlahuél techpactiyaya, quinxolejtoque. ¹² Huan teipa tlen nochí ya ni, TOTECO, ¿noja ax tleno tijchihuas? ¿Titechtlahuelcahuas para nochipa huan tijsenhuiquilis titechtlaijiyhuiltis?

65

TOTECO quintlatzacultis tlen mosisiníaj

¹ TOTECO quijjtohua: “Tlacame tlen ax quema tlatzintocayayaj nopampa na, ama nechtemohuaj. Huan tlen itztoque ipan tlaltini tlen achtohuiya ax nechtemohuayayaj, ama nechtemohuaj. Huan na niquinilhuía nopa tlacame tlen nechnojnotzaj: ‘Xiquitaca, nica niitztoc.’”

² “Nijxitlajtoc noma se tonal para niquinselis notlacajhua, pero yajuanti tlahuél mosisinijtoque ica na. Quitoquilíaj nopa ax cuali ojtli tlen yajuanti quinpectía. Quichihuaj tlen hueli tlamantli tlen ax cuali tlen yajuanti moyolilhuíaj ipan inintlanamiquilis. ³ Se tonal noixtla nechixpanoj pampa

mojmostla quinhueyichihuaj tiotzitzi huan quinnojnotzaj tlen mictoque ipan ininxochi milhua huan nopano temacaj tlacajcahualistli. Quitlatíaj copali inincalpani. ⁴ Huan ica tlayohua yohuij campa campo santo huan campa tlacajcahuaya para quinhueyichihuatij ajacame. Nojquiya quicuaj pitzo nacatl huan sequinoc tlamantli tlacualistli tlen niininTeco ax niquincahuilía quicuase. ⁵ Huan moilhuíaj se ica seyoc: ‘Ximocahua campa tiitztoc, amo xinechnechcahui más, pampa tinechijtlacos, pampa na más nitlatzejzelotic que ta.’ Pero nelía na ayoc niquinijiyohuía pampa mojmostla nechchihuaj ma nicualani más. Itztoque queja tlitl tlen se tonal lementoc huan ipocy o calaqui ipan noyacatzol.

⁶ “Pero ya nijsencajqui tlachque tlatzacuiltli niquinmacas. Eltoc ijcuilijtoc noixtla huan yeca ax nijcahuas san quiaja. Na niquintlaxtlahuis sese yajuanti queja quinamiqui ipampa nochitlen ax cuali quichijtoque. ⁷ Niquintlatzacuiltis ininpampa yajuanti inintlajtlacolhua huan ipampa nochitlajtlacoli tlen quichijque ininhuejcapan tatahua. Yajuanti quitlatijtoque copali para tiotzitzi ipan nochitlajtlacoli para tlachiquili para nechixpanose. Yeca niquintlaxtlahuis ipampa senquistoc nochitlajtlacoli para tlachiquili para nechixpanose. Yeca niquintlaxtlahuis ipampa senquistoc nochitlajtlacoli para tlachiquili para nechixpanose. Queja nopa quiijtoque.” Queja nopa quiijtoque TOTECO.

⁸ Huan nojquiya TOTECO quiijtohua: “Quema tlacame quitequij se quechtli xocomecatl itlajca, huan quiitaj para quipiya se ome tlen cuajcuali, huajca quiijtohuaj: ‘Amo xijmajcahuaca nochipampa quipiya se ome tlen cuajcuali.’ Queja nopa nojquiya nijchihuas ica notlacajhua pampa

tlahuel niquinicnelía. Ax niqintzontlamiltis nochí israelitame pampa nopano inihuaya itztoque sequin tlen temachtli nechtequipanohuaj huan huajca niquinmaquixtis. ⁹ Na nijchihuas ma mocahuaca itztoque se quesqui israelitame [65:9 O iixhuihua Jacob.] para ma moaxcatica nopa tlali Israel. Quena, moaxcatise yajuanti tlen na niqintlapejpenijtoc huan nopano nechtequipanose. ¹⁰ Huan nochí notlacajhua tlen nechtemojoque, sampa quinpiyase inintlapiyahua. Sampa quitemitise nopa tlamayamitl Sarón ica borregojme. Huan nopa tlamayamitl Acor elis se lugar campa quintzacuase inihuacaxhua.

¹¹ “Pero miyac imojuanti innechtlahuelcajtoque na, niimoTECO huan inquitlahuelcajtoque notepe tlen tlatzejzelotic, huan inquitlalijtoque mesa para inquinhueyichihuaj sequinoc tiotzitzí queja tlen inintoca Gad huan Meni. ¹² Huajca na nimechtemactilis para inmiquise ica machete. Inmotlancuaquetzase para inmechquechtzontequise pampa quema nimechnojoatzqui, ax innechnanquilijque, huan quema nimechcamahui, ax inquinejque innechtlaquila. San inquichihuayayaj miyac tlamanli tlen ax cuali yonque nimechtachilijtoc. Huan inquitlapejpeniyayaj inquichihuase tlamanli tlen inquimatiyayaj para na tlahuel nechcualancamacá.”

¹³ Yeca ama niimoTECO Tlen Más Nijpiya Tlanahuatili quej ni niquijtohua: “Imojuanti inmiquise ica mayantli, pero notlatequipanocahua quipiyase inintlacualis hasta mocahuas. Nojquiya quipiyase miyac atl

para quiise, pero imojuanti inamiquise huan ax inquipantise atl. Imojuanti inquipiryase cuesoli huan pinahualistli, pero yajuanti quipiyase paquelistli. ¹⁴ Nojquiya notlatequipanojcahua huicase ica paquelistli, pero imojuanti inchocase huan tlahuatl immocuesose pampa ayoc tlen huelis inquichihuase. ¹⁵ Huan ica imotoca tetelchihuase nepa campa notlacajhua pampa na niimoTECO Tlen Más Nijpiya Tlanahuatili nimechmictis, pero notlatequipanojcahua tlen temachme niquinmacas seyoc inintoca.

¹⁶ “Huan ipan nopa tonali quema tlacame quinequise quitlajtlanise se tlatichihualistli para quimacase seyoc, nechtlahtlanise niimoTeco Dios tlen nitemachtli. O quema quinequise quites-tigojquetzase se tlamatli, tlatestigojquetzase ica na notoca pampa na ayoc nicualanis inihuaya. Huan niquilcahuas nochi nopa tlajtlacoli huan tlaixpanoli tlen quichijque achtohuiya.

Tlatichihuali para israelitame teipa

¹⁷ “Xiquitaca, na nijchijchihuas se yancuic el-huicactli huan se yancuic tlaltepetli. Elise tlahuatl pano yejeectzitz hasta axaca moilhuis tlen nopa elhuicactli huan tlaltepetli tlen el-toya. ¹⁸ Huajca ximopaquilismacaca huan xiyolpaquica para nochipa ipampa tlen nijchihuas, pampa na sampa nijchijchihuas altepetl Jerusalén huan sampa elis se lugar campa senquistoc oncas paquelistli huan nopa tlacame senquistoc yolpaquise. ¹⁹ Huan na nojquiya nimopaquilismacaca ipan altepetl Jerusalén huan ipan notlacajhua.

Huan ayoc quema oncas choquistli, niyon tlaijiyohuclistli.

²⁰ “Nopano ayoc quema miquise conetzitzi tlen sanoc ontlacatij. Huan nochí tlen quiaxitijtose cien xihuítl, ayoc quinitase queja huehuéntzitzí. Pero yajuanti tlen tlajtlacolchihuaj, quena, yajuanti miquise quema aya quipiyaj miyac xihuítl, pampa elise tlatelchihualme. ²¹ Ipan nopa tonali, quema se tlacatl quichijchihuas ichaj, yajaya itztos ipan ichaj para nochipa, pampa ayoc hualase soldados tlen tlaxolehuaj queja achtohuiya. Nojquiya notlacajhua quitocase xocomeca mili, huan yajuanti quicuase itlajca. ²² Ayoc quichijchihuase ininchaj para ipan itztos seyoc, niyon ayoc quitocase xocomecatl para sequinoc quicuase. Ayoc hualase inincualancaitacahua para quintlacuicuilise. Pampa nochí notlacajhua quipiyase se yolistli tlen tlahuél huehueyac queja nopa cuatini tlen más quipiyaj chicahualistli. Huan yajuanti quipiyase nopa paquillistli para quitequihuise nochí tlen quipiyaj ipampa inintequi. ²³ Ax tequitise para tlacuase inincualancaitacahua. Huan ininconebla ayoc tlacatise para sequinoc tlali ehuani quinmictise. Pampa na niininTECO niquintiochihuas nochí nopa tlacame. Huan ininconebla nojquiya elise tlati-ochihualme. ²⁴ Huan na niquinnanquilis notlacajhua hasta quema noja aya nechtzajtziliáj. Huan quema yajuanti noja nechpohuiliaj tlen quinmonequilia, na ya niquinmacas tlen nechtlatlaniáj. ²⁵ Huan nopa tepechichime huan nopa pilborregojtzitzí tlacuase san sejco. Huan leones quicuase sacatl queja se huacax. Huan cohuame

quicuase tlateljpoctli huan ayoc tecocose. Huan ipan nopa tonali ayoc tleno oncas tlen tecocos o tlaxolehuas ipan notepe tlen tlatzejtzeloltic.” Quej ni niquijtohua na niimoTECO.

66

Ihueyitilis TOTECO

¹ Quej ni quijjtohua TOTECO: “Elhuicactli eltoc queja nosiya campa nimosehuía para nitlanahuatlis, huan ni tlaltepactli eltoc campa niquinsiyajcahua noicxihua. Huajca ¿quejatza huelis innechchihuilise se tiopamitl para ipan niitztos huan nimosehuis tlen cuali queja nopa? ² Ica noma nijchijchijqui nochí tlaltepactli huan elhuicactli huan yajuanti noaxcahua. Queja nopa niimoTECO niquijtohua.

“Niquintlasojtla nopa tlacame tlen moechcapantlalíaj huan ax mohueyimatiipan ininyolo, huan tlen huihuipicaj quema quicaquij notlajtol.

³ “Pero nelía teicneltique nochí tlen quitoquilíaj nopa ojtlí tlen yajuanti quinpactíaj huan mopaquilismacaj ica tlajtlacoli pampa yajuanti tlatelchihualme. Ax nijselis inintlacajcahualis. Quema tlajtlacolchijca tlacame quimictíaj se toro ipan notlaixpa niimoTECO, nechcualancamacaqueja quimictisquíaj se tlacatl. Quema quimictíaj se borrego o quihualicaj se tlacajcahualistli tlen harina, nechcualancamacaqueja quimictisquíaj se chichi o quitencahuasquíaj ieso se pitzo ipan notlaixpa. Huan quema quitlatíaj copali, niquita para eltoc fiero queja quihueyichihuasquíaj se teteyotl. ⁴ Huajca na niquintitlanilis miyac

tlamantli tlaijiyohuilistli. Quena, niquintitlanilis nochi tlen yajuanti quiimacasiyayaj. Pampa quema niquinnojnotzqui, ax nechnanquilijque. Huan quema niquincamahui, ax quinejque nechtlacaquilise. San noixtla quisenhuiquilijque quichijque tlen ax cuali. Quena, ica ininpaquilis quitlapejpenijque quichihuase miyac tlamantli tlen na ax nijnequi niquitas.”

TOTECO quincuepas itlacajhua ipan inintlal

⁵ Nochi imojuanti tlen inquiimacasij huan inquitlepanitaj itlajtol TOTECO, xijtlacaquilica tlen yajaya quijtohua: “Yonque inmoicnihua inmechcocolíaj huan inmechhuejcamajcahuaj pampa intechneltocaj, teipa yajuanti mopinahuase. Yonque tlahuel inmechtlaijilhuíaj huan quijtohuaj: ‘Inhuihuitique pampa inquihueyichihuaj TOTECO huan inmopaquismacaj ipan ya’, teipa nochi yajuanti itztose ipan pinahualistli. ⁶ ¿Tlachque onca nopa tlen caquisti ipan ni altepetl Jerusalén? ¿Ajqueya itos nopa tostli tlen temajmatía tlen quisa ipan tiopamitl? Ya nopa notos niimoTECO tlen nimomacuepa ica nocualancaitacahua huan niquintlaxtlahuía queja quinamiqui ica nochi tlen fiero quichijtoque.

⁷ “San se tlalochtli más tlaijiyohuise Jerusalén ehuani. Eltoc queja ipilcone se sihuatl nimantzi tlacati quema aya pehua chicahuac nopa tlacuajcualocayotl. ⁸ ¿Ajqueya quicactoc se hueyi tlamantli quej ni? ¿Ajqueya quiitztoc se tlamantli queja ni? ¿Huelis san ipan se tonal pejtoc se hueyi tlanahuatijcayotl ipan se tlali ica tlen ya

itlanahuatijca? Pero queja nopa elis. Quema Jerusalén sanoc pehuas tlaijiyohuis, ipan san se tlalochtli mochihuas se hueyi tlanahuatijcayotl nopano ipan tlali Israel ica miyac itlaca-jhua tlen quitlepanitase san se inintlanahuatijca.

⁹ ¿Huelis na niquinquicuatlalisquía miyac tlacame para mochihuase se hueyi tlanahuatijcayotl ica inintla huan se inintlanahuatijca, huan teipa ax nijcahuilis ma elica? ¡Axtle, ax nijchihuas! Quej ni quijtohua TOTECO tlen nimoDios.

¹⁰ “Xiyolpaquica ininhuaya Jerusalén ehuani nochí imojuanti tlen inquiicnelíaj nopa altepetl. Xipaquica ihuaya nochí imojuanti tlen achtohuiya inmocuesohuayayaj ipampa ya.

¹¹ Ximopaqulismacaca ipan Jerusalén. Xipaquica ipampa ya queja se acajya paqui ipampa se conetl tlen noja chichi hasta cuali ixhuis.

¹² Na nijchihuas para tlen itztoque ipan altepetl Jerusalén ma quipiyaca miyac tlasehuilistli. Elis queja se atemitl. Huan ininricojo nopa tlacame tlen ax israelitame ajsis ipan nopa altepetl queja miyac atl tlen huetzi chicahuac huan ax moquetza. Huan nijmocuitlahuis Jerusalén huan itlacajhua queja se sihuatl tlen quichichitía iconé, quicuapahuía imaco huan quinajnahua pampa tlahuel quiicnelía.

¹³ Huan nopano ipan altepetl Jerusalén niquinquicuatlalis notlacajhua queja se tenantzi quiyoltlalía ipilcone.”

¹⁴ Huan quema inquiitase para nochí ni tlamantli pano ipan altepetl Jerusalén, tlahuel inpaquise ipan imoyolo. Huan imotlacayohua quipiyase yancuic chicahualistli. Huan nochí tlacame quiitase para TOTECO quinpalehuía itlaca-

jhua ica miyac chicahualistli. Huan nojquiya quiitase ihueyi cualancayo tlen quinextis ica icualancaitacahua.

¹⁵ Xiquitaca, TOTECO hualas ica tlitl huan ica tlatehuijca carros tlen motlalohuaj chicahuac para tetlatzacuiltiqui. Quihualicas tlatzacuiltilistli huan tlitl tlen quinajsis tlacame ica noch i c u a l a n c a y o . ¹⁶ Nochi tlacatl tlen quihuicaj tlajtlacoli iixpa, TOTECO quintlatzacuiltiqui ica tlitl huan ica machete, huan miyac miquise imaco.

¹⁷ TOTECO quiijtohua: “Pero niq quintlamii x polihuiltis ica san se huelta nopa tlacame tlen quiijtohuaj motlapajpacchihuaj pero quichihuaj para quinhueyichihuase tiotzitz iica cuatini ipan xochi mili. Huan quicuaj ininnacayo pitzome, quimichime huan noch i t l a m a n t l i n a c a t l t l e n a x tlapajpactic noixtla.” Queja nopa quiijtohua TOTECO.

¹⁸ Huan TOTECO quiijtohua: “Pampa na niq uitztoc noch i t l e n y a j u a n t i quichihuaj huan nijmati noch i t l e n moyolilhuáj. Yeca na nihualas para niquin sentilis nopa tlacame tlen noch i t l a t t i n i huan tlen camati j noch i t l a m a n t l i t l a j t o l i . Huan niquin h u a l i c a s para ma quitehuía altepetl Jerusalén, huan n o p a n o quiitase nohueyi t ilis huan nohueyi chicahualis. ¹⁹ Na niquin macas tlacame se t l a n e s c a y o t l huan tlen teipa noja mocahuase y o l t o q u e niq quintilanis queja notlayolmelajcahua ipan tlaltini campa hueli ipan tlaltepactli. Yase hasta Tarsis, Fut huan Lidia campa itztoque nopa tlacame tlen tlahuol quiixmati j quitequihuáj cuahuitoli. Nojquiya niquin-

titlanis ipan Tubal, Javán, huan ipan nopa tlaltini tlen mopantíaj huejca campa ax quema quicac-toque tlen na huan campa ax quema quiitz-toque nohueyitilis. Huan yajuanti yase ipan nochí tlaltini para tepohuilitij tlen na nohueyi-tilis huan nochicahualis. ²⁰ Huan yajuanti quin-hualicase nochí imoicnihua tlen itztoque ipan campa hueli tlaltini huan quinhualicase queja se regalo para na niimoTECO. Quinhualicase ipan cahuayos, ipan cuacarros, ipan tlapechtli, ipan mulas huan ipan camellos hasta quinaxitiquij ipan notepe tlatzejtzeloltic tlen eltoc ipan altepetl Jerusalén. Huan yajuanti elise queja se tlacajc-ahualistli tlen harina tlen israelitame quihualicaj ipan notiopa niimoTECO ipan vasos tlen tlatze-jzeloltique.” Queja nopa niimoTECO niquijtohua. ²¹ “Huan sequin tlen yajuanti tlen mocuepase, niquintequitlalis queja totajtzitzi huan levitame. Queja nopa niininTECO niquijtohua.”

²² Nojquiya quijijo: “Huan queja nopa yancuic elhuicactli huan tlapetactli tlen nijchijchihuas mocahuas para nochipa, queja nopa nojquiya para nochipa inmocahuase innotlacajhua imo-juanti huan imoixhuihua. Huan nochí inmechix-matise para nochipa. ²³ Huan tlacame tlen nochí tlaltini hualase ipan sesen tonali para mosiyajc-ahuase huan ipan sese ilhuitl para yancuic met-ztli huan motlancuaquetzase noixtla huan nech-hueyichihuase. Queja nopa niimoTECO niquijto-hua. ²⁴ Huan quema quisase noaltepe quiitase inintlacayohua nopa tlacame tlen mosisinijque ica na. Huan nopa ocuilime tlen quicuase inintla-cayohua ax quema miquise. Huan nopa tlitl tlen

ISAÍAS 66:24

ccxxii

ISAÍAS 66:24

quintlatis ax quema sehuis. Huan nelía quintlai-
jiyaltise nochí tlacame ipan nochí tlaltepactli.”

**Itlajtol toteco: Santa Biblia
Bible without Deuterocanon in Nahuatl, Huasteca
Oriental (MX:nheBI:Nahuatl, Huasteca Oriental)**

copyright © 2005 Wycliffe Bible Translators, Inc.

Language: Nahuatl, Huasteca Oriental

Dialect: Huasteca Oriental

Translation by: Wycliffe Bible Translators, Inc.

Náhuatl, Huasteca Oriental [nhe], Mexico

Copyright Information

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Huasteca Oriental

© 2005, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

6e359f6d-e93f-5d56-819d-a3feae810a1b